

Ja øgyajpxy ja ømyadya'aky midi xuk-
paajtimp ja nitso'ok'ajtín

Tlahuitoltepec Mixe New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MATEO	4
MARCOS	41
LUCAS	66
JUAN	104
HECHOS	133
ROMANOS.....	169
1 CORINTIOS	184
2 CORINTIOS	199
GÁLATAS	208
EFESIOS	214
FILIPENSES.....	219
COLOSENSES	223
1 TESALONICENSES	227
2 TESALONICENSES	231
1 TIMOTEO.....	233
2 TIMOTEO.....	237
TITO	240
FILEMÓN	242
HEBREOS.....	243
SANTIAGO	253
1 PEDRO	257
2 PEDRO	262
1 JUAN	265
2 JUAN	269
3 JUAN	270
JUDAS.....	271
APOCALIPSIS	273

MATEO

Ja Jesucristo tyeety'aptøjik

1 Ja' idø'øn ja yiknajtškajpxip pøn jaty ja nwind-søn'ajtim Jesucristo tyeety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti. ³ Ja Judá møøt ja ñidø'øxy Tamar ja'ats t'unã'jk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram. ⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón. ⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isaí. ⁶ Jøts ja Isaí t'u'nk'aty ja rey David, jøts ja rey David møøt ja tø'øxyøjik midi ja Urías wyinaty tø t'atsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa. ⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías. ⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acáz, jøts ja Acáz t'u'ngi ja Ezequías. ¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías. ¹¹ Jøts ja Josías t'unã'jk'aty ja Jeconías, namay ja'adi møøt y'uch myigu'ukti. Winet ets ja israelit jaã'y idø'øn yiknajtswã'wigyøjxtøø jam jaduk'upki etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk'at'atp Salatiel, jøts ja Salatiel ja Zorobabel ja y'u'ngip. ¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor. ¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud. ¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob. ¹⁶ Jøts ja Jacob t'u'ngi ja José midi tñidø'øxy'ajtp ja María midi tyaagip ja nwind-søn'ajtim Jesús, ja Cristo midi yiknitsokp.

¹⁷ Makmajkts najtska'axits idø'øn ja tpaajty ku ja cho'ondã'aky Abraham ñikøjxp jøts ja ttamigugøxi ja David. David ñikøjxpts jaduk'at'atp cho'ondã'aky jøts ja jaduk jade'en ñajtska'axidyøø kunim ja israelit jaã'y yikwãanøjxxtøø aguwan'ampy jam Babilonia. Winet-nimts jaduk'at'atp cho'ondã'aky, ja'ats najtska'axidøø jaduk jade'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'øn y'ejxi tyyi sa jaty yjajty kyubejty ku nwind-søn'ajtim Jesucristo ojts kyaxi'iky: Ja María midi tyaagip, ja' idø'øn wyinaty najts'awan'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tñikøjxp'ajtni ja mutsk, Dios idø'øn ja tuujnip jøts ja Espiritu Santo myøk'ajtin jade'en tyik-majadã'aky. ¹⁹ Øy yikxonts ja José yjaã'y'aty midi idø'øn ñiyãã'y'ajtpy, ka'ap ja pøn sa tjadyimñøjmi jøts ja María kyayikpøky'ext; myajtsu'utwampy ja' jøts ja ka'ap pøn ttuknijawiwya'ãñ. ²⁰ Ixam idø'øn ja wyinaty jade'en wyinmay ku ja ojts agumãã'y'ampy tyuk'ijxyi ja Dios y'ankilis jøts ja ojts ñiimxyi:

—José, metsxi mdeety'amøjip ja David, kidits md-sø'øgi, møøt amajtski yø María. Yikaxø'økwapmy mutsk'u'nk'at'atp, Dios y'Espiritu Santo jade'en myøk'ajtin tyikwingaxø'økp. ²¹ Mixyu'nk'at'atp ja yikaxø'økp, ja'ats meets ja xyøøw mbiktaajkip JESÚS. Jade'en'ampy idø'øn ja jade'en txøøw'att ja'agøjxp ku ja pojkpitumbi jaã'y ja ttuknitso'ok'att ja pyøky.

²² Tyimyjajt tyimgyubajts idø'øn ja jade'en sa nwind-søn'ajtim Dios wyinaty tø tyikwã'ãñ ja kyugajpxy ku ja wyããñ:

²³ Jøtpyip tu'uk ja kiixye'dø'øxy midi amaay tsinaapy, yikaxø'økpts ja tu'uk myajnk'u'nk, Emanuel ja xyøøw'atp, midi ayuujk pidsømp: Dios adøøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduun sa Dios y'ankilis ja wyinaty tø y'ane'emyiyi, jøts ja ojts tñidø'øxpyiky ja María. ²⁵ Jøts idø'øn ja ka'ap jade'en tmøøtsøøniniim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txødijy JESÚS.

Ku ja wijyjaã'y ojts t'ats'ejxti ja maxu'nk Jesús

2 Jam ja Jesús ojts kye'exy Belén, jam kajpjtøp midi Judeit etjotp, ja Herodes idø'øn jam wyinaty nwind-søn'ajtp, ja' wyinaty tuki'iyi tñitanaapy ja ñãajx jøts ja kajp. Xjats jam Jerusalén yja'attøø winãagin wijyjaã'y'aty midi tsoo'ndip xøøbidsimy, ² ja'ats jam ojts tyiknidøwididi, yide'en ja wyandøø:

—¿Mã dø'øn ja tø kye'exy ja' pøn tñiwindsøn'atp ja yã'it israelit jaã'y? Tøts øøts ja n'ejxpajti ja myãadsã' mã øø tø ndsøøñ, ixyats øøts ja tø ñniniim jøts øøts ja nwind-sø'øgiwyã'ãñ.

³ Kuts ja windsøn Herodes ja ojts jade'en tñimadøø jøts ja tyatøjkiyi ja jotmay, nayide'en niduki'iyi ja

naty tø yik'ixy, ku ja wyinaty tø jadigojk yjukpyiky.

¹⁵ Yide'en ja yiknimaadyøø:

—Niyø'øyigyøxti naxwii'ñit, jøts ja øgyajpxy jøts ja ømyadya'aky xkajpxwə'kxtit mə jaty ja jaa'y yjuky'atti.

¹⁶ Pøni pøn øts xjanchja'wip jøts pøni pøn nøbajtp, ja' nøjx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky. ¹⁷ Ja jaa'y pøn øts xjanchja'widip, yide'en idø'on ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'; ¹⁸ pøni ayo'ombattip ja', pøni tsu'utsidip ja' ja tsaa'ñ adsu'jky, jøts pøni y'uuktip ja veneni ja', ka'ap idø'on ja sə yjattit; jøts nayide'en ku pamaa'y ja ja'ayi tkønixajtit, jaty ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajpjøtpy yikpatøkiyi, jøts ja tpuwa'jtsiyii'ñ aga'ngyø'ampy. ²⁰ Xjats ja pyabøjkpitøjk choo'ndøø, jøts ja ojts tkajpxwə'kxti ja øgyajpxy ja ømyadya'aky øy mədsoo. Ja nwind-søn'ajtim Jesucristo ja kø'øm pudøjkiyidip, jøts nay ja Jesús ja tmøøy ja myøk'ajtin jøts ja ttu'undit jade'en midi nipøn jaa'y yə naxwiiñ kyajajtpy, paty ja mayjaa'y ja tjanchja'widi dø'on ja pyabøjkpitøjk ja kyajpxy. Jade'en idø'on ja y'ejxi.

LUCAS

Ja Teófilo ya'at yiktaniija'ayi

1 Migu'uk Teófilo, may ja jaa'y tɔ tjaadyanwa'andi tyimjade'en ja madya'aky sam ɔɔts ja nmigu'uk tɔ t'ejxti pɔn ja Jesús kyudanaadyip. Nayide'en sam ɔɔts ja tɔ nyiktuk'ejxyin, sam ɔɔts ja tɔ n'ixpikyin, jade'ents ja tjaja'wa'andi pɔn jaty t'ejxtɔɔ tniija'widɔɔ sɔ jaty cho'ondaajky. Ja'ats tɔ pyudokiyidi jɔts ja ɔgyajpxy ɔmyadya'aky ja tkajpxwa'kxiti. Nay tɔts ɔts ja nbemuky ngonmuky ti jaty tuujnɔɔ ku ya'at ɔgyajpxy ɔmyadya'aky cho'ondaajky. Ixyamts mets ja jade'en ndyimdyanijayi, jɔts wa'ats xnijawit ja tiy'ajtín, sɔ jaty tɔ myiknɔjmi ku ja tɔ myiktukmadɔy yɔ'ɔbi ixpɔjkin.

Ku ja ankilis tnigajpxy jɔts ku ja Juan Bautista kyaxɔ'ɔkwɔ'añ

⁵ Ixyam idɔ'ɔn cho'onda'aky ja madya'aky. Ku dɔ'ɔn ja Herodes wyinaty rey'aty jam Judea, jamts ja teety wyinaty tu'uk chɔɔni pɔn txɔɔw'ajtp Zacarías, ja' y'ijty mɔɔt tyuñ tukpiky ja teetyɔjktí pɔn yiktejp Abías. Elisabet ja ñidɔ'ɔxy xyɔɔw, teety Aarón ja tyeety'ap'ajtmip. ⁶ Janch ɔy jaa'y idɔ'ɔn ja amajtskti, pyaduujnidip idɔ'ɔn Dios kyutujk ja' pɔni ti ja yikta'ana'amdip. Jade'ents ja ka'ap pɔn sɔ ñi'mxyidi, jade'en ja ka'ap pɔn pyɔky'ijxyidi. ⁷ Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyjaa'ñidi ja namajtsk wyinaty.

⁸ Xjats tuk'ojk ja Zacarías yjaa'y tyaja'jtídɔɔ jɔts ja ttuujnidit ja windsɔ'jkin ja Dios. ⁹ Jade'en idɔ'ɔn ja tkostumbri'atti ku ja teetyɔjk ja jade'en tyaja'adyidi, winets ja tniwɔjti pɔn jap uktɔkip jap mɔ ja Dios yikwindsɔ'ɔgi, mɔ poom tyɔy. Xjats Zacarías ja ojts tyimdyaja'adyi, ja' ja poom ojts tyiktɔy. ¹⁰ Exam ja poom wyinaty jade'en tyɔy, jɔts niduki'iyi ja mayjaa'y ixap yjanchapajpxmídi jap tsaptɔjkwimpy. ¹¹ Winets ja Zacarías t'ejxpaajty tu'uk ja Dios y'ankilis jɔts ku ja jap aga'ñ'ampy tyani mɔ ja poom yikpikta'aky. ¹² Ku Zacarías ja ojts jade'en t'ejxpaaty, ni sudso'ampy ja kya'ukwinmɔn'nyatni, tsɔ'ɔgi ja janchyik'o'jkníyip.

¹³ Xjats ja ankilis ja ñimɔajyɔɔ:

—Zacarías, kidi mdsɔ'ɔgi, tɔ Dios mgajpxaajkin mmado'oxiyi jɔts pyaajtp mnidɔ'ɔxy Elisabet tu'uk ja mutsku'nk. Mbaajtip m'u'nk tu'uk, Juan ja mdukwɔw'attip. ¹⁴ Mdaxonda'akp ja' mdajotkujk'atp ja', jɔts may ja jaa'y ja nayide'en ttajotkujk'attit ku ja kyaxɔ'ɔkt. ¹⁵ Ja'ats mɔk nɔjxk ja kunuu'kxin tmɔɔt'aty jam Dios wyingujkp. Niwine'enin ja nɔɔ ja tkatunk'att, ka'ap ja y'amu'ukyaa'y'att. Jaayip ja Espiritu Santo

tyuktatɔjkníyí ja wyinmɔa'ñ yam ja ka'anim myiñ naxwiiñ. ¹⁶ Ja'ats ja Israelit jaa'y tyukja'myatsp tyukja'byaatp ja Dios Teety jadigojk. ¹⁷ Jawyeen ja Juan mye'ent, jaanimts ja nwindson'ajtim mye'ent. Nayide'en winmɔa'ñ nayide'en kutujk ja tmime'ent sɔm ja Dios kyugajpxy, ja Elias'ajtpi. Jade'ents ja u'nkteety u'nktaak ja tyikjotimbett, jɔts ka' ti tsep niti aki mɔɔt chɔɔnidit y'u'nkti y'unaj'jkí, jɔts ñayikmado'op ja' pɔn kidyimydoodip. Jade'ents ja tyiktɔjktí tyiktuudaajkit ja jaa'y wyinmɔa'ñ jɔts ja tjɔp'ejxtit ja nwindson'ajtim.

¹⁸ Jade'en ja Zacarías yiknimɔaay, xjats ja ankilis ja t'amidɔɔy:

—¿Sudso'ampy ɔts ya'at ndajotkujk'att jɔts ku yɔ tyi janch, pɔ tum mɔjaa'ñits ɔɔts amajtsk?

¹⁹ Xjats ankilis ja y'adsojɔɔ:

—Gabriel'ajtp ɔts, jɔts Dios ɔ nmidumpy; ja' ɔts idɔ'ɔn tɔ xkexy jɔts mets ya'at aaw ayuujk ndukmado'ot. ²⁰ Jabi ka'apxi jaty tɔ xmibiky sɔ me tɔ nnɔjmi, tɔnts inet uum, jaanim me mgajpxt ku ja m'u'nk kya'axt. Jajtp kubatp idɔ'ɔn ya'at jade'en sɔ ɔ tɔ nwa'añ.

²¹ Exam idɔ'ɔn mayjaa'y t'awejxti ja Zacarías, maadyip tajtp ja jap ku ja jadine'en ty'a'ñini jeky jap tsaptɔjktɔpy. ²² Xjats ku ja pyidsimy, ka'ap y'aaw y'ayuujk ja t'ukyajkni, jɔts ja tyimyjaty tja'gyukidɔɔ kudamik ja wyinaty tɔ y'ejxɔɔxy y'ejxma'aty jap tsaptɔjktɔpy. Nugo ja ja'ayi tñidoni, tɔyi ja wyinaty y'uu'mni.

²³ Kuts xyɔɔw ja ojts tyika'pxy winɔak xɔɔw ja wyinaty tɔ yiktaguwani t'adsɔɔnit ja tsaptɔjk, winets ja ñɔjkní tyigam. ²⁴ Jɔts ja ñidɔ'ɔxy Elisabet ja nay jaty yjɔtp'ajtni ku ja et ja xɔɔw jade'en y'uknajxy, magoxk po' ja y'ijty jap tyɔjktɔpy jadine'en ja kya'ukpidsomni. Yide'en ja wyinmay jɔts ja wya'añ: ²⁵ “Ja'agɔjxɔp Dios tɔ ttuñ ja may'ajt jɔts ɔts ja jaa'y xka'ukmi'ajkníyit.”

Ku ja ankilis tnigajpxy jɔts ku ja Jesús kyaxɔ'ɔkwɔ'añ

²⁶ Xjats ja Dios kidudujk po' tkejxy ja y'ankilis Gabriel jam Galileit naxjotp mɔ ja kajp txɔɔw'aty Nazaret, ²⁷ jɔts ja t'ats'ext ja tɔ'ɔxyɔjk pɔn txɔɔw'ajtp María, ɔy yikxon ja yjaa'y'aty. Niwɔ'añ ja wyinaty y'ejtí jɔts ja tmɔɔt'amajtskit tu'uk ja yaa'dyɔjk mídi txɔɔw'ajtp José, ja rey David y'aptatsk. ²⁸ Xjats idɔ'ɔn ankilis ja jam tñidɔjkiyíñ mɔ ja jam wyinaty chɔɔni jɔts ja tñimɔaay:

—¿Dios kɔjxp ngajpxpɔ'okxy, tɔ ja mmay'atyiyi! Ixa mets ja nwindson'ajtim mɔɔt m'ejtni; tɔ ja Dios njanty-imgyunuu'kxyi ku nadyu'uk tɔ myik'a'ejxi wine'enin mdɔ'ɔxyɔjk'attí naxwiiñ.

Jam ja Espíritu Santo ja wyinaty tmøødi, ²⁶ jøts tø ja wyinaty twandä'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'ookt. ²⁷ Xjats ja winet ñijkxy tsaptøjkjotp, ja Espíritu Santo ja yiknøjkxip; kuts ja maxu'nk Jesús jam wyinaty ja tyeety tyaak tø yiknijkxyi jøts ja jade'en tpadundi ja kutujk, ²⁸ jøts Simeón ja jam tnixajiyi'ñ kyø'køjxp jøts ja tsaa'ñ'ijty, jøts Dios ja ojts ttukmøjawi ttukunuu'kxy-jawi, yide'en ja wyaañ:

²⁹ Dios Teety, tøts inet, wan øts inet jotkujk t'oo'kni. Tø xpaduñ ja m'ayuujk sã ø xnimaay.

³⁰ Tønim ø nwemp'ixy ja yiknitsokpi

³¹ midi tø xanibiktaagi ja ñaxwii'ñit jaa'y.

³² Yø' idø'on tu'ump ja may'ajtin jøts ja jaa'y mja'my-atstot mja'byaadit pøn ka' y'Israelitjaa'yidi.

Yø'øgøjxp idø'on yik'ejkaptit ja Israelit kajp midi tø xwi'ixy.

³³ Xjats ja José janchñigyumaap yjajtøø møøt ja ñidø'oxy ku Simeón ja mutsk jade'en tnigajpxy.

³⁴ Winets Simeón ja kyunuu'kxmyigajpxidøø. Yikajxaktip ja' jøts ja María yiknimaay, ja Jesús tyaak:

—Ejx madow, ja' yø mixyu'nk tø yiktanibiktaagi jøts Dios Teety y'ø'ajtin ttukpaajit may ja Israelit jaa'y. Nay mayts ja tkapaattit ku jaa'y yø may kyagupøkit.

³⁵ Jade'ents idø'on ja yiknijawit sã pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

³⁶ Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'aadsidip kyugojdip. Møjaa'tyigøynits idø'on ja'. Tyimy'una'jkyi ja y'amajtskiyi'ñ jøts ja ja'ayi wixujk jumøjtyi tmøøtsinaay ja ñiyaa'y. ³⁷ Makta'pxy myaktax jumøjts ja wyinaty, jøts ejtpts idø'on ja jap tsaptøjkjotpy tmiduñ ja Dios xinaxy tsunaxy, y'amaay'ajtpy idø'on ja', ka'ap ja tkugayi tku'uugi, ejtp Dios ja t'ajot'aty. ³⁸ Ja Ana dø'on jap ojts myiñ winet, jøts ku Dios ja ojts ja t'uktukmø-jawi t'uktukunuu'kxyjawi, winets ja tnigajpxøjkiyi'ñ ja mixy Jesús. Ja' ja tyukmadøøpy pøn jaty wyinaty tjøp'e-jxtip jøts ku ja Jerusaléngit jaa'y ñitso'ok'attit.

Ku ja wyimbettøø yjattøø jadigojk Nazaret

³⁹ Xjats ja wyimbejtndøø ñøjkxnidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk. ⁴⁰ Jøts idø'on ja mixyu'nk jam jade'en yeeky, møj møjjaaw, wijy kejy. Dios ja amuum jantymkyunuu'kxyip.

Ku ja mixy Jesús yikpaaty jam tsaptøjkjotp

⁴¹ Xumi nøjxxtipts idø'on ja tyeety tyaak jam Jerusalén winjumøjt ku ja paški xøøw jam tpaaty. ⁴² Jøts ku ja Jesús yjumøjt wyinaty makmajtskni, winets ja ojts ñøjkxti niduki'iyi Jerusalén, jøts ja xøøw ja t'anøjkxidi kumi jade'en ja kostumbri. ⁴³ Xjats ku ja wyimbejtndøø xøøguixy, winets ja mixy Jesús jamyi tyaanaa Jerusalén, ka'ap ja José ja tkumaydi. ⁴⁴ Jade'en ja wyinmaydi, jam ja tijy pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayik-

tøødøø tjayik'amidoodøø ja myigu'uktøjkti pøn jaty ja møøt ñay'ijxy'atyidi, ⁴⁵ nima ja tkapattøø. Xjats ja tniwimbejtøø jadigojk Jerusalén jøts ja jam t'ix-aadyøjkidøø.

⁴⁶ Kidigøøk xøønim ja tpattøø, jamdamik ja wyinaty tsaptøjkjotp chøøni jam may kyajpxwejpi y'agujkp, jamik ja pyatmadøy jøts ja jam t'amidøy tyiktiy tyik-tu'ugi. ⁴⁷ Jøts ku ja jaa'y ja jade'en tmadoodøø, ñigyumaap ja tyimyjaa'widøø ku ja amwijy tsaachwijy, jøts ku ja tij yanch y'adsøy. ⁴⁸ Xjats ku ja tyeety tyaak ojts y'ijxyi, ñigyumaap ja tyimyjaa'widøø jøts ja tyaak ojts ñi'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjantyimyikjotmadyøki wine'enin øøts ixa njawidity, mjayik'ixaa'y.

⁴⁹ Xjats ja Jesús y'adsøøy jøts ja wyaañ:

—¿Tiku ø x'ixaa'adi? ¿Ti kidi xnijawidi ku øts nDeety yja' nduujniyit?

⁵⁰ Niwine'enin ja tkaja'gyukidøø ku ja jade'en ñi-maajyidøø.

⁵¹ Xjanimts ja tmøødidøø Nazaret, etpts idø'on ja myimadøyidi jøts ja tyaak nugo tja'myats'ijty sã yjajty.

⁵² Yaak'adøtspts ja Jesús, wej'adøtsp kaj'adøtsp ja'. Jade'ents Dios ja tyajotkujk'aty ku ja jade'en y'ijxyi, jøts myigu'uk nayide'en yjotkujk'atti.

Ku ja Juan Bautista kyajpxwa'kxy abak etjotp

3 Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisaniás jam Abilinia wyindsøn'aty. ² Ja Anás møøt ja Caifás ja' idø'on wyinaty møjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'ø'ayuujk jam abak etjotp. ³ Xjats ja ojts t'ayø'ø'y'abidsimy ja et jam møj nøøba'am midi txøøw'ajtp Jordán, jøts ja jaa'y ttukmadøy jøts ku ja ñø-battit, jøts ja tyiktø'ødit tyiktuudaa'aktit ja wyinmaa'ñ, wan tyiktigatsti ja chinaa'yindi winets ja yikpojkipi-maa'kxtit. ⁴ Xjats ja jade'en yjanchtuuñøø yjanchjajttøø sã ja Dios kyugajpxy Isaías wyinaty tø tjaadyañ ja ayuujk ku ja wya'aañ:

Paty ja kugajpxy ñøjkxt jawyeen jam abak etjotp jøts ja myigu'uk ja tnøjmit møk'ampy:

“Awejxidi ja Dios y'ixpøjkin, yiktøwdi yiktuudaa'akti ja mwinnmaa'ñ yikxon.

⁵ Pønts ja kya'ukupøkp wan ja tyimyjapøni, ni'ijtyi ja tum jade'en tkupøkt.

Yik'øyip yiktuudaa'akp ja' winmaa'ñ ku wyinaty pøn-jabøn tø wyinmaama'aty.

⁶ Jade'ents ja ñaxwii'ñit jaa'y ni'ijtyi t'ejxtit sã dø'on ja Dios tyaky ja nitso'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøbatt, jøts ja tnimaay:

—¡Mee miku! ¿Pøn mee tø mñi'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets yã nøbajtpi tø mmiñ? ⁸ Yikxon idø'on mjaa'y'attit, wan idø'on tyik'ijxy jøts ku ja mdsinaa'yin tø xyikti-

gatsti. Kidi mee kə'omyi mnawya'añiyi: "Tixi ka'ap ti chəkyi, kumi ja Abraham adəm n'apteety'aməj'aj-tyindip"; jəts ka'ats yjade'eni, ti Dios kamaajyip, əy ja pən ttukmigu'uk'att ja Abraham pəni pən ja kə'əm y'a'ejxip. ⁹Jəts tsojk ja nəjxk yiktəidyuñ pən jaty tkami'əy'ajtip ja Dios.

¹⁰Xjats ja mayjaə'y ja yiktəjəjə y'amidojəjə:

—Zti əjə ndu'ump? ZSudso'ampy əjə nwinmaə'n-byaətt?

¹¹Jəts ja Juan y'adsojimbijty:

—Pəni pən ja pyikta'əky, pəni pən ja yjujky'ajtin may'ampy tjagyajtip, wants ja tmo'odi kujkwa'kxy pən niti kidyimy'ejtixidip; pənts ja kyaajyk yjə'kxik jam, wan ja nayide'en məət tjə'kxwə'kxtit pən ja kyaajyk y'uujkik kidyimy'ejtixidip.

¹²Winets ja yikugubajtpidi myemidi jam nəbajtpi, jəts ja Juan yik'amidəjə:

—Windsən, jəts əjə, zti əjə ndu'ump?

¹³Jəts ja Juan ja y'adsojəjə:

—Kidi kugujuu'ñ ne'egi ne'egi x'amidowdi, ja'ayi də'ən mbadu'undip sə kyutukyi.

¹⁴Jəts ja tseptumbidi winəəgin tyiktəmidəjə:

—Zjətsimts əjəts, ti əjə ndumip?

Xjats ja t'adsəjə:

—Kidi pən o ti xpəjxixidi aguwanikəjxp, kidi pən o ti xanəəybyatti; tajotkuk'atti ja mmijuu'ndyi.

¹⁵Ixjam idə'ən ja mayjaə'y wyinaty y'awejxy, ja' ja tyajotkukiwyəndip, yide'en idə'ən ja wyinmxydi jəts ku ja Juan ja' idə'ən Cristo. ¹⁶Jəts ja Juan ojts tñigajpxy, ttukmadəjə ja mayjaə'y:

—Tiy janch ixym ndyimdyukmadowdi jəts ku əts yə'əyi tə nnimiñ jəts meets ja nəə nduktanəbattit; jats ə tu'uk ix'oojk xpamiñ pən meets ja Espiritu Santo mduktatəkiyip, jəts ja' tmime'ent ja tidiyu'unin.

Mək'ampy kutujk ja tmimiñ, nija'baət ə xkapaət'aty jəts əts ja nugo nwinəxt. ¹⁷Jade'en ja ttu'unt ja nəxwi-i'ñit jaə'y səm ariin yikwigumyın. Abiky ja tpiktəajkit ja y'ək jəts ja tniətəy ja jəən midi nijuuni kape'tsp, jəts ja ariinbajk abiky yikpəjə'əkt, jade'ents idə'ən ja jaə'y yiktu'undit səm pənjəbən tmi'əy'aty tkami'əy'aty ja Dios.

¹⁸Jade'en idə'ən ja Juan ja t'ana'amın'aty, jade'ents ja ttukmadəjə ja mayjaə'y ja əgyajpxy ja əy'ayuujk.

¹⁹Ñayi wyingugajpxiyi'ñ ja mək ja windsən Herodes ku ja tniətəxy'aty ja Herodias, ja myiga'axy Felipe ja ñidə'əxy, jəts ñayi tyamigajpx ja' sə jaty ja jam wyinaty tyundigəy; ²⁰xjats ja Herodes ka'ap ja tməjpikta'əky, jaəkyimdyundigəjə ja', ojts Juan ja tyikpuxəktəki.

Ku ja Jesús ñəbety

²¹Ku ja Juan wyinaty ka'anım yiktsumy, ku ja jam tyiknəbejty ja mayjaə'y, winets ja Jesús jam ñəbajtməjə; ixjam ja wyinaty Dios'ajot'aty ku ja tsajp y'awaəjch ²²jəts ja Espiritu Santo ja jade'en ñigida'əgyi ejxim tsapak, wə'əts ja yik'ijxy, winets ja Dios Teety y'ayuujk yikmadəjə, yide'en ja jap tsajpətpy wya'əñ:

—Əts me n'U'nk'ajtpy; ndsəky'ajtpy mets jəts njantyajotkujk'ajtpy mets.

Ja jaə'dyi pən jaty ja Jesús tyeety'apip

²³Ee'pxmajkin ja Jesús wyinaty ja yjuməjt ku ja tyunk ja tjəpwə'jkijiyi'ñ. Nəmdip idə'ən jəts ku ja teedyi ja José. Jəts ja José tteety'aty ja Elí, ²⁴jəts ja' ja Matat, jəts ja Matat ja Leví. Jade'en ñabyayə'əyi Leví ja Melqui, Melqui ja Jana, Jana ja José, ²⁵José ja Matatías, Matatías ja Amós, Amós ja Nahum, Nahum ja Esli, Esli ja Nagai, ²⁶Nagai ja Maat, Maat ja Matatías, Matatías ja Semei, Semei ja José, José ja Judá, ²⁷Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri, ²⁸Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er, ²⁹Er ja Josué, Josué ja Eliezer, Eliezer ja Jorim, Jorim ja Matat, ³⁰Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim, ³¹Eliaquim ja Melea, Melea ja Mainán, Mainán ja Matata, Matata ja Natán, ³²Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón, ³³Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá, ³⁴Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor, ³⁵Nacor ja Serug, Serug ja Ragau, Ragau ja Peleg, Peleg ja Heber, Heber ja Sala, ³⁶Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec, ³⁷Lamec ja Musalén, Musalén ja Enoc, Enoc ja Jared, Jared ja Mahalaleel, Mahalaleel ja Cainán, ³⁸Cainán ja Enós, Enós ja Set, jəts Set tteedyi ja Adán, jəts ja Adán ja Dios Teety.

Ku ja Jesús ja miku' tyaguwaniyi jəts ja yikpəkyun-wə'əñi

4 Xjats ja Jesús wyimbijty jam Jordangit nəə agə'əm. Tə ja Espiritu Santo ja tyatəjkiniyi jəts ja jam yiknəjxəjə tə'əts etjotp mə niti kya'ity. ²Jamts ja ojts chəəni wixijxxyəw jəts ja miku' ja jam yjot'e-jxwə'əñi. Niti ja tkajiyi'kxy jadine'en jətsnim ja pyəajtəjə ja yuu. ³Winets ja miku' ja ñimaajyəjə:

—Pəni janch ku me mjanchDios U'ngi yik'əyi yə tsəə tsapkaaky.

⁴Jəts ja Jesús t'adsojimbijty:

—Yide'en jap nəkyijxpy wya'əñ: "Kuuyi Dios kyajpxy məj, kidi ja'ayip ja nəxwii'ñit jaə'y nugo tyajujky'ajttip ti jaty yikjə'ə'kxp."

⁵Xjats ja miku' ja ojts wyaəniyxxy jam məj kojpkəjxp, jəts ja jam tyuk'əjxəjə wine'enin ja kajp nəxwii'ñ.

⁶Yide'en ja miku' ñimaajyəjə:

—Nməgyəxp mets ya'ət tuki'iyi wine'en əts yə kajp nniatani ja məj ja mutsk. Jade'en əts yə tə nyikmə'əy, əyts əts yə pən ndyimy'ot pəni pən əts yə nmo'owampy. ⁷Pəni xwinguxanaapy əts jəts ə xwind-sə'əgət, winets mets yə tuki'iyi xja'ajtkəxt.

⁸Xjats ja Jesús t'adsəjə:

—Miku' jiwə'ək. Kidi əts yə xwin'ixy, pə yide'ents ja Dios kyajpxy wya'əñ: "Ja Dios Teety tu'ugyi mwind-sə'əgip, ja' tu'ugyi mduujnip ja yja' pəni sə ja wya'əñ."

⁹ Xjats ja miku' ja wyaanøjkxkojmiyøø jam Jerusaléngit kajpkøjxp jøts ja tsaptøjkøjxp yikpajtiyøø, jøts ja ñimaajyøø:

—Pøni janch Dios U'nk mets, katswoon ya; ¹⁰ pø nømpxi Dios kyajpxy jøts ku ja tnøjmit ja y'ankilis jøts me myik'ejx'ett, jøts ku me ka'ap ti mjatit. ¹¹ Mets ja mdsa'anjø'øgit jøts mdeky ja tsaa kyakumit kyayo'od-sit.

¹² Xjats ja Jesús t'adsøøy:

—Janch nayide'ents ja Dios kyajpxy wya'añ: "Kidi mDios xjot'ixy."

¹³ Jade'ents ja miku' nisudso'ampy kya'ukwinmaa'n-byatnaa sa ja tjaakjot'ejxkojt ja Jesús, jøtsnim ja jade'en ñimajststuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'on ja jaa'y wyinaty y'aawidip y'ayuujkidip o madsøo. ¹⁵ Yats ja yik'ixpiky ma jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajpjotp

¹⁶ Jøts ja ojts ñijkxy Nazaret, jam kojpkøjxp ma ja wyinaty tø myutsk'aty. Poo'kxin xøøw wyinaty ku ja tyøjkiyi'ñ jam tsaptøjkjotp, jade'en idø'on ja tkostum-bri'aty, xjats ja tmiwa'kukiyi'ñ ja Dios kyajpxy jøts ja tkajpxy. ¹⁷ Ja nøky ja wyinaty tø yikømo'øy midy ja Dios kyugajpxy Isaías yjaay; jøts ku ja ojts t'agihbyaky, ja' ja jap pyaajt ma jap wyinaty yide'en kyøxa'ayi:

¹⁸ Dios Teety øts ja y'Espíritu Santo xpudøjkp, ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øgyajpxy ja øy'ayuujk; ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip, jøts øts ja nyik'awa'atspidsø'ømdit pøn jade'en ejt-nidip sam tsumy jaa'yindi, jøts øts ja nyikwin'ejxwa'kxtit pøn wimbeets kugoots ejttip; jøts øts ja nyik'awa'atspidsø'ømdit pøn øy sagasa yik-tundip;

¹⁹ Jøts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agihmyujky ja nøky, jøts ja ojts tkømo'øy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujtniyi. ²¹ Xjats ja kyajpxøjkiyi'ñ jøts ja wyaañ:

—Ixymts idø'on yø jade'en tø yjaty tø kyubety mee mwingujky sa ja Dios kyajpxy wya'añin.

²² Jøts ja ni'ijtyi t'ødyejtøø ja Jesús, ñigyumaapts idø'on ja tjawidi ku myadya'aky ja amdsuj tsaachuj pøni sa jaty ja ñih'mxyidi, jøts ja xem yam ñayiktyidi:

—¿Kidi ja Josèjip idø'on ya'at ja y'u'nk?

²³ Jøts ja Jesús wyaañ:

—Tiigyajpxy yide'en meets inet mdyimwya'añ: "Tøøyi, nachøøyi kø'øm"; mnayinømdipts inet: "Jade'en sa øø tø nnimadøøy m'adi'ich jam Capernaum,

tu'unts inet ya nayide'en mgø'ømnaxkijxy mgø'ømkajpxkijxy."

²⁴ Jøts ja yjaakwaañ:

—Tiy janch meets idø'on nnøjmi jøts ku ni tu'ugin Dios kyugajpxy kyayikupiky kyø'ømnaxkijxy kyø'øm-gajpkijxy. ²⁵ Tyimñømp øts, kawinaak ja ku'økyø'øxy ja wyinaty ya Israelit etjøøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp; ²⁶ ni tu'ukts ja kyayiktanigajxtøø ja Elías ya Israel, ne'egi ja' Dios ja tyanigajp pøn jam wyinaty tsinaapy Sarepta, jam Sidón kajp wingon. ²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp ku-gajp'ajtp.

²⁸ Xjats ku ja jade'en tmadoodøø jøts ja yjanty-imy'ambøjktøø pøn jaty jam wyinaty tsaptøjkjotp.

²⁹ Ojts ja tnibidø'økti ja Jesús, jøts ja tkajpxidsømdy jam kajpjotp, jøts ja tyiknøjkxtøø jam kojpkubajkp ma jam tu'uk ja kats'aaw, jamts ja tkutejnaxwa'andi. ³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijkxy Capernaumit kajpkøjxp midy jam Galileit etjotp tæmp, jamts ja tyik'ixpiky ja jaa'y ku poo'kxin xøøw. ³² Nigyumaap ja tjawidi ku ja jade'en yik'ixpikyidi, kumi tum ja' ja kyajpxy midy kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnoø:

³⁴ —Majtstutk øøts; ¿ti øø xanibøjkp, mets Jesús Nazaretit jaa'y? ¿Ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtp.

³⁵ Xjats Jesús ja miku' t'adsøøy, yide'en ja tñimaay:

—iAmøñi et, kidi mgajpxy, jøts majtstu'ut yø jaa'y! Winets ja miku' tyiknaxkidajky ja jaa'y jøts ja ttawaajch ja jaa'y, nika'ap ja sa ttuun. ³⁶ Ni'ijtyi ja jaa'y yjantyimchø'jkidøø jøts ja xem yam ñawyajnidøø:

—¿Ti kajpxy ti ayuujk yø jade'en kyajpxy? iMøjta'aky yø t'ane'emy yø miku' jøts yø jaty chø'øgi!

³⁷ Ja Jesús idø'on yik'aawip yik'ayuujk øy madsøo.

Ku ja Jesús tyikmøkpiky ja Simón Pedro tyaaqmø'jt

³⁸ Xjats ja pyidsimy jam tsaptøjkjotp jøts ja ojts ñijkxy jam Simón tyigam, jamts ja tyøjkiyi'ñ. Pøjkp tamik ja Simón jam wyinaty ja tyaaqmø'jt, jantyimyjøn'oo'kp ja wyinaty. Winets ja Jesús yiknimaay jøts ja ttu'unt ja may'ajtp jøts ja t'ext. ³⁹ Jøts ja ojts t'ixy, ojts ja ñaxkøy ma ja pamaa'y jam wyinaty, jøts ja møk twingugajpxiyi'ñ ja jøømba'am, jøts ja jaty wyinaajky, jøts ja jaa'y nay jaty tyanaagyukiyi'ñ, jøts ja kø'øm t'ejxpi-naxwa'aky ja kaaky ja jii'kxy.

Ku ja Jesús tyikmøkpiy ja maabyamaa'y

⁴⁰ Kuts ja xøøw yjxnaa, winets ja Jesús ojts yik-taninijkxy ja maabyamaa'y pønity jam sagasa jajtj; jøts ja ojts tu'uk tu'uk tkønixajy, jøts ja jade'en tyikt-sokijxy. ⁴¹ Nay jamts ja winagginmidi pøn ja miku' ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyi'ñ, ka'ap ja tyikjaty jøts ja kyajpxtit, pø ñijaawidipxi ja' jøts ku ja' Cristo.

Ku ja Jesús kyajpxwa'kxy jam Galilea

⁴² Xjats ku xyijndyaaiky, jøts ja Jesús chøø'ñ kajpjotp jøts ja ñijkxy jam mā pøn kya'ity. Jøts ja mayjaa'y ja yjanch'ixa'ayi jøtsnim ja yikpaajty mā ja jam wyinaty. Yikta'aniwyandip idø'on ja', ka'ap ja tmajtstut- wa'andi jøts ja choont, ⁴³ yide'ents Jesús ja ñi- maajyidøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxxi ø tø nyikexy.

⁴⁴ Jøts ja Jesús jam jade'en kyajpxwa'kxy mā jaty ja tsajtøjk jam Galilea.

Ku ja ajkx may'ampy yikma'aky Jesús myilā- gri'ajtingøjxp

5 Tuk'ojk idø'on ja Jesús jam yikpaajty mejy agø'øm mā txøøwi Genesaret; jamts ja mayjaa'y ja ñime-jniyøø jøts ja t'amidodukwa'andi ja Dios y'øgyajpxy y'ømyadya'aky. Janch yik'atejmujknipst idø'on ja Jesús jam wyinaty ² ku ja t'eixpaajty majtsk ja barki tawa'ats jam nøø adsay agø'øm, tø ja ajkxma'kpi jam wyinaty pyidsømgøxti, jam tya'ajkxmaa'k ja wyinaty tpujti.

³ Winets ja Jesús tu'uk ja barki ttatøjkxyi'ñ midy ja Simón yja'ajtpy jøts ja tnimaay wan tniykjiwa'aky waani jøts jam wingon kidyimdyā'ant møøt ja tsayjoo- jt. Jøts ja jam jade'en y'ixaajky, jøts ja jam tyik'ixpøjk- tøkjiyii'ñ ja mayjaa'y. ⁴ Xjats ku ja kyajpx'abajtjyii'ñ jøts ja tnimaay ja Simón:

—Yiknøjkx yø barki jam mā yø nøø køjnkjawi, jamts xniwejtspattit yø mda'ajkxmaa'k.

⁵ Jøts ja Simón t'adsøøy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaa'k jadigojk, pø tøxi me mwa'añ møk'ampy.

⁶ Jøts ku ja jade'en ttundøø, may ja ajkx ja ojts tmat- sti, janch køøtswambim ja tya'ajkxmaa'k ja'adi.

⁷ Winets ja tmiyamdøø ja myigu'ukti pøn jam wyinaty jade'ukpi barkijotp jøts ja pyudøkiyidit. Nøjkxti dø'on ja jam, ojts ja barki ja majtsk tyik'ujtskøxti øy ja yjawi yjanchkøjnkøjkinidit. ⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tnimaay:

—Windsøn'ajtim, majtstutk øts, ka'ap øts yø xpaat'aty jade'en, pojkpitumbi jaa'y øts.

⁹ Janch tsø'jkiñip idø'on ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tø tma'akti. ¹⁰ Nayi tsø'jkipts idø'on ja Jacobo

møøt ja Juan, ja Zebedeo y'unā'jkti pøn ja Simón møøt ñamyigu'uk'atyiyi. Jøts ja Jesús tnimaay ja Simón:

—Kidi mdsø'øgi, ixamyi nduknijawidit sudso jaa'y ja nitso'ok'ajtin tpaatt.

¹¹ Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsø'øky ja jaa'y pøn jadi'iñi putsnøp

¹² Kuts ja Jesús jam wyinaty tu'ukpi kajpjotp, winets yja'jty tu'uk ja jaa'y, møj pu'uts pa'am ja pøjkp, jøts ku ja Jesús yik'eixpaajty jøts ja twinguxanaay. Jamyi ja ñamyujtstaajkøø jøts ja tmīnuu'kxaajky, yide'en ja tni- maay:

—Teety, mmøøt'ajtpy mets ja møk'ajtin jøts ø xyikt- so'okt, yiktsokts øts mdsojk'ajtingøjxp.

¹³ Jøts ja Jesús ja ojts tkønixajy, yide'en ja tnimaay:

—Ndsøky'ajtpy øts jøts mdso'okt, tsokni.

Ja'ayi ja jade'en wyaañ, jaty ja pu'uts wyinajky.

¹⁴ Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'on mnøjkxt jam teety wyindum, jamts xpikta'akt ja myøjxin midy ja Moisés ñi'ana'am, ja'agøjxp ku tø wya'ach ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

¹⁵ Yikmøjpikta'adøts idø'on ja Jesús, may ja jaa'y ja ñimen'adi'ichiyi, namay ja ñamyukyidi jøts ja pyat- madøyi, jøts ja tñankyiktsokwa'añidi ja pya'am. ¹⁶ Ja Jesús jam ja ñijkxy mā abak et mā niti kya'ity, jamts ja Dios Teety t'ajot'ajty.

Ku ja Jesús tyiktsøøjky ja køxujxpi pakxujxpi

¹⁷ Tuk'ojk idø'on, jam ja Jesús wyinaty yik'ixpiky, jamts idø'on ja fariseotøjk møøt ja kajpxwejpitøjk wyi- naty chøønidi wine'enin ja wyinaty tø choondi o ma- gajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tñankyjaj'ijxy ja Dios Teety myøk'ajtin ku ja pamaay ja tyiktsø'øky. ¹⁸ Winets ja jaa'y tkiyyja'jttøø tu'uk ja pamaay pøn køxujxp pakx- ujxp, jøts ja jap tøjktøtpy tyiktøkiwyā'andi jøts ja ttawingugii'yidit ja Jesús. ¹⁹ Nimats kya'awa'adsis mā ja tyøkidit kumi janch mayjaa'y jam wyinaty. Xjats ja tøjki- jxpy pyajttøø, jøts ja ojts tnikidyu'utti ja tøj, japt ja tyikwinajktøø ja pamaay jøts ja ttawingugii'yidøø ja Jesús jap mayjaa'y agujkpy. ²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaay ja tnimaay:

—U'nk, nbøkmxye'kxpy mets.

²¹ Winets ja wyinmaadyøjkidøø ja kajpxwejpitøjk møøt ja fariseotøjkti, yide'en ja wyinmaydi: "¿Pøn yø jaa'y jade'en, tigøjxp ku Dios yø jade'en twingajpx- naxy? ¿Pøn ja pøky yø t'ukmaa'kx, kidi tu'ugyip Dios pyøjkpimee'kxy?"

²² Wa'ats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwinmaydi? ²³ ¿Ja ti ne'egi jawaani jajtñi, kuts yø pa'amjaa'y nnøjmit, "Mee'kxpy øts yø mbøky", uk ku nnøjmit: "Wa'akuki, pøkmukni yø

mmaabajjt jøts nøjkxni mdigam"? ²⁴ Ixyamnim meets inet x'uk'ext mabaat øts idø'on ja møk'ajtin nmøø'taty yā naxwiiñ jøts ø nmaa'kxt ja pøky.

Xjats ja tnimaay ja kəxujxpi pakxujxpi:

—Pidøkni, wə'kukifii, wejtsjø'øk yø mmaabajjt jøts mnøjknit mdigam.

²⁵ Jaty ja kəxujxpi pakxujxpi pyidi'jky, jøts ja tyanaagyukiyii'ñ jam mayjā'y agujkp. Wyejtsmujk ja myāabajjt ja' mā ja jam wyinaty kyo'kni, jøts ja ñøjkn-
naā tyøjkwindum, møk ja Dios ja ttamøjawī. ²⁶ Jøts ja ñigyumaap tjā'widøø ni'ijtyi, ojts Dios ja ttukmøjawidi
ttukunuu'kxyjawidi, yide'en ja wyā'andi ja ñichø'øgi adøtsni:

—Ixyamnim inet ja tø n'ijxyindi midi niwindi kayak'e-
jxpnim.

Ku ja Jesús tpawaay ja Levi

²⁷ Ku ja jade'en y'ukjajty, xjats ja Jesús jam pyidsiimy, ojts chøøñ jøts ja t'ejxpaajty tu'uk ja yikugubajtpi, jam ja wyinaty chøøni mā ja ttukugubety ja jā'y øy tyii'ji, jøts ja tnimaay:

—Møødik øts, møøt widejtk øts.

²⁸ Winets ja jaty tyanaagyukiyii'ñ, jøts ja tuki'iyi tum jam tnikakijxy, jøts Jesús ja tmøødiyii'ñ.

²⁹ Jøts ja Levi xøøw ttuuñ jam tyøjkwindum jøts ja twindsø'jkiyii'ñ ja Jesús, mayts ja yikugubajtpi jam wyi-
natyi møøt jadu'ukpi jā'y dyi. Jade'en ja jam møøt twindsøøni di ja kaabyajt. ³⁰ Xjats ja fariseotøjkti møøt ja kajpxwejpitøjkti tpa-
gajxpnibøjkidøø ja Jesús pyabøjkpi, jøts ja tnimaadyøø:

—ǂTiku meets yø xmøøtkay yø yikugubajtpitøjkti møøt yø ka'øyjā'y dyi?

³¹ Winets ja Jesús y'adsøøy jøts ja tnimaay:

—Pøn tkajā'widip ja pyā'am, ti tsøøyibi ja t'ukyik-
wā'andit. Ja' ja tyik'amaādyaktip pøn pamaā'dyi, pøn pyā'am tjā'wiyejttip.

³² Kidi ja'ajjpts ø tø nnimiñ pøn niwine'en kanabyøky-
jā'wiydip. Ja' ø tø nnimiñ pøn tjā'widip ja pyøky jøts ku ja pyøkmøødidi, jøts tyiktigatstī ja chinā'yindi.

Ku ja Jesús yiktiibyijky tigøjxp ku ja kya'ayuu'atti

³³ Xjats ja tībbyøjktøø ja Jesús jøts ja tnimaadyøø:

—ǂTiku yø mbabøjkpitøjk janch nekīm kyaydi tyøjkx-
ti, jøts yø Juan yja' yjanch'amaay'atti møøt yø fariseotøjkti? Ni kyakaydi kyajøø'kxti, janch tsap-
kajpx'ejttip yø'.

³⁴ Winets ja Jesús t'adsøøy:

—ǂMā meets jade'en tø x'uknijāwi jøts ku tø'øxy ñi-
gaabyi tø'øxy ñi'ukpi winet y'amaay'atti winet kyakaydi kya'uukti ku ja jemyā'y jamni? ³⁵ Abikñimts ja tiempi tyimyja'tmit ku ja jemyā'y wyinaty kya'uk'ejni ku ja jam wyinaty tø cho'onī; jaanimts idø'on tiy pøn kya'ukaafnit kya'uk'uknit, jaanim idø'on ja y'amaay'at-
tit.

³⁶ Jøts ja nay ja'agøjxp yā'at ttanimadyaktøjkiyii'ñ:

—Ka'axi pøn wyetpach tta'agiyi jemwyet midi tyimy-
jemñim, ku ja jade'en yiktu'unt jøts kumi mujkpi ja

jemwyet jøts ja tjāaktyimgyøø'tsni ja wetpach, jāakty-
imyiwēnip ja kyøøts'ajtin ja'. ³⁷ Jøts ka'ap pøn vino tta'adamī po'duk midi namī'kxñim, ku ja jade'en
ndu'unint jaty ja tyikmīgøødsi ja po'duk, windigøøpyts
tuki'iyi, windigøøpy ja vino, windigøømyipts ja po'ak.
³⁸ Paty ja vino midi ñamī'kxñim nda'ada'amyin ja jem-
byo'ak jøts jade'en nimidi kyawindigø'øty.
³⁹ Nayide'ents ka' pøn t'uukwā'āñ ja vino midi
namī'kxñim. Pøn tø t'uukyujni ja vino midi jekyip
mīi'kxñi, xumi ja' ja chøjkpy, kumi nømp ja tukajpxy:
“Yø jekyip mīi'kxyip tyimy'øy, ka'ap yø midi tmi'abaaty.”

Ku ja Jesús ttøjtøø ja ariin yam poo'kxin xøøw

6 Poo'kxin xøøw idø'on, winets ja Jesús jam wyinaty
ñaxy jam kamjotp møøt ja pyabøjkpitøjk, ja'ats
jam wyinaty ttøjtī ja ariin tøøm; jøts ja twixatsti ja ari-
inbajk jøts ja tjøø'kxti. ² Jøts ja fariseotøjk wināagin yik-
tøøjidøø, yide'en ja yiknimaadyøø:

—ǂTiku jade'en m'adø'øtstī midi ka'ap pyāat'aty yik-
tu'unt poo'kxin xøøw?

³ Xjats ja Jesús y'adsøøy:

—ǂKa'anīm meets ja Dios kyajpxy x'ijxy midi tni-
gajxpx sa ja David tuk'ojk tmøøt'adihch ja myigu'uk ku ja wyinaty yjantyimyyu'oookti? ⁴ Pø tsaptøjkjētpymxi ja tyøjkii'ñ, japts ja tñixajjii'ñ ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyi-
natyi myøøt. Yām ja ka'ap yjapaat'atyidi jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyāāñ:

—Ngudanaapy øts ja naxwii'ñit jā'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jā'y pøn ja kyø' jadi'iñi tøtsnīp

⁶ Jadu'ukpi poo'kxin xøøwts idø'on ja'agøjmyi ku ja Jesús tyøjkii'ñ jam tsaptøjkjotp, jamts ja yik'ixpøjk-
tøjkii'ñ. Japts wyinaty tu'uk jā'y midi y'aga'ngyø' xu-
jxp; ⁷ jøts ja kajpxwejpitøjk jam tpa'ejxti tpaowdi ja Jesús, ja' ja y'ejxwāndip pøni y'ukyiktsøkpy idø'on ja pamaā'y ja' ku poo'kxin xøøw, jade'ents ja tni'øøniwyā'āndi. ⁸ Ti wā'ats ja tñijāwi sa jaty ja wyinaty wyinmaydi jøts ja jā'y ja tnimaay midi wyinaty kyø'
xujxp:

—Tani, jøts ixem nøjkx mdani kujk'am.

Jaty ja jā'y tyanaagyukiyii'ñ jøts ja jam ñijky tanaabyi. ⁹ Winets ja Jesús tnimaay ja mayjā'y:
—Nyiktø'ødip nyik'amido'odip inet yām: ǂMidi'ibi ndu'unimp ku poo'kxin xøøw, midi'ibi kutuky ku n'ødyu'unint u ku nga'ødyu'unint? ǂku nyiktsoojkint u ku nyik'o'jkint?

¹⁰ Jøts ja twin'ejkijxy pøn jaty ja jam wyinaty ttamuy-
kijyp, jøts ja tnimaay ja pamaā'y:

—Xajtøw.

Tsoojk ja' jøts ja xyajtīy. ¹¹ Jøts ja yjadu'ukpi jā'y yjanch'ambøjktøø, jøts ja xem yām ñawyajnidøø, agø'ømyi sudso'ampy ja tjadyimy'ukyikpøkyā'adit ja Jesús.

Ku ja Jesús twiwijch nimakmajtsk pøn wyinaty kyudanaabyi'atwampy

¹² Winet ets ja Jesús ñijkxy Dios'ajot'ajtpi jam kojpkøjxp, jam ja Dios Teety ja tmigajpxy tuktsunaxy. ¹³ Jøts ku xyijindyajjy, jøts ja twaadsogijxy pøn jaty ja pabøjkip, jøts ja twiwijch nimakmajtsk pøn ja tyejtip kudanaabyitøjkti. ¹⁴ Ja'ats idø'on ja'adi ja Simón midi ja xyødejtigajts jøts ja tpiktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé. ¹⁵ Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista; ¹⁶ jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'ixpijky ja mayjaa'y

¹⁷ Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøyjotpy niduki'iyi møøt ja pyabøjkipitøjk; nay jam wyinaty øy pøndi pøn jaty tso'ondip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tni-mendi jøts ja tpatmado'odit ja Jesús, jøts ja pyamaa'y ja tñankyiktso'okwa'añidi. ¹⁸ Winaagin jam pøn ja miku' tø tyatøkiyidi, tsokøxtits ja'. ¹⁹ Jøts ja jaa'y ni'ijtyi tñixajiwya'andi ja Jesús. Pyaätwandip ja' ku ja ttuktat-sø'øky ja myøk'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxi'jky mā ja pyabøjkipitøjk jam wyinaty jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaättip ja Dios kyutujk midi ja tyanitanaapy ja yjaa'y.

²¹ 'Nay Dios ja tkunuu'kxp pøn yu'oo'ktip xø'oo'ktip, ja' ja tyiknajxkøjxp.

'Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²² 'Mgunuu'kxp meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti. ²³ Kidits mjotmay'ookti, kidi x'ayoojidi, japnim ja tsajpjotpy mwingaxø'økxiyidi; pøn jade'en mduujnidip, yø jade'embi jaa'y tyeety'ap tka'ødyundøø nayide'en ja Dios kyugajpxtyi.

²⁴ 'Jøts mjanch'ayøøy mee kumeeñ jaa'y, yaayi meets iij jotkujk mdsinaagyojti.

²⁵ 'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjkk.

'M'ayøøy meets pøn yam agujk jotkujk yiknajxtip, mdaya'axtipts meets ja mwimmaa'ñ jadijojk.

²⁶ 'M'ayøøy meets ku mee myik'ødyijy myik'øñøjmi, pø nayide'ents ojts yiktejti yik'ødyejti pøn ojts nugo ñadyijyi ja Dios kyugajpxy.

Paat'ajtip jøts ja mmidsep yikmijotjimbett

²⁷ 'Ni'ijtyi madowdi wine'enin mja'atti: Tsokti miyu-jy'atti ja mmidseptøjki, pudøkidi ja' pøn mjaगतso-jkidip, ²⁸ amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip. ²⁹ Pøni mgojxip mdse'ekip, ja' øy ku xmaa'kxuktit; jøts ku pøn mbøjxkidit ja yukwop, jaaktyimyo'odipts ja mnijan. ³⁰ Kidi kanajtsjawim xjawidi ku tigati myik'amidowdi; jøts kidi jaty o pøn xamatsti ku pøn o ti tø tñix-ajji. ³¹ Kidi meets ja jawyeen jade'en xjöp'ixy pøni sa mee xjatsøky, meets idø'on mbaat'ajtip jawyeen mna-jtstunip sa dø'on ja yjawi tsoktin jøts meets ja jade'en xu'unt.

³² 'Øy meets ja'ayi møøt mjanamyaawya'añiyidi pøn mee møøt mnachøkyiyi, zti øy'ajtints meets jade'en mdumpy? zTi ja' ja ka'øy jaa'y kyajajtip? Pø tyundipxi ja nayide'en. ³³ zTi øy'ajtin meets jade'en mdumpy øy meets ja'ayi xjamay'aty pøn mee nayide'en mdu'unxiyip? Pø tyundipxi ja ka'øy jaa'y ja nayide'en. ³⁴ Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, zti øy'ajtints meets jade'en mdumpy? zTi ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may? ³⁵ Ka'ats meets idø'on xmidsepøkt ja mmidsep, tsokti xmiyuuj'attit, mduujnip meets ja may'ajt ja'. Øy meets ja tigati xuk'anuu'kxt jadi'iñi, kidits meets ja xjöp'ijxy'aty jøts ja mmigubajtxidit jawaani møj jawaani may. Møjts meets ja myikwimbetpxiyidit, ja Dios Teety tsajpjotpyit jade'en meets ja m'u'nktejyit; ti sa ja Dios Teety tmi'øy'aty nayide'en ja ka'øy jaa'dyi ja namyikaxi jaa'dyi. ³⁶ Mja'myatstip meets jøts mba'ayo'odip o pøn nayide'en sam ja Dios Teedyin ja tpa'ayøyin.

Kidi pøn o ti xawindsø'odyi

³⁷ 'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit. ³⁸ Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sa meets ti xyaky xkayaky møj may o ti. Nayide'en meets ja Dios mdunit pøni sa meets mmigu'uk xuñ. Nay ja'ats ja yik'awetsp.

³⁹ Xjats ja Jesús ttanimadyaktøjkijyi'ñ jadu'uk ja madya'aky, yide'en ja wyaañ:

—zMa ja winap jaa'y tø t'uktuu'niway ja myiwinap jaa'y? Pø namajtskxi dø'on ja tyimgyunaxtit ku et'aaw ja mā tpaättit. ⁴⁰ Uk kuts pøn, pøn tñi'ixpøjkimyidip o ti tunk, ka'axi mibaat twinaxtit ja yik'ixpøjkpidi; pø wan idø'on jaanim wyinaty.

⁴¹ 'Jøts meetsmi, zsudso dø'on ja mmigu'uk pyøky x'ejxpajtyi jøts ja mja' ne'egi xka'ixy kudam ja jawaani møj? ⁴² Jøts, zsudso mets idø'on namyikajxim xkajpx'øyiwyaa'ñ yam mets ja mdsinaa'yin øy xkayikyø'øy? iMeets win'øø'mbi ataadyi! Yik'øyiidi jawy-

een ja mga'ochinaa'yindi, winetnimts ja mmigu'uk chinaa'yin xkajpx'oyiyidit.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

⁴³ Mā meets øcha'amguipy tø x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima. ⁴⁴ Ja tyøømi ja kipy yikta'ejxkajp pøni sa ja tyøømi øy ka'øy: ka'axi ja iigi tsa'am yikwiduky kujp kipkyøjxp, ni jam ja uvi tsa'am kyawinaky jam kujp aatskøjxp. ⁴⁵ Jade'ents idø'on ja øyjaa'y pøn øyjaa'y, ka'ap ja t'aawi tjojtj ja ka'øybi winmaa'n, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjojtj, yjemwa'andi tyewa'andi kumi jam idø'on ja tyimyøødidj ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøjp ja pøch kyojpk

⁴⁶ Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sa njawa'añ. ⁴⁷ Yā net ndukmado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sa nwa'añ: ⁴⁸ jade'enin idø'on ja nbiktaajkin sam ja jaa'y tyøjkøjy, jawyeen ja køjnk øy øy tniðajiyi'n ja tyøjk, jøts ja tsaā ja amuum ttukpøchkojpk'ajty. Xjats ku ja møj nøøgom jam wyinajky, aguwani ja tyimykjø'tj'økwā'añ ja tøj, jøts ja niwine'enin nisa tkatuuñ, kumi tsaā ja wyinaty tyeky'ajtpy. ⁴⁹ Pønts ø xjapatmadoojidip ja n'ayuujk jøts ka'ap jade'en tpadundi sa nwa'añ, ja'ats idø'on jade'endi sam ja jaa'y midit tyøjk tkoj xixñaxkijxy. Niti ja tkadukpøchkojpk'ajty, jøts ku ja møj nøøgom jam wyinaajky jatyi ja tmimajadaajky, ojts ja tyikiday jøts ja tyimykudigøøy.

Ku ja Jesús tyiktsø'øky ja romanit soldadi ja tyumbi

7 Xjats ku ja Jesús jade'en tnimaagiyxy ja jaa'y, winets ja ñijky Capernaum. ² Jamts wyinaty chøøni ja soldadi windsøn, romanit jaa'y ja'. Jamts tyumbi ja tu'uk midit ja janchkamajtsu'udyim yja'wip, mowa'añ ja yjanchpiky, ookwanip ja wyinaty. ³ Ku ja soldadi windsøn tnimadøøy ja Jesús, winets ja ttaniguejxy winaagin ja israelit møjaa'dyøjkti, jøts ja t'atstuk'amidoowa'añ ja may'ajt, wan tmiñ ja Jesús jøts cho'økt ja tyumbi. ⁴ Xjats idø'on ja tniðkjxtøø ja Jesús jøts ja ojts t'amidowdi ja may'ajt møk'ampy, yide'en ja tnimaadyøø:

—Paat'ajtip xpudøkit yø soldadi windsøn; ⁵ kumi chøjkpy yø' adøm ngajp, nayø'øts tø tni'ane'emy jøts ja tsaptøjk tø kyøj.

⁶ Winets Jesús ja tmøødiy'i'n. Jøts ku ja jam wyinaty yja'atwanidi mā ja tøj, jam, jøts ja soldadi windsøn ttukjøpkubajtyi'i'n pøn jaty ja minamyajyip, jøts ja ttuknimaay ja Jesús:

—Mets teety, kidi xka'øyjawi, ka'ap ø xpaat'aty jøts mets yā mdøkit ndøjkjøjty; ⁷ paty ø kø'øm tø

nganay'a'ejxyi jøts mets jeexyip kø'øm tø n'ats'ixa'ay. Ana'am ja'ayi, jøts øts ja ndumbi cho'økt. ⁸ Ane'emy ø nayide'en nwindsøn xyik'ity, nay ja øts ndumbitøjkmidi pøn ø n'ana'amidip. Ku pøn nnøjmi: "Nøjkx", nøjkxpts ja'. Uk nnøjmits øts yø ndumbi o ti, jatyi yø jade'en tpaduñ.

⁹ Ja'ayi Jesús ja jade'en tmadøøy ñigyumaap ja tja'wiyi'n ku ja jaa'y jade'en, jøts ja tniwa'akjimbijty pøn jaty ja jam wyinaty payø'øyip, jøts ja tnimaay:

—Tyimyjanch, ni Israelit jaa'y øts yā mā jade'en nga-paadyim sam yā'at jaa'y tmøødin ja janchja'win møk'ampy.

¹⁰ Jøts ku ja waabi yja'ttøø møøt ja jøpkuyø'øyibidi jam tøjktotp mā ja pamaa'y jam wyinaty, tødamik ja wyinaty myøkpøjkni ja pamaa'y.

Ku ja Jesús tyikjujky ja ku'økyø'øxy myajnu'nk jam Naín

¹¹ Ukjajts ja jade'en, xjats ja Jesús ñijky jam mā kajp txøøwi Naín, mayjaa'yts idø'on ja jam wyinaty pawidejtp, may ja pyabøjkpøjk ja jam tmøødi. ¹² Kuts ja yja'jty jam kajpwingon, jøts ja ojts t'ejxpaaty tu'uk ja oo'kpi yikpajiy jøts ja y'atsnaxøkit, tu'umchi dø'on ja tø'øxyøjk ja t'u'nk'aty, jøts ku'økyø'øxy ja'. Mayts ja yik'oo'kpi pidø'kpi jamdi. ¹³ Jøts ku ja nwindsøn'ajtim ojts t'ixy ja ku'oogi, yik'ayo'ijxyim, jøts ja tnimaay:

—Amon, kidi mya'axy.

¹⁴ Winets ja Jesús twingunøjkxyi'n ja oo'kpi, jøts ja kajuun ja tniðajiyi'n, jøts ja oo'kpi kiibi ja tkiidyaktøø, jøts ja Jesús tnimaay ja oo'kpi:

—Mets u'nk idø'on nnimaapy: jPidø'øk!

¹⁵ Xjats ja kyu'xkukiyi'n pøn idø'on wyinaty tø y'øøky jøts ja kyajpxpiniðøjkxyi'n, xjats ja u'nktaak ja yiktagidøjkxyi'n ja y'u'nk, ja Jesús ja kømøøjyiyip. ¹⁶ Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja ttukmija'widøø ttukunuu'kxyja'widøø ja Dios, nømðip ja':

—Yā Dios ja myøjkugajpxy tø kyaxi'iky adøm njaa'yjøøjty.

Nayide'en ja wyā'andi:

—Dios tø tnimiñ ja kyajp jøts tpudøkit.

¹⁷ Yiknija'wigyøjx ja jam wine'enin ja jaa'y jam chøønið jam Judeit etjotp, ku wyinaty ja Jesús tø tyikjujky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tnija'wiyi'n, nayide'en ja pyabøjkpi ja wyinaty tø tyamimadya'aggiyi, winets ja tyajxyi'n namajtsk ja pyabøjkpi, ¹⁹ jøts ja ojts ttaniguexy ja Jesús, jøts ja t'atsyiktø'ødit pøni ja' idø'on janch Cristo pøn wyinaty menwamp yiknitsokpi. Uk kidi ka'ats, winets ja abikpyi ja tjøp'ejxtit. ²⁰ Jøts ja wingon twingunøjkxidøø ja Jesús pøn ja Juan wyinaty tø tyaniguexyidi, jøts ja tnimaadyøø:

—Ja Juan Bautista øø tø xkexy jidsik øø nyiktø'øt pøni janch ja Cristik mets idø'on midit yiknigajpxp men-

wamp yiknitsokpi. Pøni ka'ats, winets øøts jadu'ukpi njøp'ext.

²¹ Ku ja wyinaty tø yja'atti, winets ja Jesús nay jatyi tyiktsøøjkjy may ja jaa'y pømbi pa'am pøjkidip, pømbi o ti ja'ambi tmøøt'ajttip, pømbi ja miku' tmøøt'ajttip, ñayikwin'ejxwä'kxmip ja' ja may winap jaa'y. ²² Jøtsnim ja y'adsojimbijty jøts ja wyaañ:

—Nøjkxti jøts xukmado'odit ja Juan ti jatyi yä tø x'ejxti xmadowdi. Tamimadya'akti jade'en sá yø winap jaa'y wyin'ejxwä'kxti, sá yø pakpamaa'y yø'ødyi, sá yø put-spi cho'okti, sá jatyi yø nat jaa'y myadowdi, sá oo'kpi yjujkyøkty, jøts sá ayoobi jaa'y yiktukmadowdi ja øgyajpxy ja ømyadya'aky midi yiknitsokp. ²³ Ejtni xoni ja'adi pøn ø xmibøjktip, ka'ap twinmayimbettit twin-may'adøjtít sats ø xjanchjawidi.

²⁴ Xjats ku ja wyimbejtndøø midi ja Juan wyinaty tø tkexy, jaats ja Jesús ttamimadya'aktjøjkiyñ'i ja mayja'a'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midi jade'en ejxim kapy midi poj yik'ø'yimbejtíp yik'ø'y'adøjip? Ka'axi ja yjade'eni, pø tu'ukyixi tmi'ity ja wyinmaa'ñ. ²⁵ ¿Tits idø'on ojts x'ats'ejxti? ¿Tu'uk ja jaa'y pøn janch øybi wet tø ñadyaxoxiyi? Pø wä'atsxi mee xnijawidi pøn tsuj wet nadyaxoxidip, pøn nekimi tax-ondip pyiktä'aky, jamts ja ñachojk'ityidi jam windsøn tyøjkjotpti. ²⁶ ¿Tits idø'on mjanch'ats'ejxtøø? ¿Tu'uk Dios kyugajpxy? Janch ja', ja' midi jawaani møj, nika'ap yjade'eni sam yjadu'ukpidi. ²⁷ Yø Juan idø'on yiktejp ku Dios kyajpxy yide'en wyaañ:

Ixyä ngajxjawyeni tu'uk ja nngugajpxy, pøn tyiktøøjip tyiktuudaa'jkp ja jaa'y wyinmaa'ndyi jøts myikupøkt ku ixpøjkin xminøjxt.

²⁸ Ndukmadodip ixyam jøts ku ni madsoo ka'ap pøn jade'en pyidsimñim ja Dios kyugajpxy sam yø Juan Bautista; pøni pønts øts nja' xpaduujnip jøts ku tyøki mā øts ngutujk ndanitanit ja njaa'y, ja'ats ne'egi møj yikpikta'p jøts nika'ap ja Juan Bautista.

²⁹ Jøts ku ja jaa'y ni'ijtyi jade'en tmadoodøø pøn jatyi wyinaty tø yiknøbetyidi ja Juan, nayide'en ja yikuguba-jtpidi, jøts ja tjanchmibøjktøø ja Dios jøts kudam ja ka'ap jade'en mibaat wyinmaamy'a'aty; ³⁰ ka'ats ja tmøjpi'ktaktøø ja fariseotøjkti jøts ja kajpxwejpi'øjkti sa Dios ja wyinaty tø tyamidsøkyidi, jøts ja ka'ap tkupøjktøø jøts Juan ja yiknøbatidit. ³¹ Jøts ja nwindson'ajtím wyaañ:

—¿Pønxik øts jade'en meets n'uktami'ejxip?

³² Jade'en meets ndami'ejxi sam mutsk unä'jkindi muum y'adø'øtsti jap maayjotpy ku myi'unä'jk tk-agupøjkiyidi ja kyuyajtin midi yjatsøjky yjaguyat-wampy, jade'ents ja ñawya'añidi: “Tø øø yikxon njax-u'uxy jøts ni mga'atsti; tø øø jotmay'øøgyim nja'øømi, nijade'ents mgajotmay'oo'kmidi.” ³³ Kuts ja Juan Bautista tø myiñ jøts ja kyakay kya'uuky ku ja ka'ap vino t'uuky, jøts meets mnimy jøts ku miku' ja myøøt'ajtpy. ³⁴ Jøts ku ø tø njamemi jøts ku ø ngaamyi n'ukmi, jøts mnømidi jøts ku øts janch kaxim ngay n'uuky, jøts ku øts ja møøt namyigu'uk'atyiyi ja yikugubajtpidi

møøt ja ka'øyja'a'dyi. ³⁵ Pøni pønts ja Dios yja' tkupøjkp, ja'ats tjä'gyukip sam ja Dios yja' ttsøkyin.

Ku ja Jesús jam fariseo tyøjkjotp wyinaty pøn txøøw'ajtp Simón

³⁶ Xjats ja fariseit nidu'uk tñimaay ja Jesús jøts ja tmøødit kaabyi tyøjkwidum. Jøts idø'on ja ojts tmøødi, ojts ñiikxy, tyøjkiyñ'i jam fariseit tyøjkjotp, ja kaabyajt twinguwa'jtsiyñ'i. ³⁷ Winets ja tø'øxyøjk tu'uk pøn ka'øyja'a'y'ajtp midi jam tsinaapy jam kajpjotp, ku ja tñija'wiyñ'i jøts ku ja Jesús wyinaty tø ñiikxy kaabyi jam fariseit tyøjkjotp, jamts ja ojts tmija'aty ja pa'akxu-u'kpi, tsagueegi tu'jtsjotpy. ³⁸ Ñiyaxpim ja twin-gugu'xiyñ'i ja Jesús tyeky, jøts ja wyeenøø ja ttuk-taxø'jky. Jøts ja nay jatyi ja wyaa'y ttawibø'øty jøts ja ojts ttsu'kxy, ojts ja ttabajä'axy ja pa'akxuu'kpi. ³⁹ Jøts ku ja fariseo ja ojts jade'en t'ixy pøn ja Jesús wyinaty tø wyayi migaabyi, yide'en ja wyinmaa'ñ ja jap tyikyø'øy: “Pøni janch Dios kyugajpxy yø jaa'y jeexyip, tø yø je-exyip tjä'wyini pøn yø ixä tojnip majtsip, pøni pøn tø'øxyøjk yø', pø ejtpts yø yjantyimpøktyun'ity yø tø'øxyøjk.” ⁴⁰ Winets ja Jesús tñimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'on ja jaa'dyi pøn tmiyoj'ajttip tu'uk ja meeñ'anuukxyajki. Tu'uk tmiyoj'aty magoxk magø'pxy denario jøts jadu'uk wixijxmyajk; ⁴² jøts kumi ka' idø'on ja tkubatti nipøn tkagubety ja yoj, jøts ja meeñ'anuukxyajki ka'ap ja sá tijy øy ja tkagubattit, ojts ja ttaamee'kxy ja myiyoj. Nigajpxts inet, çpømbi ja jawaani tsojkip, pømbi ja jawaani takajxajki?

⁴³ Jøts ja Simón y'adsøøy:

—Ja' yjawi pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'on mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tñimaay ja Simón:

—M'ijpxyi yø tø'øxyøjk, ku tø ndøki yä mdøjkiøøjty ka' mets ja nøø tø xmø'øy ja ndekpyujik; tøts øts yø tø'øxyøjk ne'egi xapakpuji ja wyeenøø jøts ja wyaa'y tø tø ttuktati'ich. ⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixä øts ndeky yø jade'en xtsu'kxi. ⁴⁶ Ka' mets ngubajk aceite tø xpik-taajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi. ⁴⁷ Paty mets idø'on nnøjmi, pøni pøn ja tsojkin waani tmøøt'ajtp nayide'ents ja waani yikpøjkipimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tñimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jatyi ja jam wyinaty møøt-sinaajyip yjanchnawyambinaxwä'jkidøø:

—¿Pøn jaa'y yä'at ndejint, sudso pøky paat yø tmeekxy?

⁵⁰ Jøts ja Jesús yide'en ja tñimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawī, nøjxniṣ jøtkujk.

Ja tø'øxyøjk pøn jaty ja Jesús pyudøjkidip

8 Tøts ja wyinaty y'uknaxy jade'en, jøts ja Jesús t'ayø'øgyijxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk midi yjā'y ja tyanitanaapy. ² Nay jam idø'øn ja yjamyøøt'ajtmijidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtsu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tø myajtsu'udyiyi; ³ nay jam ja Juana wyinatymi, ja Chuza ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tñija'wip ti jam ejtp ka'ejtp mā ja Herodes jam wyindsøn'aty; jam ja Susana wyinatymi jøts may abikpyi jā'y dyi pøn jaty ja tigati tabudøjkiyidip.

Ku ja Jesús tmadyakpaaty ja jā'y pøn nøjx neppi

⁴ May jā'y ja Jesús jam ojts ñimiñiyi pøn jaty tsoo'ndip o mā abikyajp jøts ja Jesús yik'ejxwā'añ; jøts ku ja jā'y may'ampy myujkpejty, jøts ja ttamimadyak-tøjkiyī'ñ tu'uk ja ejxpajtin madya'aky. Jøts ja wyāañ:

⁵ —Tu'uk idø'øn ja jā'y chøø'ñ tømwtøjpi. Jøts ku ja twijy, øy ja tømṣt o mā ñaxkidaajky. Midi'ibi ña-jtswøjjiyī'ñ jam tuu'am, ja'ats yiktaa'nbu'uxkigyøjx jøts ja joon ja wā'ats tpeemujkijxy. ⁶ Midi'ibits ñajtswøjjiyī'ñ jam tsāā agujkp, ojts ja jam yjamuxy jøts ja jatyi tyøt-sjø'knāā ja'agøjxp ku ja nāājx jam kyaneki. ⁷ Midi'ibits ñajtswøjjiyī'ñ mā ja magyujp jam wyinaty myuxwā'añ, ja'ats ja ojts ñi'āāmbajtinijy. Ku ja myujxmi winet jøts ja niwine'en kyayikyonmøjkiyøø. ⁸ Midi'ibits ña-jtswøjjiyī'ñ jam pu'uty ñaxkøjxp, jøts ku ja yøøñ jøts ja ojts yikxon yjantyimdyøømi, magø'pxy magø'pxy ja pyajkpejty ja tu'ukpi tømṣt.

Ku ja Jesús jade'en myadyak'abajtiyī'ñ, jøts ja møk-tā'aky wyāañ:

—Pøni pøn ja'gyukiwyāmp, wan tjā'gyuki.

Tigøjxp idø'øn ja Jesús ejxpajtin madya'akyøjxp ja y'ix-pøjkin tyaky

⁹ Winets ja pyabøjkpitøjk ja yiktøøjyøø ti dø'øn jade'en tyijpy, sudso yikja'gyukit ja'abi madya'aky.

¹⁰ Xjats ja t'adsøøy jøts ja tñimāay:

—Meets yø Dios mduknija'wiyip ja y'ayu'uch win-māā'ñ sā ja' kyutujk midi ja tyanitanaapy ja yjā'y, jade'ents meets ja mdyimiyiktukmadø; ka'ats ja abiky jā'y nayide'en madya'akyøjxp tñijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tñimado'odit tkanimado'odit nayide'en pøni sā ø xpabøkti xkapabøkti.

Ku ja Jesús tñigajpxy sudso dø'øn yikja'gyukit ku jā'y neppi ñijxy

¹¹ Yide'en idø'øn yø madya'aky tijy: Jade'en ja tømṣt yikpikta'aky sām ja Dios kyajpxy y'ayuujkin; ¹² jøts midi

yiknajtswøjjiyī'ñ jam tuu'am jade'en ja yikpikta'aky sām ja jā'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja miku' ja jaty pyøjkxiyidi jøts ja ka'ap tmibøktit, jøts ja nisudso'ampy kyanitso'ok'at-tit. ¹³ Jøts ja tømṣt jade'en yikpikta'aky midi yikna-jtswøjjiyī'ñ jam tsāā agujkp sām ja jā'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøjkojti y'ukjanchjā'widip ja'; kuts ja yiin waan sā tkujatidi jøts ja jatyi tmajtsu'utti, jatyi ja ñayjibikpyikta'agyidi ja'agøjxp ku ja jade'endi sām ja ujts kya'āā'tsmiweninim. ¹⁴ Jøts ja tømṣt midi ña-jtswøjjiyī'ñ jam kujp agujkp, jade'en ja yikpikta'aky sām ja jā'ydyi pøn tjamadoodip ja øgyajpxy ja øy'ayuu-jk, yjajanchjā'widip jøts nika'ap t'ukpadunidi, ja' ja ne'egi yikmajadaaktip ja pyikta'aky, ja myeeñ, ja yjin-gaap, ja yjotkujk'ajtindi. Jade'ents ja tka'ukyik-møjtøjkinidi ja øgyajpxy ja øy'ayuujk jøts ja niti tkayik-wingaxø'økti Dios wyindum. ¹⁵ Jøts ja tømṣt midi ña-jtswøjjiyī'ñ jam pu'uty ñaxkøjxp, jade'en ja'ami sām ja jā'ydyi pøn amumjoojt nadyamiyøjxidip ja Dios, jøts ja jade'en tpatmadojidi ja y'øgyajpxy y'ø'yayuujk. Møk ja yjanchjā'win ja tpikta'akti, ka'ap ja juuni ttamajtsu'utti, ja'ats idø'øn tyikwingaxø'ktip ja øgyajpxy ja øy'ayuu-jk.

Niti jadi'iñi kyatañ, kuwañim ja tyimiyikñijawī

¹⁶ Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap māābajt patki'py; ja' ja wyā'añ jøts ja yikpikta'akt jam køjxp mā yjajt tyøø'kxt, jøts ku jam pøn tyøkit ka'ap ja jam kube'ets kugoots yjā'attit. ¹⁷ Ti ka'ukyikpatp ku ti yjaju'uch'ity. Øy kajpxy ayuujk yjagayiknigajpxwā'añ, kuwanits ja yikñijawī pøni sā ja y'ejxi tyiyi.

¹⁸ Jade'ents idø'øn øy xmado'odit; pøn tpabøjktip jøts tmadogukiwyā'andi øy øy, jāakyikpudøkipts ja yikxondi jøts ja tjā'gyukidit. Pønts ka', jāakty-imyikpøjkiyidip ja' ja wyijy'ajtindi midi ja jāakjanadya-jā'wiyidip jøts ja nisudso'ampy tkidyimya'gyukidit.

Ja Jesús tyāak jøts y'uch

¹⁹ Winets ja Jesús y'uch yjā'ttøø møøt ja tyāak mā ja jam wyinaty, nika'ap idø'øn ja tpaatti wingon kumi janch mayjā'y jam wyinaty. ²⁰ Xjats ja Jesús yiktukmadøø jøts ja yiknimaay:

—Ja mdaak møøt ja m'uchti ja' mmigajpxwajniṣ, ixap ja tøjkwimptyi.

²¹ Jøts ja t'adsøøy:

—Ja' øts idø'øn ndāagip, ja' øts idø'øn n'uchidip nmigu'ugidip, pøn tmadoodip ja Dios y'øgyajpxy y'ø'yayuujk jøts ja jade'en tpadundi pøni sā nwa'añ.

Ku ja Jesús tyiknajxy ja møk poj jøts ku ja tyik'amøkiyī'ñ ja mejy

²² Winets ja nay ja'abi xøøw tyøjkiyī'ñ barkijøtpy møøt ja pyabøjkpitøjk, jøts ja tñimāay:

—Wan tjā'yindi jam jaduktamajñ.

⁵⁰ Jøts ku Jesús ja jade'en tmadøoy, jøts ja tnimaay:
—Kidi mdsø'øgi, møk m'aaw mjoojt xpikta'akt, tu'u-gyi ø xjanchjawit, jujkpyøkp ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkiyih'ñ, ja Pedro ja ja'ayi myøøtøjkiyih'ñ møøt ja Jacobo møøt ja Juan jøts ja u'nk-teety u'nktaak jade'eñi. ⁵² Janchyaxtip ja wyinaty, ja y'u'nk ja tymchaachpa'ayoodip. Jøts ja Jesús ja ñi-maajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyiknixiky, pø ñija'widipxi ja' jøts ku ja wyinaty tø y'oo'kni. ⁵⁴ Xjats ja Jesús ja tmajch kyøjøp'am, jøts ja møk'ampy tnimaay:
—Pidø'øk, u'nk.

⁵⁵ Jøts ja yjujkpyiky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit. ⁵⁶ Nigyumaap ja møjaa'y ja tyimya'widøø jøts ja Jesús ja tnimaay jøts ka' pøn ttukmado'odit ku dø'on ja wyinaty jade'en tø tyuñi yjaty.

Ku ja ñimakmajtskpi pabøjkipitøjkt yiktanipøkti ja tunk jøts ja yikajtssoondi

9 Xjats ja Jesús tñankñamyujkøø nimakmajtsk ja pyabøjkipitøjkt jøts ja myøk'ajtin ja tmøoy, ojts ja tkutujkmø'oy jøts ja tyikpidsøjmidit ja jaa'y ja miku', jøts ja tyikmøkprøktit ja pamaa'y. ² Ojts ja tkexy jøts ja Dios y'øgyajpxy y'ø'yayuujk ja tkajpxwä'kxidit midi ja tyanitanaapy ja yjaa'y jøts ja tyiktso'oktit ja pamaa'y. ³ Jøts ja tnimaay:

—Ka' mniyø'øyik xko'ondit, niti xkako'ondit, ni tajk, ni pejn, ni tsapkaaky, ni meeñ. Tu'ugyi mwet xminøjkxtit midi ixja mwet'ajttip. ⁴ Jøts ku mdøjk'amido'odit o mā pøni mā mja'atti, tu'ugyits jam mja'ta'aktit kunim jam mdsoonditnim. ⁵ Jøts ku mā pøn mgagupøkidit, tanaxtits ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tø mñañiwä'achidi.

⁶ Jøts idø'on ja yø'øwya'kxtøø, ñøjxxtøø o magajp, jøts ja jam tkajpxwä'kxti ja øgyajpxy ja ø'yayuujk jøts ja pamaa'y ja tyiktso'okti o mādsøo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tñija'wiyih'ñ sã jatyi ja Jesús wyinaty y'adi'ich, jøts ja ka'ap ti tãbyajtin tpaajty pømbi ja nimaajyip jøts ku ja Juan wyinaty tø yju-jkpyiky, ja' wyinaty tø pyidsimy jadigojk jap oo'kpi jutjøtpy. ⁸ Pømbits wändip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atsmendi, ja' nidu'ugin tø pyidsimy jadigojk. ⁹ Jøts ja Herodes wyaañ:

—Pø øtsimpts ja Juan kyubajk kø'øm nankyikwi-najkøø. ¿Pønts idø'on ndejin yø' ixa njamado'ity yikni-madya'aky janch ñigyumaap?

Jøts idø'on Herodes ja tjadyimwyin'ejxwaañ.

Ku ja Jesús yikaay ja nimagoxk milbi jaa'y

¹⁰ Xjats ku ja Jesús kyudanaabyi wyimbejtøø, ojts ja tyamimadyakixyi ti jatyi ja wyinaty tø ttundi. Winets ja ojts twaaðsøøñ jøts ja tmøøtnijky mā nipøn kya'ity jam Betsaida kajp wingon. ¹¹ Kuts ja jaa'y ja tni-ja'widøø, jøts ja ojts tpanøjxkti; kyupøjks ja Jesús ja' jøts ja ojts ttamimadya'aky sã ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyiktsøøjky may ja pamaa'y.

¹² Jøts ku ja et chuu'ñaã, xjats ja ñimakmajtskpi kudanaabyi ja ñimejnøø jøts ja ñimaajyøø:

—Kajxni yø mayjaa'y, jøts nøjkx pyoo'kxnidi jøts nøjkx t'ixaañidi ja kyaajyk yjøø'kxik o magajp midi ja wingon tãmp, nitits yã kya'ity mā adøm yaaði.

¹³ Jøts ja Jesús ja ñimaajyidøø:

—Yikaydi meets.

Jøts ja tnimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'on pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tnimaay ja pyabøjkipitøjkt:

—Yik'ixa'akti tukpik jatyi niwixikxmyajk jatyi.

¹⁵ Jøts idø'on ja jade'en tpadundøø, ojts ja jaa'y y'ix-akøxti. ¹⁶ Winets ja Jesús tñixajiyih'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamø-ja'wiyih'ñ ja Dios Teety. Jøts ku ja t'adujkajky, jøts ja ojts ttagødøki ja pyabøjkipitøjkt jøts ja mayjaa'y ja ttaguma'adyit. ¹⁷ Ojts idø'on ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujky.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'on ku ja Jesús jam wyinaty ja Dios Teety t'ajot'aty nadyu'uk, jamts idø'on pyabøjkipitøjkt ja pyawidityiyi jøts ja tyiktiy:

—¿Sã jaa'y wyaañdi kyajpxti, pønik øts idø'on?

¹⁹ Xjats ja y'adsoodøø:

—Pømbi wändip jøts ku mets Juan Bautista; pømbits wamidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyip jøts ja' nidu'ugin tø wyimbity jadigojk.

²⁰ Jøts ja tjaakyiktiy:

—Jøts meets, ¿sã mee mwä'añ, pøn øts yjawi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tñigajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyo'ødyit. ²² Yide'en ja yiknimaadyøø:
—Møk øts ja ayo'on nbaatt, ka' øts ja møjaa'dyøjx xkupøktit, ka' øts ja teetywindsøndøjx xkupøktit, ni ja kajpxwejpitøjkt ø xkagupøktit. Xyik'oøktip øts ja', ja kidigøøk xøøwts ø nbidsø'ømt jadigojk oo'kpi jutjøtpy.

²³ Jøts ku ja jade'en wyaañ, winets ja tniṃaay ni-
duki'iyi pøn jam wyinaty:

—Pøni pøn ø xpabøkwap, jawyeen ja kø'øm kyan-
abya'ayowit, jabom jabom øts ja xku'ayowit, ja'ats øts
idø'on xpabøkjp. ²⁴ Pønts kø'øm nabya'ayojip, pøn
kasaduñim nay'ejxip, windigøøpyts y'anmija'win ja y'i-
ty; pønts ø xku'o'jkp xkudigø'øyip, ja'ats ja yja' nøjx
nitso'ok'ajtp. ²⁵ ¿Ja ti ja ñiwyā'ant øy ja jaa'y tjaja'bøjk-
ixy ja naṃwiiñ'ajtin jøts ja y'anmija'win ne'egi
wyindigøy? ²⁶ Jøts pøni pøn ø xatsø'ødyump, pøni pøn
øts n'øgyajpxy n'øy'ayuujk xatsø'ødyuujnip,
nayide'ents øts ja tsø'ødyumbi nøjx ndatsø'ødyuñ, ku
ø nme'ent yikutujkpi, ku øts ja ndeety kyunuu'kxy'ajtin
nmimejnit møøt ja ankiilstøjk yja'adi. Øts idø'on ja
naṃwiiñ'it jaa'y nmøjkudanaabyi'ajtpy. ²⁷ Tiy janch mee
nnøjmi jøts ku jaa' ja jaa'y yā winaagin tyanidi, pøn
ka'ooktip kunim ja tyimy'uk'ejxtit sã Dios kyutujk
tmime'ent midi ja tyanitanip yjā'y.

Ku ja Jesús adsu'jky y'atstigajch amuum chamam- bøjkixy

²⁸ Tø dø'on ja wyinaty tyuktujkxøøwip jade'en y'uk-
jaty, jøts ja Jesús pyatøjkijiiñ jam kojpkøjxp Dios'a-
jot'ajtpi, myøødiyiiñ ja Pedro ja', møøt ja Jacobo jøts ja
Juan. ²⁹ Kuts ja Jesús jam wyinaty Dios'ajot'aty, xjats ja
wyeen y'aaaw ja tyigajch, jøts ja wyet ja ñaamy ja py-
oobiyiiñ tøø'kxim tsamambim. ³⁰ Winets jam kyaxøk-
tøø namajtsk ja jaa'y, ja'ats ja jam møøt myadya'aky, ja
Moisés idø'on ja' møøt ja Elías, ³¹ nabejk'ampy aju'uk
ja ñi'awidityidi jøts ja tkajpxy'atti ja o'jkin midi ja Jesús
wyinaty pyaatwampy jam Jerusalén. ³² Øy ja Pedro
møøt ja myigu'uk yjamaa'y'ookti, wijy'ejttip idø'on ja'.
Jøts ja ojts t'ejxidi ja Jesús y'aju'uk møøt ja ñamajtskpi
yja' nayide'endi pøn ja jam wyinaty møøt tyani. ³³ Jøts
ku ja jaa'y jam wyinaty jagamniði, jøts ja Pedro tni-
maay ja Jesús:

—Windsøn, ityimy'øy'ajtp ku øø nyam'aty! Nyik'øyip
øø tigøøk ja ujts'aadyøjk; tu'uk mets mja', tu'uk
Moisés yja', jøts tu'uk Elías yja'.

Ka'ap idø'on ja Pedro y'aaaw tjawi pø ti dø'on ja kya-
jpxy. ³⁴ Exam ja jade'en wyā'añ ku yoots jam ñaxki-
daajky, jøts ja janchø'jkidøø ku ja jap yoots agujkpy
ñay'ejxpajtidøø. ³⁵ Winets ja tmadoodøø ku jap yoots
agujkpy kyajpxy ku jap ñimy:

—Øts idø'on yā'at n'u'nk njanchøjkpy; mimadojidip
pøni sã wyā'añ.

³⁶ Ku ja wyinaty jade'en tø tmadowdiwyā'añ, xjats ja
t'ejxpattøø ja Jesús jøts ku ja jam nadyu'uk. Amøñi ja
y'ejtøø, ka'ap ja pøn ttukmadowdi ku ja wyinaty
jade'en tø t'ejxti.

Ku ja Jesús tyikmøkpjiky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajty, ku ja ojts kyidaknidi jam
kojpkøjxp, jøts mayjā'y ja Jesús yjopkubajtiyøø. ³⁸ Jøts
ja jam nidu'ugin møk'ampy ñimaajyøø:

—Windsøn, tun may'ajty, win'ejxik øts n'u'nk, yø'øyi ø
tu'ugyi n'u'nk'ajtpy; ³⁹ miku' idø'on yø xumitatøjkiyip,
jøts yø janchxumiyiktsabaayi, yikmo'jtniyip yø', jøts
janchyik'a'oo'pniyip tñankwyinwøpyi tñankjyøpwøpyi.
Nijade'ents kyamajtstu'udyi, am'iixyim tsaach'iixyim
yjaty. ⁴⁰ Tø øts yø mbabøjkpi njanøjmidi jøts jeexyip yø
miku' tyikpidsømdi, nika'ats yø tø myayidi.

⁴¹ Xjats ja Jesús wyā'añ:

—iMee kajanchjā'wibidi, yø mbøky nugo myikma-
jadaktip! ¿Mā windemnim meets ngajpxy n'ayuujk
xpabøkkit? ¿Windemnim meets yø jade'embisuktat-
so'okt ku øts yø ejtp njanchjanigajpx'ity? Mets, yikmen
yø m'u'nk.

⁴² Xjats ku ja mixy wingon myiñ, jøts ja miku' ja ojts
yiknaṃkida'agyiyi jøts ja tyukpatkojmiyi ja mø'ødyi;
winets ja Jesús ja miku' twingugajpxiyiñ jøts ja
tyikømøøy møk møjaaaw. ⁴³ Ñigyumaap ja jaa'y ja ni'ijtyi
tjā'widøø ku ja Dios ja myøk'ajtin jade'en tyikwin-
gaxi'iky.

Ku ja Jesús tnigajpxy jadigojk jøts ku ja y'ookt

Exam idø'on ja jade'en wyinaty ku ja Jesús tniṃaay ja
pyabøjkpitøjk:

⁴⁴ —Madowdi yā'at, jøts kidi xjā'dyigøydi nijuuni; øts,
yikøyakp øts jøts øts ja mayjā'y nyikttagøødkit.

⁴⁵ Jøts ja pyabøjkpitøjk ka'ap ja tjā'gyukidi ku ja
jade'en wyā'añ, jøts nika'ap idø'on ja ttuknimadøy;
tsø'jkimidipts ja' jøts ja tyiktø'ødit ti dø'on ja jade'en
tyijpy.

Pøn idø'on jawaani møj mā Dios ja yjā'y ja kyutujk ttanitani

⁴⁶ Xjats ja tkajpxy'ajtpinibøjkidøø pømbi jadyimy'uk-
møjtøkip, ⁴⁷ wā'ats ja Jesús ja tñijawi sã ja wyinaty
wyinmaydi. Winets ja ojts ttsa'anji'iky tu'uk ja mut-
sku'nk jøts ja ñadyawingudsaa'niyøø, ⁴⁸ jøts ja wyā'añ:

—Pøni pøn øts yā'at mutsku'nk xkupøjkxip, øts
idø'on ja wyinaty xkupøjkp; pøni pønts øts jade'en
xkupøjkp, ja'ats idø'on ja wyinaty kyupijkpy pøn ø xka-
jxp. Pønts kanamyøjpiktaajkip wine'enin meets ixaadi,
ja'ats idø'on nøjx møjtaajkip.

Ku ja Jesús wyā'añ: Adøm ja' nbudøjkibi pøni ka'ap adøm ja xmidsep'ajtyindi

⁴⁹ Xjats ja Juan tniṃaay ja Jesús:

—Windsøn, tø øø n'ixy tu'uk ja jaa'y tyikpidsimy ja
miku' mets mmøk'ajtingøjxp; tøts øøts ja ndukmajt-
stu'uty kumi ka'ap adøm ja xmøøtwidijtyim.

⁵⁰ Jøts ja Jesús ja ñimaajyøø:

—Kidi xuktamajtstu'utti; adøm ja' nbudøjkibi pøn
ka'ap adøm ja xmidsep'ajtyindi.

Ka'ap ja Jesús tyikajty sã wyā'andi ja Jacobo møøt ja Juan

⁵¹ Jøts ku ja et ja xøøw tpaajty ku ja Jesús wyinaty
ñøjkwani tsajpøtpy, xjats ja jotmøk'ampy chøø'ñ jøts
ja ñijxxy jam Jerusalén. ⁵² Ojts ja tkajxjawyeni kyuga-

jspx, jøts ja ñøjktøø jam Samariit etjotp jøts ja jam t'ixaajyidit ja yjā'taajk; ⁵³ ka'ats ja Samariit jaa'y ja tkupøjktøø ja'agøjpx ku ja tñija'widøø jøts ku ja ñiijkxy jam Jerusalén. ⁵⁴ Kuts ja Juan ja jade'en t'ejxtøø møøt ja Jacobo midi ja pyabøjkp'ajtpy, jøts ja ojts ñii'mxyi:

—Windsøn'ajtm, ztuñ øø nayide'en sam ja kugajpxy Elias y'adiijch, n'amido'op øøts ja jøøøn tsajpjtøpy, wan yø jaa'y tkudigøøgyøxti?

⁵⁵ Jøts Jesús ja nugo twin'ijxy jøts ja møk'ampy twin-gugajpxiyii'ñ, yide'en ja tñimaay:

—Ka' meets yjawi xja'gyukidi pøn meets myøk'ajtin mmøøt'ajtxiyip. ⁵⁶ Nmøjkudanaabyi'ajtpy øts ja naxwi-i'ñit jaa'y, kaja'ajip ø tø nñimiñ jøts øts ja jaa'y nyik'oookt nyiktigø'øty, ja' ø tø nñimiñ jøts øts ja jaa'y nyiknitso'ok'att.

Xjats ja choo'ndøø jøts ja ñøjktøø abikyajp.

Ja jaa'y pøn tpawidetwandip ja Jesús

⁵⁷ Jøts ku ja wyinaty jam tyuu'yø'odyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjxpx mets o maðsoo pøni ma me mnijkxy.

⁵⁸ Jøts ja Jesús y'adsøøy:

—Ne'egi jaa ja waaix ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'on ma n'ønø'ønt.

⁵⁹ Xjats ja Jesús jadu'ukpi jaa'y tñimaay:

—Møødik øts.

Jøts ja wyaañ:

—Windsøn'ajtm, wan øts ndeety jawyeen t'atsyik-naxøki.

⁶⁰ Jøts ja Jesús y'adsøøy:

—Majtstu'ut, wan ja tyikpidø'økti ja myi'oo'kpi pøn y'anmija'win jajujkyi tø tyik'oo'knidi; jøts mets, nøjx mets ja Dios y'øgyajpxy y'øy'ayuuik xkajpxwā'kxi.

⁶¹ Jøts ja jade'en ñimaajyøø:

—Windsøn'ajtm, nmøødiwyampy mets, nijkxy øts nmigu'uk t'atstukmadøy, nijkxy øts t'atsnagayajpxpid-simy jawyeen jap ndøjkjøtpy.

⁶² Jøts ja Jesús ja tñimaay:

—Ku jaa'y yu'uy, ja' ja y'ijxy ja tyunk; pønts ejxim-bejt'adøtsp, tits ja nyikwā'anint. Jade'ents idø'on ja Dios wyingujkp ma ja tñanitani kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwyā'ant.

Ku ja Jesús tkajxwa'kxy ja ñidugui'pxmyajkpi jaa'y

10 Jøts ku ja jade'en y'ukjajt, jøts ja nwindson'ajtm twiwiijch ja ñidugui'pxmyajk ja yjaa'y, jøts ja tpagejxy namajtsk jaty. Jade'en ja ojts tyiknijkxy o magajp ma dø'on ja kø'øm wyinaty ñøjkwā'añ, ² jøts ja tñimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky. ³ Nøjx-tits meets; jade'enxi mee mnøjkxt sam borreek ñiijkxy ma may miy'uk jamdi. ⁴ Ni mbejn xkawetstit, ni

mmeeñ'abøjki'i'ñ, ni mgø'øk, niti xkako'ondit; jøts kidi pøn xmi'øømayidi xmigajpxmayidi ku pøn xkajpx-poo'kxtit tuu'ajy. ⁵ Jøts ku ma mja'taajk x'ami-dowa'andit yide'en jawyeen mgajpxpoo'kxtit: "Ma meets, Dios mjagyepyyidi." ⁶ Pøni jamts pøn jotøjkiyip ja Dios, ja'ats idø'on Dios janchjagyapip; pøni ka'ats pøn m'adsojimbejtxiyidi ja mgajpxpoo'kxindi, anaxtits ja tøj. ⁷ Jøts jam mda'andit ja' tyøjkjotpti pøn Dios jotøjkiyidip, mga'adyip mjøø'kxtip idø'on pøni ti ja mmøøjyidip, mbaat'ajttip ku jade'en myikmo'odit. Kid-its tøjkp tøjkp nugo mwidetti. ⁸ Ku o magajp mja'attit, pøni ma myikupøkti mga'adyipts mjøø'kxtipts ja' pøni ti myikmøødyip; ⁹ myikmøkpøktip ja pamaay jam, jøts ja jaa'y xnøjmidit: "Jaani Dios kyutujk ya midi ja tyani-tanaapy yjaa'y, ja adøm ja nmøøt'ajtna'andi." ¹⁰ Kuts ma ja kajp xpaattit ma mgayikupøktit, yø'øpyidsømdits jam jøts tuu'am mnø'ømdit: ¹¹ "Pu'uxpaat øø ndekyijxy tø tyā'tspøjknidi miidi ja kajpøøjty, ixyamts øøts nyik-wā'ach meets køjxp, ejxti sā x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøñidi miidi ja tyanitanaapy ja yjaa'y." ¹² Ixyamts mee ndukmadøy jøts ku nøjx ja tiidyu'unin ñaxy, ne'egi ka-jaa yø yjade'embi jaa'y ja ayo'on tyimbyaattit, jøts nigidi jade'en y'ayo'ombaatit ne'egi ja kawindi yaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ 'Corazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidi! Ku jeexyip jam kajpjotp jam Sidón jam Tiro ne'egi yiktuñ ja mila-gri'ajtin miidi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tyimchaachjawidi. ¹⁴ Kuts nøjx ja tiidyu'unin ñaxy, mgu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidón, ¹⁵ jøts meets Capernaumit jaa'dyi, zma mee xijy tø mdyimyja'aty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkipitøjk ja tñimaay:

—Pøni pøn mbatmadojidi, øts idø'on ja wyinaty xpatmadoodip; pønts mgagupøjkidip, øts idø'on ja wyinaty xkagupøjktip; pønts øts jade'en xkagupøjkp, ja'ats idø'on ja wyinaty kyagupøjktip pøn ø xkajp.

Ku wyimbejtøø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanch-wimbejtnidøø, jøts ja wyandøø:

—Windsøn'ajtm, tøbaat øøts ja mikku' xmimadøy ku øøts ja tø ngajpxpidsimy mets mmøk'ajtingøjxpx.

¹⁸ Jøts ja Jesús ja tñimaay:

—Janch jade'en, ojtsts øts ja mikku' n'ixy ku ja kya'uk-majadañi ja myøk'ajtin ja'agøjpx ku ja pyidsiimy jap tsajpjøtpy. ¹⁹ Øtsts meets ja nmøk'ajtin tø nmø'øy jøts ka' sā mjaattit. Øy meets ja tsaa'ñ øy meets ja kajpy xjadawa'kpety, øy meets ja mikku' ja myøk'ajtin sā mja-datunwā'añidi, mimajadaajkip meets yja' ja' jøts meets ja ka' sā mdunit. ²⁰ Kidits yø'øyi tu'ugyi xajotkujk'atti

ku yø miku' mmimadøyidi, ja' mdajotkujk'attip ku ja Dios m'ejxkapyidi xemikøjxp jap tsajpjøtpty.

Ku ja Jesús xyonda'aky

²¹ Winets ja Jesús tjantaxondaajky ja Espíritu Santo, jøts ja wyaañ:

—Dios Teety tsajpjotpit, yikjujky'ajtpi ya ñaxwiiñ, nmøjā'wip ngunuu'xxyjā'wip ja'agøjxp ku tø xamid-søky o pøn ja mnitsoojkin, jøts yø wijyjā'y ja tø tkajā'gyukidi kø'øm, ne'egi tøts ja xuk'ixy xuknijāwi pøn idø'øn ka'ejxiyimdi. Jade'ents Teety tø xuiñ sā kø'øm xamidsøky o pøn.

²² Tum ja' øts nDeety xuktump midi ja kø'øm tyunwampy. Ka'ap øts pøn wā'ats xnijāwi sam øts nDeety kø'øm xnijāwin, nika'ats øts nDeety pøn wā'ats ñijāwi sam øts ja kø'øm nnijāwin. Jøts pøni pøn øts ja nduknijāwiwyampy, ja'ats tnijāwidip ja Dios Teety.

²³ Winets ja pyabøjkpitøjk ja twin'ejxji'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyimy'ijxy xtyimñijāwi midi meets ixa kø'øm mdyimy'ijxpy mdyimbyatpy; ²⁴ may Dios kyugajpxy, may windsøndøjk yø kø'øm tja'ejxwändøø tjānjāwiwya'andi midi meets ixyam kø'øm m'ijxpy mnijā'wip, nika'ats ja t'ejtøø; øjts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jāā'y yjotwā'āñ

²⁵ Xjats tu'uk wyā'kukiyiñ'ñ ja kajpxwejpidi jøts ja nugo kajpxy'ejxwā'āñ ja Jesús, yide'en ja tyiktiy:

—Windsøn, ¿sudso ø ndu'unt jøts øts n'anmijā'win ñitso'ok'att xemikøjxp?

²⁶ Jøts ja Jesús ja y'adsojimbejtøø:

—¿Kidimts jap tø x'ixy nøkyjøtpty midi ja Moisés kyu-tujk myøøt'ajtpy, sā ja xjā'gyuki?

²⁷ Jøts ja kajpxwejpi y'adsøøpy jøts ja wyaañ:

—"Amumjoojt x'ajot'att ja Dios, mā'in m'anmijā'win mā'in mwinmāā'ñ myajada'aky jade'en ja xwind-sø'øgit; jøts nayide'en ja mmigu'uk xpa'ayo'ot sam kø'øm mnabya'ayøyin."

²⁸ Winets ja Jesús ja ñimaajyøø:

—Tiy janch idø'øn mjāchwā'āñ. Pøni mbadumpy yø jade'en, nitso'ok'atpts ja m'anmijā'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsø, jøts ja tnimaay ja Jesús:

—¿Pøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøøpy jøts ja tnimaay:

—Tu'uk idø'øn ja jāā'y, jam ja wyinaty kyida'aky mā ja Jerusaléngit tuu' jøts ja ñijxxy Jericó, xjats maa'tspi ja pyajttøø jøts ja wā'ats yikwimaa'tskijxy, wyet ñāamy yikpøjkijxy; øy øy yikwínwøjpy yikjøpwøjpy jøtsnim ja yiknikejky, jawaani ja tkayik'oo'knidi. ³¹ Xjats jam jot-møñ wyinaajky nay jam tu'uk ja israelit teety; øy ja tja'ijxy, wyināajky ja'. ³² Jøts jadu'uk kyida'akmøø ja Levi yjāā'y jøts ja nayide'en twināajky, øy ja tja'ijxy.

³³ Winets jadu'uk ja tuu'yø'byi kyidaajky Samariit jāā'y, jøts ku ja øjts jade'en t'ixy xjats ja wyinmāā'ñ ja

tyimchaachmiiñ ku ja jade'en yik'ayowim. ³⁴ Jøts ja wingon twingunøjkxyiñ'ñ ja tsaachi, xjats chaachi ja tsøøyi, øjts ja tpiktaajki ja aceite møøt ja vino jøts ja t'adsujmi ja chaachi. Winets ja øjts tyikpety kyø'øm jiyujkøjxp jøts ja øjts tyikjā'aty ja'atpjøtp, jamts ja tpa'am'ejx tsunajxy. ³⁵ Jøts ku kyimjabom'ajty ku ja samariit jāā'y wyinaty choonwani, jøts ja tju'jty majtsk ja myeeñu'nk jøts ja tkømøøpy ja kudøjk, yide'en ja tni-maay: "Ejx'et yø jāā'y, mo' pøni ti ka'ejtxip, jøts pøni ka' yø meeñ tpaaty ixa nmø'øpy, yiktunts mgø'ømeeñu'nk, ja øts ja ngubatt ku nwimbett jadigo-jk."

³⁶ Xjats ja Jesús tyiktiy:

—¿Pønts me m'a'ejxip migu'uk'ajtpi ja jāā'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtpi pøn ja øjts y'ayo'ijxyi.

Jøts ja Jesús ja ñimaajyøø:

—Nøjkxts jøts nayide'en xu'unt, jøts nayide'en mjāā'y'att sam ja jāā'yi pøn ja myigu'uk øjts t'ayo'ixy.

Ku ja Jesús yjā'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yjā'jty mā kajp wyinaty tu'uk, jamts ja tø'øxyøjk ja tu'uk wyadsoøø jøts ja øjts wyayi tyøjkjøtpty, Marta dø'øn ja xyøøw.

³⁹ Jamts myiga'ax ja tu'uk, María'ajtpi ja', ja'ats twin-gu'ixajkiy'ñ ja Jesús jøts ja tpatmadøø pøni sā ja wyā'āñ. ⁴⁰ Jøts ja Marta, ja' ja jam kyami'awatsip ja tyøjktunk, jøts ja tñimiiñ ja Jesús jøts ja tñimaay:

—Windsøn'ajtim, ¿kidi sā mwa'āñ ku øts yø nmigu'uk nadyu'uk xuktunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøøpy:

—Marta, Marta, yø' me nugo mdajotkijxpy mdajot-may'øø'kpy yø mdunk. ⁴² Ka' mets yø ne'egi x'øyjāwi yø øybi winmāā'ñ midi xemikøjxp tæmp, ja'ats yø María tø tja'gyuki midi paat'ajtpi. Ti pønts yø xijy ukpøjkxiniyip jadigojk.

Ku ja Jesús tnanky'ixpiki ja Dios'ajot'ajtin

11 Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtiy'ñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sā ja Juan ttukjajty ja Dios'ajot'ajtk ja pyabøjkpitøjk.

² Jøts ja Jesús y'adsøøpy jøts ja wyaañ:

—Ku mdsapkaajpxtit, yide'en mwa'āñdit:

Dios Teety tsajpjotpit,

kuuyi mets jadu'uk øy wā'ats.

Øyts ku xmimiñ ja mgutujk midi mdanitanaapy ja mjāā'y.

Yikjatts yā ñaxwiiñ nayide'en kø'ømsojkingøjxp pøni sā xamidsøky nayide'en sam jap xuñin tsajpjøtpty.

³ Møøkyts øøts ixyam ja ngaajyk n'uujkik midi øøts xka'ejtxip.

⁴ Maa'kxik øøts nbøky, kumi tø øøts nayide'en nmaa'kxuky pøn øøts xjemdump xedump.

jagam et ja Salomón, jøts ja t'eixxø tñija'wiyøø ja wyijy'ajtín; ixyats jaduk tø kyaxi'iky jawaani wijy midi tjinajxp ja Salomón, nayide'ents meets ja xkagupiky.

³² Nay jats ja Nínive jaa'y wya'kukidit ku ja tiidyu'unín ñaxt ku yiktiidyu'undit yá'atpi jaa'dyi, jøts yikni'øonidit; ja'agøjxp ku ja Nínive jaa'y ne'egi tyiktigajstøø ja chinjaa'yindi ku ja Jonás ja ojts tyukmadøyidi ja Dios kya-jpxy ja Dios y'ayuujk; ixyats jaduk tø kyaxi'iky pøn tyimñija'wip wá'ats, nigidi ja Jonás y'ijty jade'en tñijawi, nayide'ents meets ja yam xkagupiky.

Ja øy jaj midi jaa'y tyikja'gyukip

³³ 'Ka'axi pøn jaj ttuknidøøbyøki jøts ja yikyu'utst o mā, uk jøts ja yikujpt kajuun patki'py, ja'agøjxp ja tyøøbyiky jøts ja yikpikta'akt mā yjajt, kuts jam pøn tyøkit tyuk'eixpaatpts ja o ti. ³⁴ Jade'en idø'on yø mween n'ukpiktaajkint sam jajin, yøøts tyikujajtaajkip tyikudøø'kxaajkip amuum ja mne'kx ja mgojpk; kuts ja mween y'øy'aty nayide'ents ja amuum tjagyejpy ja ne'kx ja kojpk, ka'ap ja ttuktuñ kya'øybi. ³⁵ Øyimts x'e-jxtit jøts kidi xyik'ookti ja jaj midi wá'ats jajp, jøts kidim jade'en mjattí sam jaj kya'ityin, sam ja jajin midi kawa'atsjajp jøts yik'ayowin kube'ets kugoots. ³⁶ Pøn mwinmaa'nbyattipts øy yikxon, ja jajts idø'on ndejint mgayik'oo'ktip jøts ka' jade'en m'etti sam o pøn kugootstujpy chøonin niti winmaa'ñ, o nugo chaach-jawin'eix'ookti. Kuts meets, wá'ats meets ja mduk'eixpaadyidi pøni ti dø'on m'eixwandip, ka' ti jaduk chøkyi, jade'en ja myikujajtaagyidi myikudøø'kxaagyidi sam jaj wá'ats mduk'eixpaadyidi o ti.

Ku ja Jesús ttamigajpxy sá y'adø'øtsti ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtiyñ, xjats fariseo ja tu'uk wyaajøø tyigam kaabyi. Kuts ja jam tyøjkiyñ jøts ja y'ixaajky, kaabyajt twinguwa'atsiyñ. ³⁸ Jøts ja fariseo janch ñigyumaap tyimyjá'wiyñ ku ja t'ijxy ja Jesús kyagøbujy yam ja kyaawya'andi, jade'en idø'on ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwá'atsajttip ku ja kyøbujti, jøts ja kyapøkyatti. ³⁹ Yide'ents nwindson'ajtim ja tñimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkupip sudso ja texy ja tas nikijxyi nadyijyi wá'ats y'ett, jøts ka'ap ja xunk'atti pøni sadam ja yjøtpty. Ni xkaja'gyukidi kudam m'amp mjotp tum ja axøøkpí yigaappi xjamøø'atti ku jaa'y nugo xwin'øøndi xwimaatsti. ⁴⁰ iNugo mee mdyimyo'oty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky? ⁴¹ Jade'eñi Dios mgupøkiyidit ku amumjoojt mdsojkingøjxp xunk'attit ja pudøjkin. Jade'en ja m'anmija'win ja wá'atsajtin tpaattit.

⁴² iMjanch'ayøøy me fariseotøjkti! Køx kidä'ak meets xjanchkugubatkixy jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy, ku ja ttsøky ja øy tiidyu'unin, ja pa'ayo'ejk, jøts ja janch-

ja'win. Yá'atpi meets idø'on ne'egi jawaani mjapaat'ajtip mbadu'ump.

⁴³ iMjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptøjk'okp windsønín. Jøts ku tuu'ajy, øy paat meets ja nagyajxpoo'kxi xtsokti, myikwindsø'øgip myikwinjawiip meets, ejxim meets jadi'iñi myikwinajxni.

⁴⁴ iMeets tsaach'atayjaa'dyi, jøts m'ayøøy mee kajpxwejpitøjkmidi! Jade'en mee mñankyaxji'igyi sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpty.

⁴⁵ Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwá'añ xuk'ayojip øøts yø nayide'en.

⁴⁶ Jøts ja Jesús yide'en y'adsøøy:

—iMjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja køøm x'uktuni, ja pujx ja kajp meets ja mdukmidanaapy, kamadøyim meets ja x'ukja'wiñi.

⁴⁷ iMjanch'ayøøy meets!, ku yam xjanch'ukyik'øyidi xyikpaadidi ja oo'kpi nipots pøn ja m'apteety yik'ooktøø, ja Dios kyugajpxy. ⁴⁸ Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjawi xyik'ejtni møøt ja mdeety'apti ku ja tyik'oo'ktøø ja Dios kyugajpxy, jøts meets ixyam xyik'øyimi xyikpajtimi mā ja ñaxøjkidøø. Mdsaaachpa'ayøøpy meets ja xijy jade'en.

⁴⁹ 'Paty tam idø'on ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaaagin; jøts pønts jaak-jata'andip, myik'ayo'ombaattipts meets ja'.” ⁵⁰ Meets Dios ja mdagubatidip wine'enín íxa mñaxwii'ñit-jaa'y'atti ku ja m'apteetyi tø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'onaaajky, ⁵¹ kuuyip ja Abel t'oo'k'awiyñiñ jabaat ku ja Zacarías y'o'jky, ku jaa'y ja yik'o'jkøø jap tsaptøjkjøtpty mā ja altajr jap. Paty me ndukmadøy jøts ku Dios ja ttabayø'øty ja yamit naxwii'ñit jaa'y.

⁵² iMjanch'ayøøy mee kajpxwejpitøjkti!, ku x'amá'at'ajttidi ja Dios kyutujk; køømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjani-jawiwiyandip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantyim'ambøjktøø. Jantyimyik-mi'ambøjk ja Jesús jøts ja tanejkin'ampy tjantyimyik-tøwdi ñadyijyi tigati. ⁵⁴ Øyik idø'on ja ti t'ukmado'odit, y'amaa'tsk'eixwandipxi ja' jøts ja jatyi ttani'øonidit pøni ti ja kya'uk'ømyadoodip.

Ku ja Jesús tñigajpxi ja fariseotøjk kya'øwyinmaa'ñ jøts yikjøpjawit

12 Yikxon ja jaa'y yjantyimñañimujkpajtidøø mil'ampy, nugo yjanch'adøtsnidi, xem yam yjanchnadyateeñidi. Jøts ja Jesús ja pyabøjkpitøjk tni-maabyinaxwa'jky:

—Øyim mnay'eix'tetidit ejxim yø fariseotøjk kya'øwyinmaa'n mdawin'iifidi ti sa yø iiy wyanidi, jabi wa'atsts yø iiy ñadyiyidi. ² Wants uk jade'en, ka'axi ma ti yu'uch'ity, kuwanixi ja øy juuni yjadyimykpaaty; uk kuts o ti yjayik'amaa'tsk'aty, kuwanits ja yiknijaw. ³ Jade'en'ampy ja wa'ats nøjkx yiknijaw ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'knit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjagadukmadøy, wa'ats ja nøjkx yikajpxnaxy ejxim ti tøjxjpx yikajpxwa'kxyin jøts yiknijawit.

Ku ja Jesús tnigajpxy jøts ku ja tu'ugyi pøn yiktsø'ogip

⁴ Mee migu'uktøkjt pøn jaty ø xpabøjkp, meets idø'en nnimaapy jøts kidi xtsø'ogidi ja yik-jaa'y'oo'kpidi, pø ka'axi anmija'win ja tjadyimyk'ookti øy ja wyinaty tø tjayik'øøky ja ñine'kx. ⁵ Ja'ats mee ndukmadoowampy jøts ku ja' xtsø'ogidit ja Dios pøn tyikutujkp jøts mnøjkxtit ayodaajkjøtpy yam meets ja o'jkin tø xja'ixy. Ja'ats idø'en mdsø'ogidip.

⁶ Ka' meets Dios m'eixigøyi, zti sa ja nimagoxkpi joon chobaaty jøts ja yiktagujuy majtsk ja puxmeeñ? ⁷ Machøybaat meets mwaay ja myik'ejtniyi. Paty ka' mdsø'ogidit, ti sa ja mutsk jonunaj'k ja tkaja'dyigøy; maçts meets ja ndejint mja'dyigøø'niyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ Yikxon mee x'ukmado'ot, pøn ø xpukajpxip, pøn wamp mayjaa'yjøjty jøts ku øts ja xpabiky, nayide'ents øts ja møk nnitanit jam Dios wyingujkp ma myay'ankilis ja jam møøt; ⁹ pønøts ø xkabukajpxip, pøn wamp mayjaa'yjøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp ma may'ankilis ja jam møøt.

¹⁰ Jaakyikmaa'kxtip ja ne'egi pøn ø tø xkaguidy-imy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espiritu Santo.

¹¹ Kuts pøn myiknøjkxidit jam tsapøjkjotp uk myik-waønøjkxtit ma kutujktaajk ma kudunk ma tiidyumbi, kidits meets ja xajotmay'oo'kni, kidi meets ja xkumay-jawi sa dø'en jap mwā'andit, sa dø'en jap m'adso'odit, ¹² pø ja Espiritu Santoxi meets ja mda'awa'aniyip pøni sa dø'en jap mwā'andit, ja' meets jap myikajpxiyip ku tpaatt ja et ja xøøw juuni mgajpxtit.

Sa ja kumeeñ'ajtin xyikwinmaa'nmya'jtint

¹³ Xjats jam tu'uk wyaañ jam mayjaa'y agujkp jøts ja tnimaay ja Jesús:

—Windsøn, nimaajyik øts yø nmigu'uk jøts wan ø xmø'øy ja nmaay.

¹⁴ Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxiyit, uk jøts øts jade'en ndu'unt sami kudungin.

¹⁵ Nayide'en ja wyaañ:

—Øyim x'ejxtit, nay'eix'tetidim jøts kidi o ti kayakyim x'ejxti, kaja'ajip jaa'y ja y'anmija'win tyajujky'ajtpy xemikøjxp ku pyikta'aky ja may'ampy tmøøt'aty.

¹⁶ Jøts ja yide'en tmadyakpaaty tu'uk ja ejxpajtin madya'aky midi ja kø'øm ñajtsja'wip jøts ja yiktamija'-gyukit midi ja ñimadya'akwampy, jøts ja wyaañ:

—Jaa dø'en wyinaty tu'uk kumeeñ jaa'y jøts janty-imy'ejtp idø'en pyikta'aky ja jam kyamjotp. ¹⁷ Winets ja tniwinmaa'yiyii'ñ jøts ja wyaañ: "Zti sudso ndabyaatt, sudso øts yø nbikta'aky ndu'unt? Ka'ats øts n'abøjk'i'ñ ma øts yø nbøjkjø'økt." ¹⁸ Jøts ja yjaakwaañ: "Tø nniwin-mayi sudso øts yø ndu'unt. Yø ndsa'jx tam ø nyikida'ap jøts ø nyik'øyt jawaani møjpi, japts øts ja nbikta'aky nbøjkjø'køxt ti jaty øts ja nmøøt'ajtpy. ¹⁹ Winets ø kø'øm nnañø'ømxiyit: Ja tidsik winmaa'ñu'nk xijy mjadyimyjadsøjkpy jabi icyats may pikta'aky midi kawin-ñaak jumøjt m'ajot'atp; poo'kx pøk mets, kay uuk mets jotkujk xoni." ²⁰ Yam ja wyinaty jade'en wya'añ jøts Dios ja ñimaajyøø: "Jaa'gyumo'tpi, icyam koots inet m'oooknit; jøts midi jap tø xpøkji'iky, zpøn yø tjā'atp?" ²¹ Jade'en idø'en jaa'y yjaty pøn ja pyikta'aky nugo tniøkpaajtp jøts ja ya jotkujk ttuktanaxy ja et ja xøøw, ayoopts ja y'anmija'win ja yjaty jam Dios wyingujkp ja agøjxp ku pyikta'aky ja ya kø'ømyi tø t'ajot'aty.

Ku ja Dios t'ejx'ity pøn jaty ja y'u'ngip y'una'jkip

²² Xjats ja Jesús oojknim tnimaay ja pyabøjkpitøjk:

—Yikxon ndukmadowdi: Kidi nugo xpamaydi xpadajti ja mgaajyik m'uujkikti, ti mnidsøønidip, ni ja mwet ni ja mnaamy mee xkaguma'aty ti mwet'attip.

²³ Zti jade'en ja jujky'ajtin yikpaaty sam ja kaaky jii'kxyin? Pø ka'axi. Zjøts ja wet ja naamy miabaat ja t'uk'amibaat nayide'en pøni sa dø'en ja ne'kx ja kojpk yikmøøt'aty? ²⁴ Ejxti yø jøøky, ka'axi yø ñe'epti kyojti, ka'axi pyikta'aky yi tyikpidø'økti, ka'axi pyikta'aky yø tøkjø'økti jøts tpiakta'aktit jap tsa'jxjotpy; øy yø jade'en yjagatundi, ja Diosts yø yikjujky'ajtidip. i Tits mee mdsow sa ja jiyujk jade'en ja yja' yikmo'odi! ²⁵ Zpøn kø'ømdsøky tyimy'uknankyojnip jagujkp metrin øy ja mabaat jade'en tjadyimyjatsøky? ²⁶ Pøni ka'ats tam ja jade'en yjaty, ztigøjxpts ja yikmijot-may'ookt?

²⁷ Uk'ejxtim sa o ti pijy yøñ, zti pee'tip kojtip yø'? Jøts tiy janch meets idø'en nnøjmi jøts ku ja windsøn Salomón nijade'en kyanaxyøjxøø sam yø pijyin, øy ja mabaat tjabiktakijxy ja xyox. ²⁸ Sats idø'en ja Dios jade'en txøxy ja pijy midi jaty icyam o maðsoo yondip øy ja jabom yjayikniçsaañit; kuts meets, ztiku meets idø'en ja mgaxoxit? Zsudsø meets ja xpamay xpadajty jaty mga'ejtxiyidip? ²⁹ Paty wingujk jotkujk mwidettit, kidi meets ja xkumayja'wiñi ma xpøktit ti mga'adyip m'uuktip. ³⁰ Jade'en naxwii'ñit jaa'y icyamdi pøn ja Dios yja' tkaja'gyukidip, ja' pyawidejtip tpamaydi tpadajti ja pikta'aky ti jaty chojktip; kuts meets, wa'ats meets Dios Teety mnijawiyidi ti jaty mga'ejtxidip.

³¹ Ne'egi kupøjkidits ja Dios chinaa'yin ja kyutujk midi ja tyanitanaapy yjaa'y, jade'ents meets ja mmo'ojidit ti jaty mga'ejtxidip.

naty kə'əm tə t'ukyk'ookti midi ja wyinaty kə'əm tə ty-
oxti. ² Jəts ja Jesús wyaʔaʔn:

—Jade'en mee mwinmay jəts ja' ja Galileit jaa'y kyujajtidip jade'en ku ja yjantymbyoktyundi sam jam jade'en ka' pən jam y'etjotpti kyajpjtpti. ³ ōts wamp jəts ku ka'; ti pən idə'on ka'ookp, nayide'en mee m'ookt pəni ka' mdsinaa'yin xyiktigatsti. ⁴ Jade'en meets yjawi mwinmaaʔi, ja jaa'y pən oo'ktəə nimak-tuktujk ku ja pəch ja pyajtidəə midi wyinaty janch kəjxp tanaapy midi yiktejp Siloé, jade'ents meets yjawi mwinmay jəts ja' ja kyubajtip ku ja jawaani pəky tya-jə'adyidi sam ka' pən pən jaty jam Jerusaleń tsi-naadyip. ⁵ Nəmp̄ts ōts ku ka'; nayide'en mee m'oo'kəxt sam ja'ajindi pəni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midi' katəəmip

⁶ Xjats ja Jesús ttamadyakpaaty tu'uk ja ejxpajtin madya'aky jəts ja wyaʔaʔn:

—Tu'uk idə'on jaa'y, jamts ja y'iigi tsə'am kam ja', ja'ats ja y'ats'ijxpy pəni tə də'on ja wyinaty tyəəm̄i, jəts ja ni tu'ugin tkapaajtəə ja tyəəm̄. ⁷ Jamts idə'on tyumbi tu'uk pən ja kam t'ejx'ejtp jəts ja tnimaay: "Ukmad-owim, tigəək juməjt ōts ɪxyam kujk njamiyə'əy jəts ōts ja iigi tsə'am njatukwa'aʔn, nijuun̄ts ə ni tu'uk ngapaa-tynim. Yikidaagəjxn̄ts yə ŋiguip; nugots ja najaix yə yjawi tyikwindujkni." ⁸ Jəts ja kam ejx'ejtpi y'adsəy jəts ja wyaʔaʔn: "Wanimts, windsəon, tjaak'uk'ity jadukjuməjt; n'ukuyu'up ōts, n'uktajyuu'ngip ōts yə najaix jəts ōts ja pu'uty nbiktajkit. ⁹ Kidi wan jade'en tyəəm̄i; pəni ka'ats, winets yikpo'jtjə'əkt."

Ku ja Jesús tyikməkpiky tu'uk ja tə'əxyəjk poo'kxin xəwəw et

¹⁰ Jəts idə'on ngəjmyi, poo'kxin xəwəw wyinaty, jəts ja Jesús yik'ixpiky jam tsəptəjkjotp. ¹¹ Jamts idə'on tu'uk tə'əxyəjk myaktuktujk juməjtip pə'am ja wyinaty tə pyajtniyi. Jəts ja jadine'en kyatsə'əky, tə ja yjigujxkidiyigəəni, miku' idə'on ja wyinaty jade'en tə tyuʔni jəts ja niwine'enin kya'ukoogukini. ¹² Ku Jesús ja y'ejxi, winets ja yaajiyi, xjats ja ŋimaajyəə:

—Tə mbə'am mniwəajtsniyi, mək məjəawni mets.

¹³ Jəts ja ojts tkənixajy, jəts ja tə'əxyəjk nay jatyi ky-oogukiyi'ni jəts ja tiy tyəəni jadigəjk, winets ja ttukmi-jə'wiyi'ni ttukunuu'kxyjə'wiyi'ni ja Dios. ¹⁴ Jəts ja mə-jaa'y midi tnigubajk'ajtp ja tsəptəjk tjantjami'ambijky ja Jesús, tigəjxp ku ja yiktsə'əky poo'kxin xəwəw, jəts myigu'uk ja tnimaay:

—Paty tu'unin xəwəw jaa tudujk xəwəw tə yikpikta'əky jəts jaa ndu'unindit; mendits əy juuni nugo ku kyapoo'kxinxəwəwi, jade'en mme'endit pən jaty ja nankcho'ogi tsojktip.

¹⁵ Jəts nwindəon'ajtim yide'en t'adsəy:

—Mee win'əəmbidi, ɷm'ukyk'ijtpy meets mjiyujk mdsakaa miwə'əmbety, jəts adəədsi xyik'etti ku pyoo'kxinxəwəwi? ɷTi kidi meets ja xyikwinaky jəts meets nəə ja xaniwəpy? ¹⁶ Tits yə'ət tə'əxyəjk kyubatp ku yə

kyatso'əkt ku poo'kxin xəwəw, pə Abrahamts yə ty-eety'əpip jəts ja miku' yə myaktuktujk juməjtip yik-pə'əmbajtniyi, ɷsudsə'əmpyts yə kyaməkpəkt əy yjapoo'kxinxəwəwi?

¹⁷ Ku ja Jesús jade'en wyaʔaʔn, jəts ja myidsep chə'dyunbətəə; jəts ja mayjaa'y tyaxondəktip ja' ku ja t'ejxti jade'en ja Jesús myək'ajtin tyikwingaxi'iky.

Ku ja Jesús tmadyakpaaty ja mortəs təmt

¹⁸ Yide'ents ja wyaʔaʔn:

—ɷTixik ja y'ukyk'tami'ejxip ja Dios Teety kyutujk midi ja tyanitanaapy yjaa'y? ɷTixik jade'en? ¹⁹ Jade'en idə'on n'ukpiktaajkin ja' sə məj mortəs təmt midi ja jaa'y wyəjpy kyamjətpy, kuts ja myuxy jəts ja jade'en yəñ səmə o ti məj kipy yəñ paxax paxax, jamts ja joon kyəxke'eky jəts tyik'yibəət pya'an ja jam mə jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinəəm ja Jesús:

—Tixik ōts jadu'uk n'uktami'ejxip ja Dios kyutujk midi ja tyanitanaapy yjaa'y. ²¹ Jade'en idə'on ndejnt sə ja levaduri midi yiktamiməə'kxip ja ariin way jəts ja amuum tyakaagiyi, jəts ja jich yaakt.

Ja mutsk tək'aaw

²² Xjats ja Jesús ŋajxy jəts ja jam ojts ŋijkxy Jerusaleń, yik'ixpəjkp yik'ixpəjkp idə'on ja', pəni mə jaty kajp ja tpaaty ja məj ja mutsk. ²³ Winets ja jaa'y ja tu'uk yik-təjəə:

—Windsəon'ajtim, ɷjanch niwaani də'on ja jaa'y ŋit-so'ok'ətt?

Jəts ja Jesús ja t'adsəy:

²⁴ —Janch jade'en jaa ku jap ka' pən nugo ajawi ŋax-ti, əyimts x'ejxtit mə mdəkidi, jade'en ja n'ukpik-tajkin sam jaa'y ttanaxy mutsk tək'aaw; əy jap pən yja'uktəkiwyəni, ka'ats ja y'uknajxidit. ²⁵ Kuts ə ndanaagyukit, jade'en ə ndanaagyukit sam kudəjk tyanaagyukin jəts tyəjk'aaw ja t'atsyik'aduky. Pəni təts meets jap wyinaty mdəndi tək'kwimpy, mjagugajpxidi mjatəjkwingoxti meets jap, uk mjanəmdit meets jap: "Windsəon'ajtim, yiktəjkik əəts." Jade'ents mee nnəjmit sə ja kudəjk wya'aʔin: "Ka' mee nnijawi pə mbəon meets, pə mə mee mdsəəni." ²⁶ Jats mee mwinəmbi-nəxwə'əkt: "Tiku me ndejnt əəts xka'ijxyi, jabi təts adəmə ngaamyujkin n'uukmujkin, jabi mets ojts o məd-soo myik'ixpiky." ²⁷ Yide'ents mee n'adsə'ot: "Tə nwa'aʔn jəts ku mee ka' nnijawi pəni mbəon meets. Jiwa'əkti yə, kidi əts yə xwin'ejxti, ɷpənxik ə x'abajxtip, kidi meedsip?" ²⁸ Jajts mjə'ədit myə'əxtit, m'əmdətskəttit mdaachtətskəttit ku x'ejxtit ja Abraham, ja Isaac, ja Jacob jəts ku ja jap ne'əgi məət niduki'iyi ja Dios kyugajpxy y'etti, mə Dios kyutujktaajk mə yjaa'y ja ttanitani kyutujk. Ka'ats meets jap jade'en mdəkit. ²⁹ Yə'əmyujkəxtip naxwii'ni jaa'dyi, o mədsoo choondit, jəts ja tpaajtidit ja Dios myəjkunuu'kxin midi nənən kyapatpynim, midi ja tya'awijxpy ja yjaa'y. ³⁰ Pən

yam yik'ejxtip ka'ejxiyimdi, pyadundipts ja ne'egi sa nwa'añ, ja'ats idø'on ne'egi nøjkx yikmøjpiktaktip, põnts ñadyijyi icyam mõj nija'wibimdi jøts ja ka' tpadundi sa nwa'añ, ja'ats idø'on yik'ayowim jattip.

Ku ja Jesús t'ayo'ijxy ja Jerusalengit kajp

³¹ Jøts ja fariseotøjk nay ja'abi xøøw yjajtøø ma dø'on ja jam wyinaty jøts ja ñimaajyøø:

—Jade'en ne'egi tyimy'øy'att ku mnøjkxnit, myik'ook-wajnipts ja Herodes.

³² Jøts ja t'adsøøy:

—Nøjkx x'atsnøjmidi ja tsaach wyax'atøøy jøts ku yamyi jabomyi wixøjkpyi njaakajpxpidsimy ja miku', njaakyiktsøøky ja jaa'y jøtsnim ø n'abaadit. ³³ Nøjkx-pimts øts jam Jerusaleñ, tuu'døjkp ø tsojk, ti ma Dios kyugajpxy abikyajp y'uk'øøky.

³⁴ ¶Mets Jerusaleñgitingit kajp, meets Jerusaleñgitingit jaa'y, pø meetsxi myik'øø'kpy Dios kyugajpxy, meetsxi mnankya'jtsip pøn Dios kyajpxy y'ayuujk tyikyø'øyp ku Dios ja yā mjadaniguexyidi! ¶Tø njapeemukwa'añ njakonmukwa'añ ja m'u'nk ja m'unā'jk sam tsikuna'jk tyaaq ñimu'uxyi tu'ugyi, ka'ats jade'en tø xkupiky!

³⁵ Ejxtits inet ja mdsaptøjk abak tyandi; øts idø'on wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyinaty yja'a'ty ku mnøømdit: "Ejxik Dios kyunuu'kx u'nk ñadyaguguexyi midi mmimejnip ja kyutujuk."

Ku ja Jesús tyikmøkpiky ja jaa'y pøn wyinaty kexp

14 Xjats idø'on yide'en yjajty ku poo'kxin xøøw tpaajty, ojs ja Jesús kaabyi ñijkxy jam windsøn tyøjkwindum pøn ja fariseotøjk wyindsøn'ajtip. Jamts idø'on ja'adi ja ti ma ja y'etti, jam ja tpa'ejxti tpagowdi.

² Jamts wyinaty tu'uk jaa'myi pøn ke'expa'am pøjkp.

³ Jøts ja Jesús tnimaay ja kajpxwejpitøjkti møøt ja fariseotøjkti, yide'en ja tyiktiiy:

—¿Kutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tnixajiyi'ñ ja pamaa'y jøts ja tyiktsøøjkxy, yide'en ja tnimaay jøts ku ja ñøjkxnit. ⁵ Winets ja tnimaay ja fariseotøjkti:

—Pøn jyiyujk chakaa jaty tka'ukyikpidsømp ku ja ja'jøtpy kyunaxy øy yjapoo'kxinxøøwi?

⁶ Nika' idø'on y'adsojimbetti, nisa ja kyawa'andi.

Ja tø'øxñigaabyi tø'øxñi'ukpiti

⁷ Jamts idø'on ja Jesús t'ijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'akti ma dø'on ja myøjtøkidit jøts ja ojs t'ane'emy:

⁸ —Ku pøn mwawidit tø'øxñigaabyi tø'øxñi'ukpi, kidi jam jaty m'ixa'akti ma ja tsinaabyajt jam ja windsøn tø yiktanibiktaagi, jaa ku ja wyinaty yja'aty yam meets jam tø m'ixajkni; ⁹ jøts ja kujøøn kudøjk mnøø'mxiyidit pøn wyinaty tø mwayidi: "Tani me waani, wan ya'at jam tsøøni." Xjats kuwani mjanchajiwā'aktit

tsøødyumbim jøts jam m'ixa'aktit ma o pøn y'ixa'akti.

¹⁰ Ku pøn jade'en mwawidit, ne'egi øyts ku m'ixa'aktit ma o pøn y'ixa'akti; kø'ømnimts ja kujøøn kudøjk ja mdukmadowidit ku ja jam wingon mye'ent, jøts ja mnøø'mxidit: "Ya, migu'uk, ñax mdsøønidi ma jam yik'ayowim tø mdyimy'ixa'knidi." Jade'ents meets ja xajotkujk'attit ne'egi ku jade'en kø'øm myiktuk-mado'odit, yam ja jam chøøñidi pøn jaty ja kaabyajt tø twinguwaadsidi. ¹¹ Pøn kø'øm namyøjpiktaajkip, yik'amutskpiktakpts ja nøjkx, põnts kanamyøjpiktaajkidip pøn ka'ejxiyimdi, ja'ats ne'egi møjtøkidip, ja' yik-møjpikta'aktip.

¹² Naya ñimaay ja jaa'y ja' pøn ja wyinaty kaabyi tø wyayi:

—Ku pøn xyikaawa'añ, kidi ja'ayi nugo xway pøn jaty møøt mnamyayiyi, ni ja mmigu'uktøjk xkawa'at, ni ja kumeeñ jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xwa'at pøn jaty myiwimbejtxiyip pøni ti jaty mets myajkpy. ¹³ Ja ne'egi mwā'ap ja ayoobi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'ejxidi sagasa, pømbi tyeky ka'ejtp, pømbi jam winap. ¹⁴ Ne'egi nekimts jade'en mnayjawiyt, pø ka'axi ja mdunwimbejtxiyi nayide'en pøni ti mets ja tø xmø'øy, jaanimts ja xwin'ext sa ja mwingaxøjkxiyit ku jadisøjk jujky'ajtpi pyidsøømdit pøn jaty tø tpadundi pøni sa jaty pyaat'aty.

Ku ja Jesús tmadyakpaajty ja møy a'ux

¹⁵ Xjats nidu'ugin ja fariseotøjk wyaañ pøn jam wyinaty tø twinguwaadsidi ja kaabyajt, jøts ja tnimaay ja Jesús:

—Nekim xøñim ja'adi pøn ka'adyip jade'en ku Dios ja kyutujuk ttanitanit ja yjaa'y.

¹⁶ Ja'ats ja Jesús tnimaay:

—Tu'uk idø'on jaa'y t'a'ejxiy'i'ñ ja a'ux møy'ampy, tøts ja wyinaty ttukmadø ja mayjaa'y pøn jaty idø'on ja wyaawampy. ¹⁷ Kuts ja a'ux'aats tpaajty, xjats ja tkejxy tyumbi jøts ja t'atstukmadoowa'añ pøn jaty idø'on ja wyaawampy jøts ja t'atsnøjmit: "Jamstik, jamik tuki'iyi a'ejxi abaadi y'ejtni." ¹⁸ Jøts ja tum jade'en ñañikajpxu'udyidi jøts ku ja ka' ñøjkxiti, yide'en ja yjawyeembi wyaañ: "Naajx ø tø njuy, ja'ats ø n'ats'e-jxwampy, mee mjanch'ukmaa'xkp." ¹⁹ Jøts jadu'uk yide'en wyaaamaa: "Ndsakaa ø magoxk yuundi tø njuy, ja'ats ø n'ejmatswampy pøni yuup idø'on uk ka'; mjanch'ukmaa'xkp inet idø'on, ka' øts inet ndsoont."

²⁰ Jøts jadu'uk wyamøø: "Tyimyjemy'amajtskipnim øts, patyts øts inet ka' nmajada'akt jøts øts inet ka' nnøjkxt." ²¹ Kuts ja tumbi wyimbijty jøts ja ttukmadøøy ja wyindsøn sa jaty ja wyinaty tø yiknøjmi. Jøts ja windsøn yjantyimy'ambijky jøts ja tnimaay ja tyumbi: "Tsojk nøjkx nøø'ajy tuu'ajy wine'en yø kajpjooyt, jøts xwaame'ent ja ayoobi jaa'dyi møøt ja'adi pøn sagasa ejxidip, pøn kyø' tyeky ma'atti, pøn winapti." ²² Jøts ja tumbi yjatso'ongojmi jøts ku wyimbijty jøts tnimaay ja wyindsøn: "Tø øts windsøn idø'on jade'en nduñ sa tø mwā'añin, jaakwindampys ja tsinaadyaajp ja poo'kx-

køjxp najxp naajx tsajp jøts niwine'enin kyagudigøŷ ja kyutujk.

Ku ja Jesús kyajpxwijy sã amajtsk'ajtjn ñaxy

¹⁸ 'Ku pøn tmajtstu'uty ñidø'øxy uk ja tø'øxy tmajtstu'uty ñiyaa'y, ja'ats idø'øŋ møj pøky; uk kuts pøn yaa'dyøjk tmøøt'amajtski ja tø'øxy midi tø yikmajtsu'uty, møj pøkyts ja nayide'en.

Ja kumeeñ jaa'y jøts ja Lázaro

¹⁹ 'Tu'uk idø'øŋ ja jaa'y janch kumeeñ, janch xøxy piky idø'øŋ ja', tum ja y'øŷbi ja yikpejtpy jøts idø'øŋ ja xyumixøduñ jabom jabom, pijy xuugyjn tpiktã'aky ja xyox. ²⁰ Jamts idø'øŋ jaa'y jadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøjki jøts idø'øŋ ja jam xyumi'ixã'aky jam kumeeñ jaa'y tyøk'agø'øŋ, jam ja kyu'uxnay'ity. ²¹ Tsojk kaagyixyim ja tja'ijxy ja kaaky abu'xk midi jam kumeeñ jaa'y kyaabyajt patkø'øŋ na-jtskã'ijp; jøts idø'øŋ uk ja jam yjanchnimiñiyi jøts ja twiweedyi ja pyu'uts. ²² Jøtsnim idø'øŋ ja ayoobi y'ø'jky, winets ja ojts yiknijkxyi tsajpjøtpy ja ankilistøjk mā ja Abraham jap. Jøts ja kumeeñ jaa'y nayide'en y'oo'kni-maa, ojts ja ñaxøki. ²³ Kuts idø'øŋ ja jap ayodaajkjøtpy tja'ejn i jøts kudam ja Abraham jam jagam møøt ja Lázaro. ²⁴ Winets ja møk'ampy wyaañ: "Teety Abraham, ayø'ejxk øts, kax yø Lázaro, wan tmiñ, wan yø kyø' tyikxøøky jøts øts yø ndoojts xuktaxujxii; janch møk øts yø jønjøtpy n'ayøŷ." ²⁵ Jøts ja Abraham ja ñi-maaŷyøø: "Ja' u'nk mjã'myatsp, tøxi me xaxøñ ku me tø m'atsøøni m'atstani, ka' mets jade'en mjaty sã yø Lázaro tø y'ats'ayøŷin, wants yø taxoni jøts me m'uk'ayoomit." ²⁶ Jøts ti tits nnidyu'unim, abikyxi meets jam i, abikyts øøts yami; mā pøn y'uknaxt øy yam pøn yjamenwã'añ nidu'ugin, uk øyts jam pøn yjanøjkwami, nisudso'ampyts pøn kyamajada'aky." ²⁷ Winets ja kumeeñ jaa'y wyaañ: "Tixi teety Abraham, pøni jade'en tunts may'ajit jøts yø Lázaro xkaxt jam ndeety tyøjkwindum, ²⁸ jaak jam øts nmigu'uk ja nimagoxk, jøts t'atstukmado'ot jøts kidi yã nayide'en myendi ayoobi yã ayodaajkjøøjty." ²⁹ Jøts ja Abraham wyaañ, yide'en ja tñimaay: "Jøts timts ja wyã'ant midi ja Moisés yjã'y midi ja Dios kyugajpxtøjk tø tñigajpxti. iTi wan ja jam tñijawidi pøni myøjpiktãktip!" ³⁰ Jøts ja kumeeñ jaa'y y'adsøŷy: "Janch ja jade'en teety Abraham ja', yjayiktigatstibik chinãa'yin ja y'ijtyi ku ja pøn jam jujky ñinøjxidit pøn tø y'oo'knidi." ³¹ Jøts ja Abraham ñiimy: "Tixi pøni ka' ja tkupøjkti midi ja Moisés yjãay jøts sã jaty ja Dios kyugajpxy wyandøø, çti ja'ats ja yjãajjanchjawidip øy oo'kpi ja jujky yjaninijkyidi?"

Ja' midi yikpøkyajtp

17 Yide'en ja Jesús tñimaay ja pyabøjkpitøjk: —Juuni øy ti kya'ukyikpøkyuñ, kø'øŋ tsøkyts ja'. Pønts myigu'uk tyikwinmaa'nmyã'atp jøts ja tyikpøkyuñ, ipø tinim sanim ja yjançjatt y'anmi-jã'win! ² Ne'egi tyimjapaat'ajtp jøts ja mejyotp

yikniwibejpatp ku møj pãandaak ja y'ukyiktayukxotsit, jøts øts n'u'nk n'una'jk ja kidi mibaat xyikpøkyuuñi. ³ Øyimts mnay'ejx'etidit jøts kidi nayide'en m'adø'øtsti sam o pøn y'adi'ichin.

'Pøni m'ejxtip ku ja mmigu'uk mmidundigøŷyidi, tuk-madowdits jøts kidi jade'en y'adø'øtsti, uk pøni nagyu-maajyidipts, maa'kxuktits ja'. ⁴ Øy ja wixujk ojkjn tjayiknpati, øy ja jade'en mjamidundigøŷyidi, pøni nadyagumaajyidipts ja nayide'en wixujk ojk pøni mni-maajyidip ja': "Ka' øts jade'en n'uktunit", maa'kxpts meets ja'.

Ja møj janchja'win

⁵ Xjats ja nwindson'ajtm ja kyudanaabytøjk ñi-maajyøø:

—Møøky øøts janchja'win møj.

⁶ Winets ja tñimaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets yã'at kipy jeexyip xnimaañidi: "Pidø'øk yã jøts mejyotp mnøjkxt, jamts myo'ont", nay jatyits meets ja jeexyip tø mmi-madøŷi.

Ja tumbi tyunkjøøjp

⁷ 'Ku pøn ja tumbi t'ukyiktuñ kyamjotp, tyikyu'uy tyiktuñ uk tyiktsakãa'ixy ja jam, kuts ja wyimbity jam nwindson tyøjkjøtp, ku ja jam yjã'aty, çti jatyi ja jam tyimyknojmi: "Yã tyimñax jøts mga'aty?" ⁸ Pø ka'axi ja jade'en yiknojmi, pø yikni-maapyxi ja jam: "Yik'øyik øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt." ⁹ Kuts ja tumbi ja jade'en tø tja'uktumi pøni sã dø'øŋ ja tø yik'ane'emy, çja ti winets ja yiktakajxã'aky? Pø ka'axi. ¹⁰ Nayide'ents meets idø'øŋ Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: "Ti tumbi øøts idø'øŋ, ja'ayi øøts iij tø nduñ, midi pãat'ajtp øø ndu'ump."

Ku ja Jesús tyiktsøøjky nimajk ja jaa'y pøn jadi'iñi put-snidip

¹¹ Kuts idø'øŋ ja Jesús tyuu'døjkigoyomi jøts ja ñijky jam Jerusálén, najx idø'øŋ ja Samariit etjotp jøts nayide'en jam Galilea. ¹² Jøts kuts ja yjã'jty jam mā tpãajty tu'uk ja kajp, jamts ja pyajtøø nimajk ja jaa'dy i pøn pu'uts pã'am wyinaty pøjkidip, jøts ja jagamyi wyã'k'øŷidøø, ¹³ jamts ja møk'ampy ñi-maajyøø:

—iWindsøn Jesús, ayø'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tñimaay:

—Nøjkx x'ats'ejxti ja teetyøjkti.

Xjats ja jatyi ñjøjktøø, jamnim ja wyinaty ñaxti ku ja tsø'øky ñayjã'winiyidi. ¹⁵ Winets nayjaty tu'uk t'ejxpaajty ja pyu'uts jøts kudam ja tø tyaagyøxn i, jøts ja jatyi wyimbijty, møk ja Dios ja ttukmøja'wiyiiñ ttukunuu'kxyjã'wiyiiñ, ñiyaxni niyjojkni ja wyimbijty. ¹⁶ Jøts ja twinguxanay'øŷyiiñ ja Jesús jøts ja jamyi ñamyujtstãajkøø, ttukmøja'wiyiiñ ttukunuu'kxy-

ja'wiyii'ñ ku ja wyinaty jade'en tð yiktsø'øgyi. Samariit jaa'y idø'øn jade'en tump. ¹⁷ Xjats ja Jesús wyaãñ:

—¿Ti kidimts meets nimajk tð mdsokixy? ¿Ma net ja yjanidaɣujukpidi? ¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajajkp.

¹⁹ Jøts ja tñimaay ja jaa'y:

—Wa'kuki jøts mnøjkxnit; ja'agøjxp tð tyay yø mbu'uts ku ø tð xjanchjawi.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktødøø ja Jesús juunin idø'øn ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

—Ka'ap ja ti ejxin pøni sa Dios ja kyutujk tyikja'aty.

²¹ Kidi xjøp'ijxy'attit jøts pøn wya'ant: "Ixya ja", uk ñø'ømdit "Ixem ja"; ka'ats, pø jaanixi meets ja ya xjamøøt'ajtñi.

²² Jøts ja tñimaay ja pyabøjkpitøjk:

—Ja'atp ja xøøw ja jumøjt ku mee tsojk ejxpaadyim xja'ejxwa'ant ja naɣwii'ñit jaa'y ja myøjkudanaabyi, ka'ats meets ja jatyi x'ext. ²³ Mjadyimyjayiknøjmidit meets: "Ixya ja", uk møknojmidit meets "Ixem ja". Kidits xmibøkti. ²⁴ Ku ø nme'ent, wa'a'ts x'ejxtit xñijawidit jade'en sam ja et wyidsukyin xem yam tyikjajta'aky, jats idø'øn wyinaty tñibaat'aty. ²⁵ Jawyeents ø n'uk'ay-ot'ot øy øy, ka' øts ja jaa'y xkupøktit pøn jaty ja ixyam juky'ajttip. ²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'øst. ²⁷ Kya'adyit y'uuktit sam ja y'adøstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyaak-ja'abi xøøw ku ja Noé tyøjkijyii'ñ jam barkijotp, kuts ja møk tuu myiñ xjats ja ojts ñi'ijtyi y'oo'køxti.

²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyookti, ñe'epti kyajt, ña'adi pyotsti, ja tyøjk tyik'øyidi jotkujk; ²⁹ kuts ja Lot jam Sodoma kajjotp ja'ayi pyidsiimy, jøts ja jøønduu jatyi myiñ jøkmyøøt, jøts ja niduki'iyi tyikna'ojkijy ja jaa'y. ³⁰ Nayide'ents idø'øn winet et yjatt ku ø x'ejxpaattit jotmøñ.

³¹ Pøni jam wyinaty øy pøn jam tøjøjxp tð pyety, ka'ats ja t'uk'atsnidøjkinit pøni ti jaty ja jap tyøjkjøtpy myøøt'ajtpy jøts ja tðkpidisømw'a'ant; pøni pønts jam wyinaty widejtp kamjotp, ne'egi tø'øpts ku ja ne'egi kya'ukwimbejtnit tyøjkwindum. ³² Ja'myajtsidi ja Lot ñidø'øxy sa ja yjajty. ³³ Pøn kagu'øøgyim pyikta'aky t'e-jxp, windigø'øpyts y'anmija'win ja Dios wyingujkp; pønts tkayikmøjtøjkijp øy ti, pøn ø ne'egi tu'ugyi xnadyamiyojxip, ja'ats idø'øn y'anmija'win nøjkx nitso'ok'ajtp.

³⁴ Øts idø'øn wamp jøts ku jam wyinaty ø pøn nama-jtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty. ³⁵ Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty. ³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'øn ja jade'en tmadoodøø jøts ja ojts tyik-tøwdi:

—¿Ma windsøn'ajtm idø'øn ja jade'en yjatt?

Jøts ja y'adsøøy:

—Kidi mwa'a'andi ku ja kyayiknijawit, jabi niduki'iyi meets ja xñijawit ku ø nme'ent.

Ku ja Jesús tmadyakpaajty ja ku'økyø'øxy jøts ja kudunk tiidyumbi

18 Xjats Jesús ja ttamadyakpaajty tu'uk ja ejxpajtin madya'aky. Ja' idø'øn ja tyukmadogukiwyampy jøts ja Dios'ajot'ajttit jøts niyuuni kya'amutsk'attit.

² Jøts idø'øn ja tñimaay:

—Jam idø'øn kudunk tiidyumbi wyinaty tu'uk jam kajjotp, niwine'enints idø'øn Dios ja tkidyimwyindsø'øgi, nipøn ja tkamø'ijxy øy yjapøni. ³ Nayjamts idø'øn ku'økyø'øxy tu'uk chinaamyi, ja'ats ja kudunk tiidyumbi jam tñiyø'ø'y'ejtp, ejtp ja yja'øø'ngunaxy, jøts idø'øn ja tja'amidøy ja tiidyu'unin, ja myidsep tjan'øøni jøts ja yikpayø'øty. ⁴ Jeky idø'øn kudunk tiidyumbi ja tkamøjrikta'aky jøts ja ka'ap tpayø'øy, xjanimts ja wyinmaay: "Øy øts idø'øn Dios ngawindsø'øgi, øy øts idø'øn nipøn ngatunk'aty, ⁵ kuwanits øts idø'øn jade'en ndu'unt, pø ejtpts øts yø xjanchmijø'ø'y'ity, janch møk ø xyikjotkixy, tikuts øts yø nğanitanit jøts jade'en kya'ukmenit jøts øts yø xka'ukyikjotm'a'tnit."

⁶ Jøts ja nwindsøn'ajtm yide'en yjaakwaañ:

—Ja ka'øy kudunk tiidyumbi dø'øn jade'en wamp.

⁷ Kuts idø'øn Dios, ¿ti jaa ja tkidyimñitanit ja yja' pøn ja xinaxy tsunaxy ja'myajts'ejttip? ¿Ti kidi ja jatyi tpuðøjkiiñit? ⁸ Øts idø'øn wamp jøts ku ja jatyi tñitanit ku ja jatyi tñikajpxu'utt. Kuts ø nme'ent, ¿windem øts naɣwii'ñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøjk jøts ja yikugubajtpi

⁹ Jøts ja Jesús ttanimadyaktøjkijyii'ñ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyijyidi ñay'øbyikta'agyidi jøts ja myigu'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjkxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y. ¹¹ Tanaapy ja fariseo jøts ja yide'en tmigajpxy: "Dios Teety, ndukmøja'wip ndukunuu'kxy-ja'wip mets ku ø ka' nayide'en nduñ sam ø pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni pøat øts sam yø yikugubajtpi ixa tyani. ¹² Majtsk øjk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jaty ti jaty ø nbatpy n'ijxpy." ¹³ Jøts idø'øn ja yikugubajtpi jagam ja ne'egi wya'k'øyiyii'ñ, ka'ap ja jadine'en y'aaw yjoojt myajada'aky jøts ja wine'enin y'ejxjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'a'ñ: "¿Dios Teety, ayø'ejxk

⁴³ Jøts idø'øn ja winap jaa'y jade'en wyin'ejxpijky, jøts ja tpadsø'jn ja Jesús, møk ja ttukmøjawi ttukunuu'kxy-jawi ja Dios. Jøts ja nayide'en wyamidí pøn jaty jam ja jade'en t'ejxtø.

Ja Jesús jøts ja Zaqueo

19 Xjats ja Jesús yja'jty jam Jericó, kyajptøjkiyñ'n, ² jamts kumeeñ jaa'y wyinaty tu'uk, Zaqueo ja xyøøw midi ja yikugubajtpitøjk wyindsøn'ajtip. ³ Ja'ats idø'øn tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon yjaaktyimtyanaañimi. ⁴ Xjats ja ojts jawyeen putyi t'anøjkxi mā dø'øn ja Jesús jam wyinaty ñaxwā'añ, jøts ja jam kipkyøjxp kyøjxpejty. ⁵ Kuts ja Jesús jam ñajxy, ixam ja Zaqueo kipkyøjxp, jøts ja Jesús pyat'ejxøø, yide'en ja ñimaajyøø:

—Zaqueo, putyi winak, jap øts icyam mets mdøjkjōtpy nja'da'akwā'añ.

⁶ Jøts ja Zaqueo jaty wyinaajky, janch ejtni xoni dø'øn ja tyikja'jty ja Jesús jam tyøjkjōtp. ⁷ Pøn jatyt ja jade'en t'ejxtø, jøts ja pyagajxpinaaxwā'ktøø, ja' ja kyajpxtip jøts kuk ja Jesús jam wyinaty tø ñijkxy mā ja ka'øyjaa'y tyøjk jam. ⁸ Jøts ja Zaqueo wyā'kukiyñ'n jøts ja nwind-søn'ajtim yiknimaay:

—Windsøn'ajtim, ndamay'atp øts ayoobi jaa'y kujk-wa'kxy ti jaty øts ixja nmøø'tajtpy; pøni tøts øts o pøn-gapøn o tigati nbøjkxi awin'øøni'ampy, nyik'u'nkips øts ja' jøts øts ja jawaani may nyikwimbejxat, maktaxk ojk tukjadine'en jaty y'u'nk'att pøni sã ja kyojpk.

⁹ Xjats ja Jesús wyaañ jøts ja tnimaay:

—Ixyam ja nitso'ok'ajtin tø yja'aty yā tøjkjōjty, kumi nay Abraham meets m'aadsip mgugojip. ¹⁰ Pø ja'abixi ø tø nñimendi jøts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigø'y'ejtnidip.

Ku ja Jesús tmadyakpaajty ja meeeñ kyojpk

¹¹ Ixam ja mayjaa'y ja pyatmadøyyi ku ja jade'en wyā'añ, jøts ja tñanimadyaktøjkiyñ'n tu'uk ja ejxajtin madyā'aky, ku ja jam wyinaty kujk wyingoni jam Jerusalén. Nømpxi dø'øn ja jaa'y wyinmaydi, ja'ayi ja jam y'ukja'att jøts ja jaty wyindsøndøkit, jøts Dios kyu-tujk ja tyiktuujnit midi ja tyanitanaapy yjaa'y. ¹² Jøts idø'øn ja tnimaay:

—Jaa dø'øn jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jøts ja jam y'atswindsøndøkit. Ku ja wyimbett, møjwindsøn ja wyinatyni. ¹³ Jøts idø'øn tyumbi ja nimaajk twaaadsøø ku ja wyinaty choonwā'añ, jøts ja nidu'uk jaty ttagødøjkiyñ'n tu'uk møj mukmyeeñ, jøts ja tnimaay: "Mda'aju'udyip mda'agajpxtip idø'øn yø mmeeeñ, wan tmayi kunim ø nwimbett." ¹⁴ Mi'ajkiyipts idø'øn ja jaa'y ja' pøn jaty jam tsinaadyip, jøts ku ja chø'jñ jøts kexy yø'øbyi ja yik-tabaguejxy jøts ja jam yide'en y'atswā'andit: "Ka' øts ya'at jaa'y ndsøky jøts øøts yø nwindson'att." ¹⁵ Jøts yikpiktaajkim idø'øn ja' jøts ja wyindsøn'att, winets ja wyimbijty jam mā ñaaix kyajp. Ku ja jam yja'jty jøts ja twaaadsøø ja tyumbi pøn jaty ja wyinaty tø tkømø'y ja

meeñ, ja' ja ñijawiwampy wine'en jaty ja wyinaty tø tyik'u'ngidi. ¹⁶ Jøts ja yjawyeembí myiiñ jøts ja tyuk-madooøø: "Windsøn, majk ojk øts ja jadukjadine'en jaty tø nyik'u'nk'aty ja mmeeeñ." ¹⁷ Xjats ja wyindsøn y'adsøø: "Øy'ajtp, øyxi dø'øn jade'en mduñ, mjot-wampxi dø'øn jade'en; ti sã metsxi yjadini'iñibi meeeñ jade'en tø xyikmayi, ja'agøjxpts mets ndukwindsøn'at-wā'añ majk ja kajp." ¹⁸ Jøts jadu'uk myiiñ, ja'ats waan: "Windsøn, magoxk ojk øts jadukjadine'en jaty tø nyik'u'nk'aty ja mmeeeñ." ¹⁹ Jøts ja nayide'en yik'ad-soomøø: "Windsøn'atp mets ja magoxkpi kajp." ²⁰ Winets jam jadu'uk myiiñ jøts ja wyaañ: "Windsøn, ixyaani ja mmeeeñ. Konji'iky øts yø nbaajyøtpty tø nyik'i-ty; ²¹ kumi nñija'wip øts jøts ku mets ka' ti jadi'iñi xnajt-sjawí, ja'agøjxpts øts ndsø'øgi, ja'abaat me xpayø'øy øy mets ja xjagaja'aji, myikpidø'økwambyaag mets ja pikta'aky øy me mjagani'ipy." ²² Winets windsøn ja ñi-maajyøø: "Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiiduuujnip. Pøni nñija'wip tam ku øts jade'en njaaj'y'aty ku øts ja nbøkmuky midi ø ngabiktakpy, ku øts ja xijy nyikpidi'ikpyaag midi njaganipy, ²³ jøts, tti kuts øts ja nmeeeñ tø xka'anuu'kxyaky, jøts øts ja meengyojpk jeexyip tø nbaatny møøt ja meeñu'nk?" ²⁴ Jøts ja tnimaay pøn jaty jam wyinaty: "Pøjxidi yø meeñ, jøts ja xmo'odit pøn øts ja nmeengyojpk majk ojk tø xyik'u'nk'ajtyi." ²⁵ Jøts ja wyandøø: "Pø jamimts windsøn ja' myeeñ, pø majkts meeeñ muky ja jam tmøødi." ²⁶ Jøts ja windsøn y'adsøø: "Øtsts idø'øn wamp, jøts ku ja yjaakty-imyikpudøkit pøn tyikmøjtakp ku ja o ti yiin waan yik-mø'y; pønts kø'øm o ti tkidyimykøjtakp ku ja o ti yi in waan yjaykmø'y, jaaktyimyikpøjkøjxpts ja ne'egí tuki'iyi. ²⁷ Jøts ja' pøn ø xmi'ajkidip pøn ø xkatsojktip jøts ø nwindson'att, nøjkxts ja x'atswawdi jøts yā xyik-me'endit jøts yā xtyimyikpa'ookit øts nwingujky."

Ku ja Jesús kyajptøjkiyñ'n jam Jerusalén

²⁸ Kuts ja Jesús jade'en myadyak'abajtyiñ'n, jøts ja ñajxy, jamxi ja Jerusalén ñijkxy. ²⁹ Jawaani ja jam wiyinaty kyidyimya'atti jam Betfagé jøts jam Betania, jade'en ja kajpxøøw jam, ku ja tkejxy namajtsk pyabøjkpi ku ja jam wyinaty wingondi mā ja kojpku'nk jam txøwi Olivos, ³⁰ jamts ja tnimaay:

—Nøjkxti ixem kajpjojt, ixewingon. Kuts inet jam mja'attit, jam inet buur tu'uk kuwñn xpaattit midi ka'aním pøn ttatsøøni. Ja'ats m'atsmigajidip jøts xyik-me'endit. ³¹ Pøni pønts myiktøjdidip tigøjxp ku xmigajidi, nøjmidits jøts ku ø ndsøky.

³² Jøts idø'øn ja pyabøjkpi namajtsk ñøjkxtøø tpattøø jade'en sã Jesús ja wyinaty tø ñii'mxyidi. ³³ Jam ja wiyinaty tyimyigajidi ja kujiyujk ku ja jiyujk ja ñimaajyidøø jøts ja yiktøjdidøø:

—Tigøjxp ku yø jiyujk xmigajidi?

³⁴ Jøts ja t'adsoodøø:

—Kumi ja nwindson'ajtim yø ttsojpk.

³⁵ Jøts ja twejtsnøjkxtøø mā ja Jesús jam wyinaty y'awixy, jamts wyet ja ttajiba'andøø jøts Jesús ja ttawa'atspejty. ³⁶ Kuts idø'øn ja Jesús wyingon'adøtsni,

xjats wet ja nøø' tuu' yiktabatya'abi. ³⁷ Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkipitøjk ja ejtni xoni yjanchpaya'axyi yjanchpajøkyi, jøts ja møk'ampy ttukmø-jawidi ttukunuu'kxyjawidi ja Dios ku milagri'ajtin ja wyinaty jade'en tø tyuk'ijxyidi. ³⁸ Yide'en ja wya'andi:

—jØy'ajtp ku Dios xuknimi'iñim kyunuu'kxy wyind-søn! jØtukuj'atym idø'on jap tsajpjøtpy! jKuuyi Dios jadu'uk yjaak'øyi!

³⁹ Winets ja fariseotøjk winaagin tnimaadyøø ja Jesús pøn jam wyinaty jaa'y agujkpti:

—Windsøn, tiku waani sã xkanøjmi yø mabøjkipitøjk.

⁴⁰ Jøts ja y'adsojøø ja Jesús:

—Øts idø'on wamp jøts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'a-monwa'añidi.

⁴¹ Kuts ja t'ejxpajty ja Jerusaléngit kajp ku ja jam wyinaty jawaani kyaja'atni, jøts Jesús ja tkudsachwin-ma'ayiyii'ñ jøts ja yajaxy, ⁴² yide'en ja wya'añ:

—jKuk jeexyiyi iij wine'enin xja'gyuki jøts ku ja mxøøw ja mjumøjt tø mjataja'adyi, jøts jeexyiyi ni'ijtyi ja mjaa'y tpaatti ja Dios kyunuu'kxyin! Tøts ja tiempø ñaxy, jti jaa xijy, jatyi myiktami'awa'anigyoymit!

⁴³ Ja'atp ja xøøw ja jumøjt ku tiempø kya'øyt, ku mmid-sep mdamukit, amuum myikna'awidejtkøxt, nima awa'ats mgata'ant, ja xem ja yam myiknidøkit,

⁴⁴ naxjøtpy myikjaagida'akt jøts ja mjaa'y may'ampy kyudigø'ødyit. Niwine'en niti kyata'ant; ja'agøjxp ku tø xkagupiky ja Dios ku ja kø'øm tø mjaniñi.

Ku ja Jesús twojpidømguxy ja too'kpitøjk jam tsaptøjk agø'øm

⁴⁵ Xjats ja Jesús chaptøjktøjkiyii'ñ jøts ya tuki'yiyi tyikpidsømbinaxwa'jky pøn jaty jam wyinaty yajktip too'ktpi, juudyip kajpxtip, ⁴⁶ yide'en ja tnimaay:

—Yide'ents Dios kyajpxy jap kyøjxja'ayi: "Ja' øts nd-saptøjk wya'añ jøts øts njaa'y jap Dios'ajot'attit"; ma meets yø ja jade'en xyiktuni sã maa'tspi chi-naadyaajkindi.

⁴⁷ Jabom jabom idø'on ja Jesús jam tsaptøjkjotp yik'ixpijky; yam idø'on ja teetywindsøndøjkti, møøt ja kajpxwejpitøjkti møøt ja møjaa'dyøjkti midi tnigubajk'ajttip ja kajp, tniwinmayidi sudso ja yjady-imy'uk'ooktnim. ⁴⁸ Jøts ja nisudso tkamidabyaatti ti sã ja ttu'undit, pø amuumts ja jaa'y ja jam pyatmadøyiyi, ti pøn ja jam kabatmadojyiyip.

Ja Jesús kyutujuk

20 Xjats idø'on yide'en tuk'ojk yjajty ku ja Jesús jam wyinaty tsaptøjkjotp tyik'ixpiky ja mayjaa'y, ja øgyajpxy ja øy'ayuujk ja jam wyinaty kyajpxwa'kxpy sudso nnitso'ok'ajtin, ku ja teetywindsøndøjk jam yja'jttøø, møøt ja kajpxwejpitøjkti, møøt ja møjaa'dyøjkti pøn tnigugajp'ajttip ja kajp, ² ja'ats idø'on jam yide'en wandøø:

—Yø' mnigajpxp pøn jade'en tø mdagutujuk'aty jøts jade'en m'adø'øtst. jPøn yø kutujuk jade'en tø mmo'øyi?

³ Winets Jesús ja t'adsojimbijty jøts ja tnimaay:

—Nayide'en mee nyiktøøwami, jøts m'adso'odip idø'on: ⁴ jpøn ja Juan ojts tya'ane'emyi jøts ja yiknø-batt? jDios ja ojts jade'en tyanigutujuk'ajtxyi, uk ja naxwii'ñit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—jSa nnima'ayin? Ku net yø njanima'ayin jøts ku Dios ja tyanigutujuk'ajttøø, yide'ents inet yø x'adso'owin: "Jøts jtigøjxp ku ja xkajanchja'widøø pøni jade'en tam?" ⁶ Jøts kuts inet yø njanima'ayia'andit jøts ku ja yaa'y jade'en yiktanigutujuk'aty, tsojk inet yø jaa'y xjanchka'tspa'o'jkindit, kumi wa'ats yø tñijawidi jøts ku ja Juan ja Dios kyexyi.

⁷ Xjats ja t'adsoøøø jøts ku ja ka' tñijawidi pøni pøn ja Juan jade'en wyinaty tø tyanigutujuk'aty jøts ja jade'en yiknøbatt. ⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'tot pøni pøn øts jade'en tø xanigutujuk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tnimaabyinaaxwa'jky ja mayjaa'y, yide'en ja ejxpajtin madya'aky ja tu'uk tñimadyak-tøjkjyii'ñ:

—Ja dø'on jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidaañ ja tyumbi winaagin ku jeky'ampy widejtpi ñijky. ¹⁰ Kuts tpaajty ja uvi tsa'am tujuk'aats, jats ja tkejxy tu'uk tyumbi jøts ja t'at-stuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, midi ja paa't'ajtip jøts ja yikmo'ot. "jMaaj?" "Ka'ap." Ja tumbi ñømdøø. Yikxon ja jam ojts yjantyimyikwøpy, jøts ja yikajximbijty wa'ats jadi'iñi. ¹¹ Xjats ja kugam tkejxy jadu'uk tyumbi; nayide'en ja ojts yikjemnøjmi yiktenøjmi, yikxon ja jam yjanchyikpwyøjpy jøts ja nayi wa'ats jadi'iñi yikajxim-bijty, niti ja kyayikmøø. ¹² Jøts idø'on ja ka' tñimøñ, ojts tyumbi ja jadu'uk tkajkxkojmi jøts ja jam nayide'en ttundøø, tyikwindsaachidi tyikjøptsaaçidøø jøts ja tyiakttøø.

¹³ jJøts yide'en ja kugam wya'añ: "jSudsom tsøky ndu'unt? Nmajnkun'ngin n'ukaxp, ja ku yø t'ejxpaattit, jja kidi yø ttsø'øgidit?" ¹⁴ Ja'ayi ja tumbitøjk ja ojts y'ejx-paadyiyi jøts ja xem yam ñawyaajnidøø: "Ya'at yø kam tmidanwamp; wan tyikpa'o'jkyim jøts adøm yø kam nmidanindit." ¹⁵ Winets ja tjidøjtpidsømdøø jam kamjotp jøts ja ojts tyik'oakti.

—jSats idø'on kugam ja yjawi tyunidit? ¹⁶ Me'emp ja kø'øm jøts ja tyikugøxit ja yjade'embi tumbidi pøn jadyimyjade'en'ajttip, jøts ja ne'egi tmo'ot ja kyam ja abiky tumbidi.

Ku ja nidaay'ajtibijty jade'en tmadoodøø, jøts ja wyandøø:

—jPø katsojknim ja Dios!

¹⁷ Tiy Jesús ja wyin'ijxyidi, jøts ja yiknimaadyøø:

—¿Tits idø'ðn yø Dios kyajpxy ñigajpxpy ku yø jap yide'en yja'ayi? ¿Nugo yø jap jade'en wya'añ?

Ja tsaā midi ja pojtspi kya'eixidøø, ja'ats yam ne'egi tø y'uknøjxnñi jam pøch kyubajkp jøts ja' t'amajtsmujkøjxp yø pøch.

¹⁸ Ku ja y'ukyiktanaxkidakpatt ku jam o pøn y'uknaxki-dā'akt, pø mā ja nay'ejxpaaðit; u kuts o pøn tyanaxki-dakpattit ja tsaā, pu'uxints ja yiktawayit.

Ku yikajpxy'aty ja kugubajt

¹⁹ Xjats ja teetywindsøndøjk møøt ja kajpxwejpitøjk ja tjadyimy'ukmatswandøø ja Jesús, wa'ats ja tyimyjaja'-gyukidi jøts ku ja ja'agøjxp ja madya'aky yikmadyak-paaþty; yjadyimy'ukmatswandip ja' ja Jesús, ja jaa'yts ja chø'jkidip paty ja jade'en tkatundøø. ²⁰ Winets ja tpik-taktøø myigu'uk pøn tpa'ejxtip tpaço'odip jøts ja ñadyiji nugo jade'en ñanky'iixyidi sam øy jaa'y, ja'ats ja chojktip jøts ja tkajpxy'ejxtit kuuyi ja y'ukajpxigø'øty, ja'ats ja jatyi tyani'øønidiip jøts ja jam tkøyaktit mā wyindsøn ja jamdi. ²¹ Paty ja yide'en tyiktøøddøø:

—Windsøn, nniija'wip øøts jøts ku myik'ixpiky øy tsuj, tiy janch tuki'iyi xnigajpxy jøts ka' me pøn xkupiky xk-agupiky ti sa me mwa'añ, ne'egi yikxon mets ja ne'egi xnankñi'ixpøkyi tiy janch ja Dios tyiy'ajtin sudso ja yiknijawit. ²² Tukmadooks øøts: ¿Nmo'op øøts kugubajt ja møj windsøn midi jam abiky'ampy nichøky tø myiñ yikutujkpi, uk ka'?

²³ Yja'wiyiññ Jesús ja jatyi jøts ku ja kya'ødyunwā'añi, jøts ja tñimaāy:

—¿Tiku øts jade'en xkajpxy'ejxti, tigøjxp ku øts jade'en xniwambatwā'andi? ²⁴ Uktuk'ejxtik øts tu'uk meeñ. ¿Pøn ja wyeen y'aaaw yø jam myøøt'ajtip, jøts pøn ja xyøøw jam køxja'ay?

Jøts ja wyandøø:

—Ja møj windsønimts yø' yja'.

²⁵ Xjats ja tñimaāy:

—Ja'ats meets ja mmo'op midi ja yja'ajtpy, jøts ja Dios ja' xmo'odit midi ja paaat'ajtmiiyip.

²⁶ Jøts ja nisudso'ampy tkakajpxy'ejxti øyik idø'ðn ja ttaniwambattit sa jaty ja jam wyinaty wya'añ jam may-jaa'yjotp; jinaxy ja ñigyumaap yjajtøø ku ja jade'en yik'adsoodøø, jøts ja ne'egi y'aaaw amøñi t'ukyk'ejtnidi.

Ku ja jaa'y tyiktøwdi pønñi janch idø'ðn ja' ku oo'kpi jadigojk yjujkpyøktit

²⁷ Jøts idø'ðn ja saduceotøjk jam winaāgin yja'tmidøø jøts Jesús ja t'ejxwā'andi. Ka'ap idø'ðn ja saduceotøjk ja tkupøkti jøts ku oo'kpi y'anmija'win jadigojk pyid-simy jujky'ajtpi xemikøjxp møøt ñine'kx; paty ja tni-maadyøø ja Jesús:

²⁸ —Windsøn, yide'en ja Moisés tjaadyāañ, pønñi ñidø'øxy ku'øøky tyiktamp yam ja ka'aním y'u'nk tpaati, pønñi jamts ja' y'uch y'ajch, ja'adsik tmøøt'ama-jtskip ja ku'økytø'øxy jøts ja ttukpaatt y'u'nk, jøts ja jade'en tkayikudigø'øty ja myigu'uk. ²⁹ Jats idø'ðn jaa'y y'ijtyi, niwixujk ja tyukyā'dyøjk'atti jøts ja jygyoobi

jawyeen y'amajtskiyññ jøts ja tku'ø'jky ja ñidø'øxy, ni-tu'uk y'u'nk ja ojts tkapaatti. ³⁰ Xjats ja mutskpi ja tmøøt'amajtskiyññ ja ku'økytø'øxy jøts ja nayide'en tku'ø'jky, ka'ap ja tyik'u'nkpaajty. ³¹ Jøts ja midigøøkpi ja twaay ja ku'økytø'øxy jøts ja nayide'en tku'ø'jky. Tum jade'en yjajtkøjxti niwixujk, ni tu'ugin pøn y'u'nk tkayiktaañ. ³² Jøts ja tø'øxyøjk nayide'en y'o'jknimāā. ³³ Kuts idø'ðn ja nøjkk jadigojk yjujkpyøkti, ¿pømbits idø'ðn ja nøjkk tñidø'øxy'aty jadigojk, pø niwixujkxi ja tø t'atsnidø'øxy'atti?

³⁴ Xjats ja Jesús ja ñimaājyidøø:

—Yaa'yi dø'ðn yø jade'en yjaty, yaa'yi na'xwiññ jade'en y'amajtskidi ja yaa'y ja tø'øxy. ³⁵ Pøn paaat'ajtidip jøts ja jøjktit jam mā Dios ja tø t'a'ejxi, ku ja yjujkpyøktit jadigojk ka'ap jam pøn t'ukjotmay'ajtnit ja amajt-sk'ajtin, ni tka'ukyik'amajtskyinidit y'u'nk y'una'jk jam pøn, ³⁶ ka'ap pøn y'uk'oo'kniit y'uktigøøñit. Tum jade'en ja jam chinaañidit sam ankilistøjk. Tum Dios ja amuum y'u'nk'ajtidip una'jk'ajtidip, ja'agøjxp ku dø'øñ ja jemchināā'yin tø tpaatti ku ja jadigojk tø yju-jkpyøkti jap oo'kpi agujkpy ja nwindson'ajtimgøjxp. ³⁷ Kø'øm paaatxi Moisés ja xukniija'windi jøts ku oo'kpi yjujkpyøkti jadigojk ku ja jam ojts t'ixy ja ximum ñitøøwyidity. Pø yide'enxi ja jam tmadøø jøts ku ja Abraham, jøts ku ja Isaac, jøts ku ja Jacob ja tdios'atti ja Dios Teety. ³⁸ Kidi oo'kpiøts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn.

³⁹ Winets ja kajpxwejpitøjk wināāgin ñømdøø:

—Janch tiigyajpxy, windsøn.

⁴⁰ Jøts ja ka' y'uknay'a'ejxiñiyidi jøts ja tyiktøø'adø'øt-stit, ne'egi ja y'amondøø.

¿Janch idø'ðn ku ja David t'ap'aty ja Cristo?

⁴¹ Xjats Jesús ja tñimaāy:

—¿Jøts sudso jade'en mwa'andi jøts ku David ja Cristo t'ap'aty? ⁴² Pø yide'ents ja David tyikwā'añ ja nøky ku ja tjaay ja Salmos:

Yide'en ja nwindson'ajtim ja Dios Teety ñimaājyøø: "Putsinaaky øts n'aga'ñ'ampy,

⁴³ kunim øts yø nmimajadəkøxt pøn jaty mmid-sep'ajtip."

⁴⁴ ¿Sudso'ampyts ja David t'ap'aty ja Cristo, pø wyindson'ajtpyts ja kø'ømbaāt?

Ku ja Jesús tñigajpxi ja kajpxwejpitøjk ja kya'øwyin-māā'ndy

⁴⁵ May jaa'y idø'ðn ixam amidodujktpi ku ja Jesús tñimaāy ja pyabøjkpitøjk:

⁴⁶ —Øyim mnay'ejx'etidit, ejxim yø kajpxwejpitøjk mdawin'ñiñidi kya'øwyinmāā'ñ, jade'en yø ñachøkyidi jøts wyet yø tyeky'ok'am paaat tpaaidøttit, jøts ja' yø chojktip ja nawyindsø'øgi jøts yø yikajpxpoo'kxtit jam mayjaa'y agujk, jøts ku yø tsaptøjkøtpy tøkidi tum ja tsinaabyajt yø tyatsinaawyandip midi jam tsaptøjk'okp, jøts ku kyaamyidi tum jam yø ñaxti tsinaabyi mā dø'ðn yø myøjtøkidi. ⁴⁷ Nayø'øxi ku'økytø'øxy ja pyikta'aky tpojkxidip jøts ñadyijyi ñadyagubøjkyidi ja Dios'a-

jot'ajtín. Ja ti pøn ja', ja ti pøn ñadyijyi jeky'ampy tsap-kajpxtip, nayø'oxi ja'adi pøn ka' ti tyiknigaxø'òkti, ñadyijyi øy jaa'y'atti. Yø yjade'embí jaa'yts idø'øn Dios møj yik'ayo'op.

Ku ja ku'òktyø'øxy tpiktaajky lyimunsi

21 Xjats idø'øn ja Jesús ojts t'ixy jap tsaptøjkjønpy ku ja kumeeñ jaa'y jam wyinaty tkugonidi ja lyimunsi jam meeñ'abøjk'ii'ñjotp. ²Jøts ku'òktyø'øxy ma-jtsk ja pyujxmeeñu'nk jam tkugo'onimøø; ³winets ja Jesús ja pyabøjkpitøjk tñimaay jøts ja wyaañ:

—Janch meets idø'øn nnøjmi, jøts ku yø ku'òktyø'øxy ayoobi ne'egi myinajpxy lyimunsi yø jam Dios wyingujkp øy idø'øn yø kyamabaadi sam o pøn yja' tpikta'akti. ⁴Ja' yø iiy yoxtip midí yø winda'anxyidip yam yø ku'òktyø'øxy ayoobi ne'egi tpikta'aky ja yiktuujnik ja ñidsinaajyk.

Ku ja Jesús tñigajpxy jøts ku ja tsaptøjk yjett

⁵Jøts idø'øn niwinaagin jam wyinaty tñimadya'akti ja tsaptøjk, ku ja janch tsuj kyaxi'iky, ku tsaa ja jade'en janch tsuj tmøø'taty, jøts ja nayide'en chujkaxi'iky midí jam wyinaty pøngapøn tø tyoxti. Xjats ja Jesús wyaañ:

⁶—Ja'atp ja tiempi ku ya'at kyuja'wigyøxt ixá jade'en x'ejxti, ku yø tsaa ni tu'ugin kyata'ant nikiibyety.

Ku ejxa'an jawyeen yikpikta'akt ku wyinaty ja tñidyu'unin xøøw wyingøñ

⁷Winets ja tyiktøødøø jøts ja tñimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjat-wa'añ?

⁸Jøts ja Jesús wyaañ:

—Øyim mnay'ejx'etidit, jøts kidi mee tø mniyjajtni ñiwyindaay'ajtk. Kumí may ja mye'endit pøn øts nxøøw nugo nadyanikajpxidip ku ja ñø'mødit: “Cristo øts”; “Tø kya'pxy ja tiempi.” Kidits mets ja xpanijky jaty. ⁹Jøts ku xnimado'attit ja tsep, uk tyiktigatsti ja kyutujk adsepkojpx, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja ñaxwii'ñit.

¹⁰Winets ja tjaa'knimaay:

—Ja møj ja mutsk kajp nøjkk ñañibidi'igyidi, jøts ja windsøndøjk cheptu'undit ja xem ja yam pøn jaty ja naajx ja kajp tñitanaadyip ya ñaxwiiñ. ¹¹Møk'ampy ujx ñaxt, yuu pa'am ñaxkida'akt øy madsøo, adsø'jkyibim ja tuki'iyi myiktuk'ejxtit ku ja Dios ejxa'an møk tpik-ta'akt jam tsajpwemp.

¹²Jawyeents mee myikmajtsmukøxwa'ant, myik'ix-a'adit o madsøo. Kuts myikpaattit jøts myikwanøjkxtit jam tsaptøjkjønpy mē myiktiidyu'undit, myikti'idyit myiktsu'umdit puxøjkjønpy, ja møj windsøndøjk myik-tawinguwawidit pøn jaty yikutujktip, ja'ats idø'øn ja mdukupøky'atidip ku øts nja' xpabøjkidi. ¹³Jats meets idø'øn ja nja' xniguboikit. ¹⁴Kidits meets ja xwandijy pøni sã mee mnagyubokit ku mee mnagyu'adsowiyit. ¹⁵Øts meets ja wijy'ajtin nmo'op, øts meets nyik'ayuk-

paatp sã mee mwā'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit. ¹⁶Mdeety paat mdaak paat mee nga'ødyuniyit. Tits ja chow ja mmigu'uktøjkti jøts ja'adi pøn mminamyaajyidip, myik'oogidip winaagin meets ja'. ¹⁷Tum midsep meets o pøn m'ejxit ja'agøjpx ku mee xjanchjawí. ¹⁸Ka'ats meets jadi'iñi myik'ejxigø'øty, ni tu'ugin meets mwāy kyawindigø'øty. ¹⁹Pøni mmidanaadyip tu'ugyi amumjoojt, mbaatpts meets ja nitso'ok'ajtín jøts meets m'anmija'win yjujky'att xemikøjpx.

²⁰'Ku x'ejxtit yø Jerusaléngit kajp jøts ku amuum tseptumbitøjk tø ñi'awidejtñiyi, jade'ents meets ja xni-jawit jøts ku yø kajp wyinaty tsojk kyudigøøwya'añ.

²¹Pøni pønts jam Judeit naxjotp wyinaty, wants ja tkaknøjkxti jam kojpkøjpx; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp widejttip, kidi ja winet et ywym-betti jøts ja ñøjkxtit jam kajpjotp. ²²Ja'abi xøøw idø'øn ja ayo'on mye'ent, jaa dø'øn ja jade'en yjatt kyubatt sã jaty Dios kyajpxy wya'añ. ²³¡Ayo'ijxyim ja tø'øxyøjk yjattit pøn jaty ja myutsk jam wyinaty tñikøjpx'ajttip, pøn jaty ja myaxu'nk jam wyinaty tø kyaxø'òkti! Pø ji'iyim ya'axymxi dø'øn ya ñaxwiiñ yjatt, møk ja jaa'y ayo'on tpaattit t'ejxtit. ²⁴Pømbi ookit jam tseptun-dajkjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sã yiktu'unt, øy ja ja'at jaa'y yø sã tyuniyit, kunim ja y'ayo'on yø ttanajxkøxt winetnimts yø yikmajtstu'utt.

Sã mye'ent ja ñaxwii'ñit jaa'y myøjkudanaabyi

²⁵'Wenk yø xøøw yø po' yjatt, yø maadsa' nayide'en; jøts naajx kajp jadi'iñi tyā'andit, niti tabyajtin tkapaattit, øy ja tsø'øgi yik'o'jkniyidit ku tmado'odit ja mejy ty-ojmjøøkt øy madsøo. ²⁶Yik'oo'kjimbetidip jaa'y tsø'øgi ku ja tñimado'odit jøts ku jade'en ñaxwiiñ yjatwa'añ; jøts ku ja'abaat jade'en yjatt ti jaty jam tsajpwemp ejtp. ²⁷Jaanimts ø x'ejxtit, ja ñaxwii'ñit jaa'dyi myøjku-danaabyi, ku nmime'ent yootsjøtpy ja nmø'ajtin, jajpim tsamambim ja n'aju'uk nyikaxø'òkt. ²⁸Ku dø'øn ja jade'en yjatt'ukwā'ant, møk mnabyiktā'agidit jøts xjøp'ejxtit jøts ku tsojk mye'ent pøn myiknit-so'ok'atidip.

²⁹Nayi tyamimadyakpajtiyññ ja' jadu'uk ejxpajtin madya'aky jøts ja wyaañ:

—Ku x'ejxti ja iigi kipy uk øy ti kipy kyā'adigach ja yaay. ³⁰Ku kujk xyimumni, jats ja wa'ats xñijawidit jøts ku poot wyingøñ ku ja nøø ja tuu myenwani.

³¹Nayide'ents idø'øn ja' ku x'ejxtit jade'en ja ayo'on, jade'ents ja xñijawidit jøts ku wyingøñ ja Dios kyutujk midí ja tyanitanaapy yjaa'y.

³²Janch øts idø'øn nwa'añ jøts ku dø'øn ja jaa yjatt namga'aním y'oo'kixy pøn jaty ja ixyam jujky'ajttip.

³³Najxp y'ity ja naajx ja tsajp, øy yø juuni kyudigø'øty, jøts øts n'ayuujk nijuuni yø kyakixy kyanaxy.

³⁴Øyim mjaay'attit, kidi m'aaw mjoojt xamiyoxti mi-di yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp ñaxwiiñ jøts jade'en adsu'jky mgayikubaadidit ³⁵sã naky

myukyin, jade'en ja yiknime'endit pøn jaty juky'ajttip øy madsoo ya naxwiiñ. ³⁶ Jøp'ejxtits meets, ajot'at'etti ja Dios jøts mniwa'adsidit ja ayo'on midi tunip jatip, jøts ø xwinguwa'agidit amgujk jotkujk, ja naxwii'ñit jaaj'y myøjkudanaabyi.

³⁷ Xinaxy idø'øn ja Jesús jam yik'ixpiky tsaptojkjotp, jøts ja koots ñijkxy jam kojpkøjxp midi yiktejp Olivos.

³⁸ Jøts ja mayjaa'y jam tsaptojkjotp ejtp xyuminøjkxti jøpyi jøts ja jam pyatmadøyiyi.

Ku ja Jesús yikajpxy'aty jøts ja yikmatst

22 Ja paski xøøw idø'øn wyinaty pyatpy ku ja tsapkaaky yikay jadi'iñi midi kalevaduri møøt. ² Jøts ja teetywindsøndøjkxti jøts ja kajpxwejpitøjkxti tjanç'ix- a'adi ja taay sudsonim ja t'ukyik'ooktit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjkiyøø, ja idø'øn ja pabøjkpitøjk møøt kya'pxti nimakmajtsk.

⁴ Jøts ja ojts tniijiky ja teetywindsøndøjkxti møøt ja tajk mayut, jøts ja ojts tminagyajpxyi, ojts ja tkajpxy'atti sudso ja tkøyakt ja Jesús jøts ja tmåtstit. ⁵ Jøts ja jade'en yjotkujk'atti, ojts ttami'awanidi meen ja Judas, jøts ja ttamiju'udyit ku ja tkøyakt ja Jesús; ⁶ kyupøjk ja jade'en jøts ja t'ixaadyøjkiyii'ñ ja taay, jøts ja winet tkøyakt ku ja mayjaa'y jam kya'ettit.

Ku ja nwindsøn'ajtim yjaak'uk'a'ux'ajtni ja pyabøjkpitøjk

⁷ Xjats ja xøøw tpaajty ku ja tsapkaaky kyayikay levaduri møøt, xjats idø'øn ja borreegi maxu'nk wyinaty y'ookwa'añ, jøts ja idø'øn yikyøxy'ajtp ku ja paski xøøw ñaxy. ⁸ Winets ja Jesús tkejxy ja Pedro møøt ja Juan, yide'en ja tnimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøødøø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoojidøø:

—Ku net jam mgajptøkidit, jam inet tu'uk xpaattit jaaj'y pøn jam wyinaty nøø twejtsp tsiijøtpty. Ja'ats mbanøjkxtit jam tøjtkjotp, pøni mā yja'aty jamts mja'attit, ¹¹ jøts ja kudøjk xnøjmidi: “Yide'en ja windsøn wyā'añ: ¿Mak idø'øn ja tøjkjoojt mā ja tmøøt'a'ux'att ja pyabøjkpitøjk, mak idø'øn ja tka'adyit ja paski a'ux?” ¹² Winets meets inet ja tøjkjoojt myiktuk'ejxtit jap nipatøjkijxpy a'ejxi abaadi; japts xyik'awejxtit ja a'ux.

¹³ Xjats idø'øn ja ojts ñøjkxti jøts ja jam jade'en tjançpattoø sa Jesús ja wyinaty tø ñii'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyii'ñ ja kaabyajt. ¹⁵ Jøts ja tnimaay:

—¿Ixyamnim meets inet ja paski a'ux jade'en nmøøtkaamyuky sam ø ndyimchøkyin namga'anin ø n'øøky! ¹⁶ Janch øts idø'øn nwa'añ jøts ku meets ixyamyi jade'eñi njaaqmøøtkay jaanin jadiogok ku mye'ent ja Dios kyutujk midi ja tyanitanaapy yjaa'y.

¹⁷ Winets ja tniijiyii'ñ tu'uk uujk'ii'ñ, jøts ja jawyeen ttukmøja'wiyii'ñ ttukunuu'kxyja'wiyii'ñ ja Dios Teety, jøtsnim ja wyaañ:

—Axajidi ya'at jøts x'ukwa'kxtit; ¹⁸ øts kø'øom wamp jøts ku ø ka'ap tsojk n'uk'uknit yø uvi tsā'am nøø'u'nk, jaanin jadiogok ku Dios ja kyutujk tyikme'ent midi ja tyanitanaapy yjaa'y.

¹⁹ Jøts ja tniijiyii'ñ tsapkaaky, ojts nayide'en ttukmøjawi ttukunuu'kxyjawi ja Dios Teety, jøts ja t'adujk-pajkxi ja kyudanaabyitøjk jøts ja tmø'øy, yide'en ja tnimaay:

—Kaydi ya'at, yø' øts idø'øn ñamyayi nne'kx'ajtpy midi meets mniitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

²⁰ Nayide'en ja uujk'ii'ñ ja ttuñ ku ja y'a'ux'ajtkøjxtøø, jøts ja wyaañ:

—Ya'at tsapnøø'uujkin idø'øn ixyam tåmp ejxpajtin ku ja Dios Teety ja wyanda'aky tyik'aduky samdam ja ttami'awa'aniyii'ñ ja naxwii'ñit jaaj'y ja nitso'ok'ajtin. Ixyamts idø'øn ja cho'ondā'aky ku øts ja nni'jpy inet wyidusu'unt wyidaxt.

²¹ Pønts ø xkøyåkp, pøn ø xka'ødyunwamp, ixya øts ja møøt ngay, kidi majip ja'. ²² Ja' ø nbadumpy midi ø tø nyiktaniipiky; ija' ayo'ijxyim jajtp pøn ø xkøyåkwamp!

²³ Jøts ja ñayiktøønaxwā'jkidøø agø'ømyi, pøn idø'øn jade'en ka'øy'adøø'tswamp.

Ku ja Jesús kyudanaabyitøjk tkajpxy'atti pøn idø'øn jawaani møj pidsø'ømp

²⁴ Xjats ja xem yam tkajpxy'ajtpinibøjkidøø pømbi dø'øn jadyimy'ukmøjtøkip. ²⁵ Jøts Jesús ja ñimaajjidøø:

—Jade'en møj windsøn t'ana'amdi ja naajj ja kajp pøni sa ja ttsokti; jøts pøn jaty tningubajk'ajttip o ti, ja'ats yiktejtø jøts ku ja t'ødyundi øy pøn. ²⁶ Ka'ats meets idø'øn jade'en mjaaj'y'attit; pøni pøn møjtøjkøp, pøni pøn ana'amp, kidi ja jawyeen namyiduni ttsøky; ja' idø'øn paa't'ajtip ja myigu'uk tpudøkip. ²⁷ ¿Pømbi dø'øn møjtøjkøp? ¿Ja' pøn yikwindsø'jkøp, uk ja' pøn windsø'jkøp mā ja kaadyajk jam? ¿Kidi ja'ajtp møjtøjkøp pøn jam tø twinguwaadsi ja kaabyajt jøts ja yikwindsø'øgi? Ixyats meets jade'en nmøøtwidity sam ja' pøn ja myigu'uk wyindsø'jkøp.

²⁸ Tøts meets xmøøt'ayo'ombaaty, tø nayide'en xmidanidi wine'enin øts ixyam xmøøtwidetti. ²⁹ Paty meets mbaat'aty nmo'ot ja Dios Teety kyutujk midi ja tyanitanaapy yjaa'y, nayide'en sam øts ja tø xmø'øyin,

³⁰ jøts mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit mā ø nyikutukt jøts xiidyu'undit ja Israelit jaaj'y niduki'yii.

Ku ja Jesús kø'øom tningajpxy jøts ku ja Pedro ja kyu'øønyiyi

³¹ Nayide'en ja nwindsøn'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja t'iy'ajtin jøts meets ja øy øy myik'ayo'ombaadit, yikxon meets ja mduktani'e-jxwā'añ; ³² tøts me nni'amidowi jøts kidi yikmima-

jada'aky ja mjanchja'win ku jade'en m'ukjatt m'uku-batt. Kuts ja m'ajot'ajtin jadigojk tu'ugyi xyik'ett, kajpxjot'amøjkits ja mmigu'uk pøn jaty ø nja'ajtpy.

³³ Jøts ja Simón wyaāñ:

—Windsøn'ajtim, ku me m'ukyiktsu'umt, nayide'ents øts nyiktsu'umt, žti ti ø nnida'amp? Mjadyimya'øøky mets, nmøøt'ookpts mets.

³⁴ Winets Jesús ja űimaājyøø:

—Øts Pedro dø'on wamp jøts ku tsapni'āaw wyinaty ka'anim y'ayajji'ikñim, ku mets wyinaty tigøøk ojk tø xku'øø'ni jøts ku me xka'ijxy'aty.

Ku Jesús tnimaāy kyudanaabyitøjk jøts ku ja tyagø-da'akwā'añidi ja ayo'on

³⁵ Xjats Jesús ja yiktøøjidøø:

—Ku meets ojts nguexy jadi'iñi, ku ja pejn ngaduk-wejtstøø, ku ja meeñ abøjk'iñi ngadukondøø, ku ja mgø'øk paat xkakondøø, žsats meets ojts mdyimyjaty? Žti ojts mguidyim'ijtyidi o dø'on ja jade'en xkakondøø?

Jøts ja yjanchwandøø:

—Janch ka'ap øøts ojts ti xka'ejtxi.

³⁶ Winets ja űimaājyidøø:

—Yamnims inet ja pejn xwetstit pøni pøn yja' jam, nayide'en ja meeñ abøjk'iñi; pøni pøn ja chujx ka'e-jtxip, wan ja űijan ttøøky jøts ja ttaju'uty. ³⁷ Øts wamp, wan idø'on jade'en tjaty, jabi kuwanyimxi jade'en yjatt sã Dios kyajpxy wya'āñ: "Møøt ka'øy jaa'y ja yik'ama-chomujky." Jade'ents øts idø'on nyiktu'unt sã øts jap tø nyikniagajpxy. Ka'pxy idø'on ja jade'en yjatt kyubatt.

³⁸ Jøts ja wyandøø:

—Windsøn'ajtim, øø ixjats majtsk tsujx.

Jøts ja y'adsøøy:

—Amøñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chø'jñ, jøts ja űijkxy jam kojpkøjxp midi yiktejp Olivos ma dø'on ja jam xyumiyø'y'ity; jøts pyabøjkpitøjk ja pyadso'onøø. ⁴⁰ Kuts ja jam yjajty, jøts ja űimaājyidøø:

—Ajot'atti Dios Teety, jøts kidi myikmajada'akti.

⁴¹ Jøts ja ojts yjyø'øy nadyu'uk, űajtsyø'øyiyiñi ni-jagam. Jamts ja űagyuxendyaajkøø, jøts ja jam Dios Teety t'ajot'ajty ⁴² yide'en:

—Dios Teety, pøni mdsøjkpy, jøts ø ka' jadine'en n'ayo'ombaaat; kidi øtsipts nja' kø'øom nyiktumpy, ja' ø nbadumpy pøni sã me xamidsøky.

⁴³ Winets ankilis ja tu'uk űimejnøø midi tsajpøtpy tso'omp, jøts ja myøjāawmøøjyøø. ⁴⁴ Tyimchaach-ja'wipts ja møk ku dø'on ja jade'n yjatwā'āñ, jøts ja ojts tjaaktyimyktoñ tjaaktyimy'ajot'ajty ja Dios Teety amumjoojt. Janch yikxon ja yja'anuu'kxiñi, jade'en y'anuu'kxi ja wyix'e'kxy sam ni'jpy kom kom wyix-e'kxyin.

⁴⁵ Kuts ja Dios'ajot'ajt'abajtyiñi, jøts ja ojts tnimiñ ja pyabøjkpitøjk ma ja jam wyinaty. Maadip ja jam ku ja

tpaaajty, ja jotmay ja jadi'iñi yikjotkøjxidip. ⁴⁶ Winets ja tnimaāy:

—Žtigøjxp ku mma'adi? Pido'økti, jøts ja Dios Teety x'ajot'attit jøts kidi mibaat miku' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinaty jade'en kyajpxy ku yja'jty may jaa'y. Ja Judás ja twinyø'øpy pøn ja pabøjkpitøjk wyinaty nimakmajtsk møøt tø y'uka'pxti, jøts ja twingume'eniyiñi ja Jesús jøts ja ojts tssu'kxy. ⁴⁸ Winets nwindson'ajtim ja tnimaāy:

—Judás, žjade'eñi øts idø'on xkøyaky ku ø xtsu'kxy?

⁴⁹ Jøts pøn ja Jesús jam wyinaty møøtwidewjtp, ku ja jade'en t'ejxtøø, winets ja yiktøøjyøø:

—Windsøn'ajtim, žnadyagubojkim yø tsujx?

⁵⁰ Jøts ja nidu'uk tyiktsaachiyiñi ja teetywindsøn tyumbi, ojts y'aga'ndyatsk ja tkajtspo'jtiji. ⁵¹ Ka'ap Jesús űiimy, yide'en ja wyaāñ:

—Majtsu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky.

⁵² Xjats ja tnimaāy ja teetywindsøndøjkti, ja kajpxwe-ppitøjkti, ja møjaa'dyøjkti wine'enin ja jam winaty tø myendø jøts ja yiktsoonwā'āñ:

—Ja tsujx, ja kipy meets yam xanimemp. Žti øts yjawi tø nduni? Žtø øts yjawi nmaa'tsni? ⁵³ Ku meets jam y'ij-ty nxumiminabyaadyi jabom jabom jam tsapøjkjotp, niwine'enints meets y'ijty sã xkatuñ xkanøjmi; yamts meets winet tø mnaqxwā'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'ñiñ jøts ku ja ka' t'ijxy'aty ja Jesús

⁵⁴ Winets ja tmajtsstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'øy. ⁵⁵ Jøts jøøon ja jam tajkyujk'am tyikmøjyidøø, jamts ja tnidsinay'awidewjttøø jøts ja Pedro nay jam y'ixakmøø. ⁵⁶ Winets tø'oxyøjk ja tu'uk y'ejxøø pøn jam wyinaty tump, jøts ku jøøon ja jam twindsøøni, winets ja tiyim wyin'ejxøø jøts ja wyaāñ:

—Yø'øts ja Jesús y'ijty tmøøtwidewjtp.

⁵⁷ Ka'ats Pedro ja tkupiky, yide'en ja wyaāñ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaāñ:

—Mets yø y'ijty møøtwidewjtpy, žkidi?

Ka'ats ja Pedro űiimy, yide'en ja wyaāñ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori űaxy ku ja jadu'uk møkta'aky wyaāñ:

—Janch yø' tam yø y'ijty myøøtwidewjtpy, øø nayi Galileit jaa'yts yø'.

⁶⁰ Xjats ja Pedro wyaāñ:

—Migu'uk, nguidyimñija'wip øts øø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'āaw tu'uk y'ayajxy. ⁶¹ Jøts ja nwind-

søn'ajtim t'ejxjimbijty ja Pedro, winets ja Pedro tja'myejch ku nwindson'ajtim ja wyinaty tø ñii'mxyi: "Ku tsapni'aaw inet y'aya'a'xt, tø mets wyinaty tigøøø ojk xku'øø'ni jøts ku me ka' x'ijxy'aty, jøts ku me ka' xnijawi." ⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktaguyaty

⁶³ Jøts ja jaa'dyi pøn ja Jesús wyinaty tkøjø'øm'ajttip, ojts ja ttaxe'ekti ttaya'a'xti, jøts kawine'en twinwopti tjøpwopti. ⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—İUknajtsjawi pøn yjawi tø mgøxyi!

⁶⁵ Kawine'enin ja tjemnimaadyøø ttenimaadyøø.

Ku ja Jesús yikwaanijkxy jam kutujktaajjotp

⁶⁶ Xjats ku xyijindyajky jøts ja jamit møjaa'dyøjk ñamyujkidøø møøt ja teetywindsøndøjkti, møøt ja kajpxwejpitøjkti, jøts ja tyknøjkxtøø ja Jesús mja ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, zjanch mets idø'øn myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt. ⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamaajtstu'utt. ⁶⁹ Nay icyamyits øts inet ja Dios Teety nbu'ix-aagit kyutujktaajk jøp'am, pøn ja myøk'ajtin kamaabyim.

⁷⁰ Winets ja niduki'iyi wyandøø, niduki'iyi ojts yiktiyi:

—Zjanch mets idø'øn Dios U'nk?

Jøts Jesús y'adsøø, yide'en ja tnimaay:

—Øts idø'øn ja', nagyø'øm meets ixa jade'en tø mwa'a'ñ.

⁷¹ Jøts ja wyandøø:

—ZTi ejxpi ti nija'wibi jaa'ktojkijy? Tøxi adøm yø yam kø'øm ndyimadø'øyin sa yø kø'øm wya'a'ñ.

Ku ja Jesús twinguwa'jkiyii'ñ ja Pilato

23 Winets ja tyanagyukigyøjxtøø, jøts tyknøjkxtøø ja Jesús jam Pilato wyingujk. ² Jøts ja jam tni'øø'ninaxwa'aktø yide'en:

—Tø øøts yø jaa'y ngubaadi, yø' tkajpxma'tp adøm ja nmigu'uk. Yide'en yø wya'a'ñ jøts øøts ja yjadu'ukpi windsøn ngamigubatt midi yä'at naajx kajp tni-tanaapy. Nayide'en øøts yø xnimaamyi jøts ku yø' Cristo, tyimy ja møj windsøn midi yiknitsokp.

³ Xjats Pilato ja tyiktiy:

—Zjanch mets idø'øn israelit jaa'y mniwindsøn'ajtpy?

Winets ja Jesús y'adsøø jøts ja wya'a'ñ:

—Janch øts ja', ka' me nugo mwa'a'ñ.

⁴ Jøts ja Pilato tnimaay ja teetywindsøndøjkti møøt ja mayjaa'y:

—Niti pøky yø jaa'y, niti tundigø'øyin yø tkatuñ.

⁵ Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyin-ma'a'ñ yø ttuk'ixpiky. Jam yø ojts Galilea jade'en y'adøt-

spinaxwa'aky, jøts yø icyabaat jade'en tpamiñ, icyabaat jade'en tkamajtsu'uty.

Ku ja Jesús twinguwa'jkiyii'ñ ja Herodes

⁶ Kuts Pilato ja jade'en tmadøø, xjats ja tyiktiy pøni janch Galileit jaa'y idø'øn ja'. ⁷ Kuts ja ñømdøø jøts ku jade'en, winets ja ojts ttaninijkxy ja Herodes pøn wyinaty møj kudunk'ajtp jam Galilea, tyimbyøn ja wyinatymi jam Jerusalén ja'abi xøøw. ⁸ Kuts ja Herodes twingu'eixiyii'ñ ja Jesús, jøts ja yjantyimxyondaajky; jekyid idø'øn ja wyinaty tyimyjawin'eixwa'a'ñ jøts ja jadin'e'en ka' twin'ijxñim, tø ja wyinaty yiktami-madya'aky jøts ja jade'en tnijawt, yjøp'ijxpyts ja t'ejxit øy juuni ja myilagri'ajtin. ⁹ Kawine'en ja ttiibyijky, jøts ja Jesús kyidyimy'adsoop ja'. ¹⁰ İxam idø'øn ja teetywindsøndøjk wyinaty møøt ja kajpxwejpitøjkti, ja'ats jam møk'ampy jantyimy'øø'ndip. ¹¹ Xjats ja Herodes møøt ja tyumbitøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttuk-tatøkidi sam møj windsøn wyetin, jøts ja Herodes ja ttaniquejxy ja Pilato jadigojk. ¹² Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'øn ja wyinaty.

Ku ja Jesús ñiduujkiyii'ñ jøts ja y'ookt

¹³ Jøts ja Pilato twaamujky ja teetywindsøndøjkti, ja kudunktøjkti, møøt ja mayjaa'y, ¹⁴ jøts ja tnimaay:

—Meets yø jaa'y ya tø xanimiñ jøts mnømdi jøts ku yø' tkajpxma'aty ja jaa'y; tøts xmadowdi ku tø njatiibyiky, jøts niti tundigø'øyin øts yø ngadapøky'ijxy, øy meets yø jade'en xjani'øøni. ¹⁵ Nayide'en Herodes yø niti tundigø'øyin tkapaajtxi, icyats ja tø tkajximbejt-nimi jadigojk. İxats idø'øn x'ejxti jøts ku ka' pyaat'aty jøts yø y'ookt. ¹⁶ Nyik'ayo'opts øts inet yø' jøtsnim øts inet yø nyik'awa'atspidsø'ømt.

¹⁷ Xumijade'ents idø'øn ja ttundi ku ja xøøw tpaaty, kuwañi dø'øn ja Pilato tu'uk ja pøkyjaa'y tjady-imyik'awa'atspidsimy. ¹⁸ Jøts ja ni'ijtyi møk'ampy wyambinaxwa'aktøø:

—İYikjiwa'ak yø', jøts yø Barrabás ne'egi xyik'awa'at-spidsø'ømt!

¹⁹ Tsep'ejxp idø'øn ja Barrabás jam wyinaty jam kajpjotp jøts ja tø yikjaa'y'øøky, ja'ats ja kyubuxøjk-tøjkiyii'ñ, ja' ja wyinaty tø yiktagudsumi. ²⁰ Yik'awa'at-spidsømwampy Pilato ja Jesús, jøts ja ojts tmigajpxy jadigojk ja mayjaa'y; ²¹ zmaa?, jawaani møk'ampy ja wyandøø:

—İYikruspat! İYikruspat!

²² Xjats ja Pilato midigøø øjk wya'a'ñ:

—ZTimts yø tyimgyubatp? ZTi tundigø'øyin adøm yø tø xtyimdyu'unxim? Ka øts yø nbøky'ixy ti yø tyim-gyu'oogip. Ja'ayi øts yø nyik'ayo'ot jøts øts yø nyik'awa'atspidsø'ømt.

²³ Jøts ti dø'øn ja tjantyimdyejti, møk ja tyimdyanidi jøts ja tnøjmidi wan tyikruspety; yjanchka'uk'amonidi ja', jøts idø'øn ja teetywindsøndøjk ja jade'en tnank-tyuujnidøø sam idø'øn ja wyinaty tyimyjotkidä'akti.

²⁴ Winets ja Pilato ja tkupiiky sã ja wyinaty tø wyã'andi, ²⁵ jøts ja jade'en tyik'awa'atšpidsiimy ja jaa'y pøn ja wyinaty tø t'a'ejxidi. Jøts ja pyidsø'ømt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'øyin ku ja wyinaty tø tñankchep'ijxyi ja kajpja'y jøts ku ja yikjaa'y'øøky. Xjats idø'on ja Jesús yikøyaiky jøts ja yiktagøðjkiyi'ñ ja mayja'y, wan ja ttundi pøni sã ja ttundi chojkingøjxp.

Ku ja nwindson'ajtim Jesús kyiruspejty

²⁶ Kuts ja wyinaty jam tyiknøjkxti mã ja tyikruspattit, winets ja tu'uk tmajstøø ja jaa'y pøn kugajp'ajtp Cirene, Simón'ajtp ja'. Kyamjotp ja wyinaty chøøñ jøts ja ttaguwã'anidøø jøts Jesús kyirus ja tpagøjyt jøts ja ix'oojk ttabayø'øty.

²⁷ Janch may jaa'y idø'on ja jam wyinaty payø'øyiyip, may ja tø'øxyøjk yjanhya'aaxti ku ja jotmay ja tyatøkiyidi, ku ja jade'en tyimyiktuñ. ²⁸ Jøts Jesús ja ojts y'ijxyidi jøts ja ñimaajyidøø:

—Meets Jerusaléngit tø'øxyøjkti, kidi ø xkuyaaxidi, kø'ømyi mee mnabyaya'axit jøts ja' m'ejxtip ja m'u'nk m'una'jk, ja' mbaya'axtip. ²⁹ Jã'atp ja et ja xøøw ku pøn wyã'ant: “Nekim yø t'ejxti pøn ka'u'nkpattip, pøn nijuuni kayikwise'etstip, pøn nijuuni y'u'nk tkatsimy'ejt-tip.” ³⁰ Jøts ja jaa'y wyambinaxwã'aktit: “Ok øts yø tun yø kojpk ne'egi xnijaanit.” ³¹ Jade'en sam øts ixyam n'ayo'ombaaty niti pøkyøjxp, isats ja tyimy'ayo'on-baattit ja Jerusaléngit jaa'y!

³² Namajtsk pøkyjaa'y ja pyaa'yø'øyi ja Jesús jøts ja t'atsemøt'oook. ³³ Kuts ja jam yjã'jttøø mã ja et jam txøøw'aty Calavera, jamts ja tyikruspajttøø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttøø. ³⁴ Kuts ja ixam wyinaty jade'en yikruspatti, xjats ja Jesús wyããñ:

—Dios Teety, maa'kxuk, ka' yø tñijawidi pøni ti yø tyundip.

Jøts ja soldaditøjk ja wet tñiguyajttøø midi ja Jesús y'ijty wyet'ajtpy, jøts ja jamyi agø'ømyi twejtswã'kxtøø. ³⁵ Ixam idø'on ja mayja'y y'a'ejxukti jøts kudunktøjk pãat ja ñixi'igyi tyaxi'igyi, yide'en ja wyã'andi:

—Tøxi wyenkpi tyiktsø'øky, wants inet yø kø'øm tñankchø'øgyi, pøni janch ja Cristo tam idø'on yø' pøn ja Dios tø y'a'ejxiyi yiknitsokpi.

³⁶ Nayide'en soldaditøjk ja ñixejkmiyøø tyaxejkmiyøø, jam ja wingon wyingunøjkxiyi jøts ja ttuk'uukwã'andi ja vino tã'am, ³⁷ yide'en tñøjmidi:

—Pøni mets tam idø'on mjanchwindsøn'ajtp yã israelit jaa'y ñaxjøøjty kyajpjøøjty, ñankñitso'ogits mets jøts mgã'oook.

³⁸ Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wyã'ãñ: “Yã'at idø'on tñiwindsøn'ajtp israelit jaa'y.” ³⁹ Jøts ja pøkyjaa'y dyi pøn jam wyinaty kudiydi, ja'ats ja nidu'uk migajpxigøøyyøø, yide'en ja ñimaajyøø:

—Pøni mCristo tam mets, ζti kuts mganankwyinakyi jøts øøts nayide'en xyikwinakt?

⁴⁰ Jøts ja yjadu'ukpi ojts twi'øjy ja myigu'uk, yide'en ja tñimaay:

—ζKa' mets ja Dios x'uktsø'jkiñi? Jabi nayide'ents jam yjawi mja'ayo'ombaatmi. ⁴¹ Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tø ndu'uñin, mats yã'at niti yø tkatuñ ti dø'on yø jade'en kyubejtpy.

⁴² Jøts ja yjaakwããñ:

—Jesús, xjã'myatspim øts ku mja'att jam mgutujk-tajk jøp'am.

⁴³ Jøts Jesús ja y'adsoojøø:

—Janch øts idø'on nwã'ãñ jøts ku øts inet nayamyi xmøøtñøjkxt jap tsajpjøtpy.

Ku ja nwindson'ajtim Jesús y'ø'jky

⁴⁴ Ja dø'on ja xøøw wyinaty kyuki ku jotmøñ kyood-siyi'ñ, jøts ja et kugoots tyããñ, jaanim xiñi'ñ jadigojk tiggøøk yaxp. ⁴⁵ Kuts ja xøøw wyingoodsiyi'ñ, jats ja tsaptøjk awejststuk kujkwa'kxy, winet tyakø'jtsiyi'ñ.

⁴⁶ Jøts ja Jesús møk'ampy wyããñ:

—Dios Teety, pøjkjø'øgik øts n'anmija'win.

Ja'ayi ja jade'en yjaakwããñ jøts ja y'ø'jky.

⁴⁷ Xjats kuts ja romit soldadi mayut ja tuki'iyi jade'en ojts t'ixy sã jaty idø'on yjajty kyubejty, jøts ja tmø-jã'wiyi'ñ tkunuu'kxyjã'wiyi'ñ ja Dios, yide'en ja wyããñ:

—Janch øy jaa'y tam idø'on yø', ka'ap yø pyøky-jaa'dyi.

⁴⁸ Pøn jaty jam wyinaty, pøn jaty ja jade'en t'ejxtøø tñijã'widøø, niyaxni ja jam cho'onidøø. ⁴⁹ Jøts pøn jaty ja Jesús ijxy'ajtip, jøts ja tø'øxyøjkti pøn ja jam Galilea wyinaty tø pyadsøøñiyi, ja'ats idø'on jam jagam ojts t'a'ejxukti ti jaty tuujnøø jajtøø, wã'ats ja t'ejkøjxtøø.

Ku ja Jesús ñine'kxy yikpiktaajky jap oo'kpi tsã jutjøtpy

⁵⁰ Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøy, José ja xyøøw'ajtpy, jam ja Arimatea kyugajpi, nayjam idø'on ja kajp tyañ Judeit etjotp. Nay jamts idø'on ja tyuñ jam kutujktaajkjotp mã ja israelit jaa'y kyutujk'adsøøñidi. ⁵¹ Y'awijxpyts idø'on ja José ja' ja Dios kyutujk midi ja tyanitanaapy yjaa'y, jade'ents ja ka' tkupiky sã ja møøtkutujk'adsinaabyi wyinaty tø y'adø'tsti. ⁵² Ja'ats ojts tñinijxy ja Pilato jøts ja t'ats'ijxy jøts ja t'amidoojøø ja Jesús ñine'kx. ⁵³ Kuts ja tyikruswinajky, winets ja tpoop-wet'amøjch jøts ja tpiktaajky mã oo'kpi jut ja wyinaty yikxon tø tyik'øyi, tøjku'ngin ja wyinaty tø tpejkxjuty ja tsã, nipøn oo'kpits jap kyayikpikta'ãkñim, tyimñay'a-maay ja y'ity. ⁵⁴ Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

⁵⁵ Jøts ja tø'øxyøjk ñøjkxtøø pøn wyinaty tø tpad-soondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky. ⁵⁶ Kuts ja wyimbejtnidøø, ñøjkxnidi jam tyøjkjotp jøts ja ojts t'a'ejxidi ja pã'ãkxuu'kpi møøt ja aceite, jødsyim ja t'a-maay'atti ja poo'kxin xøøw sam wyã'ãñ ja Dios kyutujk.

Ku ja nwindson'ajtim Jesús ñanky'ijxyi ma ja pyabøjkipitøjik jam

³⁶ Ixamni dø'on ja wyinaty jade'en ñawya'añidi ku ja Jesús jam ñanky'eixøø jadigojk ja' y'agujk'amdi ma ja jam wyinaty, jøts ja ojts kyajpxpoo'kxidi, yide'en ja ñimaajyidøø:

—Dios mjagyepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'e-jxjoxti. ³⁸ Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi? ³⁹ Eixidik øts ngø' ndeky. Pø øtsts idø'on kø'øm. Tondik øts, ejxtik øts; pø ka'ats eixma'jtin ñine'kx møødi, ni pyajk niti ja jade'en kya'ejtxi, sam meets ixyam x'ijxy tuki'iyi nmøøt'aty.

⁴⁰ Kuts ja jade'en tyukmadojidøø jøts kyø' tyeky ja tnanky'eixøø. ⁴¹ Kumi nika'anims ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigyumaap tjä'wi'adø'øtsti, xjats Jesús ja ñimaajyidøø:

—¿Ka'ap ja ti jii'kxy xmøødidi?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk, ⁴³ jøts ja t'axajiyi'ñ jøts ja ojts jami tji'kxy ja' wyindumdi. ⁴⁴ Winets ja ñimaajyidøø:

—Jade'en øts idø'on tø njaty sã meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sã øts jap nyiknigajpxy ma

ja kutujk Moisés Dios tyukjajyøø, jøts nayide'en jap nøkyjøtpy midi ja yjadu'ukpi kugajpxy yjaadyandøø, jøts nayide'en sã ja nøky tnigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukiyidøø, ⁴⁶ yide'en ja ñimaajyidøø:

—Jade'en jap yjə'ayi jøts ku ja Cristo y'oock, kyidigøøk xøøwts ja yujukpyøkt ku o'jkin ja tja'uk'ext; ⁴⁷ jøts ja yiknigajpxwa'kxt o manaaix o magajp, ku ja ya Jerusalén cho'ondə'akt jawyeen, jøts ku ja'agøjxp yiknøjmidit o pøn, wan ja chinaa'yin tyiktigatsti jøts yikpojkipimaa'kxtit. ⁴⁸ Meets, wa'ats mdyimy'ijxy mdyimñijə'wip sã jaty tuki'iyi tyuñi yjaty. ⁴⁹ Madowdits, ndanigaxp meets ja' midi øts ja Dios Teety tø xamiwandaagi; yaayits meets m'awext ya Jerusaléngit kajpjøøjty kunim ja mbaadidit ja møk'ajtin midi jap tsajpjøtpy kidəkp.

Ku nwindson'ajtim Jesús chajpejty

⁵⁰ Xjats idø'on Jesús ja jam kajpjotp wyaaðid-søøjmidøø, jøts ja yiknøjxidøø jam Betania, ojts kyø' ja tyanixajyidi jøts ja kyunuu'kxidøø. ⁵¹ Kuts ja jade'en kyunuu'kxidøø, jøts ja myajtstujtidøø, jøts ja chajpejty. ⁵² Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtndi ñøjknidi jotkujk'atyim jam Jerusalén, ⁵³ xumijam'ajttip idø'on ja' jam tsaptøjkjotp jøts ja jam tmøjawidi tkunuu'kxyjawidi ja Dios. Jade'en ja y'eixi tyiyi.

JUAN

Ja' pøn xuk'ejximp xuknija'wimp ja Dios Teety

1 Jaayim ja wyinatyni pøn xuknija'wimp ja Dios ku tuki'iyi cho'ondakijxñim; Dios ja møøt tyimy'ity jøts nayi Dios ja kø'øm. ²Tso'onda'agyip ja møøt y'ity. ³Jøts ja' ja Dios Teety tuki'yiyi ja tsajp jøts ja naajx jøts tuki'yiyi; pø ka'axi ja naaxwii'ñit jeexyip cho'ondaajjk ku jeexyip kya'ity ja'. ⁴Ja' tyiktso'ondaajjk ja tsinaa'yin jøts ja jujky'ajtin, jøts nayide'en xuknija'windi ja tyiiby ja yjanchpi, midi tyik'øyip midi tyikwinaa'nbyatp ja naaxwii'ñit jaa'y. ⁵Møk ja tyikmajada'aky ja myøk'ajtin ku xyikudøø'kxaajka'am ma pøn wimbeets kugoots, jøts ka'ap ja miku' yja' myajada'aky.

⁶Jats idø'on jaa'y tu'ukmi pøn Dios ojts kyexyi, Juan ja xyøøw, ⁷midi testigi'ajtpi meen jøts ja tningajpjt jøts ja tnmadya'akt pøn xyikujajtaajjkimp xyikudøø'kxaajjkimp, jøts ja øy pøn ttiyjawit tjanchjawit pøni sa jaty ja wya'añ. ⁸Kidi ja Juanixi ja' pøn xyikujajtaajjkimp xyikudøø'kxaajjkimp; nugo testigi'ajtpi ja ja'ayi yikexy jøts ja' tningajpjt. ⁹Tyimy ja' idø'on wyinaty memp ja'tp ya naaxwii'ñit pøn tyik'øyip tyikpaadip, pøn tyikwinmaa'nbyatp ja naaxwii'ñit jaa'y.

¹⁰Ixa ja wyinaty tø yja'tni ya naaxwii'ñit jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'øyiyi ja naaxwii'ñit. ¹¹Kyø'øm ja' ja yjanimimpy jøts kyø'ømig'uuktøjk paat ja ka'ap kyupøjkyyøø. ¹²Jats winaa'gin pøn ja kupøjkiyøø jøts pøn ja janchja'wiyøø; ja'ats ja tiy'ajtin ja ojts tmø'øy jøts Dios Teety ja y'u'nk'atidit. ¹³Tiy'ajtingøjxp ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jk tpaatti.

¹⁴Jøts ja' pøn xuknija'wa'am ja Dios, ojts ja jaa'yin y'atsøøni y'atstani, jøts ja ojts ñiyjeki xmøøt'ijtyindi xmøøtsinaa'yindi. Tø adøm myøk'ajtin ja nja'ijxyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaajjagyepy, janch pa'ayoop, jøts tum ja tiy'ajtin janch'ajtin yajkpy. ¹⁵Ja'ats ja Juan ojts tningajpjt jøts ja yide'en wya'añ:

—Yø'øxi øts idø'on ndijpy ku ø nwa'añ: "Ja' pøn oo-jknim me'emp, ja' idø'on møj jøts ka'ap øts. Jøts kumi jaayim yø' wyinatyni, kidinim øts."

¹⁶Kajaa adøm Dios kyunuu'kxin xmøø'yijtyindi ni'ijtyi. Juuni ja tkayaky. ¹⁷Tøts ja Moisés kyutujk xuknija'wa'am sa ja Dios kyutujk; ixyats ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tyi'yajtin yjanch'ajtin. ¹⁸Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø' xuknija'wa'am sa ja Dios Teety.

Ku ja Juan Bautista tningajpxy ku ja nwindson'ajtim Jesucristo myeenwa'añ

¹⁹Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk møøt ja levijit jaa'dyi midi t'ejx'ejttip ja tsaptøjk, jøts ja t'atstibyøktit ja Juan pøn idø'on ja'; ²⁰jøts ja ojts wa'ats tningajpxy, yide'en ja wya'añ:

—Ka øtsip ja' midi yiktejp Cristo.

²¹Xjats ja tjaaktyimdyiibyøjktøø:

—¿Pønts mets idø'øni? ¿Mets idø'on Dios kyugajpxy midi yiktejp Elías?

Jøts ja Juan wya'añ:

—Ka'ap ja y'øtsi.

Jøts ja tjaaktyimdyiibyøjk'adø'øtsti:

—Jøts, ¿metsimts idø'on ja' midi dø'on menwamp midi ja Dios kyugajpxy'ajtpy?

Jøts ja y'adsøøy:

—Ka'.

²²Winets ja yiknimaay:

—¿Pønimts mets? Kuwanixi øøts ja nnijawit jøts øøts ja ndukmado'ot pøn øø tø xkexy. ¿Sa me m'ukwa'añ ku mga'uknañigajpxyi?

²³Jøts ja Juan ja t'adsøøy:

—Øts ja' midi yikmadoop y'ayuyk jam abak etjotp, ma niti kya'ity: "Yiktøwdi yiktud'a'akti ja mwinmaa'ñ jøts xkupøktit ja nwindson'ajtim" —nayide'en sam ja Isaías wya'añ, ja Dios kyugajpxy.

²⁴Ja fariseotøjk ja wyinaty tø kyexyidi midi idø'on ja Juan jam jade'en møøt ñagyajpxyi. ²⁵Xjats idø'on ja Juan yiktibyijky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

²⁶Jøts ja Juan tningaay:

—Nøø øts iiy nduktanøbejtpy; jats ya tu'uk midi ka' x'ejkaptinim; ²⁷oøjknim ja mye'ent, ja' tu'uk møj, nugo øts jawyeen nyiktuu'awa'aach. Nijuuni øts ja møøt nganamyibaat'atyyit.

²⁸Jam idø'on ja jade'en yjaty ma ja et jam txøøwi Betábara, midi tãmp xøbidsimy jam nøø agø'øm midi txøøw'ajtp Jordán, ma ja Juan jam ojts yiknøbety.

Ja Jesucristo yiktamiyoxp ja Dios Teety adømgøjxp

²⁹Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wya'añ:

—Ejxti, yø' idø'on jade'en jatwamp kubatwamp sam ja borreek u'nk yikyøxyin adøm nbojkpi køjxp, jøts yø'

naxwii'ñit jaa'y tyikpøkwyatsp. 30 Yø' øts idø'on ndijpy ku ø nwa'añ: "Ja tu'uk jaa'y myiñ, ja' idø'on møj jøts ki-di øts, jøts jaayim ja'ani." 31 Nika'ap øts yø y'ity nnijawi pøni pøn yø'. Tøts ø nmiñ jøts øts Israelit jaa'y nøø nduktanøbatt jøts nduknijawidit pøn ja'.

32 Nayide'en ja Juan wyaañ:

—Tø øts ja Espiritu Santo n'ixy jøts ku kyida'aky jam tsajpwemp sam tsapakin, jøts ja tø kyøkke'eky yø' kyubajkp. 33 Ni nganijawi øts yø' pøni pøn yø'; jøts øts idø'on ja Dios Teety ojts xnøjmi midi øts nøø xukyiktump ku nyiknøbety, yide'en øts ja xnimaay: "Ku x'ext ja Espiritu Santo kyida'akt jøts y'ixa'akt jam tu'uk jaa'y kyubajkp, ja'ats idø'on ja wyinaty midi ja Espiritu Santo xmø'øyimp ku ja yiknøbatt." 34 Tøts ø n'ixy, jøts øts tes-tigi jøts ku yø' Dios U'ngi.

Ja jaa'y pøn ojts jawyeen ttabøkti ja Jesús yja'

35 Xjats ku kyimjabom'ajty, iexam ja Juan wyinaty køjmyi møøt namajtsk pyabøjkpi. 36 Jøts ku ja Juan ojts t'ixy jøts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yø' idø'on jade'en jatwamp kubatwamp sa borreek u'nk yikyøxyin adøm nbojkpi køjxp.

37 Ku ja' tmadoodøø midi ja Juan pyabøjkpi'ajtpy, mi-di jam wyinaty namajtskti ku ja Juan jade'en wyaañ, xjats ja ojts tpanøjkxti ja nwindson'ajtim Jesús.

38 Winets ja nwindson'ajtim Jesús y'ejxjimbijty, jøts ojts t'ixy jøts ku jam yikpayø'øy, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

39 Jøts ja nwindson'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idì. Ja dø'on ja xøøw wyinaty jawaani kyagidåkni.

40 Ja Andrés idø'on ja', ja Simón Pedro y'uch, midi idø'on ja jade'en tmadoodip namajtsk ku ja Juan jade'en wya'añ. Jøts nay ja' idø'on jade'en tpanøjkxtip ja nwindson'ajtim Jesús. 41 Jøts ja Andrés tyimñayjaty ja ojts t'ats'ixa'ay ja y'ajch Simón, jøts ja ojts t'at-snøjmi:

—Tø øøts ja Mesías nbaaty midi Dios kyejxpy, midi Cristo yiktejp.

42 Xjats ja Andrés ojts twaajnikxy ja Simón ma ja nwindson'ajtim Jesús jam wyinaty, jøts ku ja ojts y'ijxyi jøts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet ixyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaadsøoy ja Felipe jøts ja Natanael

43 Jøts ku kyimjabom'ajty, jam ja nwindson'ajtim Jesús wyinaty ñøjkxw'añ Galilea etjotp, ku ja tmin-abyajti ja Felipe jøts ja tnimaay:

—Møødik øts.

44 Jam Betsaida ja Felipe kyugajp'aty nay jam ma ja Andrés kyugajpi møøt ja Pedro. 45 Winets ja Felipe ojts ñijxxy jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja jaa'y n'ixy midi ja Moisés ñigajpxpy jap nøkyjøtpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam ku-gajp'ajtp Nazaret.

46 Xjats ja Natanael wyaañ:

—¿Wan ndejin y'øybi jam y'ukpidsømni Nazaret?

Jøts ja Felipe y'adsøoy:

—Men xtyimy'ixy.

47 Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midi øy-jaa'y'ajtp, midi ka' tyaa'y.

48 Winets ja Natanael ja ojts yiktiiyyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patk-i'py.

49 Winets ja Natanael wyaañ:

—Windsøn, mets idø'on Dios U'nk, jøts mets idø'on mniwindsøn'ajtpy israelit jaa'y.

50 Jøts nwindson'ajtim Jesús ja ojts yide'en y'adsøoy:

—¿Jaty me xtyimyjanchjawi ja'agøjxp ku me tø nnøjmi jøts ku me tø n'ixy jap iigi patk'i'py? M'ejxpniim mets ja myøjpi y'øybi midi ø ndu'ump midi ka'ap yjade'eni sam ya'adin ku me tø n'ixy.

51 Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwii'ñit jaa'y ngudanì Dios Teety wyingujkp.

Naxyøduujnidip ja jaa'y jam Galileit etjotp

2 Kyimdigøøk xøøw wyinaty tø y'ity ku jaa'y y'ama-jtskidi ma ja kajp txøøwi Caná, jam Galileit etjotp. Iexam idø'on ja nwindson'ajtim Jesús wyinaty tyaaak.

2 Jøts nayide'en ja nwindson'ajtim Jesús wyinaty tø yik-waamidì migaabyi mi'ukpi møøt ja pyabøjkpitøjk jøts ja nay jam ñøjkxtit. 3 Xjats ja vino tyimgyijxy, winets ja nwindson'ajtim Jesús ja tyaaak ñimaajyøø:

—Tø tyimgyugøxidi, ka'ap vino ukteeni.

4 Jøts ja nwindson'ajtim Jesús y'adsøoy:

—¿Ti øtsimts taaak yø xpatp? ¿Tiku øts yø xukmadøy? Pø ka'animxi øts nja' xpaaty midi ø ndu'ump.

5 Jøts ja tyaaak wyaañ, yide'en ja tnimaay ja jaa'y pøn jaty jam wyinaty windsø'jkidip:

—Mdu'undip idø'on jade'en tuki'iyi pøni sa wya'añ.

6 Jamts wyinaty tudujk ja tsaaadu'jts midi ja israelit jaa'y yiktundip ku Dios ja twindsø'øgidi jøts ja pyøk-wya'atsttì. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami. 7 Xjats ja nwindson'ajtim Jesús tnimaay ja jaa'y pøn jaty jam wyi-naty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyk'utsti, ⁸ winets nwind-søn'ajtim Jesús tnimaay ja jaa'dyi:

—Aja'aptu'uttits inet waani, jøts xaninøjkxiti midi yø xøow tø tniwaamuki.

Jøts ja ojts jade'en ttundi. ⁹ Ojts ja tjā'gyapy midi ja xøow tniwaamujkip jøts ja tsujkx nøø tø ja vino yajitni, nika'ap ja tnijawī pø mā ja chøøñ; ja'ayi ja nugo tni-jā'widip pøn windsø'jkidip, pø ja'axi ja nøø wyinaty tø tjaapti. Xjats ja twaādsøoy ja jemyaa'y ¹⁰ jøts ja tni-maay:

—Tum jawyeen øy pøn t'uuky yø vino y'øbyi, jøts ku ja mi'ukpi ja kom tø t'uknidi winets ja yu'nkpi yikyakñim. Jøts mets, tø mets ja møk vino ne'egi xjaakyik'awixy, jøts mets yø yāmnim ne'egi xyaky oo-jknim.

¹¹ Yø'øbi miłagri'ajtin idø'on ja nwindson'ajtim Jesús tyimijawyeen nan'ky'ejxøø jam Caná, jam Galileit etjotp, midi yiknigaxø'jk ja myøk'ajtin, winets ja pyabøjkpitøjk ja ojts yjaakjanchjā'wiyi.

¹² Xjats ku ja jade'en y'ukjajty, winets ja ojts ñijkxy mā ja kajp jam txøowi Capernaum, møøt ja tyaak, møøt ja myigu'uktøjk, jøts møøt ja pyabøjkpitøjk. Jøts ja jam tyaā'nidøø ñigyawinaak xøow.

Ku ja Jesús tpawojpkijxy ja too'kpitøjkti jam tsaptojck agø'øm

¹³ Ja paški xøowts wyinaty tyimbyatniip midi ja israelit jaa'y tyundip, winets ja nwindson'ajtim Jesús ojts ñijkxy jam Jerusalén. ¹⁴ Jøts ja jam tsaptojck'agi'py tkubajtiyiñ ja jaa'dyi pøn too'ktip ja tsakaa, pøn too'k-tip ja borreek, pøn too'ktip ja pak, jøts nayide'en pøn ja myigu'uk myeeñ tyikwā'kxidiip, ja' jam wyinaty tsi-naadyip mayim ja jam tunk'atti. ¹⁵ Ku ja nwind-søn'ajtim Jesús ja ojts jade'en t'ixy, xjats ja tyik'øyiñ'ñ tu'uk pawojp, jøts ja jam tpawojpkijxy niduki'iyi ja jaa'y jam tsaptojck agø'øm, møøt ja byorreek møøt ja chakaa. Jøts ja meeñ yikwā'kxipiidi ojts ja myeeñ ja yik'ixko'odi, jøts ja myesi ja ojts yiktejimbetti. ¹⁶ Jøts ja tnimaay ja jaa'y midi paktoo'ktip:

—Yikjiwā'akti yø yā! iKidi nDeety tyøjk maadyøjk xyikwā'andi!

¹⁷ Winets ja pyabøjkpitøjk nay jaty tja'myajtsidøø ja nøky mā ja David yide'en wyaāñ: “Møk øts nba'ayøy ja mdøjk.”

¹⁸ Xjats ja israelit jaa'y ttiibyøjktøø ja nwindson'ajtim, jøts ja tnimaadyøø:

—zTi tiy'ajtin øøts xuk'ejxp jøts ku xjagyepy ja kutujk ku jade'en m'adi'ich?

¹⁹ Jøts nwindson'ajtim Jesús ja ojts t'adsøy:

—Yikidawdi yø tsaptojck, kidigøøk xøow øts yø jadigojck nyikwā'kukit.

²⁰ Winets ja israelit jaa'y wyāndøø, jøts ja ojts ñi'ixyiyi:

—Wixijkxyudujk jumøjt yø tø yiktunk'aty yø tsaptojck jøts yø tø y'øyi; zJøts me mwā'añ jøts ku mets yø kidigøøk xøow xyikwā'k'øyt jadigojck?

²¹ Ku ja Jesús ja tsaptojck tkajpky, pø kyø'ømne'kx ja jade'en tyijpy. ²² Pø patyxi ku ja nwindson'ajtim Jesús ojts yujkpyijky jadigojck jap oo'kpi jutjøtpy, yø'øts ja pyabøjkpitøjk yja'myatstøø ku ja wyinaty jade'en tø wyā'añ. Xjats ja tjantyimyanchjā'widøø ja Dios kyajpky, jøts nayide'en tmiibøjkidøø ja nwindson'ajtim y'ayuujk sã jaty ja wyinaty jade'en tø wyā'añ.

Wā'ats ja Jesús tnijawī sã jaty jadu'uk jadu'uk wyinmay

²³ Kuts ja nwindson'ajtim Jesús jam wyinaty tyiknaxy ja paški xøow jam Jerusalén, jøts may ja jaa'y ja jam yjanchjā'wiyoø tyiyja'wiyoø ku ja t'ejxti ja myilagri'ajtin midi ja tyumpy. ²⁴ Jøts ja nwindson'ajtim Jesús ka'ap ja nugo tyimñaagyiyaki, kumi wā'ats ja t'ejxkapy ja ni-duki'iyi sã pønjabøn. ²⁵ Ka'ap ja chøkyiyi jøts ja pøn tyukmadowit sã jaty jaa'y jadu'uk jadu'uk yjaa'y'aty. Wā'ats ja kø'øm tyimñijawī sã pøngapøn y'am yjotp wyinmay.

Ja Jesús jøts ja Nicodemo

3 Jamts idø'on tu'uk fariseit jaa'y pøn txøow'ajtp Nicodemo, jøts ja' idø'on ja israelit jaa'y wyind-søn'ajtip. ² Ja'ats ojts koots y'atstøk'ayø'øy mā ja nwindson'ajtim Jesús jam wyinaty, jøts ja ojts t'at-snøjmi:

—Windsøn, nniija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin miłagri'ajtingøjxp sam ixyam xyik-tuñin, ku jeexyip møøt mga'ity ja Dios.

³ Xjats ja nwindson'ajtim Jesús ja tnimaay:

—Janch øts idø'on nwa'añ, jøts ku ka' pøn tpaatt ja Dios kyutujk midi yjaā'y ja tyanitanaapy pøni ka'ap pøn nayide'en kyaxi'iky jadigojck sam tø kye'exyin.

⁴ Winets ja Nicodemo tyiktiiy jøts ja tnimaay ja nwindson'ajtim Jesús:

—zSudsots ja møj jaa'y nayide'en jadigojck kyaxø'økt sam ja tø kye'exyin? zPø sudso'ampy jadigojck tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøoy:

—Janch øts idø'on nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit mā Dios ja kyutujk ttanitani ja yjaā'y. ⁶ Ku ndeety ndaak xyikaxø'jkyim, nugo yø' xmø'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espiritu Santo xmø'øyim. ⁷ Kidi nigyumaap xjāwi jøts ku jade'en nnøjmi: “Niduki'iyi jaa'y pyaāt'atyidi ja chi-ñā'yin tyiktigatstīt, ka'axigajstipts ja ñamyayi jade'en.” ⁸ Pojp øy maḁsoo pyøjy; wā'ats nmadøø'yim sã wyinaañ ja poj, ka'ats nniija'wa'an pøni mā chøøñ jøts pøni mā ñijkxy. Nayide'ents idø'on ñamyayi ja'adi pøn ja Dios myøk'ajtin yikaxø'jkiyidip.

⁹ Winets ja Nicodemo tjaakñbyijky:

—zSudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—zPø møj maestrimts mets yā israelit kajpkijxy, jøts mets yø yjade'embī xkanimadøy? ¹¹ Janch øts idø'on

nwa'añ, jøts ku øøts ja' nnigajpxy midi øø nniñja'wip, jøts nay ja' øøts nideſtigi'ajtpy midi øø tø n'ixy; jøts meets ja xkajanchjawí sa øø njawa'añ. ¹² Nika' xjanchjawídi ku øts ja'abaat ndyimyjanigajpxy ti jaty ya naxwiiñ, ɓti ja'ats mee mjaakjanchjawip ja tsajpjøtpyit yja' ku meets njadukmado'ot?

¹³ Ka'axi jap pøn y'ats'øch jap tsajpjøtpy, øts idø'on jap tsoo'mp kumi øts jap'ajtp jap tsajpjøtpy; jøts øts ja naxwiiñit ja'aa'y ngudanaapy. ¹⁴ Jøts nayide'en ø nyiktu'unt sam ja Moisés ojts ttuñin ja tsa'añ jam abak etjotp ku ja ojts køjxp tiyji'iky, ¹⁵ jøts ja kyawindigø'ødyit pøni pøn ø xjanchja'widip, xemikøjxp ja tpaattit ja kunuu'kxy jujky'ajtin ja kunuu'kxy chinnaa'yin.

Pyaa'yøøpy ja Dios ja naxwiiñit ja'aa'y

¹⁶ Janch møk ja Dios tsojkin tjagyepy, jøts tpikta'aky ja pyaa'ayo'owin ya naxwiiñ ku ja y'U'nk tkexy midi tu'umchi, jøts ja kyawindigø'ødyit pøni pøn ja tjanchja'widip, jøts ja xemikøjxp ja kunuu'kxy chinnaa'yin ja kunuu'kxy jujky'ajtin tpaattit. ¹⁷ Kidi ja'ajip ja Dios y'U'nk tyanigujxpy ya naxwiiñ jøts ayo'on ja ttukpaatt ja naxwiiñit ja'aa'y, jade'en'ampy ja tkexy jøts ja tyiknitso'ok'att ja naxwiiñit ja'aa'y.

¹⁸ Pøni pøn tjanchja'wip ja Dios U'nk, ka'ap ayo'on ja yiktaguwani; pønts tkajanchja'wip, ja' y'ayo'on kutujkp xemikøjxp ja'agøjxp ku tkajanchja'wiyidi ja Dios y'U'nk midi tu'ugyi. ¹⁹ Pøni pøn tyimyjade'en'ajttip, tø y'ayo'on ja kyutujknidi, ku ja myiñ ya naxwiiñ midi ja ja'aa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja'agøjxp ku ja tyumjaka'øbyi ttunwa'andi. ²⁰ Niduki'iyyi pøn ja tyumjaka'øbyi ttundip, kawin'ijxyim ja tjawidi ja yik'øwyinmaa'nbyatpi. Niwine'enin ja tkamijotwa'andi ja'agøjxp jøts kyanigaxø'øktit ja kya'ødyu'unindi. ²¹ Pønts ttsinaadyip ja tyi'i byi yjanchpi, ja'ats tmijotwandip midi øy tsuj tyikwinmaa'nbyatp ja ja'aa'y, jøts ja tyiknigaxø'øktit ja Dios yja' ti jaty ja tyundip.

Ku ja Juan Bautista jadigojk tkajpxpaaty ja Jesús yja'

²² Kuts idø'on ja jade'en y'ukjajty, xjats ja nwindson'ajtim Jesús ojts tmøødi ja pyabøjkpitøjk jam Judeit najjotp. Niyyeky ja jam tyaa'nidøø jøts ja jam møøt yiknøbajttø. ²³ Jøts ja Juan nay ixam ja wyinaty yiknøbatmi ixam Enón midi ja Salimit kajp myiwingon'ajtpy, ja'agøjxp ja jam yiknøbety ku ja nøø jam janch kom; jamts ja ja'aa'y myendi jøts ja jam y'atsnøbatti. ²⁴ Jawy-eenip idø'on ja jade'en yjaty, ka'anim ja Juan wyinaty yikpikta'aky puxøjkjotpy.

²⁵ Jøts nay winet ja Juan pyabøjkpi winaa'gin tnadyamigajpxyidi møøt ja myigu'uk israelit ja'adyi, ja' tnadyamigajpxyidi sa ja pøky wyaa'ach. ²⁶ Nay winets ja Juan y'atsyiknimaa'y:

—Windsøn, ixam ja ixyam yiknøbety pøn mets jam wyinaty møøt xøbidsimy mē ja Jordángit nøø, ja' pøn mets ojts xnigajpxy jøts niduki'iyyi ja'aa'y ja yjanchpabikiyyi.

²⁷ Xjats ja Juan ja tnimaay:

—Ka' pøn ti tniyaty pøni ka'ap Dios myø'øyi. ²⁸ Meet-sxi ojts wa'ats kø'øm xtyimadøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo. ²⁹ Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawiyi kuts nmadøy ja Jesús y'ayuujk. ³⁰ Yø' møjtkøkipnim jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjøtpy

³¹ Ja' pøn tsoo'mp jap tsajpjøtpy, tum ja' tuki'iyyi tni-tanaapy. Jøts pøn ya naxwiiñ'ajtp, ja naxwiiñits ja ja'ajtp, jøts tum ja'ayi ja ñigajpxy ti jaty ja ejtp. Pønts tsoo'mp jap tsajpjøtpy, ja' tuki'iyyi tnitanaagyøjxp, ³² jøts tum ja' ja ñigajpxy midi ja tø t'ixy, midi ja tø tmadøy; jøts ka'ap ja pøn tjanchjawí midi ja ñigajpxy. ³³ Kuts øy pøn tjanchjawí, ja'ats wa'ats tyikniga'axp jøts ku Dios tkajpxy ja tyi'byi yjanchpi; ³⁴ Dios kyajpxy Dios y'ayuujk ja kyajpxip pøn ja Dios kajxp, kumi amuum y'Espíritu Santo ja myø'øyi. ³⁵ Chøjkpy ja Dios Teety ja y'U'nk, jøts tuki'iyyi tø ttagidøjkigyixy ti jaty ejtp ka'ejtp. ³⁶ Pøni pøn ja Dios U'nk tjanchja'wip, xemikøjxp ja nøjkx tpaaty ja kunuu'kxy jujky'ajtin ja kunuu'kxy tsinnaa'yin; pønts tkajanchja'wip, kawindem xøøw ja nøjkx tpaaty ja yjade'embi jujky'ajtin, ja Dios myøk'ayo'on ja nøjkx kyupøjkp.

Ja Jesús jøts ja Samariit tø'øxy

4 Xjats ja fariseotøjk tni'j'widøø jøts ku ja nwindson'ajtim Jesús may pyabøjkpitøjkni, jøts may jawaani ja ja'aa'y tyiknøbety jøts nigidi ja Juan jade'en; ² øy idø'on nwindson'ajtim Jesús ja kø'øm tkidy-imyiknøbety, ja pyabøjkpitøjkts ja tyiknøbajttip. ³ Xjats ku ja tnimadøøy jøts ku ja fariseotøjk tø ñijawiyi, winets ja chøø'ñ jam Judeit najjotp, jøts ja ojts ñijky jam jadigojk Galileit etjotp.

⁴ Ja Samariit et ja tyanaxp ku dø'øn ja jam ñijky.

⁵ Xjats ja yja'jty mē ja kajp jam tu'uk Samariit etjotp mi-di txøøw'ajtp Sicar, jam wingon mē ja Jacob ja y'u'nk José wyinaty tø tmø'øy ja ñaa'jx. ⁶ Jamts idø'on tu'uk ja nømu'ut midi yiktejp Jacob nømu'ut. Jøts kumi jøtkøjxp ja nwindson'ajtim Jesús wyinaty ku ja yø'øy, xjats ja y'ixaajky jam nømu'ut agø'øm. Ja dø'øn wyinaty ja xøøw kujky. ⁷ Winets yja'jty tu'uk ja tø'øxyøjk jam nømu'ut agø'øm pøn ku'etip kugajpíp jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñi'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñøjkxti jam kajpjtøp, jøts ja t'atsju'udyit ja kaaky ja jii'kxy.

⁹ Xjats idø'on ja samariit tø'øxy tniimaay ja nwindson'ajtim Jesús:

—ɓSudso mets nøø x'amidøy jøts m'israelitja'ayits mets jøts øts samariit ja'aa'y?

(Kumi ka'ap ja israelit ja'aa'y tminamyayidi ja samariit ja'aa'y.) ¹⁰ Winets ja yide'en y'adsojøø ja nwindson'ajtim:

ja xøøw, øy idø'on ja ka'ap yjadyimñanky'ijxyi jam mayjää'yjotp. Yu'uch idø'on ja wyidity. ¹¹ Jøts idø'on ja israelit jaa'y ja yjadyimy'ixa'ayi ku ja xøøw tyuñi, yide'en idø'on ja wya'andi:

—¿Ma net ja jaa'y midi Jesús nadyejip?

¹² Jøts jam mayjää'yjotp jam ja may pøn ja n-madyajkiyip. Pømbi jam nømp: “Øy jaa'yxi ja”; jøts jadu'uk wyamidi: “Ka'ap ja y'øyjaa'yi, nugo jaa'y ja twin'iñi.”

¹³ Jøts ka'ap pøn nugo ajawi møk tnmadya'akti ja agøjxp ku ja israelit jaa'y wyindsøn jamdi, ja' ja chø'jkidip.

¹⁴ Kujkwā'kxnip ja xøøw wyinaty ku ja nwindson'ajtim Jesús tyøjkiyñi jam tsaptøjkjotp, jøts ja jam yik'ix-pøjk'okwaañ. ¹⁵ Jøts idø'on ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpikiy?

¹⁶ Xjats ja nwindson'ajtim Jesús t'adsøøy:

—Yø ixpøjkin ka' øts yø nja'aji, ja' yø' yja' pøn ø xka-jxp. ¹⁷ Pøni jam pøngapøn, pøn jade'en ja tsojkin tjagyajp jøts tpadunwā'añ sã Dios ttsøkyin, ñijawipts ja' pøni kidi jamip øts n'ixpøjkin chøøñ mã Dios, uk kidi ngø'øm ja' øts jade'en ngajpxy. ¹⁸ Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn ttsojpk jøts tyikmøjtøkit ja Dios Teety yja' midi ja tøkxy, tiy janch ja wya'añ, ka'ap ja tyaayi.

¹⁹ ¿Ti kidi ja yjanchi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwā'andi øts?

²⁰ Jøts ja mayjää'y ja y'adsoojtyi:

—Pø tø mets miku' mdatøkiyi; ¿pøn idø'on myik'ookwajnip?

²¹ Jøts ja nwindson'ajtim Jesús ja tnimaay:

—Tyimyja' idø'on ku tuk'ojkyi ojts jade'en n'adi'ich yam yjapoo'kxinxøøwi, ja'ats mee mga'øyja'wip. ²² Ojts meets ja Moisés mdanigutujk'aty jøts meets mutsk unā'jk ja chuujku'nk xjøptsuktuujtidi midi yiktejp circuncisión (øy ja tyeety'aptøjk ja tjayiktso'onda'aky, pø nigidi ja'ajipxi ja kø'øm tyiktso'ondakp), ¿tigøjxp meets ja mutsk mixyuna'jk xuujni ja circuncisión wan tjapoo'kxinxøøwi? ²³ Jabi mdoujnipts meets ja mutsk mixyuna'jk ja circuncisión øy ja poo'kxinxøøwi, ¿ti kuts øts ja xami'ambiky ku øts ja jaa'y amuum tø nyiktso'øky ku poo'kxin xøøw? ²⁴ Kidi meets øy sãgasa mbayø'øy pøni sã øy tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tnigajpxy pøn ja kajxip

²⁵ Xjats winaggin pøn wyinaty tø choondi jam Jerusalén, jøts ñay'amidoojñaxwā'jkidøø:

—¿Kidi ja'ajip yø' midi yik'ixaapy, midi yik'ookwā'andi? ²⁶ Ìxats yø kyajpxy mayjää'y agujky, mats yø pøn sã kyanimā'añiyi. ¿Wan ndejin kudunktøjk tjanty-imyjanchjawidi yø'øbi jaa'y jøts ku yø Cristo? ²⁷ Jabi wā'atsxi adøm yø nnija'wam mã yø chøøñ; kuts ja Cristo mye'ent, ka'ats ja yiknijawit pøni mã ja choont.

²⁸ Ja'ayi ja nwindson'ajtim Jesús ja jade'en ojts tmadø, pø ixamxi ja wyinaty tsaptøjkjotp yik'ixpiky, xjats ja møk wya'añ:

—¿Aaa wā'ats tam meets x'ijxy'aty, jøts mnija'wip tam meets yø' pøni mã ø ndsøøñ! Kidits ngø'ømwinmaa'ngyøjpxipxi ø nmiñ, ja' ø xkajxp jøts øts ja ngudanit midi dø'on tyimyjanch'ajtp, midi mee mga'ijxy'a-jtpy. ²⁹ Wā'ats øts ja n'ijxy'aty kumi jam ø ndsøøñ, ja'ats ø xkajxp.

³⁰ Winets ja ojts tjadyimyja'ukmatswā'andi jøts ja ttsu'umdit; nika'apts ja ojts pøn ñixajiyi kumi ka'aním ja wyinaty xyøga'pxy. ³¹ Jamts ja maydi pøn ja janchja'wiyøø, pøn wā'andi:

—Ku ja mye'ent ja Cristo, ¿ti miagri'ajtin ja jawaani yjaaktyimdu'unt, ti ti yø jaa'y yam kyatumpy?

Ku ja fariseotøjk t'ana'amdi ja chaptøjk jøts ja Jesús yikmatst

³² Xjats ja fariseotøjk tmadowdi sã jaty ja nwindson'ajtim Jesús ja jaa'y ñimadya'agytyi; winets ja t'ana'amdøø ja tsaptøjk pøn tump jap tsaptøjkjotpy, jøts tyimykmatst ja nwindson'ajtim. Ja teetywindsøn idø'on ja jade'en møøt y'adø'øtsti. ³³ Winets ja nwindson'ajtim Jesús wya'añ:

—Tyimyjawaani meets yam njaakwindsøøni, jøts øts ja n'awimbejtyinit pøn ø tøkxy. ³⁴ Xjadyimyja'ixa'ap meets, ka'ats mee mã xpaatt. ¿Ja ti ja meets jap mnøjkxt mats jap n'ett?

³⁵ Xjats ja israelit jaa'y agø'ømyi ñayiktøøbi-naxwā'jkidøø:

—¿Ma dø'on yø ñøjkxwā'añ, sudso dø'on yø wya'añ jøts ku adøm yø nga'ukpaajtña'ant nima? ¿Wan yø ndejin jam tninøjkxwā'añ ja israelit jaa'y pøn jadi'iñi tø yø'øwya'kxnidi, møøt tø ñamyidøjkniyidi ja griegit jaa'y? ¿Ja' ndejin yik'ixpøkwampy? ³⁶ ¿Ti dø'on yø jade'en tyijpy ku yø jade'en tø xnima'ayin ku wya'añ: “Xjadyimyja'ixa'ap meets, ka'ats mee mã xpaatt, ja ti ja meets jap mnøjkxt mats jap n'ett”?

Ja kunuu'kxy jujky'ajtin midi ja Jesús yajkpy

³⁷ Ja yjadu'ukpi xøøw midi ja xøøw tyamigugøjxinip, ja' idø'on ja tyimy'ukmøjnaxnñip, winets ja nwindson'ajtim Jesús wya'kukiyiñi, jøts ja møk'ampy wya'añ:

—Pøni pøn ja kunuu'kxy jujky'ajtin ttsojpk jade'en sam ndøøjtsant, wants ø xñimiñ jøts ø nmo'ot. ³⁸ Pøni pøn ø xjanchja'widip, jade'ents ja yjattit sam wya'añ ja nøky jøts ku ja jam y'anmija'winjotp jade'en myu'ut ja nøø midi yikjujky'ajtp xemikøjxp.

³⁹ Jade'en idø'on ja nwindson'ajtim Jesús tjtijy, pøni pøn ja janchja'wiyip, ja'ats ja Espiritu Santo pyaattip; ka'aním idø'on ja Espiritu Santo wyinaty myiñ, kumi ka'aním ja nwindson'ajtim Jesús wyinaty tmimadøkixy ja ayo'on jøts chajpatt.

jøts ja nika' ja ja'gyukin tjagyaptit, jøts ja nika' ñabyøkjawiyidit øy øts ja wine'en njayikpøkwyā'atswā'andi.
 41 Jade'en'ampy ja Isaías jade'en wyāañ, kumi tø ja wyinaty jekyip Dios Teety tyuk'ijxyi jøts ku jade'en ja Jesús ja y'øy'ajtín xuk'ejxint, jøts ja ojts jade'en patki'jyi tni-gajpxy.

42 Jøts øy idø'on ja yjadjade'eni, may ja israelit jaa'y tjanchja'widøø ja nwindson'ajtm Jesús, østi windsøndøjk paat winaagin tjanchja'widøø; ja'ayi ku ja pøn ka' ttukmadowdi, ja'agøjxp ku ja ttsø'øgidi ja fariseotøjk jøts ja ka'ap tyukmajstst'udit ja tyunk. 43 Ja jaa'y yja' ja ne'egi yikmøjtøjkidip, jøts ka'ap Dios yja'.

Ja Jesús y'ayuuik payø'øiyip ja jaa'y pyøky

44 Jøts ja nwindson'ajtm Jesús møk wyāañ:
 —Ja' pøn ø xjanchja'wip, kidi øtsip ja tu'ugyi xjanchja'wip, nayide'en ja ñamyayi tjanchjawi ja Dios Teety mididi ø xkajxp. 45 Jøts pøn øts ixa x'ejxp xnija'wip, nayide'ents ja t'ixy tnijawī pøn ø xkajxp. 46 Jøts ku øts ñamyayi jade'en sam ja jaj, ja' ø tø nnimiñ ya naxwiiñ pøni pøn ø xjanchja'widip, jøts kidi øts ja wimbeets kugoots nyiktandi. 47 Pøni pøn ø xmadojip ja n'ayuuik jøts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tø nnimiñ jøts øts ja naxwii'ñit jaa'y ndabayø'øyt ja pyøky, pø ja'axi ø nnimimpy jøts øts ja nyiknitso'ok'attit. 48 Pøni pønts øts nja' xkatsojkip jøts ka' tmøjpikta'aky sã ø nwā'añ, jats ja' pøn ja ttabayø'øyip ja pyøky, nayø'øyi ja nøjkk kø'øm ni'øøniyip sã jaty ø tø nwā'añ, ku kyøxt ja naxwii'ñit. 49 Kidi ja'ajip ø ngajpxy sã ø kø'øm nwinmay; ja' mididi ø xkajxp, ja Dios Teety, ja' øts ø xanigutujk'ajtp jøts øts jade'en ngajpxt, jøts øts jade'en nyik'ixpøkt. 50 Jøts wā'ats ø nnijawī, jøts ku ja' wyā'añ ja Dios Teety y'ana'amin sudso yikpaatt ja jujky'ajtm xemikøjxp. Jade'ents idø'on, pøni sã jaty ø tø nwā'añ, jade'en øts idø'on ja tø ngajpxnaxy sã øts ja Dios Teety ja tø xanigutujk'aty.

Ku ja Jesús pakpujy ja pyabøjkpitøjk

13 Tyimdyø jøts ja paski xøøw tpatnit, jøts ja nwindson'ajtm Jesús wā'ats ja tnija'wiñ jøts ku tø kya'pxy ja hori jøts ku ja tmajstst'utt ja naxwi-iñ'ajtm, jøts ja Dios Teety ja tniñøjkxnit. Ejtp ja tpa'ayøøpy ja pyabøjkpitøjk, xjats ja jade'en tpikta'aky møk ja ejxa'an, jøts ja tñanky'ijxyi mābaat ja pa'ay-o'owin ja tjagyepy.
 2 Jøts ja Simón myajnk, ja Judas Iscariote, tø ja miku' ja wyinaty tyatøkyi, jøts ja tyukwinmaa'ñ'aty sudso ja tka'ødyu'unt ja nwindson'ajtm Jesús. Wā'ats ja tnijawī ja nwindson'ajtm Jesús jøts ku ja nay jam ñijkxy mā ja Dios Teety ja tø yiktsøøñi, jøts ku ja amuum tø kyutujk-mø'øyi. Xjats ku dø'on ja jam wyinaty y'a'ux'atti, winets ja tyanaagyukiyi'ñ jam kyaadyaajk jøp'am, jøts ja twejtstaajky ja wyet, jøts poop wet ja ojts ñadyaten-wøø'niyi. 5 Xjats ja nøø t'ada'amiyi'ñ jam købu-j'iñ'ñjotp, jøts ja pyabøjkpitøjk ja tpaakpujpinaxwā'jky,

jøts ja nay jatyi ttuktati'ich ja poop wet mididi ja jam wyinaty tyenwøøn'ajtpy.

6 Jøts ku ja wyinaty tpaakpujwā'añ ja Simón Pedro, winets ja ojts ñi'ĩmxyi:
 —Windsøn'ajtm, z'mets ne'egi ndeky xpujip?
 7 Jøts ja nwindson'ajtm Jesús ja t'adsøøy:
 —Ka' mets ø ixyam xja'gyuki, mja'gyukipnimts mets øy nøjkk.
 8 Jøts yide'en ja ñi'ĩmxyi ja Pedro:
 —Ka' me mābaat ndeky xpujit.
 Winets ja nwindson'ajtm Jesús ja tñimaay:
 —Pøni ka' øts øy mdeky nbujy, ka'ats me n'uk-migu'ukwānit.

9 Winets ja Simón Pedro wyāañ, jøts ja nwindson'ajtm Jesús yiknøjmi:
 —Winets ø windsøn'ajtm amuum xpujiyt ja ngø' ngubajki; jøts ka' nugo ja ndeky.
 10 Jøts ja nwindson'ajtm Jesús ja tñimaay:
 —Øy ku ja'ayi tyeky tpujt pøn tse'abajtpnim, kumi wā'ats ja amuum. Nayide'ents meets m'anmija'win wyā'adsidi øy kidyimñiduki'iyi.
 11 Jade'en'ampy ja wyāañ ku ja ñimy: "Øy ka' niduki'iyi mdyimwyā'adsidi", ja'agøjxp ku ja wā'ats tni-jawi pøn ja wyinaty køyakkwajnip.

12 Xjats ku ja jade'en y'abajtyi'ñ tpujkøjxyi ja pyabøjkpitøjk tyeky, winets ja ñadyaniyajni ja wyet jadigojk, jøts nay jam y'ixaaajky mā ja mesi jøts ja tñimaay ja pyabøjkpitøjk:
 —z'Mnija'widip tigøjxp jade'en tø ndundi? 13 Meets, xmaestri'ajtp meets, xwindsøn'ajtm meets, janch tiggayjpxy kumi janch jade'en. 14 Pøni øts tamts maestri, jøts pøni øts tamts windsøn'ajtm, tøts ja mdeky nbujidi, nayide'ents meets idø'on xuumit xem yām. 15 Tø nduk'ejxti jawyeen, jøts nayide'en xundit sã ø tø ndunjøpi. 16 Jøts janch øts idø'on nwā'añ, jøts ku ka' pøn tumbi tjinaxy ja wyindsøn; uk ja jaa'y pøn kexy ø'øpy, ka'ap ja tjinaxy pøn ja kajxp. 17 Jøts pøni mja'gyukidip ø'øbi winmaa'ñ jøts jade'en xundit, jotkujkts x'ejxtit.

18 Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwānits jade'en yjatt sã jap jaabyety nøkyijpxy: "Jats ja tu'uk tø x'ukmid-sepøjkni pøn ø møøt ngay n'uuky." 19 Patki'iyi øts yā'at yām nni-gajpxy jøts ku jade'en nøjkk yjaty, jøts xiy-jawidit xjanchjawidit jøts pøni pøn øts. 20 Janch øts idø'on nwā'añ, jøts ku øts ja xkupiky pøni pøn ø xkupøjkip ja ngudanaabyi; jøts pøni pønts øts jade'en xkupøjkp, ñayi kyupijpkyts ja nayide'en pøn ø xkajxp.

Ku ja Jesús tni-gajpxy sã ja Judas kyøyakiyt

21 Xjats ku ja wyinaty jade'en tø wyā'añ, jøts ja tyimchaachjotmaadyøjkii'ñ, jøts ja ojts yikxon wā'ats tni-gajpxy:
 —Tiy janch mee nnøjmi, jøts ku meets ja nidu'ugin pøn ø xka'ødyunwamp.
 22 Winets ja pabøjkpitøjk xem yām ñawyin'e-jxø'jkidøø, jadi'iñi tkamidaabyaatti pøni pøn idø'on yiktejp. 23 Winets ja tu'uk, mididi ja nwindson'ajtm Jesús

jmi ja naxwii'ñit, jøts ø n'awimbetiwyā'añ jadigojk ja Dios Teety.

²⁹ Xjats ja pyabøjkpitøjk wyandøø:

—Ixyamnim inet tiy janchwā'āts xnigajpxñim, ka' x'ukyiktuni ja abiky myadyā'āky midi kayiktami-madodøø'wip. ³⁰ Ixyamnimts øøts inet njanch'ixy njanchnijawi jøts ku tuki'iyi xnija'wigyixy, jøts ku ka' chøkyi jøts ku øy pøn kuwāni mdyimdyiibyøkiyt. Ja'agøjxp øø njanchjawi jøts ku jam mdsøøñ mā Dios Teety.

³¹ Jøts nwindson'ajtim Jesús yide'en t'adsøøy:

—¿Jøts xjanchjā'wiñidip øts ixyam? ³² Ja wyingøñ jøts tø yjā'aty ja xøøw ja jumøjt, jøts tyimñay'ixyami, ku meets inet m'agakpaktit pø mā pønjabøn ñjokxt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøøt'ity. ³³ Ndukmodoogøjxtip yā'at yam tuki'iyi, jøts ja øy'ajtin jotkujk'ajtin xpaattit ku ø x'a-jot'attit. M'ayo'ombāattip yā naxwiiñ; jotmøkts mnabyikta'agidit, tøts øts inet nmimajada'āky midi yā naxwiiñ yikwindigøøpy.

Ku ja Jesús tni'amidowi tniøøktowski ja pyabøjkpitøjk, jøts ja ttukmadøy ja Dios Teety

17 Xjats ku ja nwindson'ajtim Jesús jade'en wyan'abajtyi'ñi, jøts ja ojts jam tsajpwemp py-at'ixy, winets ja wyāañ:

—Dios Teety, tø ja hori kya'pxy. Yikmøjtøjkikts øts, kunuu'kxyjā'wikts øts, jøts me nayide'en nyikmøjtøkit, jøts me nayide'en myikunuu'kxyjāwit. ² Metsxi tø xmøø'y ja kutujuk jøts øts naxwii'ñit jāā'y ja ni'ijtyi nda'ana'amdit, jøts ja tpaattit ja juky'ajtin xemikøjxp pøn jaty me tø xkømøø'y. ³ Jøts jade'en'ampy yikpaaty ja juky'ajtin xemikøjxp ku tu'ugyi mets Dios Teety myikjanchjawi, sam nayide'en ja Jesucristo, pøn mets yā tø xkexy naxwiiñ.

⁴ Tø øts ja ndunguixy jade'en midi me tø xa'ane'emy, jade'engøjxpts myikmøjawi myikunuu'kxyjawi yā naxwiiñ. ⁵ Møøkyts øts jam mwingujky nay ja'abi møk'ajtin midi øts y'ijty nmøøt'ajtpy møøt mets ku ka'anim wyinaty naxwii'ñit y'øyinim.

⁶ Jøts ja jāā'dyi midi me køøm tø xwiwich yā naxwiiñ midi me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjāā'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'ø'yayuujk. ⁷ Nija'winidip ja ixyam wā'ats ti jaty me tø xmøø'y jøts ku mets ja xja'aji. ⁸ Tøts øts ja ndukmadowdi ja øgyajpxy ja ømyadyā'āky midi me tø xukmadøy, jøts tøts ja tkupøkti, tøts ja tñijawidi jøts ku ja yjanchi jøts ku øts jam ndsøøñ mā mets jam. Tø ja tjanchjāwidi jøts ku me tø xkexy.

⁹ Yøøts ø nni'amidoo'widip pøn jaty me tø xmøø'y ja'agøjxp ku ja xja'aji; jøts nigidi ja'abi nni'amidoo'wip pøn øts tø xkabadundi. ¹⁰ Midi jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyiktuujnidip.

¹¹ Øts, ka'ap øts n'ukyāā'ajtnit yā naxwiiñ; yøøts ja tādip, jøts me nninøjkxnit møøtsinaabyi. Kunuu'kxy Dios Teety, agøøduk axajtuk mmøk'ajtingøjxp pøn jaty

ø tø xagødøki jøts ni'amuki ni'aga'pxi y'ettit, kyanamyajst'uudidit nayide'en sam adømin. ¹² Ku øts yø yā y'ity nmøøt'etti yā naxwiiñ, n'exj'ejtipp øts yø', ja møk'ajtin ø nyiktumpy midi me tø xmøø'y, ja'ats øts yø nda'agøødujktip nda'axajtjujktip. Ni tu'ugin yø tø kyawindigøydi, ja'ayim idøø'n jade'en tø yjaty midi'iyim y'ijty windigøy'ejtnip, jøts jade'en ka'pxy tpaaty sā ja mgajpxy sā ja m'ayuujk xyiktaāñ.

¹³ Ixyamts me nninøjkxnit mā mets jam; jøts ku njaaknayaā'aty yā naxwiiñ, ja'agøjxp øts jade'en nwa'āñ jøts ja mja' yjotkujk'attit sam ø njotkujk'atyin.

¹⁴ Tø øts ja ndukmodoogøxti ja m'øgyajpxy ja m'ø'yayuujk, ja'ats mmi'ajkiydip pøn ja ka'øwyin-māā'ñ tjagyajp. Ja' yiktami'ajkidip ku ja yjade'emb iwinmāā'ñ tka'ukyiktunidi, nayide'ents øts ka' nyiktuñ ja yja'adi. ¹⁵ Kaja'ajpts ø n'amidøøpy jøts xwāābid-søømt yā naxwiiñ, ja' n'amidøøpy jøts xkuwā'ant xkubokt, jøts miku' yja' kidi myajada'āky. ¹⁶ Nayide'en ja'adi sam øts, ka' nyiktuñ ja kya'øwyinmāā'ñ.

¹⁷ Pøkjøøøts ejxjøøøts mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuu-jk. ¹⁸ Nayide'ents sam me tø xaniguexy ja naxwii'ñit jāā'y, nayide'ents øts ja yam ndanipøkti ndani'ejxti pøn yā naxwiiñ ja ka'øwyinmāā'ñ tjagyajtpnim.

¹⁹ Amumjoojt øts njaaktyimñadyamiyoxiyit yø'øgøjxpti, nayide'ents ja ñadyamiyoxiyidit ku ja mgajpxy ja m'ayuujk ttu'undit midi tiy midi janch.

²⁰ Kidi ja'ayip ø nugo ndyimñi'amidowidip, nayide'en ja'amidip pøn ø xjanchjawiwyandipnim ku ja myigu'uk ja tmadooljdit ja øgyajpxy ja ømyadyā'āky.

²¹ Jøts ja' øts yam n'amidøøpy jøts tu'ugyi ja wyin-māā'ñ tyik'ettit; jøts tu'ugyi y'ettit møøt adøm, nayide'en Dios Teety sam mets xmøøt'ity jøts sam me nmøøt'ity. Jøts wan tu'ugyi ja wyinmāā'ñ tpikta'akti jøts jade'en ttukjanchjāwidit ku me tø xkexy, pøn ja ka'øwyinmāā'ñ tjagyajptip. ²² Tø øts ja nmo'odi nay ja'abi møk'ajtin midi me tø xmøø'y, jøts tu'ugyi wyin-ma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'ami. ²³ Øts ja møøt nnamyayidit, jøts mets xmøøtnamyā'yimiyit jøts ja tu'ugyi y'ettit, jøts jade'en ja naxwii'ñit jāā'y t'ejxtit tni-jawidit jøts ku me tø xkexy, jøts ku mets ja xjanchøky sam me xtsøkyin.

²⁴ Dios Teety, metsxi ja tø xagødøki, jøts ja'ats ø nd-søjkpy jøts ja yjap'attit mā øts jap ndsinaawya'āñ, jøts t'ejxtit ja møk'ajtin ja øy'ajtin midi me tø xmøø'y; jaayim me xtsøky ku ka'anim wyinaty naxwii'ñit y'øyinim. ²⁵ Mets Dios Teety tiy'ajtin janch'ajtin mmøøt, jøts ka'ats ja naxwii'ñit jāā'y mnijawiyi; jøts øts, nni-jā'wip mets; jøts yø pabøjkpitøjk, ñija'winidip yø' jøts ku me tø xjanchkexy. ²⁶ Tø øts ja ndukmadowdi mbøn mets jøts njaaktukmadoowandipnim øts. Jade'ents sā mets xpa'ayøyin, nayide'ents ttaba'ayoomidit ja myigu'uktøjk. Nmøøt'etpyim øts yø' y'agujkpti jade'en.

Ku ja Jesús ojts yikmach

18 Xjats ku ja nwindson'ajtim Jesús jade'en wyinaty tø wyā'añ, winets ja tmøøtsøø'ñ ja

ja'abi pa'akxuu'kpi midi jade'en abøjkmuky. Jade'en ja ttundøø sam idø'on ja israelit jaa'y kyostumbridi ku ja y'oo'kpi ja tyiknaxøkidi. ⁴¹ Jøts ma ja nwindson'ajtim Jesús wyinaty tø kyiruspety, jam wingon tu'uk ja kam ma y'ity øy ti tsā'am. Jamts tu'uk oo'kpi jut ja'abi kamjotp midi tyimjemy'øypnim, ka'anim jap pøn tyimykpikta'aky. ⁴² Japts ja tpiktaktøø ja nwindson'ajtim Jesús ñine'kx, pø wingonxi ja jam tyañ ja oo'kpi jut, jøts tyimdyøts jøts ja israelit jaa'y pyoo'kxin xøøw tyimcho'ondaknit.

Ku ja Jesús yujukpyiky jadigojk jap møj tsaa jutjotpy

20 Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijkxy jam ma ja oo'kpi jut jam wyinaty, ka'anim yikxon yjajta'aky; jøts ja ojts t'ixy jøts ku ja oo'kpi jut jam tka'uk'agø'ajtni ja tsaa midi ja wyinaty tø yikta'agi'iy. ² Winets ja ojts putyi ñijkxy ma ja Simón Pedro jam wyinaty møøt øts midi yø nøky tjaapy, midi ja nwindson'ajtim Jesús jantyimiyinamyajyip, jøts øøts xnimaay:

—Tøts ja nwindson'ajtim jap yikjidøjtpidsømni jap jutjotpy, jøts ka'ap øø nnijawi pø ma net tø yikpikta'aky.

³ Xjats øts møøt ja Pedro nnijkxy ma ja oo'kpi jut jam. ⁴ Jøts øøts namajtsk janch putyi nnijkxy; jøts øts jawaani møk njantyimbyujt jøts ja Pedro nnikejky, jaween øts jam nja'jty ma ja oo'kpi jut. ⁵ Jøts øts jap ngu'ejxiyñ, ja wetyi jap n'ejxpaajt midi ja nwindson'ajtim wyinaty tø yikta'abity jøts ku ja jap wyøjni, jøts nika'ap ndøjkiyñ. ⁶ Jøtsnim ja Simón Pedro ix'oojknim yja'jty, jøts ja tyøjkiyñ jap oo'kpi jutjotpy. Jøts ja nayide'en jap ojts t'ixy jøts ku ja abet jap wyøjni; ⁷ jøts ja tjaaktyimy'ejxpaajty ja wet midi ja nwindson'ajtim Jesús wyinaty tø yiktagupity, jøts nigidi ja jam møøt ja wet midi ja amuum yikta'abejt, axaach ja jam abiky tø yikpikta'aky. ⁸ Winets øts ndøjkiyima ma dø'on ja oo'kpi jut jam, jøts n'ijxy jøts kudam ja wyinaty jade'en tø yjaty, xjats ja njanchja'wiyiñ. ⁹ Jøts ka'anims idø'on øøts wyinaty nja'gyuki midi jap nøkyijxy jaabyety wyā'añ, jøts ku ja nwindson'ajtim Jesús yujukpyøkt jadigojk jap oo'kpi y'agujkp. ¹⁰ Jøts øøts jade'en namajtsk nwimbejtña jøts nnøjkxnaa jam ndøjkwindump.

Ku ja Jesús ñanky'ejxøø jadigojk ma ja María Magdale-na jam wyinaty

¹¹ Jøts ja María jami jut'agø'øm tyaañ, ñiyaxni ja jam kyu'ejxiyñ ma ja jut, ¹² winets ja ojts t'ixy namajtsk ja ankilis, tum amuum poop ja xyøxyidi, jøts ja jam chøonidi ma ja nwindson'ajtim Jesús wyinaty tø y'ukyikpikta'aky ja ñine'kx; tu'uk jam chøoni agubajkp, jøts jadu'uk teky'ok'am. ¹³ Jøts ja ankilis ja ñimaajyøø, ja tø'øxyøjk yiknimaapy:

—¿Ti mjajtip, tiku myā'axy?
Jøts ja tnimaay:

—Ja'agøjx ø nyā'axy ku øts ja nwindson'ajtim ya tø yikwejtspidsømni, jøts øts ja ka' nnijawi pø ma ja tø yikpikta'aky.

¹⁴ Ja'ayi ja jade'en wyaañ, jøts ku ja y'ejxjimbijty winets ja t'ejxpaajty jøts kudam ja nwindson'ajtim Jesús jam tyani; jøts ka'ap ja tyimwya'añ jøts ku ja yja'aji. ¹⁵ Winets ja ojts kø'øm ñi'mxyi, jøts ja tø'øxyøjk yiktiibyiky:

—¿Tiku myā'axy? ¿Pøn m'ixaapy?

Jøts ja tø'øxyøjk jade'en ja wyinmay, ja tsā'am kam ejx'ejtpik idø'on ja tijy, jøts ja tnimaay:

—Teety, pøni mets ja tø xyikpidsimy, tukmadookts øts ma tø xpikta'aky jøts øts ja n'atsyiktsoont.

¹⁶ Winets ja ñimaajyøø ja nwindson'ajtim Jesús:

—¡María!

Xjats ja y'ejxjimbijty jøts ja tnimaay hebreit ayuujk:

—¡Raboni! —midi tyijpy yik'ixpøjkipi.

¹⁷ Jøts ja nwindson'ajtim Jesús ja ñimaajyøø:

—Kidi ø xøñ, majtstutk øts, pø ka'animxi ø nnijkxy jam ma ja nDeety jam. Nøjkxts x'atstumadøø pøn jaty øts nja' xpabøjkidip, jøts ku øts jap nnijkxy ma øts ja nDeety jap, midi mee mDios Teety'ajtpy.

¹⁸ Winets ja María Magdalena ojts ñijkxy, jøts ja ojts t'atstumadoji ja nwindson'ajtim Jesús pyabøjkpitøjk jøts ku ja wyinaty tø t'ixy ja nwindson'ajtim, jøts ku ja wyinaty jade'en tø ñi'mxyiyi.

Ku ja Jesús ñanky'ejxøø jadigojk ma ja pyabøjkpitøjk jam wyinaty

¹⁹ Jøts nay ja'abi xøøw ku midukxøøw cho'on-da'akñim ja yjadu'ukpi samaan, nay ja'abi ux ku ja pabøjkpitøjk jam wyinaty tø ñamyukyidi jøts ja wyinaty tø ñañ'agiibyetyidi, ja israelit jaa'y ja chø'jkidip. Winets ja nwindson'ajtim Jesús tyøjkiyñ jøts ja jam y'agujk'am wyā'k'øxyiñ, jøts ja ojts yide'en kyajpx-pøø'kxyidi:

—Øy'atti jotkujk'atti.

²⁰ Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyachpuk'i'jyit tsaachi. Jøts ja pabøjkpitøjk jantyimxyondaktøø ku ja t'ejxtøø ja nwindson'ajtim. ²¹ Jøts ja nwindson'ajtim Jesús ja jadigojk ñimaajyidøø:

—Øy'atti jotkujk'atti. Nayide'en sam øts ja Dios Teety tø xkexyin, jøts nayide'en meets yam nguexy.

²² Xjats ja tnibixujyñ ja pyabøjkpitøjk jøts ja tnimaay:

—Wan ja Dios y'Espíritu Santo mdatøkiyidi. ²³ Jøts pøni mgajpxwā'kxtip jøts ku ja yikpojkipimee'kxy pøn nabyøkyja'wiyidip, jøts øts nja' ja xpabøjkiyidit; uk pøni ka'ats, mdukmodo'opts meets ja nayide'en jøts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyidi niwine'en.

Ku Tomás ojts t'ixy ja Jesús ku tø yujukpyiky

²⁴ Jøts tu'uk ja nwindson'ajtim pyabøjkpi midi Tomás'ajtp, midi yiktejp xeeñu'nk, ja' wyinaty ka'ejtp ma ja jamdi ku ja nwindson'ajtim Jesús wyinaty tø

ñanky'ijxyi. ²⁵ Xjats ja oojknim ttukmadowdi ja nwind-søn'ajtim Jesús pyabøjkpitøjk, jøts ja tnimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit pøni ka' øts kyø' ja n'ejxi jøts ku ja klābis ja tø yiktsaachiyi; ku øts ngøtsa'jx jap kø'øm ka' ndyimgyudejit mā ja klābis ja tø yiktsaachiyi, pøni ka' øts jap nguxaji mā ja kyachpuki'jy tø chaachi, ka'ats øts ja njanchjawit.

²⁶ Xjats ku kyiduktuikxøøw'ajty, winets ja pabøjkpitøjk ñamyukidøø jadigojk jam tøjktotp, jøts ja Tomás ixjam ja wyinaty tmøødidi. Winets jadyimja'aduky ja tøjkwiyi naty yikxon ku ja nwindson'ajtim Jesús tyøjkijy'ñ, jøts ja jam agujk'am tyanay'øiyi'ñ. Jamts ja ojts kyajpx-pøø'kxyidi, yide'en ja ñii'mxyidi:

—Øy'atti jotkujk'atti.

²⁷ Jøts ja Tomás nay jatyi yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'jy. Jøts kidi nugo xkuwinmayi, janchjawi dø'on.

²⁸ Xjats ja Tomás y'adsøø jøts ja wyañ:

—Mets nwindson'ajtpy ndios'ajtpy!

²⁹ Jøts nwindson'ajtim Jesús ñimaajyøø:

—Tomás, ja'agøjpx yam xjanchjawinim ku ø tø xty-imwyemp'ijxñim. Jotkujk'atyim ja'adi pøn tmibøjktip pøn tjanchja'widip jadi'iñi, øy øts ja xjaga'ejxti.

Ya'at nigajpxp ja tiy'ajtin midi yø nøky myøøt'ajtpy

³⁰ Jøts may ja nwindson'ajtim Jesús ojts tpiktā'aky ja ejxpajt, ku ja ojts ttuñ ja milagri jam pyabøjkpitøjk wyingujkp midi ka' kyøxja'ayi ya'at nøkyjotpy.

³¹ Ja'agøjpx ya'at jap jade'en tø yikujayi, jøts xiyjawidit xjanchjawidit jøts ku ja' yiknitsø'øky, jøts ku ja' Cristo ja nwindson'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjpx sam pyaāt'atyidi pøn tjanchja'wiyidip.

Ku Jesús ñanky'ejxyi niwixujk pyabøjkpi windump

21 Xjats ku dø'on ja wyinaty jade'en tø y'ukjaty, winets ja nwindson'ajtim Jesús ñanky'ejxi jadigojk jam mā ja pyabøjkpitøjk, jam mejy'am midi yiktejp Tiberias. Yide'en idø'on ja y'ejxi tyiyi: ² Ja Simón Pedro jam wyinaty møøt ja Tomás midi yiktejp xeeñu'nk, jøts ja Natanael midi jam kugajp'ajtp Caná midi Galileit etjotp, jøts ja Zebedeo y'unā'jk, jøts møøt abiky jana-majtsk nay ja nwindson'ajtim Jesús pyabøjkpi. ³ Ja'ats ja Simón Pedro ñimaay:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'on ja ñøjkxtøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots. ⁴ Jøts ku wyinaty xyijñiwyani, winets ja nwindson'ajtim Jesús jam mejy'am wya'kaxi'jky, ja pyabøjkpitøjk ka'ap ja twinmaydi jøts ku ja yja'aji. ⁵ Jøts ja ñimaajyidøø:

—Mixy, ztø dø'on ja ajkx iij xmatsti uk tyimgya'anim? Jøts ja yide'en t'adsoodøø:

—Ni tu'uk.

⁶ Xjats ja nwindson'ajtim Jesús ja ojts ñii'mxyidi:

—Niwøjpatti yø mda'ajkxmajk ixa barki puki'jy aga'ñ'ampy, jøts ja ajkx inet jap xpaattit.

Jøts ja ojts jade'en ttundi, jaanimts idø'on ja tiy ka'ap ja tya'ajkxmajk y'ukmaa'yniyidi jøts ja jap nøøjtopy tju-uttit, ja'agøjpx ku ja ajkx jap janch'ujts'abøki. ⁷ Winets øts midi ja nwindson'ajtim Jesús yjanchminamaayajyp tnimaay ja Pedro:

—Ja nwindson'ajtimts yø!

Ja'ayi ja Simón Pedro ja jade'en tnimadøø yøts ku ja yja'aji ja nwindson'ajtim, winets ja ñikijxyit nijan ja ttatøjkijy'ñ (pø tøxi ja wyinaty tjeñ) jøts ja ñidøjkijy'ñ.

⁸ Jøts øøts jam mejy'am ja barki nyikja'jty, jøts ja nda'ajkxmajk ja nbajidity janch ujts abøki ja ajkx, pø jadukmagø'pxy xajkxi dø'on ja jam wyinaty yjaaka'ity jøts øøts nbaatnit ja naajx. ⁹ Xjats ku øøts jam nwi-najky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjingtoni, jøts tsapkaaky abiky.

¹⁰ Winets øøts xnimaay ja nwindson'ajtim Jesús:

—Yikmendi tu'uk majtsk ajkx midi ixjanim tø xjuutti.

¹¹ Jøts ja Simón Pedro pyejty jam barkijotp jøts ja tjidøjtidsimiy ja ta'ajkxmajk, janch ujts abøki tum ja møjaty ajkx, tukmagø'pxy ja wixijxmyaktigøøk; jøts nika'ap ja xuummy yjapøøjty øy idø'on ja tyimya-jadine'eni. ¹² Jøts ja nwindson'ajtim Jesús wyañ:

—Men m'ajop'atti.

Jøts ja pabøjkpitøjk ni tu'ugin ja sa kyawa'andi pøni pøn idø'on ja', pø tøxi ja wyinaty tnijawidi jøts ku ja yja'aji ja nwindson'ajtim. ¹³ Winets ja nwindson'ajtim Jesús ja wingon ñimejnidøø, jøts ja tnixajiyi'ñ ja tsapkaaky, jøts ja ojts myø'øyidi møøt ja ajkx.

¹⁴ Ya'at idø'on møøt myidigøøk ojk yjaty ku ja nwindson'ajtim Jesús ñanky'ijxyi mā ja pyabøjkpitøjk jam, ku ja wyinaty tø yjujkyiky jadigojk.

Ku Jesús møøt ñagyajpxy ja Simón Pedro

¹⁵ Xjats ku ja y'ajop'ajt' abajtidøø, winets ja nwindson'ajtim Jesús tnimaay ja Simón Pedro midi ja Jonás myajnkijp:

—Simón, zxtsojpk øts jawaani sam øts ya'at xtsoktin?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xni-jawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyt xuu'møøjyt ja nbabøjkpitøjk.

¹⁶ Jøts ja mimajtsk ojk kujk yiktiibyiky ja Jonás myajnk, yide'en ja yiknimaay:

—Simón, zxtsojpk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xnijawi.

Jøts ja ojts ñii'mxyi ja nwindson'ajtim Jesús:

—Winets ø xnøø'møøjyt xuu'møøjyt ja nja!

¹⁷ Jøts ja midigøøk ojk yiknimaay ja Jonás myajnk:

—Simón, zxtsojpk øts?

Winetnimts ja Pedro yjotmay'oo'kpijky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tniṁaay:

—Windsøn'ajtim, mets tuki'iyi ṁnija'wip. ṁnija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ṁi-maajyøø:

—Mets ndanipijky amuum, jøts xnøø'møøjyit xu-u'møøjyit ja nbabøjkpitøjk. ¹⁸ Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaak-naxyøxyi jøts ṁniikxy pøni mā kø'øm xtsøky; kuts ja mōjaa'y'ajtin xpatnit, jøts mxajtøønit, wyenkpits mets ja mwet mmo'ojyip jøts ja myiknøjkxit mā me ka'ap mjanøjkxwa'añ.

¹⁹ Ku ja nwindson'ajtim Jesús jade'en wyaañ, ja' idø'on ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxy-jawit. Jøts ja ojts ṁi'mxyi:

—¡Paduujnik øts yø nja', kidi øts xmajtstu'uty!

Ja Jesús pyabøjkpi midi janchṁinamyajyip

²⁰ Xjats ku ja Pedro y'ejxjimbijty, jøts ja ojts t'ixy jøts ku øts nbamiñ midi ja nwindson'ajtim Jesús janchṁinamyajyip. Øts ja nwindson'ajtim Jesús jam wyinaty

nbutsinapy ku øøts wyinaty xøjøøjty n'a'ux'aty, jøts øts wyinaty nwindson'ajtim n'amidøøy: "Windsøn'ajtim, ¿pøn idø'on mga'ødyunwajni?" ²¹ Jøts ku dø'on ja Pedro ja ojts y'ijxyi, winets ja Pedro tniṁaay ja nwindson'ajtim Jesús:

—Windsøn'ajtim, jøts yø', ¿sats yø yjatt?

²² Jøts ja nwindson'ajtim Jesús ja ojts yide'en y'ad-søyi:

—¿Ti mets yø xunk'aty, njadyimyjayikjujky'aty øts yø' nay jaa ku ø nme'ent jadigojk? Tujnik øts yø nja' tu'u-gyi.

²³ Xjats ja ayuujk yø'øgyøjy, jøts ja jade'en tniṁad-ow'atti pøn jaty ja nwindson'ajtim Jesús yja' pabøjkpi, jøts ku ja'abi pabøjkpi ka' y'oockt. Kajade'enipts ja nwindson'ajtim Jesús wyinaty tø tñøjmi ja Pedro jøts ku ja'abi pabøjkpi ka' y'oockt, pø yide'enxi ja wyaañ jøts ku ka' ttunk'attit pøni sa ja yjatt.

²⁴ Øts idø'on Juan, midi'its idø'on ya'at ayuujk njaadyampy, pø tiy janchxi dø'on yø'. N'ejx ṁi-ja'wiyii'ñ øøts ku jade'en yjajty.

²⁵ Jaanim yø may ti jaty ja nwindson'ajtim Jesús tyu-un, ku ja jeexyip jade'en tø tyimykja'ay piy køñ, mayts nøky jeexyip chøkyi jøts yikjaagyøxt sam yjajty kyubej-ty. Jade'en idø'on ja yjajty.

HECHOS

Ku ja Dios Teety ttamiwandaagi ja naxwii'ñit jaa'y ja Espiritu Santo

1 Migu'uk Teófilo, ja nøky midi øts ojts nja'ay mi-jawyeen, ja' øts jap nguja'ayigyøjx ti jaty Jesús tyu-un ku ja tpadøjkiyi'ñ ja tyunk, sa jaty ja tyik'ixpijky ² kunim ja chajpajtni. Ku ja wyinaty ka'anim ñijkxy jap tsajpjøtpty, winets ja jawyeen twiwejtskijxy twigongijxy ja jaa'y pøn idø'on ja wyinaty nadyagugaxwajniyip, ojts ja tkajpxwijy sa jaty idø'on ja y'adø'øtstit ku ja tyu'undit, Espiritu Santo ja ja'gyujkin ja møøjyidi. ³ Xjats ku ja Jesús wyinaty tø yja'oo'kni, ojts ja tpaaty ja kyudanaabyi jadigojk jade'eñim sayim idø'on ja yjaa'y'atyin, wixijxyøøw ja jam ñanky'ejxiyøø, jøts ja jade'en wa'ats ttuk'ixy ja tiy'ajtin ja kyudanaabyi ku ja ejtp yujky'aty; jade'en idø'on ja jam ttukmadoogijxy ja kyudanaabyi sa jaty ja y'ejxi tyiyi, ja Dios kyutujk midi ja tyanitanaapy ja yjaa'y.

⁴ Ku dø'on ja jade'en tjaakmøøtsinaay ja kyudanaabyi jøts ja t'ane'jmy jøts ja ka'ap ñøjkxtit ma jap txøøwi Jerusalén. Yide'en ja tnimaay:

—M'awejxtip idø'on ja' midi øts nDeety tø mdamiwanda'agyidi, midi kawinaak ojk meets tø ndamimadya'aky. ⁵ Janch idø'on ja' ku ja Juan ttuk-tanøbejty ja nøø, jøts tsojk meets nøjkx ndukatøkidi ja Espiritu Santo.

Ku ja Jesús chajpejty

⁶ Xjats ku ja pyabøjkpitøjk jam wyinaty tø tmin-abyaadyidi ja wyindsøn, winets ja tyiktøødøø jøts ja tnimaadyøø:

—Windsøn, zyamnim inet ja Israelit kajp xmo'ot jøts ja kø'øm jadigojk ñay'ana'amiyidit, jøts ja kø'øm ñankyutujkxiyidit pøni ti ja kø'øm tyunwandip?

⁷ Xjats ja Jesús y'adsøø jøts ja wyaañ:

—Ka' meets ja mbaat'aty jøts meets ja xnijawit pøni juuni ja Dios Teety jade'en y'adø'øtst, pøni ti xøøw pøni ti po' ja jade'en ttunwa'ant. Ja' ja tu'ugyi tnija'wip, jøts ja' tu'ugyi tmøøt'ajtp ja møk'ajtin jøts ja jade'en ttu'unt. ⁸ Ku meets ja Espiritu Santo wyinaty tø mnimiñi, winets meets ja nøjkx jaty mmø'øyi ja møk'ajtin jøts øts xniga'ama'adyit jawyeen jam Jerusalén, nayide'enmi tuki'iyi wine'enin jam chøønidi Judeit etjotp, sam nayide'en jam Samariit etjotp, winet-nimts øts xniga'ama'adyit ømyadsowi mbaat naxwii'ñit y'øjx y'oojk.

⁹ Tø ja Jesús wyinaty jade'en wyaañ, wa'ats idø'on ja pyabøjkpitøjk ja wyinaty ixjam y'ijxyi ku ja chajpejty;

jøts ja jadyi'ñi yoots yik'adigø'øñiyøø, jøts ja pyabøjkpitøjk ja jade'en nimā kya'uk'ejxpajtniyøø. ¹⁰ Ix-jam idø'on ja wyinaty øy pyat'ejxti ku ja Jesús jade'en chajpejty, winets yaa'dyøjk namajtsk adsu'jky kyaxø'k-tøø ma ja jam wyinaty, ankilis ja'adi, jøts tumboop wet ja wyet'ajttip, ¹¹ xjats ja yide'en ñimaajyidøø:

—Meets Galile'it jaa'dyi, ztiku yø tsajp jade'en xpat'ejxti? Tøxi x'ejxti ku ja Jesús tø pyatøki jap tsajpjøtpty, zki-di? Nayide'en ja nøjkx jadigojk myiñ sa ja tø pyatøki tsajpjøtpty.

Ku ja Matías yikpiktaajky jøts ja tkudanit ja Judas oo'kpi

¹² Xjats ja jam kojpkøjxp choo'ndøø midi txøøw'ajtp Olivos, jøts ja ojts ñøjkxti Jerusalén, jade'enin ja ojts tniyø'øyidi waani sa ja yø'ødyi ku ja poo'kxin xøøw tpaaty. ¹³ Xjats ku dø'on ja jam yja'ttøø kajpjotp, winets ja kyøxpajttøø jap nipatøkiixpy ma ja Pedro jam wyinaty tø yja'ta'akti møøt ja Jacobo, møøt ja Juan, møøt ja Andrés, møøt ja Felipe, møøt ja Tomás, møøt ja Bartolomé, møøt ja Mateo, jøts møøt ja yjadu'ukpi Jacobo pøn ja Alfeo y'u'nk'ajtpy, jøts møøt ja Simón zelote, jøts nayide'en møøt ja Jacobo y'uch Judas. ¹⁴ Niduki'iyi dø'on ja jam jade'en xyiminamyukyidi jøts ja Dios'ajot'ajtmukti jøts ja wyinmaa'ñ ja tu'ugyi tyik'etti møøt ja Jesús myigu'ukti, møøt ja María midi ja tyaa'ajtpy, jøts møøt nayide'en winaa'gin ja tø'øxyøjkti, jade'en idø'on ja jam wyinaty xyimidios'ajot'ajtmukti.

¹⁵ Xjats idø'on ja Pedro winet'et tyanaagyukyiyi'ñ jam jaa'y agujkp pøn tjanchja'widip ja Jesús, jam idø'on ja jaa'y wyinaty nimagø'pxy ja ee'pxindi, jøts ja Pedro jade'en kyajpxwa'kxy:

¹⁶ —Meets migu'uktøjkti, tø dø'on ja jade'en yjanch-jaty sa ja Dios kyajpxy wyaañ, ku ja Espiritu Santo jap jade'en kø'øm wyaañ, midi ja David kyajpxnajx ku ja ojts tnimadya'aky ja Judas, ja' pøn tuu'waa'w ja jaa'y jøts yikmatst ja Jesús. ¹⁷ Øøts idø'on nmigu'uk ja' ja Judas pøn idø'on jade'en adøøjts, nayi ya'atpi tunk ja y'ijty tyumpy midi øø ndumpy. ¹⁸ Xjats ja ñøjkxnaa jøts ja ojts tjuy naajx, ja meeñ ja tyagujyuyi midi ja ojts yik-tamijuy ku ja Jesús ja jade'en tkøyajky; jøts ja nay jam kyidaay, winets ja kø'øm ñañajtskuwojpiyøø, jøts yjooit ja ky'i'ch jøts ja tyiinch pyidsømgijxy. ¹⁹ Xjats ja jaa'y ja jade'en tnija'widøø pøn jam wyinaty tsinaadyip Jerusalén, winets ja tyikxøbjttøø ja naajx Acéldama, midi tyijpy Ni'jpyam, jade'en ja ttejtiti ku kyø'øm ayuujk ja tkajpxti. ²⁰ Jøts ja David yide'en jap ja nøky tyik-waañ ma ja Salmos jap yikuja'ayi:

Wan ja tyøjk abæk ttañ,
wan jap pøn tkidyimchøøni.
Wan tmatjststuty tyunk jøts jadu'uk ja jaa'y tyøkit
tumbi.

²¹ Paty øøts yā'at jaa'y nidu'ugin nyiktunwā'āñ pøn øøts jeky tō xpawidity, wine'en øøts ja nwindson'ajtim yā tō x'at-smøøtsøøni, ²² jaayip øøts yō jade'en xmøøtwidity ku nwindson'ajtim ja Juan ojts yiknøbetyi, kunim ja tō pyatōki jap tsajpjøtpy. Paty øøts yā'at jaa'y nidu'ugin ndsøky, jøts øøts yō møøt ngajpwa'kxt ku ja nwindson'ajtim tō pyidsimy jadigojk jap oo'kpi jutjōtpy.

²³ Ku ja Pedro jade'en wyāāñ, xjats ja twi'ejxtøø namajtsk ja jaa'y pøn ja nidu'ugin pyiktā'akwandip: ja José ojts yikwīwīch pøn tīgøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwīwīch. ²⁴ Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sā jaty pøn jadu'uk jadu'uk wyinmay, yō jaa'y ixa øøts tō nwiwīch namajtsk, tuknija'wik øøts pøni pøn me md-søjkpy, ²⁵ wan ja tunk ttuñ midī ja Judas tō tmatjststuty, ja agøjxp ku tō pyøkyuñ jøts ja tō ñijkxy jap mā ja pyāat'aty.

²⁶ Winets ojts nidu'uk yikpiktā'aky ja ñamajtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

Ku ja Espíritu Santo myiñ

2 Ku ja Pentecostés xøøw tpaajty, tyimwyinet'et idø'on ja Jesús kyudanaabyi wyinaty niduki'iyi tō ñamyukyidi jap tøjkjøtpy ² ku adsu'jky tmadoodøø jøts ku y'amu'uy jade'en sām ku møk pyøjyīn, japts tsajpjøtpy chøøñ, jøts ja tøjkm amuum ñojktaajky mā ja jam wyinaty tō ñamyukyidi. ³ Winets ja jade'en t'ejxpatti ejxim ja jøøn yowīn, tu'uk tu'uk idø'on ja jade'en tmøøt'atti kyubajkp. Ja tu'ukpi jøøn idø'on wyinaty tō ñawya'kxyi. ⁴ Xjats ja niduki'iyi tyatøjkiydøø ja Espíritu Santo, jøts wenk ayuujk ja jaty tkajpxtøø sā jaty ja pøngapøn yik'awijyi ja Espíritu Santo.

⁵ Jamts idø'on wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chi-naañidi, ka'ap ja jam wyinaty y'ukugajp'ajtnidi. ⁶ Ku ja jade'en tmadoodøø y'amu'uy kyidā'aky, winets ja t'anøjksidøø mā ja tmadoodøø y'amu'uy, kuts jam yjā'ttøø, ka'ap ja jam y'ukwinmaa'nbyatnidi, ja agøjxp ku ja tmadoodøø ja y'ayuujk yikajpxti, pøni sā jaty ja nidu'uk nidu'uk t'ayuujk'atti. (Jade'en ja kyajpxwā'kx-tøø ja jaa'y pøn tjanchja'widip ja nwindson'ajtim Jesucristo.) ⁷ Xjats ja jadi'iñi myondi y'ookti, jøts ja xem yām nawyajnidøø:

—¿Ti kidi ja Galile'itjaa'yip yā'atti ixa jade'en kyajpxti? ⁸ ¿Sudso yō jade'en tkajpxti yō ayuujk midī adøm nidu'uk jaty ngajpxyīndip, sā jaty pøngapøn ja y'ayuujk tō t'aniweji? ⁹ Ixa ja jaa'y ixyāmdī pøn kugajp'ajttip jam Partia, jam Media, jam Elam, mā Mesopotamia, jam Judea, jam Capadocia, jam Ponto, jam Asia, ¹⁰ jam Frigia, jam Panfilia, jam Egipto, mā jaty kajp jam Africa,

jambaat yō kyugajpidi jam Cirenit kajp ixkø'øm. Nay jats ja romanosti pøn yā tō kya'axti, pønts yā tō yja-gaka'axti tō ja israelit jaa'y ja china'yin tpadøjkiñidi.

¹¹ Nay jaa ja jaa'y yā tō yjā'atti midī tsoo'ndip jam Cre-ta, jam Arabia; niduki'iyi yō jade'en tō nmadøø'yindi ku yō tñigajpxti tñimadyā'akti ja Dios myøk'ajtin, jøts jade'en xmigajpxyīndi sā adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'on tyimy-jā'widøø, jadi'iñi ja kya'ukwinmaa'nbyatnidi xjats ja xem yām ñañimaa'jydøø ti dø'on tuujnīp.

¹³ Jamts ja jaa'y jadu'ukti pøn ttaxektip, yide'en ja ñawyāa'miyidi:

—Mujkidip yō jaa'y, paty yō jade'en y'amu'ugykajpx-ti.

Ku ja Pedro ojts kyajpxy jam mayjaa'y aguujk

¹⁴ Ku dø'on ja jaa'y jade'en ñawyajnidøø, winets ja Pedro wya'kukidøø møøt ja ñimaktu'ukpi myigu'uk, jøts møk'ampy tmigajpxy ja mayjaa'y, jøts tñøjmi:

—Meets Judeit jaa'dyi, jøts nayide'en niduki'iyi pøn jaty yā tsinaadyip Jerusalén, ukja'gyukidi yikxon midī øts ixyām nnigajpxwampy. ¹⁵ Ka'ap øøts nmu'ugyi sā meets nugo mjawinmay, nīpøn jøpyi kyamu'ugyi, apenī xøøw ixa pyetynim. ¹⁶ Jajtp idø'on ixyām jade'en sām ja Dios Teety tñimaa'y ja kyugajpxy, pøn txøøw'ajt Joel, ku ja jade'en wyāāñ:

¹⁷ Ku wyinaty ja naxwii'ñit tyigatswani, winets øts ja'abi xøøw møk'ampy ja naxwii'ñit jaa'y nduktatøkit ja n'Espíritu Santo ømyagajpi; nyikugajpxy'atp øts ja mutskuna'jktøjkti, jøts ndukwingumā'ap øts ja wajtyøjkti kiixyi'idi sā wyinaty yjatwā'āñ yā naxwiiñ, jøts nayi xwingumā'adip øts ja møjaa'dyøjkti.

¹⁸ Xjats øts nay ja'abi xøøw møk'ampy nøjks nduktatøkidi ja n'Espíritu Santo ja'abi dø'øndi, pøn øts nja' wyinaty amumjoojt xpadunwajnyīdip, ja'ats øts n'ayuujk nøjks møk'ampy xkajpxwā'kxiydip, øy ja yjaya'adyøjki øy ja yjatøxyøjki.

¹⁹ Nanky'ejxip øts jam tsajpwemp ja nmilagrī'ajtin, jøts nayide'en yā naxwiiñ nanky'ejxit ku ja nī'jpy yø'øty, jøts ja jøøn mye'ent, winets yjoktā'atst.

²⁰ Jøts ja xøøw y'ookt, jøts ja po' nī'jpyīn kyaxø'økt, ku dø'on jade'en yjatt winets ø nme'ent, pø øtsxi mee xwindson'ajtp,

jøts nyikjatt ja xøøw sām nijuuni xka'ejxtinim.

²¹ Jøts niduki'iyi pøni pøn jaty ø xminuu'kxāk, ja'ats ø nyiknitso'ok'attip.

Jade'en ja Joel ja Dios kyajpxy y'ayuujk tyiknajxøø.

Xjats ja Pedro yide'en tjaaknīmaa'y ja myigu'uk:

²² —Jaa'ukmadowdi meets Israelit jaa'y midī øts njaaknīgajpxwampy: Ja Jesús Nazaretit jaa'y, tō ja Dios Teety ja myøk'ajtin myø'øyi, jøts janch tsuj janch møj ja milagrī ttuñ, jøts may ja ejxā'āñ jade'en mmø'øyidi Dios Teety myøk'ajtingøjxp, paty xñijawidit ku ja Dios Teety møøt y'ity. ²³ Xjats ku meets ojts myikømø'øy, ti nduu'nimp, tō yjaty kyubety tuki'iyi pøni sā ja Dios Teety kø'øm tpiktaajky jekyīp, jøts nay ja' meets ojts

xmach jøts xtsumdøø xiidyøø, jøts ja ka'øybi jaä'y xukyik'oockti jam kruskøjxp. ²⁴ Xjats ja Dios Teety ojts jadigojk tyikjujkyi, jøts tyik'awä'at'spidsiimy jap oo'kpi jutjötty; ja'agøjxp ku ka' pyaät'aty jøts ja o'jkin xemikøjxp tkupøkt. ²⁵ Yide'en ja rey David ojts ja Dios Teety yikugajpxy'aty sa ja Jesús kyajpxy y'ayuujk:

Mets Teety, ejtp me møøt njujky'aty m'a-ga'ngyø'ampy;

jøts ka'ap øts pøn x'adsø'øgit.

²⁶ Paty øts n'anmija'win janch jotkujk nnayjawiyi, jøts øts ja nxondaajkin jade'en nnigajpxy.

Øy n'ookt, ka' ti jotmay njagyapt;

²⁷ ja'agøjxp ku mets ka'ap ja n'anmija'win xyikta'ant ma oo'kpi yja' tyandi,

jøts nika'ap øts nnine'kx xyikwindigøjyiyit, pø øtsxi me xtsøky'ajtp.

²⁸ Tø øts xuknijawi ku njujkyøkt jadigojk ku wyinaty tø n'øøky,

jøts nayide'en xyikxonjatt ku mets xemikøjxp nmøøt'ett.

Jade'en ja David tyiknaajx ja Jesús kyajpxy.

Xjats ja Pedro tjaaknimaa yide'en ja myigu'uk:

²⁹ —Migu'uktøjkti, wä'ats yiknijawi ku adøm n'apteety'amøj David ojts y'øøky jøts ñaxøkiyiñ, nay ja n'ijxyindi ma ja yjut ma ojts ñaxøki. ³⁰ Ja David, ja' Dios kugajpxy'ajtiyøø jøts ñija'wip sa wyinaty ja Dios møk wyanda'aky, ku wyinaty tu'uk y'ap yikpikta'aky yiknitsokpi ya naxwiin, jøts nayide'en yikutukt sami David kyutujkin. ³¹ Jade'en idø'on ja David jekyip tni-jawi, jøts jade'en tngajpxy ku ja Cristo yjujkyøkojmit jøts ni ja ñine'kx kyawindigø'ty. ³² Pøn ja David ñigajpx ñimadyaajk, ja Jesús idø'on ja', ja' idø'on ja Dios Teety tø yikjujkyiyi, pø tøxi øøts ja wä'ats n'ixy, pø tøxi øøts ja wä'ats nnijawi. ³³ Jøts ja Dios Teety ja nayide'en yiktsajpajtøø jøts pyiktaajkøø y'a-ga'ngyø'ampy, jøts jade'en ja møj kutujk myø'øyiyi; jøts ja' tkajxp ja Espiritu Santo ya naxwiin midi ja Dios Teety wyinaty kø'øm tø twanda'aky, jøts ja' idø'on ja myøk'ajtin yø' midi ixa m'ejxtip mmadoodip. ³⁴ Pø kidi ja Davidipxi kø'øm tsajpajt, ja'ayi ku David ojts yide'en wya'añ ku ja nwindson'ajtim Jesús ja Dios Teety yide'en ñimaajyiyi:

“Ëxa'ak, jøts ø xputsøønit n'aga'ñ'ampy,

³⁵ jøts øts yø mmidsep nmimajadəkøxt.”

³⁶ Meets Israelit jaä'y kuwani niduki'iyi ka'pxy xni-jawidit, jøts ku ja Jesús pøn meets kø'øm mdukyikrus-pajt ja abiky jaä'y, ja' yø' pøn ja Dios ixyam tø kø'øm tpiikta'aky møj windsøn jøts yiknitsokpi.

³⁷ Ku dø'on jade'en tmadowdi ja Pedro kyajpxy, winets ja jotmay tyatøjkyidøø, xjats ja Pedro yikni-maa y møøt ja ñimaktu'ukpi myigu'uk:

—Migu'uktøjkti, ¿sudso'ampy øø ndu'unt?

³⁸ Xjats ja Pedro t'adsojimbijty jøts tni-maa y:

—Yø mbøkyu'unin mmajstuttip, jøts mnøbattit ndu'uk jaty Jesús xyøögøjxp, jøts jade'en myikpojki-maa'kxtit; jøts nayide'en ja Dios Teety mduktatøkiyidit ja y'Espiritu Santo. ³⁹ Meets m'øy'ajtin yø', møøt m'u'nk møøt m'unaj'jkti, jøts nayide'en pøn jaty jagam

tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'on ja Pedro ojts tkajpxwiyi ja jaä'y, jøts tni-maa y:

—Majstuttip yø'øbi jaä'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tni-maa y, winets ja jaä'y ñøjkxtøø nøbajtpi pøn jaty tmibøjktøø ja Pedro y'ayuujk; ja'abi xøøwts ja Jesús yja' ojts ñamayi nidigøøk mil.

⁴² Nidukna x idø'on ja t'ixpøkti sa ja Jesús kyudanaabyi y'awä'andi, jotkujk idø'on ja jam tu'ugyi chøønidi, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sä chinaadyi ja myijawyembi ja Jesús janchja'wibidi

⁴³ Xjats ja jaä'y ñigyumaap idø'on ja tja'widøø ku ja Jesús kyudanaabyi ja mamylagrñ tnankey'ijxyidi. ⁴⁴ Tu'u-ugyi ja wyinmaa'ñ ja tyik'etti pøn jaty ja Jesús yja' tpabøjkiyip jøts ñadyagumayidi ja pyikta'aky; ⁴⁵ jøts ttookti pøni ti jaty pøn myøøt'ajtpy, xjats jade'en ja nimeeñ tyikwä'kxidøø pøni sa jadu'uk jadu'uk yja' kya'ity. ⁴⁶ Jabom jabom idø'on ja jap ñamyukyidi møj tsaptøjkjotp, jøts nayide'en awingujk tøjkyøtpy, jøts ja chapkaaky jap tyikwä'kxti, jøts jade'en ejtni xoni kyay-di, jøts jade'en nipøn kyanamyøjpikta'agyiyi. ⁴⁷ Jøts ja Dios Teety jade'en tjanchkajxa'akti jøts ja kajp jaä'y jade'en yjanchøkyidi; jabom jabom idø'on ja nwindson'ajtim Jesús tyikmayi ja yja' pøn jaty yikpojki-maa'kxtip.

Ku ja pakma'at jaä'y choknaä

3 Tuk'ojk idø'on ja Pedro ojts tmøøtnijkxy ja Juan jam tsaptøjkjotp, wyinaky xøøw ja ñøjkxtøø wine'enin ja jaä'y jam wyinaty xyuminamyukyidøø dios'ajot'ajtpi. ² Jamts idø'on wyinaty tu'uk ja jaä'y pøn ja tyeky ma'at. Ejtp idø'on ja jam xyumiyikwaanijkxy jam tsaptøjk agø'øm ma ja tsaptøjk'aa w jam midi txøøw'ajtp Hermosa. Jamts ja myigu'uk yiktaajniyi, jøts ja jam yiklimunsimuky ku jam pøn tyøki tsaptøjkjotp.

³ Xjats ku ja pakma'at jaä'y ojts t'ejxpaaty ja Pedro møøt ja Juan, ku ja jam wyinaty tyøkiwya'andi tsaptøjkjotp, winets ja t'amidøø y limunsi. ⁴ Xjats ja Pedro møøt ja Juan twin'ejxjø'øktøø ja pakma'at jaä'y, jøts ja Pedro wyaañ:

—Win'ejk øøts.

⁵ Xjats ja jaä'y yjanch'ejxji'jky, yide'en ja wyinmaa y, yikmo'op idø'on ja tijy øy ti yiin waan. ⁶ Winets Pedro ja ñimaajyøø:

—Kidi meeñip øø nmiwidijtpy, ja'abi øø ndumpy midi øø xukmiwdejtp ja nwindson'ajtim Jesús pøn ojts chøøni jam Nazaret, pidø'kni jøts myø'øñit.

⁷ Xjats ja Pedro ja jaä'y tmajch y'aga'ngyø'køjxp jøts ja twejtsji'jky, ja'ayi ja jade'en ttuun winets ja tyeky ja jaty wya'kmøkiyiñ, jaty tyekyo'kt ja myøkpjiiky. ⁸ Xjats ja pakma'at jaä'y jade'en kanimøjjaaw yjanchwo'onji'jky, jøts ja tyanaagyukyiyiñ, jaty ja ojts yø'øyji'iky. Xjats ja tmøøtjikidøø jap tsaptøjkjotpy, ñiyukwo'oni

ñichajpwo'oni ja jap t'ajot'aty ja Dios. ⁹ Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanchtukmøjawi tjanchtukunuu'kxyjawi ja Dios. ¹⁰ Xjats ja ñigyumaap tyimyja'widøø pø ma ja tyimñayja'widøø ku dø'on jade'en wyinaty tø yjaty. Ja'widip tsø'jkidip idø'on ja jamdi, kumi ñija'widip ja wyinaty ku ja yja'aji pøn jam wyinaty xumiyikmujkp jam tsaptøjk agø'øm, ma ja tsaptøjk'aaw jam midi txøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm mi-di yiktejp Salomón Tyøjkweenk

¹¹ Ja pakma'at jaa'y pøn idø'on wyinaty tø myøkpiky, ka'ap ja t'ukmajstutni ja Pedro jøts ja Juan, winets ja jaa'y pyujtmendøø ma dø'on ja jam wyinaty, jadi'iñi ja myondi tyukti paty ja jam myendi tsaptøjk agø'øm mi-di txøw'ajtp Salomón Tyøjkweenk. ¹² Xjats ku ja Pedro jade'en ojts t'ixy ja jaa'y, winets ja tnimaay:

—Israelit jaa'dyi, ztiku ñigyumaap xjawidi? zTiku øø xwin'ixy, yide'en meets idø'on yjawi mwani, øøts idø'on yø xijy kø'øm møk'ajtin tø nduktatsø'øky yø jaa'y ku yø tø yø'øbyiky, uk ja' øøts idø'on yø xijy tø nduktatsø'øky ku øøts ja Dios janchtsuj n'ajot'aty? ¹³ Ka'ap yjade'eni, ja Dios Teety jade'en tø tmø'øy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajttip, møøt n'apteety'amøj Isaac, jøts nayide'en møøt ja Jacobo. Ja y'U'nk ja myøk'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgø'yajk jam yikutujkpi wyindum. Jøts ku ja Pilato ja wyinaty tjamajstistu'utwa'añ, ka'ats meets ja xnankyikpidsøjmi. ¹⁴ Ja' mee ne'egi myik'awa'atspidsøøm pøn wyinaty tø tyundigøy, jøts meets ja ka'ap xnankmyajstuujuutøø pøn wa'ats, pøn katundigøøpy niwine'enin. ¹⁵ Jade'ents meets ja xyik'ø'jky ja yikjujky'ajtpi. Jøts tø Dios ja jadi-gojk yikpidi'igyi jap oo'kpi jutjøtpy, tø øøts idø'on ja jade'en ndyimybyaaty ndyimy'ixy, øøts idø'on ñamyayi nøjkxp testigi. ¹⁶ Ja' idø'on yø jaa'y jade'en tø yik-møkpiky ku yø tø t'ajot'aty, ku yø tø tmøppikta'aky ja Jesús. M'ijxy'ajttip mnija'widip yø pakma'at jaa'y jøts ku tø yikmøkpiky, jøts ixa dø'on jade'en x'ejxti møk møjaaaw.

¹⁷ Migu'uktøjkti, wa'ats øts ja nnijawi ku meets ja mwindsøn møøt mnabyudøjkiyidøø, jøts meets ja Jesús xyik'oo'ktøø, nugo ja jade'en xundøø, ni xkani-jawi meets ja' pø tigøjxp jade'en m'adøstøø. Ka'ap meets ja nnijawi pø tidam meets idø'on mjatumpy. ¹⁸ Xjats ja Dios tø tjanchyik'aduky ja wyanda'aky ku myagyajpxnaxpi ja tyikwaañ: jøts ku ja yiknitsokpi wyinaty jade'en y'ayo'ombaatwa'añ. ¹⁹ Paty mbøkyu'unin xmajstustu'uttit xyiktigatstit ja mdsinaa'yin, ja'myatsti ja Dios Teety jøts ja tyakt ja øxyøøw ja øyjumøjt, ²⁰ jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitsok'ajtindit. ²¹ Øy idø'on ja Jesús ixyam ndejint tø yjatañ jap tsajpjøtpy, jaanin ku ja Dios Teety ja kø'øm tyik'ø'yigyøxt pøni ti dø'on ja tyunwampy, jade'en sa ja myagyugajpxy ja kø'øm t'a-gajpxiyi'ñ ku ja jade'en wyandøø pøn jaty tsinaadyøø

jekyip. ²² Jade'en adøm n'apteety'amøj ojts yikni-maa'yindi ku Moisés ja ojts ñii'mxyidi: "Mdanigaxidip ja Dios Teety tu'uk ja kugajpxy, meets mgø'øm migu'uk nøjkx kø'øm yikpikta'aky jade'en sa ø kø'øm nyikpiktaajky. Mimado'odip idø'on ja' pøni sa jaty ja wyinaty mnii'mxyidi, ²³ pøni pøn ja wyinaty tkami-madoop, ka'ap ja t'ukmøøtsinaañidit ja myigu'uk, kuwani ja jaty wyindigø'ødyit."

²⁴ Jade'en idø'on ja Dios kyugajpxy wyandøø, ja' idø'on ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jawyeen wyaañ. ²⁵ Tum meets ja Dios kyugajpxy m'u'nk'ajttip, jøts paty ja Dios ojts tpikta'aky tu'uk ja kutujk midi ja aptøjk ojts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'on ja Abraham Dios ojts ñii'mxyi: "Tuki'iyi ja teety ja taak, ja u'nk ja unajk nøjkx yikunuu'kxkøxti mets m'ap mets m'unaj'kjøxp." ²⁶ Ku ja Dios tyikpid-siimy jadigojk ja y'U'nk Jesús jap oo'kpi jutjøtpy, jawyeen ja ojts mdaniguexyidi jøts ja mgunuu'kxidit, jøts niduki'iyi xmajstustu'uttit ja mga'ødyu'unindi.

Ku ja Pedro møøt ja Juan ojts twingunøjxkidi ja kudunktøjkti

4 Nay iexam idø'on ja Pedro ja jaa'y wyinaty tmi-gajpxti møøt ja Juan, ku ja teetyøjk jam myendøø møøt ja tsaptøjk ejx'ejtpi windsøn, jøts møøt ja saduceotøjkti. ² Tø dø'on ja wyinaty yikxon yjanch'am-bøkti, ja agøjxp ku ja Pedro møøt ja Juan tyik'ixpøkti ja jaa'y, ku ja wya'andi jøts ku oo'kpi pyidsø'ømdit jadi-gojk jap oo'kpi jutjøtpy, kumi tø ja Jesús wyinaty kø'øm pyidsimy jadigojk jap oo'kpi jutjøtpy. ³ Xjats idø'on ja ojts yikmajtsnidi jøts ja yiktsumnidøø, kyimjabomnim ja yiktiidyundøø kumi tsuu'nip wyinaty ku ja yikt-sumdøø. ⁴ May jaa'y idø'on wyinaty tø tjanchjawidi ja øgyajpxy ja ømyadya'aky, pøn jaty ja wyinaty tø tpat-madowdi; jawaani kamagoxk mil ja yikmachoopidsiimy ja yaa'dyi pøn tjanchja'widi ja nwindsøn'ajtim, ku ja wyinaty tø tmadowdi ja øgyajpxy ja ømyadya'aky.

⁵ Xjats ja'abi xøøw winets ja windsøndøjk ñamyu-jkidøø jam Jerusalén midi t'ana'amdip ja kajp, nay ojts idø'on ja mayjaa'y jam myendøø, møøt ja kajpxwe-jpitøjkti midi tundip jam tsaptøjkjotp; ⁶ nay jam idø'on ja Anás wyinaty pøn ja teetywindsøn'ajtip møøt ja Caifás, møøt ja Juan, jøts møøt ja Alejandro, niduki'iyi ja jam wyinaty niwinø'on ja pyaat'atyidi ja teetywindsøn'ajtk. ⁷ Xjats ja Pedro yiknajtswa'widøø møøt ja Juan, jøts ja ojts yikpikta'akti jam agujk'am, winets ja yiktiibyøjktøø, yide'en ja ojts yiknøjmidi:

—zPøn yø jade'en tø mdanigutujk'atyidi jøts jade'en m'adø'østtit, pøn jade'en tø m'ane'emyidi?

⁸ Xjats ja Pedro y'adsøøy, kumi tø ja Espiritu Santo ja wyinaty amuum tyatøkiyi, jøts ja tnimaay:

—Meets windsøndøjkti, meets møjaa'dyøjkti pøn jaty tsinaadyip ya Israel: ⁹ ku øøts idø'on jade'en tø xyiktiy sa tø chø'øky yø pamaa'y, sa yø tø yik'ødyuñ, ¹⁰ n'adso-jimbetp øøts ja m'ayuujk, nnigajpxp øøts ya mayjaa'y agujky, jøts nnijawidit niduki'iyi pøn jaty tsinaadyip ya

Israel, jøts yø jaa'y ixa tyani mee mwinduuju møk møjaa. Ja nwindson'ajtim Jesucristo ja' yø tø yiktsø'ogyi pøn kugajp'ajtp jam Nazaret, ja' midi meets ojts xyikruspety, jøts ja' Dios Teety tø yikpidsimy jadigojk jap oo'kpi jutjotpy. ¹¹ Jade'en idø'on ja Jesús ñamyayi tø ñøjknixni ejxim ja tsaa' midi meets jagam m'ixjibejp, midi mee mgayiktuun jam pøchkyøjxp, jøts ja' ixyam ne'egi tø pyidsimy jadigojk jawaani øy, midi tmach'etkøjxp tuki'iyi ja pøch'aa. ¹² Nipøn jadu'uk xkayiknitso'ok'ajtim sa adøm Jesús xyiknitso'ok'ajtyindi, pøn ja Dios tu'ugyi tø ttanibiktaagi yä naxwiiñ.

¹³ Xjats ku ja kudunktøjk t'ejxti ja Pedro møøt ja Juan, ku ja jade'en møk'ampy wyingugajpxiyidi, winets ja t'ejxkajptøø kudam ja kya'ixpikyidi, ku ja ñugojaa'yidi, jøts ja jade'en nugo myaydi tyajti, winets ja t'ejxkajptinim jøts kudam ja yja'adi pøn ja Jesús wyinaty tø tmøøtwidetti. ¹⁴ Jøts ja jaa'y midi wyinaty tø chø'øky, jam idø'on ja wyinaty tmøøtanidi, paty ja kudunktøjk ka' t'ukmidsepwanidøø. ¹⁵ Xjats ja yikajpxidsømdøø ma ja mayjaa'y jam wyinaty tø ñamyukyidi, jøts ja kudunktøjk ja agø'ømyidi tkajpx'øydøø. ¹⁶ Yide'en ja ñawyajnidøø:

—¿Sa yø jaa'y njanchtuu'nindit? Pø tyumni-ja'winidixi yø' pøn jaty yä tsinaadyip Jerusalén jøts ku yø jade'en tø tyiktuujnidi ja Dios myøk'ajtin, ¿ti jats adøm ja ngagupijkyim ku dø'on ja jade'en tø yjanchjaty? ¹⁷ Wan yø tkajpx'adsø'jka'andi, jøts ja Jesús ka'ap ja yja' y'ukyikajpxyø'øñit jam mayjaa'y agujkp.

¹⁸ Xjats ja twaadsøø ja Pedro møøt ja Juan, ja møk'ampy t'ana'amdøø jøts ja kidi jade'en ja jaa'y t'ukyik'ixpøjknidi, ka'ap ja jade'en t'ukajpxwa'kxinidit ja Jesús yja'. ¹⁹ Winets ja Pedro y'adsøø møøt ja Juan, jøts ja wyandøø:

—Ukwinmaagyukidim kø'øm pøni tiy tam jade'en, pøni øy tam ja Dios jade'en tjawi ku mee ne'egi myikmimado'ot, jøts ja kyayikmimado'ot. ²⁰ Nijuuni øøts ja ngamajststuttu'utt midi øøts jaa'y nduk'ixpijky, kumi tø øøts ja jade'en kø'øm ndyimyadøy, jøts kumi tø øøts ja jade'en kø'øm ndyimy'ixy.

²¹ Winets ja kudunktøjk ja ojts kyajpx'adsø'ogyiyidi jøts nigidi'iyam ja ojts tyimyikmatsti, yikmajstuttøø ja jadi'iñi. Nigidi ja yikmiwinmaa'nbyajtidøø sudso ja tyik'ayo'ombaattit, kumi tsø'jkidip ja', niduki'iyi ja kajp jaa'y wyinaty tkajxaknidi ja Dios. ²² Jade'en idø'on ja pakma'at jaa'y chøøjky, jam idø'on ja jaa'y yjumøjt ja wyinaty wixijky myajtskin pøn ja Dios yiktsøøjkyøø.

Ku ja Jesús yjanchja'wibi t'amidøø ja møk'ajtin

²³ Xjats ku ja Pedro møøt ja Juan y'awa'atapid-sømdøø, winets ja myigu'uk ja tniñøjxtøø ma ja jap wyinaty, jøts ja ojts ttamimadya'akti sa jaty teetywindson sa jaty møjaa'dyøjkti ja wyinaty tø ñi'mxyidi.

²⁴ Xjats ku ja myigu'uk ja jade'en tmadøø, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajtskojigyixy tuki'iyi winø'on ja pikta'aky y'ity naxwiiñ, wan tsajpi, wan tnaajxi, wan tnøøjtmejy. Tum mets yø mja'ajtpy amuum.

²⁵ Nayi mets ja David ja Espiritu Santo mdukyik'a-gajpxiyiñ ku ja xyikwaañ yide'en:

¿Tigøjxp ku jaa'y kajp kajp nugo jotkøjpxim t'ejxti pøn yä jagagugajp'ajttip, pønts yä kugajp'ajttip, jøts yø tmidundigøøwyamididi ja nwindson'ajtim?

²⁶ Ja windsøndøjkti midi yikutujktip yä naxwiiñ, ja' tø tmidsepøkti ja nwindson'ajtim, jøts ja jaa'y midi t'ana'amdip ja kajp, tø ja ñamyukyidi may'ampy,

jøts ja tniñidø'kti ja Dios Teety, nayide'en ja tmidsepøkti ja yiknitsokpi midi ja Dios Teety kyejpxy.

²⁷ Jøts janch tø dø'on yjaty, kumi jade'en ja Herodes møøt ja Poncio Pilato tø tminamyukyidi ja wenk jaa'y jøts nayide'en yø israelit jaa'dyi yä møj kajpøjty, ja' idø'on jade'en tø yikmidsepiky ja m'U'nk Jesús pøn janch tsuj janch wa'ats, pøn me kø'øm tø xanibiktaagi yiknitsokpi. ²⁸ Tø dø'on ja jaa'y ja jade'en yjanchtuñi sa mets ja wyinaty kø'øm tø xanibiktaagi jøts ku ja jade'en yjatt, tøts idø'on ja jade'en yjaty. ²⁹ Dios Teety, ejx ixyam sa tkajpx'adsø'ogidi ja jaa'y, yikjotmøkpøky m'ayuyk. ³⁰ Mo' møk'ajtin, mo' pudøjkin jøts tyiktso'oktit ja pamaa'y jøts tyikwingaxø'øktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiñ ja ujk ma ja jam wyinaty tø ñamyukyidi; xjats ja jade'en ja Espiritu Santo yikjotmøkpøjkidøø, jøts tkajpxwa'kxidøø amumjoojt ja Dios kyajpxy ma jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y midi wyinaty tø tjanchjawidi ja øgyajpxy ja ømyadya'aky, tu'ugyi ja wyinmaa'ñidi, ka' pøn wenk wyinmay, nitu'ugin nipøn ja pyikta'aky tkaja'adijy, tyumja'ajttip idø'on ja niduknax, ka'ap ja pøn tja'atynadyu'uk. ³³ Jøts ja kudanaabyi jotmøk'ampy ja tni-gajpxti tniadya'akti ja nwindson'ajtim Jesucristo, sa ja pyidsimy jadigojk jap oo'kpi jutjotpy. Dios idø'on ja yikxon pudøjkin møøjyidi. ³⁴ Jøts nipøn niti kya'ijtxyi, kumi tyoo'ktip ja ñaajx ja', kumi tyoo'ktip ja tyøjk ja' pøni pøn jaty jam ja pyikta'aky tmøøt'ajtp, jøts ja ñimeeñ ja tyikmenidi, ³⁵ jøts ja ttagødøkididi ja kudanaabyitøjkti. Ja'ats ja tyikwa'kxtip, jøts ja ttagumaydi pøni pøn jam tigati ka'ejtixyip. ³⁶ Jamts idø'on wyinaty tu'uk ja israelit jaa'y pøn ja Leví y'apteety'amøjip, José dø'on ja xyøøw, jam ja wyinaty tø kye'exy ma ja naajx jam møj mejyotp midi txøøw'ajtp Chipre. Ja'abi jaa'y ja kudanaabyitøjk yikxødigatstøø, jøts ttejtøø Bernabé midi tyijpy kajpxot'amøjkibi; ³⁷ ja'ats idø'on tto'jk ja ñaajx jøts ja tyikmiñ ja naxtsow, jøts ja ttagødøjkiy'iñ ja nwindson'ajtim kyudanaabyi.

Ku ja Ananías jøts ja Safira tmidundigøødyøø ja Espiritu Santo

5 Jamts idø'on wyinaty jadu'uk ja jaa'y pøn txøøw'ajtp Ananías, jøts ja ñidø'øxy Safira txøøwi, ja'ats idø'on tto'ktøø ja ñaajx tukam. ² Xjats ja kujk-

wa'kxy tmidanidøø næxtsow, jøts ja ojts kujkwa'kxy ttaninijkyx ja kudanaabyitøjkti, jade'en ja ttanikajpxy jøts ku ja jam ka'pxy, ka'ap ja jade'en ttukmadø, wa'ats ñidø'øxy ja møøt tñijawi ku ja jade'en y'adø'øtsti. ³ Xjats ja Pedro tñimaay ja yaa'y:

—Ananías, ¿tiku miku' tø mdatøkiiyi jøts jade'en xjawin'øønwa'añ ja Espiritu Santo, kidi kujkwa'kxyip tø xyikmiñ? ⁴ ¿Ti kidi ja kam xkø'ømnajaaji? Jøts ku tø xøøky, ¿ti kidi ja meeñ xkø'ømja'aji jøts xkøyakt põni winø'on kø'øm xkøyakwa'añ? Dios tø xawin'iñ, kidi øødsip.

⁵ Ja'ayi Ananías jade'en tmadøø, winets ja jatyi øøky ñaxkidaajky. Ku ja jaa'y ja jade'en niduki'iyi tñimadoodø jøts ja yjanchø'jkidøø. ⁶ Xjats ja una'jk jaa'y myendøø, jøts ja t'abejtøø ja oo'kpi jøts ja t'atsiyiknaxøjkidøø.

⁷ Tigøøk oorinin idø'on ja wyinaty jade'en tø yjaty, ku tyøjkiyi'ñ ja Ananías ñidø'øxy nay jam, ka'ap ja tñijawi põni tidam idø'on wyinaty tø tyuñi. ⁸ Xjats ja Pedro ja tyiibyøjkøø, jøts ja ojts ñii'mxyi:

—Nigajpx, ¿jade'en idø'on ja naajx tø xjanchtookti winø'on tø xanitejti?

Winets ja y'adsøøxy jøts ja wyaañ:

—Jade'en øøts ja tø ndøøky.

⁹ Xjats Pedro ja tñimaay:

—¿Tiku jade'en tø xkajpxy'atti ku ja Dios Teety y'Espiritu Santo jade'en xwin'øøndi? Ìxa ja jaa'y tøk'agi'jy myendi midi ja mniyaa'y tø y'atsiyiknaxøkiyi, jøts mets inet m'atsnaxøjkimiyip.

¹⁰ Winets ja tø'øxy jatyi øøky ñaxkidaajky jam Pedro tyekyjø'm. Xjats ku ja una'jk jaa'y tyøjkidøø, øøky ja jap tpattøø ja tø'øxyøjk, winets ja ojts jatyi tyikpid-sømdi, jøts ja ojts t'atsnidajidi nay jam ñiyaa'y pyukø'øm ma ja jam wyinaty tø yiknidaji. ¹¹ Winets ja Jesús yja' niduki'iyi yjanchø'jkidøø, jøts nayide'en põn jatyi ja ojts jade'en tñimadowdi.

Ja mamylagri midi ja Jesús kyudanaabyi ñanky'ejxidøø

¹² Møk idø'on ja Jesús kyudanaabyi ja milagri ttundi jam mayjaa'y aguajpx; jøts niduki'iyi dø'on ja Jesús yja' jam yø'ømyukti møj tsaptøjk agø'øm midi yiktejp Salomón Tyøjkweenk. ¹³ Janch chøky'ajttip idø'on ja kajp jaa'y ja', ka'apts ja niduki'iyi ja jotmøkwinmaa'ñ tjagyapti, jøts jap ñøjkxtit ma ja Jesús yja' jap ñamyukyidi. ¹⁴ Namay idø'on ja Jesús y'ayuujk yik-mibijky, jade'en ja yaa'dyøjk jøts nayide'en ja tø'øxyøjk. ¹⁵ Ja'agøxpts ja pamaa'y jap yikiidyaktøø jap ma tuu' ñaxy, nay jap ja yikpikta'akti myaabajtkijxy jøts tø'økyøjx, jøts ja cho'oktit ku ja Pedro jap wyinaty ñaxy, øy ja y'aga'ax ja'ayi tyapaadiyidit. ¹⁶ Jøts nayide'en ja wenk kajp midi ja Jerusalén myiwingon'a-ipty, ja'ats tyikmendøø ja pyamaa'y jøts nayide'en põn jatyi wyinaty tø møk'ampy myachiyi ja miku'; xjats jade'en niduki'iyi chøktøø.

Ku ja Pedro møøt ja Juan yikjemdondøø yiktedondøø

¹⁷ Winets ja teetywindsøn møøt ja saduceit jaa'y ojts nawyinaxi tjawidi, ¹⁸ winets tmætstøø ja Jesús kyu-danaabyidi, jøts jap tsumdøø ma ja kajp jaa'y pyuxøjk jap. ¹⁹ Xjats nwindson'ajtim ja puxøjk agaj ojts tyik'awa'ach jøts tyikpidsiimy, jøts ojts tñøjmi:

²⁰ —Nøjkxti jam møj tsaptøjkjøtpy, tukmadowdi jam ja jaa'y ja øy'ayuujk midi ndajjuky'ajtindip.

²¹ Xjats ku dø'on jade'en yiknimaydi, winets jøpyi ñøjkxtøø jam møj tsaptøjkjøtpy, jøts ja jaa'y ja jam tyik'ixpøjkjøtkidøø.

Yam idø'on ja teetywindsøn jap wyinaty udyaa'ky twaaðsoodiniim niduki'iyi ja møjjaa'dyøjkti midi ja Israelit jaa'y yikutujk'adsinaadyip, jøts ja Jesús kyudanaabyi nayide'en yikwaadsowa'andi põn wyinaty tø yiktsumdi. ²² Xjats tkejxy ja teetywindsøn ja tyumbi, jøts ku jam yjaja'ttøø jam puxøjk agø'øm, nitu'uk ja ojts tkapaatti põn idø'on jayiktanigaxtip; winets ja jadi'iñi wyimbejtnidøø ²³ jøts ttukmadooðøø ja teetywindsøn, jøts yide'en tñimaadyøø:

—Ku øøts jam tø nja'aty, aduky øøts ja puxøjk jam tø nbaaty, jam idø'on ja soldadi y'eix'etti puxøjk agø'øm; xjats ku øø tø nyik'awa'ach, nĩpøn øøts jap nitu'uk tø ngapaaty.

²⁴ Xjats ku dø'on jade'en tmadoodøø ja ayuujk ja møj teetywindsøndi, jøts møøt ja tsaptøjk adsinaabyi, winets ñawya'añidi: "¿Sudso'ampy nmidaabyajttindit, sudso'ampy yjøpkøxt yø jade'embi winmaa'ñ?" ²⁵ Jøts winet jatyi tu'uk yja'jty ja jaa'y, jøts ja wyaañ:

—¿Kidi xnijawidi? Pø ja'axi yik'ixpøjkti jam møj tsaptøjkjøtp midi meets tø x'uuktsumy.

²⁶ Winets ja tsaptøjk adsinaabyi tmøødiyi'ñ ja tajkti, jøts ojts twaaawidi ja Jesús kyudanaabyi, nisa dø'on ja tkatundi, tsø'jkidip ku ja kajp jaa'y myi'ambøkiyidit jøts ku jotmøñ chaa'ga'adsiyidit. ²⁷ Ku dø'on tyikja'ttøø, winets ttawingugajxidøø ma ja israelit jaa'y kyutujk adsinaabyidi, winets ja teetywindsøn tñimaay ja Jesús kyudanaabyidi:

²⁸ —Tø øøts nnigajpxy jøts ku øøts ojts nyikutuky, jøts ku meets ja Jesús yja' yā niwine'enin xkananky'ixpøkiyidit. ¿Ti dø'on ixyam jade'en tø xundi? Meets ixyam jinaxy tø xuknija'wiguixy ja m'ixpøjkin yā Jerusalén, jøts øøts xukpøky'atwa'añ nayide'en ja Jesús y'o'jkin.

²⁹ Winets ja Pedro t'adsojimbettøø møøt ja myigu'uk:

—Kuwan øøts ja Dios yja' nbaduujniyi jøts ka'ap ja jaa'y yja'. ³⁰ Ja Dios Teety põn adøm n'apteety'amøj Dios'ajttøø, nay ja' kø'øm tø tyikjujkyky ja Jesús, põn meets kruskøjxp mmiwopajt kyøø'øm tyekyjø'm, jøts jade'en xyik'ooktøø. ³¹ Tø ja Dios ja kø'øm tpiakta'aky møj windsøn y'aga'ngyø'ampy jøts yikutukt, jøts nayide'en yā tyiknitso'ok'att ja næxwii'ñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpojkpimaa'kxtit ku tmajstustu'ttit ja pyøkyu'unin.

³² Wa'ats øøts idø'on ja nnijawi ku ja Dios Teety idø'on jade'en ttuuñ, jøts y'ijxy nayide'en ja Espiritu Santo

midi ja Dios Teety tyuktatøjkp ja yjaa'y, pøn jaty ja kya-jpxy paduujniyip.

³³ Xjats ku dø'øn ja Israelit jaa'y jade'en ja kyutujk adsinaabyi tmadoodøø, jøts ja Jesús kyudanaabyi yik-mi'ambøktøø jøts yik'ookwajnidøø. ³⁴ Jamts wyinaty nidu'ukti ja kutujk adsinaabyidi pøn yiktejtíp fariseit jaa'y, ja' xyøøw Gamaliel midi tñanky'ixpøjkijyp ja Moisés kyutujk, jøts janch tsojkijyp idø'øn ja kajp jaa'y ja'. Ja'ats ttanaagyukiyyi'ñ, winets tkajxpidimgijxy ja Jesús kyudanaabyi, jøts ja jap mimøj t'atsyik'awixy abiky tsoo. ³⁵ Xjats yiknimaadyi ja kutujk adsinaabyidi:

—Meets Israelit jaa'y, kidi yø jaa'y nugo ajawí sá xundi. ³⁶ Ja'myatsti ku ojts tu'uk ja jaa'y ñamyøjpikta'agyí windsøn pøn txøøw'ajtp Teudas, jøts ja kyutujk ojts ttawin'iñ ja jaa'y nimaktaxk magø'pxy. Winets ja soldaði ojts yik'øøgyi ja kya'øwyinmaa'ngyøjxp, xjats ja jadi'iñi wyindigøøgyøjxti pøn jaty wyinaty tø tpabøkti. ³⁷ Xjats jadigojk yjajtkojmi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts kø'øm ñamyøjwindsønbiakta'agiyi jøts namay ja jaa'y nayide'en ttukmibijky; winets ja soldaði nayide'en yik'o'jkiyøø, xjats ja jade'en kyutigøøgy ja kyutujk. ³⁸ Paty ø nwa'añ jøts xmajtstu'uttit yø'øbi jaa'dyi, ka'ap nugo xatøjkijyidi ja wyinmaa'ñ. Pøni kyø'mwinmaa'ñ yø'ødi, kudigø'øpyts yø tsojk; ³⁹ pøni Dios yja' yø', nijuunits meets yø xkayikudigø'øty. Øyim mnay'ejx'etiyyidit; kidim Dios møøt nugo mdseptundi.

⁴⁰ Xjats ku dø'øn ja Gamaliel jade'en kya-jpxy'abajtiyyi'ñ, jøts ja kutujk adsinaabyitøjk udy'a'aky tmbøjkøjxtøø. Winets twaadsodøø ja Jesús kyudanaabyitøjk jøts tyik'ayo'ombaa'ttøø, xjats tnimaadyi jøts ka' nugo tjaakajpxwa'kx'adø'øtstít ja Jesús y'ix-pøjkin; winets jadi'iñi tmajtstu'ttøø. ⁴¹ Xjats ja Jesús kyudanaabyi jap pyidsømdøø ma ja israelit jaa'y kyutujk adsinaabyi japti, jotkujk idø'øn ja ñayjawiyyidi kumi tø ja Dios ja wyinaty tyaniðiktaagiyidi, jøts ja jade'en y'ay-o'odit Jesús køjxp. ⁴² Ejtp idø'øn ja jabom jabom tni-gajpxti tkajpxwa'kxidi ja Jesús yja', jøts ja jaa'y jade'en ttuk'ixpøkti jap møj tsaptøjkøtpy jøts nayide'en awingujky tøjkjøøjty, nijuuni dø'øn ja tkamajtstu'ttøø.

Ku ja niwixujkpi yaa'dyøjk yikpikta'ktøø ejx'ejtpi

6 Nay ja'abi et, nay ja'abi jumøjt idø'øn ja jaa'y ñamay'adøtstøø pøn jaty ja Jesús yja' pyaduujnidip. Jøts ja' midi tkajpxtip ja griego ayuujk, ja' idø'øn ojts y'øø'mbinaxwa'akti jøts tni'øøniði ja myigu'uk pøn tkajpxtip ja israelit ayuujk, ja'agøjxp idø'øn ja y'øøniði ku ja kyu'øktyø'øxy ja kyayik'ejxti yikxon, ku ja jii'kxy jabom jabom yjawa'kxy. ² Ja' idø'øn ja ñi'øøndip, winets ja nimakmajtskpi jaa'y pøn tkudanaadyip ja nwindson'ajtim Jesucristo, ja' ojts niduki'iyi tñankñamyukiyyidi ja Dios yjaa'y, jøts ja tnimaadyøø:

—Ka'ap jade'en y'øyi ku øøts ja jii'kxy nyikwa'kxt, jøts øøts ja Dios y'øgyajpxy y'ømyadya'aky nga'atskajpxwa'kxít, çti juuni øøts ja n'atstuñ?

³ Migu'uktøjkti, paty øøts yikxon ndyimñigajpxy, ixã'adi niwixujk jaa'y, nay jaayi dø'øn kø'øm mnawyi'ejxidit, ja' idø'øn m'ixã'adip pøn windsø'øgi'ejtíp, pøn ja'-

gyukidip, jøts pøn ja Espíritu Santo tmøøt'ajttip, ja'ats yø tunk mdaguwanidip jøts ja jii'kxy ja jade'en tyik-wa'kxtit. ⁴ Øøts dios'ajot'ajtwamp øøts, njaakty-imdyuk'ixpøjkwampy øøts jaa'y ja Dios y'øgyajpxy y'ømyadya'aky.

⁵ Xjats niduki'iyi ñagyajpxkyupøjkidøø, winets ja Esteban yikpiktaajky yikjii'kxwya'kxpi, ja jaa'y pøn idø'øn ja Dios møk tjanch'ajot'ajtp, pøn tmøøt'ajtp ja Espíritu Santo. Ja'ats idø'øn jade'en yikwiwejtstøø møøt ja Felipe, møøt ja Prócoro, møøt ja Nicanor, møøt ja Timón, møøt ja Parmenas, jøts møøt ja Nicolás pøn tsoo'mp jam Antioquía, ja' midi wyinaty jekyip tø t'ukpabiky ja israelit jaa'y chinaa'yindi. ⁶ Xjats ja jam wyinaty tø tyik-mendi ma ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adijch, may'adøtsp idø'øn jade'en ja Dios yjaa'y jam Jerusalén, kø'ømbaæt ja teetyøjkti tjanchja'wiñidi, kø'ømbaæt ja t'ajot'ajtnidi ja nwindson'ajtim Jesucristo.

Ku ja Esteban yiktsumnaø

⁸ Jamts idø'øn ja jaa'y wyinaty tu'uk midi txøøw'ajtp Esteban, ja' idø'øn ja Dios myøk'ajtin amuum myøøt'ajtpy, Dios idø'øn ja kyunuu'kxin nayide'en amuum myøøt'ajtpy, jøts ja jade'en ttuun ja myilagri Dios myøk'ajtingøjxp jam mayjaa'y agujkp. ⁹ Nay jamts idø'øn ja jaa'y wyinatymidi winaaagin, pøn xuminøjktip ma tsaptøjk jam yikxødijy Esclavos Libertados. Jam wyinaty ja'adi midi tsoo'ndip Cirenit etjopt, jøts Alejandriit etjopt, jøts Ciliciit etjopt, møøt Asiit etjopt. Ja'ats idø'øn tniðidø'øktøø ja Esteban, jøts ja jade'en xe ya ñadyamigajpxniðøjkidøø; ¹⁰ jøts nigidi dø'øn ja tmi-danaadyøø sã ja Esteban ojts wya'añ, kumi wijy'ajtin ja yiktumpy, jøts nayi Espíritu Santo ja pudøjkijyp. ¹¹ Xjats ja mayjaa'y winaaagin tmijuudyøø ja myigu'uk, jøts idø'øn ja wya'andit jøts ku ja Esteban wyinaty tø tka'ødyijy ja Moisés jøts ja Dios. ¹² Xjats idø'øn ja jade'en jotkøjpxim tuk'ejxpina'axwa'akti ja myigu'uk, ni-duki'iyi ja møjaa'dyøjkti møøt ja kajpxwejpitøjkti; jøts ja t'adinaadyujktøø ja Esteban, xjats idø'øn ja jade'en tmajtstøø jøts ja tyiknøjktøø jam møj kutujktaajkjotp.

¹³ Nay ojts idø'øn ja tpiakta'midi ja testigi pøn tni-daa'y'ajtp ja Esteban, yide'en ja wyandøø:

—Yã'at jaa'y nijuuni yø tkamajtstu'uty ja kya'øy'ajtin, xumi jade'en yø tpagajpxy tpaxi'iky yø tsaptøjk, nayide'en yø ttuun ja Moisés kyutujk. ¹⁴ Ti yø jade'en ñadyijyi, pø tøts øøts yø jade'en kø'øm ndyimyadøy ku yø jade'en wya'añ, jøts ku Jesús (ja Nazaretit jaa'y) tyikudigø'øty yø tsaptøjk møøt yø tsinaa'yin midi ja Moisés yiktaan.

¹⁵ Exam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

Ku ja Esteban kø'øm yjanagyugajpxøø

7 Winets ja teetywindsøn ttiðbyjky ja Esteban, yide'en ja tnimaay:

—Janch jade'en mets tø m'adi'ich?

² Xjats ja yøn'ampy t'adsøoy, jøts ja wyaāñ:

—Mee migu'uktøjkti winø'on myikteedyidi myik-taāgidi, madowdi waani. Ku adøm n'apteety'amøj Abraham jap chinaay mā et txøwi Mesopotamia, jøts ka'anīm ja wyinaty ñijkxy tsinaabyi jam mā et txøw'ajtmī Harán. Xjats ja Dios Teety pøn janch wā'ats janch møj ojts ñanky'ijxyiyi, ³ jøts ja Abraham yiknimaay: "Majtstu'ut yø mdsinaadyaāj jøts nayide'en ja mmigu'uktøjkti, jøts mnøjkxt jam mā ja tsinaadyaāj n'atstuk'ext." ⁴ Xjats ja Abraham choo'ndøø jam chinaadyaāj jøtpōti mā txøw'aty Caldea, jøts ñøjkxtøø tsinaabyi jam Harán. Xjats ja ty-eety jam y'oo'knā, winets ja Dios Teety twaādsøoy ja Abraham mā ixyām ndsinaā'yindi. ⁵ Jøts ku ja jade'en yjā'aty niwinø'onin ja ñāajx ja kyayikmøoy, nugo ja chī-naay; jøts nay ja Dios Teety kø'øm tyikutujk jøts yik-mo'otnim ja ñāajx mā chøñidit ja y'u'nk ja y'unā'jk øy ja Abraham wyinaty yjā'øky; ka'anīm ja y'u'nk te ku ja Dios jade'en wyāndaājky. ⁶ Jøts nayide'en ja Dios Teety tjaāknimaay ja Abraham, jøts ku ja y'u'nk y'unā'jkti, y'apti y'okti ñøjkxtit tsinaabyi abikyajp, jøts jap jaa'y ja yjanchyiktunidit ejxim jiyujkin. Ku ja jap yjā'attit, winets ja jaa'y kyayik'ødyunidit maktaxk magø'pxy jumøjt. ⁷ Xjats ja Dios nayide'en wyaāñ: "Øts ndiidyu'ump ja jaa'y pøn mga'ødyunidip, pøn myik-tunidip jiyujkin, jøts ngajxpidsø'ømdit kyø'ømnaājotpti, jøts ø xwindsø'øgidit nay ya." ⁸ Jøts nay yø Dios Teety møøt ja Abraham tkajpxy'ajty sā jaty ja ejxpajt ja ejxā'an ku ja yikmo'odit ja naajx. Jøts tpiktaājkyøø sā mutsk mixyu'nk yiktu'undit ku kya'axtit. Paty idø'on ku ja Abraham y'u'nk kyaxi'jky midi txøw'ajt Isaac, winets jade'en ttundi sā tkajpxy'ajttøø jøts ja ejxā'an tpiktaājki ñe'kxkøjxp, kyiduktuujk xøow ja jade'en ttuūñ. Nayide'en ja Isaac ttuūñ ja y'u'nk midi txøw'ajt Jacob, jøts nayide'en ttuūñ ja Jacob ja y'u'nk y'unā'jkti nimak-majtsk pøn y'apteety'ajttøø ja Israelit jaa'y.

⁹ Yā'at Jacob y'u'nk y'unā'jkti midi adøm n'apteety'ajttindøø, myi'ajkidip ja y'uch José ja'adi, paty ja ojts tto'o'knidi jøts tyiknøjkxtøø jam Egiptit jaa'y y'etjotp. Jøts ja José, ka'ap ja Dios myajtstu'udyi nijuni. ¹⁰ Nay yø Dios pudøjkiyip ku y'ayo'ombāaty. Jøts nay ja' ja møjyiyip ja wijy'ajtin, ja'agøjxp chojkiyøø ja Faraón midi møj windsøn'ajtp jam Egipto. Nay ja' tpik-taājky ja José gobernador jøts ja yikutukt jap kutujk-taājkyøtpy, jøts nayide'en jap Faraón tyøjkjøtpy.

¹¹ Winets ja yuu myiñ jøts janch may ayo'on pyajtidøø jam Egipto etjotp jøts nayide'en jam Canaán, paty adøm n'apteety'amøjti ka'ap tpaattøø ti yjø'kx-tip. ¹² Xjats ku ja Jacob tñija'wøø jøts ku jap Egipto y'ity ariin, winets jap tkejxy ja y'u'nk y'unā'jkti pømbi adøm n'apteety'ajtyindip. Jade'en ojts y'otsti mijawyeen.

¹³ Ku myimajtsk ojk ñøjkxtøø, winets ja José kø'øm ñanky'ejxyøø, jøts jade'en ja Faraón tñija'wøø kudam ñamyigu'uk'atyidi. ¹⁴ Xjats ja José twaādsøoy ja tyeety jøts niduki'iyi ja myigu'uktøjkti, nidugui'pxy myakmoxk niduki'iyi y'ejttoø. ¹⁵ Jade'en ja Jacob yjā'jty ku yikwāad-søoy tsinaabyi jap Egipto. Jap y'oo'knā møøt adøm

n'apteety'amøjti. ¹⁶ Xjats ku jam y'oo'ktøø, winets jam tyiknøjkxtøø Siquem y'etjotp mā ja Abraham jam wyi-naty ja jut tø tjuy, midi ja Hamor y'u'nk tyooktøø.

¹⁷ Xjats ku ja Israelit jaa'y myayiñidi jam Egipto ñāxjotp, winets ja Dios ja wyānda'aky y'adukwani midi wyāndaājky Abraham køjxp. ¹⁸ Winets ja Egiptit jaa'y tpiktaktøø tu'uk ja møj windsøn, pøn tkanija'wip pøni sā ja José wyinaty tø y'atswindsøn'aty. ¹⁹ Ja'ats idø'on twindaay'ajt adøm nmigugajpti jøts tjemduūñ tteduūñ adøm n'apteety'amøjti, yide'en idø'on ttuūñ jøts ku aguwanikøjxp ttukmajtstu'uty ja teety ja taakti ja myaxu'nkti jøts y'ooktit. ²⁰ Ja'abi xøow ja'abi jumøjt idø'on ja maxu'nk kye'jxy midi txøw'ajt Moisés, jøts janch tsojki ja Dios ja'. Xjats ja Moisés ja tyeety tyaāk yikya'jkiyøø tigøøk po'. ²¹ Winets yikmajtstutnaā kuwani, xjats nay yø Faraón ñøøx ojts tpaaty, jøts tyikye'jky ejxim ja kyø'øm'u'ngin. ²² Xjats ja Moisés jap wyijy kyejy y'ixpijky, jøts midi ja Egiptit jaa'y yjajtip, nay jap ja Moisés yikta'awaan. Ku ja jade'en y'ixpijky, kajpxwā'kx ja janch øy janch tsuj, jøts yjanchtumpy idø'on ja kø'øm jade'en.

²³ Xjats ku ja Moisés wyinaty ja jyumøjt wixijky, winets ja t'atspaatwā'añ ja myigugajp ja israelit jaa'y. ²⁴ Winets jap ojts t'ejxpaaty ja myigu'uk ku ja jap wyi-naty ja egiptit jaa'y yjemduñi tyeduñi. Winets ja Moisés ja myigu'uk t'ayo'ijxy jøts tñigubøjky, paty ja tyik'ø'jky ja' egiptit jaa'y. ²⁵ Kumi jade'en ja yjawinmay jøts ku ja myigu'uktøjk tñijawidit, jøts ku ja Dios myo'owa'añidi ja awā'ats'ajtin, jøts nagyø'øm ja twindsøn'attit; jøts ja myigu'uk ka'ap ja tñija'widøø. ²⁶ Xjats kyimjabom'ajty, winets ja Moisés tpaaty ja myigu'uk namajtsk, nache'jkidip tam ja wyinaty, xjats ja Moisés wyinmaay jøts ñamyiyuy'atidit, jøts tñimaay: "¿Tiku jade'en mnayjemduñidi mnadyeduñidi, kidi mdukjaa'yip meets?" ²⁷ Xjats ja' midi ja myigu'uk wyinaty tjemdumpp ttedump jøts ja Moisés yiknajtsteymyā, jøts ñi-maajyøø: "¿Pøn mets tø mbikta'agy yikutujkpi jøts øø x'ana'amt?" ²⁸ ¿Xyik'ookwamp øts nayide'en sam ja xyik'ø'jky ja' egiptit jaa'y uxøø?" ²⁹ Xjats ku ja Moisés jade'en tmadøoy ja ayuujk, winets jaty kyeejky ku yiknimaay jøts ku uxøø wyinaty ja jaa'y tø tyik'ø'øky, winets ñijkxy jap tsinaabyi mā et jap txøwi Madián. Japts chinaay samī ja'atjaa'y, winets jap ja y'u'nk tpaajty namajtsk tum mixy.

³⁰ Tø ja wyinaty chinaañi wixijky jumøjt, winets ñijkxy widejtpi jam tø'øts etjotp, wingon et mā kojpk jam midi txøw'ajtp Sinaí, xjats jam t'ejxpaajty tu'uk ja ankilīs jam jønjotp midi ujtsummgøjxp tøøpy. ³¹ Xjats ja Moisés ñigyumaap tja'wiyi'ñ ku ja jøon t'ejxpaajty, jøts ku tjaākwingunøjkxøø wingon, winets tmadøoy ja Dios Teety y'ayuujk ku ja wya'āñ: ³² "Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob." Xjats ja Moisés chø'øgidyøjkiñā, jøts ka' y'uknadya'a'ejxiniyøø jøts twin'ext. ³³ Winets ja Dios Teety ñimaajyiyøø: "¿Tiku yø mgø'øk xkajeñ, kumi tø øts yø nwi'ixy yā'at et?"

³⁴ Kø'øm øts tø n'ixy ja njaa'y ku jam y'ayo'ombāatti Egipto, tø øts nayide'en nmadøoy sā yjø'ødi sā yā'axti,

sā yjatti sā kyubatti, ja' tō nniimiñ jōts nyik'awā'atšpid-sō'ōmdit. Madā'āk, jōts jam mnōjkxt Egipto."

³⁵ Ōy ja Moisés wyinaty tō yjayiknōjmi jōts ku ja ka' wyindsōn'att, jōts ku ja ka' tyiidyu'unt, Diosts ja kō'ōm kajxiyi jōts ja tyik'awā'atšpidsō'ōmt, jōts nayide'en tniwindsōn'att ja myigu'uktōjk, ja'agōjxp ku ja ānkilis jam tyukmadoji ujts ximumgyōjxp jōšōn aguījkp. ³⁶ Nay yō Moisés idō'ōn tyikpidsō'ōm adōm n'āpteety'amōjti jam Egipto, jōts nayide'en yjanchtuun ja milagri jōts ja Dios myōk'ajtin tyiktuujnōš, jade'en ttuūñ jam Egipto, jōts nayide'en mā ja Tsajpts Mejy, jōts jam tō'ōts etjotp, winet ku jam jade'en chinaay wixijky jumōjt. ³⁷ Nay yō Moisés idō'ōn tniimaay ja israelit jaa'y: "Myik-tanigaxtip ja Dios Teety ja kyugajpxy tu'uk, nayide'en idō'ōn ja mye'ent sam ōts ja jawyeen tō xkejxyin, jōts nay adōm idō'ōn ja nniigu'uk ja'. Ja'ats idō'ōn mbadu'unindip." ³⁸ Nay yō Moisés idō'ōn kyudanaay ja yjāy jam tō'ōts etjotp mā ja kojpk txōōwi Sinaí, ku ja ānkilis myōōjyōš ja ōgyajpxy ja ōy'ayuujk midī ndaju-jky'ajtindip; jōts adōm ja nayide'en nniija'wint.

³⁹ Xjats adōm n'āpteety'amōjti ka' tpadundōš pōni midī ja Moisés yjanāntyunwājnip, jam ja ne'egi jādī-gojk ñōjkxwā'andi nay jam Egipto, jōts ja Moisés jade'en yikmajtstu'utwā'āñ. ⁴⁰ Winets tniimaadyōš ja Aaron: "Yikojk ōōts nwenkdiošti jōts ōōts ja' xu-u'wā'at, kumi ka'ap ōōts nniijawi pōni sā ja Moisés yjaty ku ōōts nichōky'ampy xyikpidsiimy Egipto." ⁴¹ Xjats tyik'a'ōyīñaxti ja lōjch, jōts tyik'oo'kti namay ja jiyujk, ja' idō'ōn tyamiyoxtip tyawindsō'jkidip ja lōjch awānax, winets ja' ttaxondāktōš midī kō'ōm yik'ōyidōš. ⁴² Xjats ja Dios Teety myajtstuuftidōš jōts ja wyāāñ, wan yō wenk dios yja' tpaduujnidi, wan tmaād-sā'ji wan ttiī'ji. Yide'en idō'ōn ja Dios Teety kyugajpxy jap ñōkyōtpty tjaadyandi:

Ku meets jam mduu'yō'ōy tō'ōts etjotp wixijky jumōjt,

¿myik'o'jkk meets ja jiyujk may'ampy ōts nwind-sō'jkingōjxp?

⁴³ Pō ka'axi yjade'enī, pō jinaxyi meets ja wenk dios yja' ixyam xpaduujniyi, ku ja dios Moloc mōōt ja tyōjk xkiwiyidejtyidi ja tō'ōts naxjotp.

Nayide'en jadu'uk ja wenk dios Renfán myāadsā' xpaduujnidi ja yja',

yide'en idō'ōn ja kō'ōm xyik'ōyidōš jōts xwind-sō'jkidōš.

Ja'agōjxp meets ngajxpidsōmwāanidi jōts jam mnōjkxtit Babilonia jixkō'ōm, jamts nayide'en m'ay-o'ombāattit.

Yā'at idō'ōn ja Dios ja kyugajpxy tyukjaay, xjats ja Esteban yjākwāāñ:

⁴⁴ Nayide'en jam tō'ōts etjotp ja n'āpteety'amōjti tmōōt'ajttōš ja wetōjk tu'uk mā tpōkjō'ōkti ja kyutujkti, tsāgōjxp idō'ōn ja yjā'ayi, Dios idō'ōn ojts tyuk'ijxyi ja Moisés sudso wetōjk y'ōyit. ⁴⁵ Xjats ku ja tiempi ñājxy jeky jumōjt, winets ja mōjāā'dyōjkti tkōyajknidōš ja wetōjk mōōt ja wyindsōn Josué. Winets ja myidsep tmimajadāktōš pōn jaty ja wyinaty tsinaadyip, kumi kō'ōm ja Dios ja kyexyidi jōts ja chinaadyajk ja yik-

mo'odit. Nay ja wetōjk wyinaty yiktundip ku ja David yikutujky. ⁴⁶ Jōts ja Dios ja ojts y'a'ejxiyi, paty ja tu'uk tkōjwā'āñ ja tsaptōjk mā ja chōōnit ja Dios Teety pōn ja Jacob ojts Dios'ajtmī; ⁴⁷ jōts ni ka'abyim ja tkōjy ja tsap-tōjk; winets ku ja Salomón tyōki windsōn, ja'anims tkōj ja tsaptōjk. ⁴⁸ Jōts ōyim ja Dios jap kyidyimchōōni kuwāni jap tsaptōjkjōtpty midī ja jaa'y yik'ōyidip, kumi yide'en ja Dios ja y'ayuujk ttukmiyō'ōy ja kyugajpxy ku ja yide'en wyā'āñ:

⁴⁹ Tsajpjōtpty ō ndsōōni, jōts nayide'en naxwiīñ.

¿Ti ndōjk meets idō'ōn myik'ōyip, jōts ti tsinaadyāajk meets idō'ōn xmo'owamp?

⁵⁰ ¿Kidi ōtsip jade'en tuki'iyi tō nyik'ōyi?

⁵¹ Xjats ja Esteban tjaakniimaay yide'en ja myigu'ukti: —Meetsxi mgamadoop mgajā'gyujkidip, jōts nijuuni meets ja Espiritu Santo xkagupōjkti. Jade'en mee nugo mjanch'ity sami n'āpteety'amōjti. ⁵² Ja'axi tjemdundip ttedundip ja Dios Teety kyugajpxy, jōts tyik'oo'ktōš pōmbi yjōpja'widip ku ja myenwā'āñ ja yiknitsokpi, pōn janch ōy janch wā'ats. Ixyamts ja yiknitsokpi yjanchmiīñ, pō meetsxi ja mgōyājk jōts ja jaa'y yik'ōogyit. ⁵³ Pō tōxi meets ja ānkilis ja Dios kyutujk mjamō'ōyi jōts nika'ap ja xpadundi.

Ku ja Esteban y'ō'jky

⁵⁴ Xjats ku jade'en yikniimaadyōš ja windsōndōjkti, winets yikxon tjanchtyimyī'ambōjktōš ja Esteban.

⁵⁵ Kumi ja Espiritu Santo ja Esteban yjanchmōōt'ajtpy, winets ja chajp'ijxy jōts t'ejxpaajty ja tsuj'ajtin ja ōy'ajtin mā ja Dios Teety, jōts nayide'en t'ijxy ku ja Jesús jam tyani Dios Teety agā'ngyōjō'ōm. ⁵⁶ Xjats tni-maay pōn yik'ookwājnyidip:

—Uk'ejxti! Awā'ats ōts yō tsajp ō n'ixy, jōts nayide'en n'ejxpaaty ja Cristo tyani Dios Teety agā'ngyō'ampy.

⁵⁷ Xjats ja jaa'dyi ka'ap ja tmadowdi, y'amātstip ja tyātsk ja', niyaxni niyjokni dō'ōn tñibidōktōš jōts tmāt-stōš. ⁵⁸ Jōts tyikpidsōmdōš aguwanikōjxp jap kajpjōt-pty; winets ja ni'ōō'nibidi jawyeen ja chabixy tjandōš jōts ja ttuk'ejx'etti ja mixy Saulo, xjats idō'ōn jaty twikā'tsnibōjkidōš ja Esteban. ⁵⁹ Yikā'tsp wyinaty ja Esteban, jōts ja chapkajpxy jōts ja wyāāñ:

—Nwindsōn'ajtim Jesús, mets ndagōdōjkip ō n'anmi-ja'win.

⁶⁰ Xjats ku jade'en wyāāñ winets ñagyuxendyaajkiyōš jōts mōk wyāāñ:

—Kidi xukpōky'aty nmigu'uktōjkti yō n'o'jkin.

Kuts wyāanguijxy jade'en, winets y'oo'knāā.

Ku ja Saulo tjemduuñ tteduuñ ja Jesús yjanchja'wibidi

8 Jōts ja mixy Saulo yjotkujk'ajty ku ja tyik'oo'ktōš ja Esteban. Xjats nay ja'abi xōōw, winets ja tsep cho'ondaajky mōōt ja' pōn ja Jesús yjanchja'widip jam Jerusalén. Paty yide'en niduki'iyi cho'onjōknidōš pōn ja tsep tkawāndip, jōts jam ñōjkxti nay Judeit kajp win-gon, jōts nayide'en Samaria y'etjotpti. May idō'ōn choo'nidōš, ja'ayi dō'ōn tādōš ja Jesús kyudanaabyi

pøn nımakmajtskjaa'y'ajttip. ² Xjats winaagin jaa'y pøn ja Dios kyajpxy tpadundip, ja' tyiknajxøjkidøø ja Esteban jøts nayide'en tjanchpaya'axti. ³ Xjats ja Saulo txumika'odyuñ ja myigu'uk pøn ja Jesús yjanchja'widip, jøts t'ixaañibøjkøø tøj k tøj k. Kuts ja tpaajty, jøts ja t'ixjidøjtidsimy tyøjkjøtpy wan tjayaa'yi wan tjatø'oxyi, jøts ja tyikpuxøjktøki.

Ku ja øgyajpxy ja ømyadya'aky ojts yikajpxwa'kxy jam Samariit etjotp

⁴ Xjats niduki'iyi midi tsoo'nidøø Jerusalén jøts ja ñøjkxtøø omagajp, ja'ats ja Dios kyajpxy tkajpxwa'kxidøø midi anmija'win tyiknitso'ok'ajtp. ⁵ Xjats ja nidu'ukti, pøn txøøw'ajt Felipe, ja'ats nøjk abikyajp jam Samariit y'etjotp, winets ja jam tkajpxwa'kxy sa yjajty sa kyubejty ja Jesús. ⁶ Winets ja jaa'y yjanchñamyujkidøø namay, jøts ja tjanchpatmadowdi sa wyaañ sa kyajpxy ja Felipe, jøts ku nayide'en milagri ttuun. ⁷ Winets tyikpidsiimy ja mamyiku' midi ja jaa'y wyinaty tø tyatøkiyidi, jøts møk idø'on ja tjanchmiyaahti ku pyidsømdøø ja miku'; nay ja' tyiktsoojk may ja køxujpxi pakxujpxidi, jøts nayide'en tyiktsoojk ja pakma'at jaa'dyi. ⁸ Paty idø'on yjanchjotkujk'ajttøø ja jamit jaa'y.

⁹ Jøts nay jamts idø'on ja yaa'dyøjk tu'uk y'ijty pøn txøøw'ajtp Simón, ja'ats jam yik'adujk jøts nayide'en xyimay, ja'agøjpx idø'on ja tjanchmøjawidi ku ja jade'en ñamyøjpikta'agyi ja Simón. ¹⁰ Xjats ja niduki'iyi ja møj ja mutskti tpatmadowdi pøni sa jaty ja Simón wyaañ. Winets wyandøø jøts ku tjanchmyøødi ja Dios myøk'ajtin.

¹¹ Jøts tpaduujnidøø ja yja' ku ja xyimay jøts ku ja yik'aduky, may jumøjt idø'on ja wyin'øø'nidøø. ¹² Xjats ku ja Felipe tñigajpxkijxy ja øgyajpxy ja ømyadya'aky pøni sa yjajty kyubejty ja Jesús, jøts ku ja tñigajpxy ja Dios kyutujk midi ja yjaa'y ja tyanitanaapy, winets ja yikpabøjknaa, xjats ja yaa'y ja tø'oxy ñøbajttøø.

¹³ Nayide'en ja Simón tpaabøjknimaa, jøts ja ñøbajttmaa, jøts ja tjamyøøt'ajty ja Felipe, winets ja ñigyumaa tjanchnja'wøø ku ja Felipe tjanchpikta'aky ja milagri, jøts ja Dios myøk'ajtin tyikwingaxi'iky.

¹⁴ Xjats ku ja Jesús kyudanaabyi pøn jam jaaktaandøø Jerusalén tñija'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jøts ku ja tpadu'undit, winets ja yjaa'kyikajxtøø ja Pedro møøt ja Juan. ¹⁵ Jøts ku jam yja'ttøø, winets tku'amidowdi ja Samariit jaa'y midi tpadundip ja Jesús yja' jøts tyatøkiyidi ja Espiritu Santo. ¹⁶ Ka'anım wyinaty ja Espiritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjpx. ¹⁷ Xjats ku ja tkønixajttøø ja jamit jaa'dyi, winets ja tyatøjkiyidøø ja Espiritu Santo.

¹⁸ Ku ja Simón tjanch'ijxy ku ja Jesús kyudanaabyi ja Espiritu Santo ttuktatøki ja jaa'dyi, winets ja juy t'amidøøy, ¹⁹ jøts tñimaay:

—Tiku meets xkadamidøøky yø Dios myøk'ajtin midi mee mmiwidijtpy, jøts ø nayide'en øy pøn ngønixajt, jøts nayide'en nduktatøkit ja Espiritu Santo.

²⁰ Xjats ja Pedro tñimaay:

—Pøni jap ja meeñ xmøødi, wan ja møøt mgudigøy, jade'enxi mets yjawi mwinmay jøts yø yiktøøky midi ja Dios yajkpy. ²¹ Ka'ats mets yø mbaat'atyiyi ya'at midi øø nmiwidijtpy, ka' mets mwinmaa'ñ y'øyi pyaadi Dios wyingujky. ²² Majtstu'ut yø mga'øwyinmaa'ñ, minuu'kxa'ak ja Dios pøni maa'kxujkiyip midi tø xwinmay m'am mjotp. ²³ N'ijxpy øts yjawi ku ka'øwyinmaa'ñ xmøødi, yø'øts myikjem'adøøjtsip myikte'adøøjtsip.

²⁴ Xjats ja Simón y'adsøøy:

—Ku'ajot'ajtik meets, jøts øts ja nbøky ngagu'ay-o'ombaadi.

²⁵ Xjats ku ja Juan møøt ja Pedro tñigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magyajpjotp nay ja Samariit y'etjotp, yide'en ja wyandøø sudso'ampy yø anmija'win ñitso'ok'aty, winets wyimbejtnidøø nay jam Jerusalén.

Ku ja Felipe møøt nabaajtiyøø ja Etiopiit jaa'y

²⁶ Xjats ku ja jade'en wyimbejtnidøø, jøts ja nwindson'ajtim y'ankilis ojts ja Felipe myigajpxyiyi, jøts ñimaajiyøø:

—Pidø'øk mets jøts mnøjkxt abatø'øm'ampy, ja tuu' midi naxp Jerusalén jøts nayide'en Gaza.

Jade'en idø'on ja ankilis ñimaajiyøø ja Felipe. Ja'abi tuu' idø'on naxp tø'øts etjotp ma ka'apøn chøøni.

²⁷ Xjats ja pyidi'jky jøts ja chøø'ñ; winets tpaajty jam tuu' am tu'uk ja Etiopiit jaa'y, pøn ja Dios Teety jap t'atswindsø'jkp Jerusalén. Ja jaa'y isaabiky ja', jøts møj yikutujkpi ja', jøts nayide'en t'eix'ejtmiyøø ja myeeñ ja tø'oxy pøn jam møj windsøn'ajtp Etiopía, Candace ja xyøøw ja tø'oxy. ²⁸ Kyajpkøjpx idø'on ja wyinaty wyimbejtni kyarretijøtpy, jøts jade'en tuktuu' tkajpx'adi'ich ja Isaías ñøky pøn ja Dios kyugajpxy'ajt. ²⁹ Winets ja Espiritu Santo myigajpxiyøø ja Felipe, jøts ja ñimaajiyøø:

—Wingonjawi puwa'agi yø karreti.

³⁰ Xjats ku ja wingon tpuwa'jki, jøts tmadøy ku ja ñøkyajpxy, jøts ja tyiktiy ja Felipe:

—¿Mnimadøøpy idø'on midi ixja mgajpxpy?

³¹ Xjats ja wyaañ ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpy jøts tmøøtsøøni. ³² Midi ja Etiopiit jaa'y wyinaty kyajpxy, ya'at idø'on ja':

Ku jaa'y yik'o'jkøø kyupiky'ajt ja', jade'en ja y'ijty kidim ja borreegi maxu'nk y'øøky;

ka'ap ja sa wyaañ, uum ja' jade'en ejxim borreegi ku yikeepy.

³³ Jade'en idø'on ja jaa'y yik'ayoojiyøø, jøts nika' kø'øm ñanky'ayowiyit;

ku ja jade'en yiktuñ, ¿pøn ja kugajpxiyip?

Tø dø'on jabaat kyixy ja chinaa'yin ya naxwiiñ.

Yide'en idø'on jap yja'ayi midi ja Etiopiit jaa'y kyajpxpy.

³⁴ Xjats ja jaa'y yiktøøjøø ja Felipe:

—Tun ja may'ajt, ñigajpx waani, ¿pøn idø'on yø jade'en ñimadyakpy, kø'ømyi yø jade'en ñañimadya'agi, uk wenkpi dø'on yø ñimadyakpy?

³⁵ Xjats ja Felipe ttuk'ixpøjknibøjkøø sã yjajty sã kyubejty ja Jesús. ³⁶ Xjats ku ja jade'en yø'ødyi, winets ja møj nøø tpaattøø, jøts ja Etiopiit jaa'y wyaañ:

—Ixats ja nøø yjawí, ¿ti kidi ndejint y'øyit ku nnøbatt?

³⁷ Xjats ja Felipe t'adsøø:

—Pøni mjanchja'wip ja Jesús tu'uk amumjoojt, o me nyiknøbatt.

Winets ja t'adsojimbijty:

—Njanchja'wip øts ku ja Jesucristo yjanch'u'nk'atyí ja Dios Teety.

³⁸ Xjats ku ja jade'en wyaañ jøts ja karreti tyik-wa'k'øydøø; winets ñøjkxtøø jam møj nøøjotp, jamts ñøbejty ja Etiopiit jaa'y. ³⁹ Kuts jam pyidsømdøø møj nøøjotp, jøts ja Espiritu Santo yiknøjkxøø abiky et ja Felipe, jøts ja Etiopiit jaa'y nika'ap ja t'uk'ejnãã; jøts ja tyuu' tnøjkxnãã jotkujk. ⁴⁰ Jøts ja Felipe jap yjã'aty mã kajp jap txøøwi Azoto. Kajp kajp idø'on ja tkajpxwa'kxwidity sã dø'on ja anmija'win ñitso'ok'att. Xjats ojts jap yjã'tni mã kajp jap txøøwi Cesarea.

Ku ja Saulo tyiktigajch ja chinaa'yin

9 Xjats ku ja jade'en, jødsyim ja Saulo tkidyimy-ja'dyigøø ja o'jkin, kuwani tyimdyanekwa'añ ja' pøn yjanchja'widip ja Jesús yja'. Paty ojts tninijky ja teetywindsøn, ² jøts t'ats'amido'ot ja nøky ja tiy'ajtin. Ja'ats ja myinøjkxp jøts ja ttuk'ext ja teetyi pøn jam ttundip tsaptøjkjotp mã txøøwi Damasco, winets ja t'ixã'at pøni pøn ja Jesús yja' pyaduujnidip, jøts jam ja tyiknøjkxt kø'tsumy Jerusalén, wan tjayaa'yi wan tjatø'øxyi. ³ Kuts jam yjã'atwaañi Damasco, winets ojts jotmøñ ja jaj ñawidityi midi kidãkp tsajpjøtpy, janch tsamamp ja jaj. ⁴ Winets ja Saulo kyidaaay, jøts tmadøøø ja ayuujk ku ja yide'en wyã'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiy:

—¿Mbønimts me teety idø'on?

Jøts ja y'adsojøø:

—Øts idø'on Jesús, nay yø' midi mjemdumpy mde-dumpy. Kø'øm me mnay'ayo'onduñyi jade'en kidi tsakaã ku ja ti tnepy, jøts ja kø'øm kujp ñadyukyø'ødyiyi.

⁶ Xjats ja Saulo yjanchmiøbjøjknaã ku jade'en yiknøjmi, jøts wyaañ:

—¿Timts me teety xamidsokp, ti ø ndu'ump?

Winets ja nwindson'ajtim ñimaajyøø:

—Pidø'øk jøts jam mnøjkxt kajpjotp, jamts myiktuk-mado'ot pøni ti mdu'ump.

⁷ Xjats ja Saulo yjamyøøt nayide'en yjanchø'jkidøø ku ja Saulo y'ayuujk ja jade'en tmadojidi, jøts ka'ap ja t'e-jxtøø pøni pøn ja myigajpxpy. ⁸ Winets jatyi ja Saulo pyidi'jky, jøts ku ja yjawn'ejxwa'kxy, ka'ap ja ti t'ej-paaty. Winets ja myigu'uk y'ukwejtsniydøø, jøts ja yiknøjkxi Damasco. ⁹ Jamts chinaaay tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'on tu'uk chinaamyi yãa'dyøjk pøn tjanch-ja'wip ja Jesús, Ananías, idø'on ja xyøøw, winets ja nwindson'ajtim ojts tninijky ja Ananías, jøts ja tni-maaay:

—iMets Ananías!

Xjats ja Ananías t'adsøø:

—¿Ti, teety?

¹¹ Xjats nay jatyi ñimaajyøø:

—Pidø'øk jøts mnøjkxt mã ja tuu' yiktijy Tiidyuu', jøts ku jam mjã'att Judas tyøjkwindum, jamts xyiknidøøwit ja Tarsit jaa'y midi txøøw'ajt Saulo. Dios'ajot'ajtp inet ja jam, ¹² jøts tø ja nayide'en tñijawi agumaa'gyøjxp, ku me mnøjkxt jøts ja wyin'ejxwa'kxkojmit wã'ats ku xkønixajt.

¹³ Kuts ja jade'en tmadøøø ja Ananías, jøts ja wyaañ:

—Janch namay, teety, idø'on ja jaa'y tø xukmadowdi ku yø Saulo tjanchjemduñ tjanchteduñ ja' pøn mets mjanchja'wiyip jam Jerusalén. ¹⁴ Ixyamts ja tø tmiija'aty nay ya ja tiy'ajtin, midi ja teetywindsøn ja ojts t'amidøø jøts ja tyiktsoont midi me mbaduujniyip.

¹⁵ Winets ja nwindson'ajtim wyaañ:

—Nøjkx x'ats'ixy ja Saulo, tø øts ja nwi'ixy, nyiktun-wampy øts ja', abikyajp øts ja ngaxwa'añ. Japts øts x'atsniøgajpxt x'atsnimadya'akt, jøts ja ttukmado'ot ja jamit jaa'dyi møøt ja' wyindsøndøjkti jøts nayide'en ja yã'at israelit jaa'dyi. ¹⁶ Nduk'exp øts ndukmado'op øts sudso jawyeen tyu'unt, jøts kuwani nayide'en tmi'ay-o'ot øts ngajpxy øts n'ayuujk ku ja jaa'y yjemdunit tye-dunit.

¹⁷ Xjats ja Ananías ojts tninijky ja Saulo. Kuts ja yjã'j-ty, jøts ja ja'ayi ojts tkønixajy jøts yide'en tni-maaay:

—Migu'uk Saulo, øts tø xkexy ja nwindson'ajtim

Jesús, nay ja' midi ojts x'ixy jam tuu'am, ja'ats øts tø xkexy jøts me nyikwin'ejxwa'kxt jadigojk, jøts ja Espiritu Santo nayide'en mdatøjkiniyt.

¹⁸ Xjats jotmøñ kya'ay wyeengøjxp jade'en jajtp ja t'ixy ejximi ajkx jimeeñin, winets wyin'ejxpjiky jadigojk. Xjats ja Saulo pyidøknaã, jøts ojts ñøbety. ¹⁹ Jøts ja jadigojk kyaabyjky, winetnimts ja myøjaaw tpijky, jøts jap yjãaktsinaaay ja majtsk xøøw ja tigøøk xøøw møøt ja' pøn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

²⁰ Xjats ja Saulo tkajpxwa'kxnibøjkøø jam tsap-tøjkjotp, yide'en ja wyaañ ku ja Jesús y'U'nk'atyí ja Dios Teety. ²¹ Xjats ja ñigyumaap tjanchja'widøø pøn jatyi ja jam patmadojiyøø, jøts ja xem yam ñagyajpxidøø, jøts yide'en ñawya'añidøø:

—¿Kidi nay ja jaa'yip yø' midi jam Jerusalén y'ijty tka-maa'kxp ja myigu'uk ku ja tpabøkti ja Jesús? ¿Kidi ja'a-jip yø tø t'uknimiñ jøts tmajtsmukøxt ja Jesús yjanch-ja'wibidi, jøts ttawinguwaaawit ja møj tiidyumbidi?

²² Xjats ja Saulo jinaxy yjãaktyimkyajpxwa'kxy, jøts ja yikxon tyimñigajpxy jøts ku ja Jesús yã tø yjanchyikexy yiknitsokpi, jøts ja israelit jaa'y jadi'iñi myondi y'ookti pøn jatyi jam wyinaty tsinaadyip Damasco, niti kajpxy niti ayuujk ja'adi.

Ku ja Saulo ayu'uch kyeejky

²³ Xjats kyimjekñim ja israelit jaa'y tkajpxy'ajtnidøø jøts ja tyik'ookit ja Saulo; ²⁴ jatyi Saulo ja tñija'wiyiñi.

Winxøow windsuu ja myidsep y'awejx'ityi mā pidsøm-daaik jam, jamts ja tyimyik'oogiyit. ²⁵ Winets ja Saulo ja myigu'uktøjkti pyiktaajkiyøø kachjøtpty jøts ttanikiñaxti ja pøch midi nawidity tukajpaa', jøts nika'ap jam ja pyidsimy mā ja myidsep y'awijxyi, paty idø'on ja kya'ø'jky.

Ku ja Saulo jam yja'jty Jerusalén

²⁶ Xjats ku ja Saulo jam yja'jty Jerusalén, jøts ja tmi-namyukwa'añi pøn ja Jesús tjanchja'widip. Jancht-sø'jkidipts ja', kumi ka'ap ja tjanchjawidi jøts kudam ja Saulo nayide'en tjanchjawi ja Jesús. ²⁷ Paty idø'on ja Bernabé wyajiyøø, jøts ttukwinguwa'jkøø ja Jesús kyu-danaabyidi. Jøts nay ja' ttukmadoow sudso wyinaty tø t'ixy ja Jesús jam tuu'am, jøts nayide'en sa ja myi-gajpxiyøø, jøts nayide'en ja ttukmadøø sja ja ojts jam jotmøk tkajpxwa'kxy ja y'ayuujk Jesús køjxp. ²⁸ Xjats ja Saulo jam jade'en tyaañ Jerusalén, jøts ja møøt wyide-jtni pøn jaty ja Jesús yja' pyadundip. ²⁹ Jøts ja ka' ti tku-mayjawi, jotkujk ja tkajpxwa'kxi ja nwindson'ajtim yja', jøts ja ttamimadya'aky ja israelit jaa'dyi pøn ja griegit ayuujk tkajpxtip; yikxon ja ñadyawingugajpxiyidi ku ja ja xe ja ya tum jade'en kyanagyupijxyiyidi ja wyin-maa'ñ, ja'ats ja israelit jaa'y ñiwinma'ayidip jøts ja tyik'ooktit. ³⁰ Xjats ku ja myigu'uk jade'en tnija'widøø, winets ja yikwaañaa jøts yiknøjkxyøø jam Cesareit kajpjotp, jøts yikejñim jøts ja ñøjkxt kyajpkijxy midi txøøwip Tarso.

³¹ Xjats ja janchja'wibidi pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'ogidi, ejtp ja twindsø'ogidi jøts namay'adøtstip ja nayide'en, ja Espíritu Santo ja amuum pudøjkiyidip.

Ku ja Eneas chøøjky

³² Xjats ku ja Pedro wyinaty t'ayø'ø y mā jaty ja janch-ja'wibi chøønidi, nayide'en ojts t'ixy ja janchja'wibi pøn jam tsinaadyip mā ja kajp txøøwi Lida. ³³ Jamts tu'uk tpaajty ja yaa'dyøjk midi txøøw'ajt Eneas, tyuktujk jumøjtij ja pa'am ja wyinaty tø pyajtniyi, kyidy-impnyidi'iky jøts køxuxyi pakxuxyi pa'am idø'on ja myøøt. ³⁴ Xjats ja Pedro ja tnimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty, ³⁵ xjats niduki'iyi ja jaa'dyi pøn jaty kugajp'ajttip jam Lida jøts jam Sarón kuuyi ja tnija'widøø, winets ja tyikutigøødyi ja møjaa'chinaa'yin midi ja wyinaty chinaadyip, jøts ja nwindson'ajtim yja' tpabøjknidyidøø.

Ku ja Dorcas yujkpyijky jadigojk

³⁶ Nay ja'abi xøøw nay ja'abi jumøjt idø'on chinaay tu'uk ja tø'øxyøjk jam Jopit kajpjotp, Tabita dø'on ja xyøøw, yide'en yiktij griegit ayuujk, Dorcas. Jøts nayi Jesús idø'on ja yjanchja'wimiyip paty ja tjanchpudøki pøn ayoop pøn winmaapy. ³⁷ Winetsik idø'on ja pa'am

pyaajtniyaa jøts ja tyimyik'o'jkiyøø; jøts ku yikpujnaa, jøts ojts yikpikta'aky myidukniapatøjkixpy. ³⁸ Xjats kumi wingonts ja kajp midi txøøw'ajtp Lida, mā jap wyinaty ja Pedro t'ayø'ø y ja myigu'uktøjkti, jøts kumi tø ja wyi-naty ja Dorcas myigu'uk tnijawidi ku ja jam wyidity, winets ja ñagyajxidøø namajtsk jøts ja t'atstuk-mado'odit ja Pedro jøts mye'ent putyi.

³⁹ Xjats ja Pedro jaty tmøødi ja kugajpxtyi. Ku jam yja'ttøø, jøts jap tyimwyaanøjkxyøø mā ja oo'kpi jap, winets ja Pedro ja ku'øktyø'øxyi ñawa'kwidejtyøø, jøts ja tyuk'ijxyi ja wet midi wyinaty ja Dorcas tø tyik'øyi. ⁴⁰ Winets ja Pedro tkajpxidsømguixy ja jaa'dyi, jøts ja ñagyuxendyyaajkøø, jøts kuts ja twindsap-kajpxkijxy ja oo'kpi, xjats ja tnimaay:

—Tabita, pidø'øk.

Winets ja oo'kpi wyin'ejxwa'kxy jøts ja Pedro yik-win'ixy, winets chinaagyukøø. ⁴¹ Jøts ja kyø' ja tmajt-støø jøts ja jade'en pyidi'jky; winetnømts ja twaaadsøø ja Pedro ja myigu'ukti midi ja kyajpxidsøm jøts nayide'en ja ku'øktyø'øxyi, xjats ja twin'ejxtøø, tødam yjujkyi ja oo'kpi wyinaty. ⁴² Ñija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús. ⁴³ Nay jam idø'on ja Pedro tyaa'ni kawinaak xøøw jam po'ogoo'tspi tyøjkwindump, ja' idø'on ja xyøøw Simón.

Ku ja Pedro tmigajpxy ja soldadi windsøn pøn yiktejp Cornelio

10 Jam idø'on tu'uk y'ijty ja yaa'dyøjk mā kajp jam txøøwi Cesarea, Cornelio dø'on ja xyøøw, ja'ats idø'on ja soldadidi tukpiky tniwindsøn'ajtp pøn yikxøømmøødyøø Italiāni. ² Xjats ja Cornelio møøt ja y'u'nk møøt ja ñidø'øxy, yjanchja'myatstip idø'on ja Dios Teety ja', jøts nayide'en twindsø'ogidi. Ajot'ajttip idø'on ja Dios jabom jabom, jøts nayide'en tjanchtabudøjkidøø ja myeeñ ja ayooobi jaa'y. ³ Tu'uk idø'on ja xøøw sa yjajty sa kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'on wyinaty ku ojts ñidø'kiyi mā ja jap wyinaty, winets ja xøøw ja tyamigajpxiyøø:

—iMets Cornelio!

⁴ Winets ja Cornelio tsø'ogijawi twin'ixy, jøts t'ad-søøy:

—¿Ti, teety?

Xjats ja ankilis ojts ñi'mxyiyi:

—Tø ja Dios Teety ja m'ajot'ajtin mgupøjkxyi, jøts ku tø xpudøki nayide'en ja ayooobi jaa'dyi. ⁵ Kax mguga-jpxy jøts jam ñøjkxtit Jope, wan ja Simón t'atswawdi pøn nayide'en yiktejp Pedro. ⁶ Jam ja myidsøøni po'ogoo'tspi wyindump pøn yiktejmip nayi Simón, pøn jam tsinaapy mejy wingon. Ja'ats mdukmadoowiyip pøni ti mdu'ump.

⁷ Xjats ku ja ankilis ñøjkxnaa, winets ja Cornelio twaaadsøø ja tyumbi namajtsk. Wyaadsøow nayide'en ja soldadi tu'uk pøn ja møøt ñamyayi, jøts pøn nayide'en twindsø'jkijp ja Dios Teety. ⁸ Xjats ja ttuk-madoogijxy ja kyugajpxtyi sa jaty ja ankilis ja wyinaty tø ñi'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjotp mā ja yikaxtøø kugajpxy'ajtpi, winets ja Pedro pyejty jam tøjkjøxp dios'ajot'ajtpi, kujk xøøw et idø'on wyinaty. ¹⁰ Janch yu'oo'knip idø'on ja wyinaty jøts ja kyaawya'añ; japnimts ja kaaky wyinaty y'øyi, ku jot-møñ t'ejxpaajty jade'en kidi jaa'y kyumaa'y, ¹¹ ku ja tsajp y'awā'ach jøts t'ixy ñaxkida'aky, jade'en ja t'ixy kidim ja møj manti, jøts tum wendi maktaxk iskiin. ¹² Jøts jam mantikjøxp mayjøøjp ja jiyujk t'ixy, jam ja tsaa'ñ, jam ja joon, jøts jam nayide'en ja maktaxkpi tekpyi jiyujk. ¹³ Winets tmadøøp ja ayuujk midi tsoo'mp tsajpjøtpy, jøts ja yide'en ñi'mxyi:

—Pidø'øk Pedro, yik'ook inet yø jiyujk tu'uk jøts xtsu'utst.

¹⁴ Xjats ja Pedro t'adsøøp:

—Ka' teety jade'en; niwindii øts jade'en ngatsu'uch ja kya'øbyi kyawā'atspi, midi kapaat'ajtiyp yiktsu'utst sam ja Moisés kyutujk.

¹⁵ Xjats jadigojk tmadøøp ja kajpxy ja ayuujk, jøts wya'añ:

—Kidi jade'en xka'ødyijy, tum mbaat'ajtip yø jiyujk tsu'uch midi Dios Teety tø ttanibiktaagi.

¹⁶ Tigøøk ojk idø'on ja manti wyimbijty y'adijy, jøts pyatøjkiñaā nay jap tsajpjøtpy. ¹⁷ Ixjam ja Pedro jade'en wyinaty myay tyajy, ti dø'on ja tyijpy jade'en midi wyinaty tø t'ixy ku ja Cornelio kyugajpxy yja'ttøø, tø ja wyinaty tyiknidøøwidi ja Simón tyøjk. ¹⁸ Kuts ja jam yja'ttøø tøk'agi'py, winets møk tkugajpxidøø pøni jap ja Simón midi nayide'en yiktejp Pedro. ¹⁹ Kumi ja' wyinaty ja Pedro myimaapy myidajpñim midi wyinaty tø t'ixy, winets ja Espiritu Santo ñimaajyøø:

—Nidigøøk icyam ja jaa'y m'ixa'ayiyi. ²⁰ Pidø'øk, winak jøts xmøødit yø jaa'y, kidi ti xpawinmay, nay øts yø' ngugajpxy.

²¹ Xjats ja Pedro tniwinajky mā wyinaty ja Cornelio kyugajpxy y'awejxti, jøts ja tniimaay:

—Øts meets idø'on x'ixaapy. ¿Ti dø'on mnimendip?

²² Xjats ja kugajpxy t'adsoodøø:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkp ja Dios ja', xjats nayide'en janch tsojkp ja' ja israelit jaa'dyi. Nay ja Dios Teety idø'on y'ankilis ja tniimaajyøø jøts me myikwa'at, jøts jam njaa'mint mā ja chøøni ja Cornelio, jamts mets x'at-stukmado'ot pøni ti jaty me mnija'wip, jøts ti jaty mmadya'akwampy.

²³ Xjats ja Pedro tkuwaa'wiñaā tyøjkjøtpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi winaagin midi jam Jope tsinaadyip.

²⁴ Jøtsnim kyimjabom yja'ttøø jam Cesarea, mā ja Cornelio y'awijxyiyi niduki'iyi møøt ja myigu'uktøjkti, midi wyinaty tø twaadsowdi jøts ja tpatmado'odit ja Pedro kyajpxy y'ayuujk. ²⁵ Kuts ja jam tyimyja'ttøø ja Pedro, xjats ja Cornelio y'adsoojyøø jøts ja pyidsimy tyøjkjøtpy, xjats ja jaty ñagyuxendyaajki ja Pedro wyin-gujky, jøts ja jade'en yikwindsø'øgi ejxim ja diosin.

²⁶ Winets ja Pedro jaty twejtsji'iky, yide'en ja wyaañ:

—¿Tiku ø xwinguxaani? Pidø'øk, pø nay jaa'yts øts nayide'en sã mets.

²⁷ Jøts nay madyaktipnim idø'on ja wyinaty, ku jap tyøjkidøø tøjkjøtpy mā wyinaty ja jaa'y jap yjanch'awe-jxti namay. ²⁸ Xjats ja Pedro tniimaay yide'en:

—Meets migu'uktøjkti, mnija'wip meets jøts ku øøts wenk n'israelitjaa'y'aty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tyøkidit ja' tyøjkjøtpi, ka'ap øøts ja n'ødyijy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty. ²⁹ Ja'agøjxp ø nmiñ jaty ku mee xwaadsøøp. Jøts nnijawiwampy øts icyam ti meets idø'on xamigajpxwamp ku meets xwaadsøøp.

³⁰ Xjats ja Cornelio t'adsøøp, yide'en ja tniimaay:

—Ixyam myimaktaxk xøøwiñi ku øts yide'en njajty, ya øts wyinaty ndøjkjøjty n'ayuu'aty, jøts ja Dios wyinaty n'ajot'aty winakxyøøw, ku øts jotmøñ n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'iky. ³¹ Winets øts yide'en xnimaay: "Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayooi jaa'dyi. ³² Kax mgugajpxy jøts jam ñøjkxt Jope, wan ja Simón t'atsway pøn nayide'en yiktejp Pedro. Jam ja myidsøøni ja po'o-goo'tspi wyindump midi jam tsinaapy mejy wingon. Ja'ats mdukmadowiyip pøni ti mdu'ump." Jade'en øts idø'on ja ankilis xnimaay. ³³ Paty øts ngugajpxy jaty nguejxy jøts me m'atsyikwa'at, pø janch øy ku tø xpaduñ ku tø mmiñ ya. Wa'ats ja Dios Teety x'ijxyim xnija'wa'am ku adøm icyaadi, ku øø nbatmadoowa'añ ja nwindson'ajtim kyajpxy y'ayuujk midi ja tø mdami-gaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tyøjkwindump

³⁴ Winets ja Pedro kyajpxnibøjkøø, jøts ja yide'en wyaañ:

—Ixyam njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi, ³⁵ kyupijky ja' pøni pøn windsø'jkijy, jøts y'øyjaa'y'at-tit nayide'en. ³⁶ Dios Teety idø'on jade'en ojts ttukmadøp ja Israelit jaa'y, ku xmi'øy'atwa'añindi jadigojk ja Jesucristo køjxp pøn nwindson'ajtyindip niduki'iyi.

³⁷ Pø mnija'wipxi meets niduki'iyi sã yjajty sã kyubejty jam israelit jaa'y y'etjøtpi, jam idø'on cho'ondaajky mā et txøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayide'en namay tyiknøbejty. ³⁸ Ja pø mnija'wipxi meets nayide'en ku ja Dios Teety ja Jesús ttuktatøjkøø ja Espiritu Santo møøt ja myøk'ajtin, jøts nayide'en sã jaty ja wyidity ku ja t'ødyuñ ja jaa'y, jøts ku ja tyiktsø'øky pøni pøn ja miku' møøt y'itynim. Ja'agøjxp ja jade'en ttuñ ku ja Dios Teety ja ejtp tmøø'tity. ³⁹ Øøts idø'on tø n'ixy, øøts idø'on tø nnijawi, sã jaty ja Jesús ttuñ jam Israelit kyamwemp kyamjøtpi, jøts nayide'en jam Jerusaléngit jaa'y myøjkajpjøtpi. Jøts nay tø øøts ja n'ixy sã jaty ja yjajty ku yik'o'jkiyøø ja jaa'y, jøts sã yikmitsumbejty jam kruskøjxp. ⁴⁰ Winets ja Dios Teety ojts kyidigøøk xøøw tyikpidsiimy jap oo'kpi jutjøtpy mā ñajxøjkøø ja

Jesús, xjats øøts ja xukyikwingaxi'jky. ⁴¹ Ka'ap ja yik-tuk'ejxtøø ja mayjaa'dyi, øøts yide'en yø xukyikwin-gaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yujukpyijky, jøts øøts ja ngaay jøts øøts ja n'uuky møøt. ⁴² Xjats øøts ja xani'ane'emy ja kajpxwā'kxk, jøts øøts ja jaa'y ndukmado'ot ndukni-jawit ku ja Dios Teety ja kø'øm tpiktaajky ja Jesús, jøts ja jujukpyi ja øøkpyi ttiidyu'unt. ⁴³ Nayide'en idø'on wyi-naty jekyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yikmaa'kxuktit ja pyøky. Jade'en ja Pedro ja tnimaay ja jaa'y.

Ku ja Espíritu Santo ttatøjkøø pøn ka'israelit jaa'yidi

⁴⁴ Nagyajpx'adøtsp wyinaty ja Pedro, ku ja Espíritu Santo tyatøjkiydøø niduki'iyi ja jaa'y pøn jaty jam wyi-naty patmadojiyip ja Pedro. ⁴⁵ Xjats ja israelit jaa'y pøn ja Pedro tpadsoo'niiydøø ku ojts ja kugajpxy jam wyayidi, winets ja ñigyumaap tjanchja'widøø ku ja Dios tyuktatøjkiydøø ja Espíritu Santo øpyønjaa'yi, pøn ka'ap israelitjaa'yidi. ⁴⁶ Ja'agøjpx idø'on ja ojts yiknijawi ku ja adsu'jky ojts tjanchkajpxti tum ja wenk ayuujk, jøts ku ja nayide'en tjanch'øjya'widøø ja Dios. ⁴⁷ Xjats ja Pedro tnimaay ja myigu'uk midi myøøtwidijtpy:

—¿Ti pøn miøaat xkadukyiknøbajtimp yø jaa'y, pø tøxi Espíritu Santo tyatøkiydøø jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwind-søn'ajtim Jesucristo myøk'ajtingøjpx. Jøts ja Pedro møkta'aky yiknimaay, jøts ja jam yjaakta'anit ja winaak xøøwin.

Ku ja Pedro ttamimadyaajky ya'atpi ayuujk pøn tjanch-ja'widip ja Jesús jam Jerusalén

11 Xjats ja tnija'widøø ja Jesús kyudanaabyidi pøn jam tãndi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi. ² Xjats ku ja Pedro jadigojk wyimbijty jam Jerusalén, winets ja twindsø'ødyøø ja Pedro:

³ —¿Tiku ja tø x'ats'ixy ja wenk jaa'y pøn ka' y'israelit-jaa'yidi, tiku møøt tø m'atskay m'atsjiikxy?

⁴ Xjats ja Pedro tnimadyajktøjkøø sã ja yjajty sã ja kyubejty ku ja ojts yikway yikwich, jøts ja wyaãñ:

⁵ —Jam ø wyinaty Jopit jaa'y kyajpjotp, jøts Dios'a-jot'ajtpi wyinaty, jøts jade'en nja'wøø kidi ja jaa'y kyu-ma'ay, jade'en n'ejxpaajty ejxim ja møj manti, ku n'ijxy kyida'aky tsajpwemp tum wendi maktaxk iskiini, jøts wyingøøñ mã øts jap wyinaty. ⁶ Xjats nwin'ijxy yikxon ti dø'on jap mantijøtpy, winets jap n'ejxpaajty janch mayjøøjp ja jiyujk, jap wyinaty tsaa'ñ, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi. ⁷ Winets nmadøøpy ja ayuujk ku ø xnimaay: “Pidø'øk, Pedro; yik'ook inet yø jiyujk tu'uk jøts xtsu'utst.” ⁸ Jøts ø n'adsøøpy: “Ka' teety jade'en. Niwindii øts jade'en ngatsu'uch ja kya'øybi kyawa'atspi, midi kapaat'ajtiyip yiktsu'utst sam ja Moisés kyutujkin.” ⁹ Winets øts jadigojk xmigajpxy jøts

øts xnimaay: “Midi ja Dios tø tyikwā'ach kidi xka'ødyi-ly.” ¹⁰ Tigøøk ojk idø'on ja manti wyimbijty y'adjiy, jøts pyatøjkiñaa nay jap tsajpjøtpy. ¹¹ Xjats ku øts jade'en njajty, winets nay jaty yja'ttøø nidigøøk ja yaa'dyøjk-tøø mã øts ja wyinaty, Cesarea dø'on ja choondi jøts jam ñøjkxti mã øts ja xpaattøø. ¹² Winets øts ja Espíritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpad-so'ondi nidudujk ja Jopit jaa'dyi pøn tjanchja'widip ja Jesús. Xjats ku øøts jam nja'jty Cesarea, winets øø ni-duki'iyi ndøjkøø Cornelio tyøjkjotp pøn ø xnigajxøø.

¹³ Winets øøts ja xukmadøøpy sã ja yjajty sã ja kyubejty jam tyøjkjotp, ku ja ankilis tu'uk t'ejxpaajty, jøts ku ja ñimaajyøø: “Kax mgugajpxy jøts jam ñøjkxt Jope, wan ja Simón t'atsway midi nayide'en yiktejp Pedro.

¹⁴ Ja'ats mdukmadowyidip sudso m'anmija'win y'awa'atspidsø'ømdit møøt nmigu'uktøjkti.” Jade'en ojts ñii'mxyi. ¹⁵ Xjats ku ojts nmigajpxnibøki niduki'iyi, winets ja Espíritu Santo tyatøjkiydøø, nayide'en sam adøm xatøjka'andøø ku ojts myiduk'ojk tyimiyiñ.

¹⁶ Xjats ku øts jade'en n'ijxy, winets øts jaty nja'myejch ja nwindson'ajtim y'ayuujk sã ja wyaãñ ku ja Juan Bautista mayjaa'y nøø ttuktanøbejty, jøts ku ja wyaãñ: “Wenk mee jatt, jade'en ku Espíritu Santo mdatøkiydøø.” ¹⁷ Pøni tyuktatøkiwyampy ja Dios Teety ja y'Espíritu Santo ja wenk jaa'dyi jade'en sam adøm xuktatøjka'andøø, kumi adøm njanchja'windip ja Jesús, ¿ti øts ja jade'en ngaduktunip? Tsaachtyi øts idø'on, pø kø'ømxi ja jade'en ttunwã'ãñ.

¹⁸ Ku ja jade'en tmadoodøø ja Pedro y'ayuujk, winets y'amongøjxtøø jøts yjotkujk'ajttøø, jøts ja Dios Teety tmøjpiktaajktøø, jøts yide'en wyaãndøø:

—iTø ja Dios Teety ttanibiktaagi jøts nayide'en yikunuu'kxtit øpyønjaa'yi ku ja tmajstuttit ja kya'ødyunk, winets ja tsinaa'yin xemikøjpx tpaattit!

Ku ja jaa'y ja Jesús tjanchja'wi'okwã'ãñ jam Antioquía

¹⁹ Ku ja Esteban t'ukyik'oo'ktøø, winets t'ix-aañibøjkidøø pøn ja Jesús tjanchja'widip, xjats ja wi-naaggin kyaknøjkxtøø Fenicia, Chipre, jøts nayide'en Antioquía. Japts ja tkajpxwã'kxtøø ja øgyajpxy ja ømyadya'aky. Ka'ap ja nugo ajawi tnidyukmadowdi o pøn, agø'ømyi ja tnadyamimadya'agyidi tuk'israelit jaa'dyi. ²⁰ Xjats winaaggin ja'adi midi jam tsoo'ndip Chipre jøts nayide'en Cirene, ku ja nay jam yja'ttøø Antioquía winets ja nayide'en tkajpxwã'kxtøø ja øgyajpxy ja ømyadya'aky, midi anmija'win tyiknitso'ok'ajtp, ja'ayi tyukmadoodip pøn ka'israelit jaa'dyi. ²¹ Janchkunuu'kxidi ja Dios ja' ku ja kyajpxwã'kxti, winets ja japit jaa'y tjanchyiktatstøø chinaa'yindi, jøts ja nwindson'ajtim yja' tpabøjkiñidøø.

²² Xjats ku ja jade'en tnija'widøø ja Jesús yjanch-ja'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøw'ajt Bernabé, jøts jam ja ñijky Antioquía. ²³ Xjats ku jam yja'jty, jøts ja t'ijxy jøts ja tnija'wøø sã ja Dios Teety wyinaty tø tkunuu'kxy ja Antioquiiit jaa'y ku ja chinaa'yin wyinaty tø tyiktatstøø, winets ja janch yjotkujk'ajty yjanchxondaajky. Xjats ja

tkajpxjot'amøkøø jøts amumjoojt ja nwindson'ajtim yja' tpaduujnidit, jøts nijuuni tkamajtstu'uttit. ²⁴ Janch yujy idø'on ja Bernabé, yjanchmøøt'ajtpy ja Espíritu Santo, jøts nayide'en ja Dios t'ajot'ajty. Xjats jade'en ja namay jaa'y tpabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñøjkxkojmaa mā txøøwi Tarso jøts ja t'ats'ix-ā'at ja Saulo. Kuts ja jam tpaajty, winets ja twaanijkxy mā ja wyinaty tø tñidsøøñ jam Antioquía. ²⁶ Japts chinadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'on Antioquía mā ojts ja Jesús yjanchja'wibi yiktejtí mijawyeen cristianos.

²⁷ Nay ja'abi xøøw nay ja'abi jumøjt ku ja Dios Teety kyugajpxy ojts ñijkxy nay jam Antioquía, pøn jam tsoo'ndip Jerusalén. ²⁸ Xjats ku yja'ttøø, jøts tu'uk txøøwi Agabo, ja' idø'on jam ojts tyanaay'øyi mayjaa'y agujkp, jamts ja kyajpxwa'kxy Espíritu Santo myøk'ajtingøjxp, jøts wyaañ jøts ku ja yuu møk'ampy myeenwā'añ yā naxwiiñ. Janch tiy yide'en, janch jajt idø'on ja jade'en winet ku Claudio wyinaty myøjwindson'aty. ²⁹ Xjats ku ja jade'en ja janchja'wibi tmadoo-døø ku ja yuu myenwā'añ, winets ja tkajpxy'ajttøø jøts pudøjkin ttanigaxtit ja myigu'uk pøn jam tsinaadyip Judea, jade'en pøni sã kø'øm tmo'owa'āndi nidu'uk ni-du'uk. ³⁰ Jade'en ja tundøø, jøts ja ttamigajxidøø ja Bernabé møøt ja Saulo, jøts jam tkømo'odit ja jamit møjaa'dyøjkti.

Ku ja Herodes tñankyik'o'jkøø ja Jacobo jøts ja Pedro ja'ayi yiktsuumy

12 Xjats nay ja'abi xøøw nay ja'abi jumøjt ja møj windsøn Herodes tjemdunibøjki ttedunibøjki wi-naagin ja Jesús yjanchja'wibidi. ² Jøts ja ttukta'ø'jky ja yøñchujx ja Jacobo, ja Juan y'ajch, ³ jøts ja t'ijxy ku ja israelit jaa'y ja yjawi jade'en ttaxondā'akti ku ja jade'en y'adi'ich. Xjats ja Pedro yjaaktyimymajch paski xøøjøøjty, winet ku ja tsapkaaky jadi'iñi yikay midi kalevadurimøøt. ⁴ Xjats ku jade'en ja Pedro yikmajch, winets ja windsøn Herodes ja pyiktaajkiyøø puxøjkjøtpy, japts soldadi ja y'eix'ityiyi maktaxk piky jøts maktaxk soldadi tukpiky jaty. Jade'en ja Herodes yjawin-maaay jøts ja tyikpidsøømt ja Pedro paski xøøguixy, jøts ja mayjaa'y ttuk'ejxwā'añ ttuknijawiwya'āñ. ⁵ Jap wyinaty ja Pedro tsumy, jøts nayide'en ejtp idø'on ja y'eix'ityiyi ja soldadi, winets ja Jesús yjanchja'wibi tni'amidowidi tñibøktsowidi ja Pedro amumjoojt, jøts ja ttukmadoodøø ja Dios.

Ku ja Dios Teety y'ankilis ojts tyik'awa'atspidsimy ja Pedro jap puxøjkjøtpy

⁶ Nay ja'abi tsuu ku wyinaty tyimbyaatwaani ja kajpx'aats ku ja yikpidsømiyit jøts ja kajp jaa'y y'ejxit ñijawiyit, jøts jaakmaaap jap wyinaty ja Pedro. Jap wyinaty adsow aduuk ja soldadi ñama'ayiyi, puxkadeen køxøch wyinaty ja Pedro, jøts nayide'en ja soldadi t'e-jx'etti ja tøjkaaw. ⁷ Winets jaty ñimejniyøø ja nwindson'ajtim y'ankilis, jøts jap puxøjkjøtpy yjajpøjkijxy.

Xjats ja Pedro yikijxy jøts ku tyikniwijy, winets tñimaay yide'en:

—Pidø'øk putyi.

Kuts ja pyidi'iky jøts ja kadeen jade'eñi kø'øm kyaj-naa, ⁸ xjats ja ankilis ñimaajiyøø yide'en:

—Nachumjønii yikxon, jøts tawa'agi yø mgø'øk.

Xjats ku ja Pedro jade'en tpaduun, jøts ja ankilis yjaaknimaaajyøø:

—Tatøki yø mxox jøts øts ix'oojk xpayø'øty.

⁹ Xjats ja Pedro ix'oojk tpadsoø'ñ ja ankilis, ni tkani-jawi pø janch kajanch ku ja yik'awa'atspidsømwā'añiyi. Jade'en jajtj ja tjawi ja Pedro kidi jaa'y kyuma'ay.

¹⁰ Xjats ku ja jade'en yiktsoo'niyøø ja ankilis, jøts jam ñaxti mā myidukpiky ja ejx'ejtpidi, jøts nayide'en twi-naxti mā ja myimajtsk pikpyi ejx'ejtpidi, jøts jam yjā't-tøø mā pux'agaj jam tuu' pa'am, winets ja pux'agaj kø'øm y'awaajch jøts pyidsømdøø. Xjats ku jade'en y'awa'atspidsømdøø, jøts yjaagyø'ødyi jadu'ukpi tuu', japnimts ja Pedro ojts yikmajtstu'uty nadyu'uk. ¹¹ Xjats ja tjanchnja'wøø ku y'awa'atspidsiimy, jøts yide'en wyaañ:

—Pø janch jade'endamxi dø'on ku ja nwindson'ajtim tø tjanckexy ja y'ankilis jøts øts ja xyik'awa'atspidsøømt jap puxøjkjøtpy, jøts ja israelit jaa'y møøt ja wyindsøn Herodes jade'en tø xkamimajada'akti pøni sã øts ja' xtyimya'uktunwā'āndi.

¹² Jade'en ja Pedro wyinmay, xjats ja ñijkxy jam María tyøkwindum midi ja Juan tyaaqip, ja Juan midi nayi yikxøømmøøpy Marcos. Ja' idø'on ja tyaaq tyøkwindum ñijkxy ja Pedro mā ja mayjaa'y jam wyinaty tø ñamyukyidi, jøts idø'on ja jam Dios'ajot'atti. ¹³ Kuts ja Pedro twingøjxy ja tøk'agi'pyit agaj, winets ja kiixy Rode pyidsiimy tyøjkjøtpy, jøts ja ojts tpatmadøy pøni pøn ja'. ¹⁴ Xjats ku ja ojts tyukmadøy kudam ja Pedro kyajpxy, nika'ap ja tøjky tyik'awaajch, janch jotkujk ja wyimbijty yukwøøñ chapwøøñ, jøts ja myigu'uk ja t'at-stukmado'ot ku ja Pedro jap kyajpxy. ¹⁵ Xjats ja myigu'uk ñimaajiyøø:

—iPø mguma'aymadyakp mets!

Jøts ja kiixy ja tyimyanimaaay ku ja tyimdyiy tyimyanichi. Xjats ja ka'ap tyimybøkti tyimwyandip ja':

—iKa'ap inet yø yja'aji; pø ja y'ankilis yø' midi nitanaajiyip!

¹⁶ Ìxap ja Pedro jøp'ijxy tyøkwingøxy. Jøts ku ja tyik'awaatstøø ja tøjkaaw, jøts pø mā ja tyimya'jttøø ku ja twingu'ejxidøø jøts kudam ja yjanchja'aji. ¹⁷ Ja'ayi ja Pedro ja kyø' tñanky'eixøø jøts ja tukween y'ettit amøñi, winets ja tñimadyajknibøjkøø sã ja yjajty sã ja kyubejty ku ja nwindson'ajtim ojts yjuudyi jap puxøjkjøtpy; xjats ja nayide'en t'uknimaañaa jøts ja ttukmado'odit ja Jacobo, nayide'en ja Jesús yjanchja'wibidi, jøts ja tñijawidit.

Xjats ku jade'en t'uknijajpxkøjxnaa, winets ja choo'-naa jøts ja ñijkxy abikyajp.

¹⁸ Xjats ku kyimjabom'ajty ku xyijñøø, winets ja soldadi ñigyumaap ñayja'wiyidøø ku ka'ap ja Pedro jap ukpøni. ¹⁹ Xjats ja Herodes møk pyagajxiyidøø jøts ja t'ats'ixā'adit, ka'ats ja mā t'ukpaatnidøø. Xjats ja

Herodes wyaadsojyidøø niduki'iyi jøts ja tyukni-gajpxwā'añidi sudso'ampy ja Pedro pyidsiimy, winets ja Herodes ja yik'oo'kiñidøø. Xjats ku ja jade'en y'adijch, winets jam choo'naa Judeit y'etjotp, jøts ñøjkxnaa tsinaabyi jam Cesarea.

Ku ja Herodes y'ø'jky

²⁰ Xjats ja møj windsøn Herodes janch mi'ajkip ja jaa'y ja' pøn jam tsinaadyip Tiro jøts nayide'en Sidón. Xjats ja Tirot jaa'y møøt ja Sidóngit jaa'y tkajpxy'ajt-nidøø sudso ttu'undit sudso tyaa'byaattit. Winets ja kyugajpxy tkajxtøø jøts ojts tpaatti ja Herodes kyudsi-naabyi pøn txøøw'ajt Blasto, ja'ats ojts tnøjmidi jøts tnøjmit ja wyindsøn Herodes, jøts ka'ap cheptu'undit jøts jotkujk chøønidi, ja'agøjxp ja jade'en tnimaadyøø ku ja yji'kxy jam tjuydi tkajpxti mā Herodes yikutuky. ²¹ Xjats ja Herodes twaadsøø ja namayjaa'y, jøts jap mye'endit mā kya'amaadyaajk, xjats ku ja jade'en myengøjxtøø ja jaa'y, winets ja ttatøjki ja xyox midi amuum tsamamp, winets kyajpxwā'kxñibøjkøø jam mayjaa'y wyingujk. ²² Xjats ja mayjaa'y jade'en ñigyumaap tjanchja'widi ku ja jade'en kyajpxwa'kxy, jøts ja xem yam møk yjanchnøømdi:

—Yø' ixja kyajpxwa'kxy ka'ap yø yjaa'yi, dios yø'.

²³ Xjats ku jap wyinaty kyajpxwa'kxy, winets ojts jaty ja nwindson'ajtim y'ankilis yikpa'ambaadyiyi, ja'agøjxp jade'en yjaty ku kø'øm ñamyøjpikta'agyyi, jøts ku ja Dios ne'egi tkamøjpikta'aky. Ku ja jade'en pyiky, tinø'øk idø'øn jam y'am yjotp tøjkiña, ja'ats jadi'iñi tsu'tskøjxniyøø.

²⁴ Winets ja nwindson'ajtim y'ayuujk myøjtak'adøtsnaa, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choo'nidøø jøts ñøjkxnidøø Jerusalén møøt ja Juan midi nayide'en yiktejp Marcos.

Ku ja Bernabé møøt ja Saulo myiduk'ojk choo'ndøø kajpxwā'kxpi

13 Jam Antioquia wyinaty namay ja Jesús yjanchja'wibidi, jam ja kyugajpxy'ajtpi jøts nay jam ja yik'ixpøjkpidi. Ya'at idø'øn jade'en yiktejtip Bernabé, jøts ja Simón (midi nayide'en yiktejp Negro), nayide'en ja Lucio ja Cirenit jaa'y, jam ja Manaén (midi yaakti tukna x møøt ja Herodes midi windsøn'ajt jam Galilea) jøts jam nayide'en ja Saulo. ² Tu'ukpi xøøw idø'øn ya'at jaa'y jade'en ñamyujkidøø jøts ja nwindson'ajtim twindsø'jkidøø, ayuu'ajttip idø'øn wyinaty ku ja Espiritu Santo wyaañ:

—Jigaxti yø Bernabé møøt yø Saulo, jøts ttu'undit midi øts yø tø ndaniwaa'dsowidi.

³ Xjats ku jade'en Dios'ajot'ajt'abajtidøø ayuu, xjats ja myigu'uk t'ukønixajkøjxnidøø, winets ja yika-jxtsoo'nidøø.

Ku ja Jesús kyudanaabyi kyajpxwā'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espiritu Santo, winets ñøjkxtøø mā jam txøøwi Seleucia. Jamts ja barki ttatøjkidøø jøts ñøjkxtøø jam Chipre. ⁵ Xjats ku jam yja'ttøø mā ja barki wya'k'øøw mā jam txøøwi Salamina, winets ja tkajpxwā'kxñibøjkidøø ja Dios kyajpxy jam tsap-tøjkjotp. Jøts nay jap ja Juan tmøødidi, ja'ats ja pudøjkiyidøø. ⁶ Xjats ja jade'en ja Chiprit naajx ttayø'øñaxtøø, jøts jam yja'ttøø mejy wingon mā txøøwi Pafos. Jamts tpaattøø tu'uk ja israelit jaa'y pøn txøøw'ajt Barjesús, yik'adujkp ja' jøts nayide'en xyimay. Dios idø'øn kyugajpxy ja ñadyiyi jøts ja jaa'y tjanchwin'iñ. ⁷ Jam idø'øn ja tyuñ møj windsøn wyindump pøn txøøw'ajt Sergio Paulo, janch wijy janch kejy idø'øn ja windsøn. Winets ja tnigajxøø ja Bernabé møøt ja Saulo, yjanchmadoowampy idø'øn ja' ja Dios kyajpxy y'ayuujk jøts ja tyukmadowiyit. ⁸ Xjats ja yik'adujkpi midi nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo. ⁹ Xjats ja Saulo pøn nayide'en yiktejp Pablo, yjanchmøøt'ajtpy ja Espiritu Santo ja', paty ja tjanchwin'ijxy tiyim ja yik'adujkpi, ¹⁰ jøts ja yide'en tnimaay:

—iMets windaayibi jaa'y, kawindiy jaa'y mets, miku' mdeedyip, mi'ajkip mets ja' pøn øy tsinaadyip! ¿Tiku xyikutigøøwya'añ ja nwindson'ajtim kyajpxy y'ayuujk? ¹¹ Ixyam idø'øn ja nwindson'ajtim myik'ayo'ombaa'diyit; kunim me mdā'ant winjoox jøts may xøøw idø'øn jade'en xkawin'ext ja xøøw.

Xjats tyimyjaty tyaañ jade'en kugoots, winets t'ixaay pøni pøn tuu'wetsiyip. ¹² Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jaty tjanchja'wøø pøni sa jaty ja tyukmadooyiøø ja Saulo møøt ja Bernabé. Janch tyimñigumaap idø'øn ja tja'wiyi'ñ ku ja yik'adujkpi jade'en yjajtnaa ja nwindson'ajtin Jesús myøk'ajtingøjxp.

Sa yjajttøø sa kyubajttøø ja Pablo møøt ja Bernabé jam Antioquia midi tãmp Pisidiit y'etjotp

¹³ Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjkxti mā txøøwi Perge, nay jam Panfilia y'etjotpti; jøts ja Juan jamyi ja tminawya'kxidøø Pafos jøts ja ñøjkxnaa Jerusalén. ¹⁴ Xjats ku jam ja jade'en yja'ttøø Perge, winet jam choo'ngojmidøø jøts yja'ttøø Antioquia, nay Pisidia y'etjotpti. Xjats poo'kxin xøøw winets tyøjkidøø jam tsap-tøjkjotp, japts y'ixaktøø. ¹⁵ Xjats ku ja jade'en yikajpxkijxy ja nøky midi ja Dios kyutujk myøøt, jøts nayide'en sa wyandøø ja Dios kyugajpxtyi, winets ja tsap-tøjk windsøn ojts ñimaajyidi ja Pablo møøt ja yjamyøøt:

—Meets migu'uktøjkti, kidi wan meets jap xmimiñ xmija'aty ja kajpxwejin, kidi wan meets xukmadowandip yø jaa'y, tukmadowdits.

¹⁶ Winets ja Pablo tyanaagyukøø jøts ja kyø' ja'ayi tñanky'ijxyi, ja' tyijpy jøts ja jaa'y y'amo'ondit jøts tpatmado'odit, xjats ja yide'en wyaañ:

—Ukpatmadowdi meets Israelit jaa'y pøni pøn jaty ja Dios twindsø'jkidip: ¹⁷ Meets Israelit jaa'y niduki'iyi pøn adøm ndios'ajtyindip, ja' ojts twi'ixy adøm n'apteety'amøjti jøts ja tpiktakti adøm ndsinaadyaajkti janch møj, winet ja yjajty ku wyinaty nay jam chøonidi Egiptit jaa'y y'etjotpti jade'en ejxim ja ja'at jaa'y; xjats ja møk'ampy jadigojk kø'øm ja Dios tyimyikpid-søøjmiydøø nay jam, ¹⁸ jøts ja tyiknaxtit jam tøøts etjotp wixijky jumøjt, kuwañim ja Dios ja yikjujky'ajtidit øy ja tpadundi tkabadundi ja Dios y'ayuujk. ¹⁹ Jøts ja nayide'en tyikudigøø wixujk ja møj kajp midi jam wyinaty ejttip ma txøøwi Canaan, jøts ja n'apteety'amøj yikmo'odit ja ñaajx. ²⁰ Xjats jade'en maktaxk magø'pxy jagujkp jumøjts ñitanaajyidøø kunim ja kugajpxy kyaxi'iky midi txøøw'ajt Samuel. ²¹ Xjats ja kø'øm t'amidoonidøø tu'uk ja windsøn pøn ja nitaniyidip, winets ja Dios tu'uk myøøjyidøø pøn txøøw'ajt Saúl, ja Cis y'u'nk, nay ja Benjamín y'ap, ja'ats wixijky jumøjt ttuuf. ²² Winets ja Dios jadigojk pyøjkiyøø ja windsøn'ajtk, jøts ja nagyø'øm tpiktaajk ja David, xjats ja Dios wyaañ: “Tø øts nbaaty ja David, midi ja Isaí y'u'nk'ajtpy, yø' janch yujy janch tuda'aky, xpaduujnip øts yø' nja' pøni sa ø ndsøky.” ²³ Xjats ja Dios nayide'en tñajtskajxøø ja Jesús midi adøm n'Israelit jaa'y tyiknitso'ok'atp, yø' idø'on ja David myigu'uk'ajtpy, kuts ja Jesús myiif pø kø'ømxi wyinaty ja Dios tø wyanda'aky. ²⁴ Xjats ja Jesús namga'aním wyinaty tyundøki, winets ja Juan Bautista jawyeen tkajpxwa'kxy jøts ja Israelit jaa'y ttukmadøø, jøts pyøkyu'unin tmajtstu'uttit jøts ñøbatkøxtit. ²⁵ Xjats ku ja Juan Bautista y'oo'knaa, tø ja wyinaty tñøjmi ja Israelit jaa'y, jøts ku ja ka'ap yja'aji pøni sa ja wyinaty tñijawidit ku ja yiknitsokpi myiif, jøts ja tñimaay: “Ix'oojknim ja mye'ent pøn øts nijuuni møøt nganamyiñaat'atiyit.”

²⁶ Xjats ja Pablo yjaakajpxwa'kxy, yide'en ja wyaañ:

—Meets migu'uktøjkti, pøni pøn jaty ja Abraham myigu'uk'ajtpy, jøts nayide'en pøni pøn ja Dios twindsø'jkidip, yø kajpxy yø ayuujk yø' adøm ndanitso'ok'ajtindip midi øts ixyam nnigajpxwampy. ²⁷ Uk-madooda'am, ja' pøn jaty jam tsinaadyøø Jerusalén nayide'en pøn ja wyindsøn'ajttøø, ka'ap ja tñija'widøø ku ja Jesús wyinaty tø kyexyi ja Dios Teety, jøts kyidyimwyinmadoodøø dø'on ja kajpxy ja ayuujk midi ja Dios kyugajpxy wyinaty tø tjaadya, ja' idø'on xyumikajpxtip etjp ku ja poo'kxin xøøw jam kyø'øm tsaptøjkjotpti; winets idø'on ja kø'øm ttami'ambøjktøø ja Jesús, jøts ja jade'en ttuundøø sa ja Dios kyugajpxy tyiktaañ ja ayuujk. ²⁸ Xjats ku ja kø'øm tkamiwinmaa'n-byaattøø ti ja tyukpøky'ajttip jøts tyik'ooktit, winets ja tñimaadyøø ja Pilato jøts ja Jesús tñankyik'oogiyit. ²⁹ Xjats ku ja jade'en ttundi tuki'iyi sa ja Dios kyugajpxy tjaadya, ja' nøkyjotpy, winets tyikwinajktøø jam kruskøjpx jøts tyiknaxøjkidøø. ³⁰ Ja Dios Teetyts ojts kø'øm tyikjujkyiky jadigojk jap oo'kpi jutjotpy. ³¹ Xjats ku pyidsiimy, winets ojts jeky ñanky'ijxyiyi jam jaa'y

wyindump midi myøøtwidejt ku choo'ndøø Galilea jøts ñøjkxtøø Jerusalén. Ja' idø'on ixyamdi pøn tkajpxtip tmadyaktip ja Jesús jøts ttukmado'odit ja jaa'y.

³² Jøts øøts nayide'en ixyam nnigajpxy nnimadya'aky, jøts meets ndukmado'ot ja øy ayuujk sa ja Dios Teety tpiktaajky ja wyandaajkin adøm n'apteety'amøjkøjxpti. ³³ Ja'agøjpx ku adøm ja n'apteety'amøj'ajtyindi, paty ja tø tpaduñ ja Dios Teety ja wyanda'aky jøts ku ja tø tyikpidsimy jadigojk ja Jesús jap oo'kpi jutjotpy, jade'en sam jap wyaañ myimajtsk salmojotpy ku yide'en sam jap wyaañ myimajtsk salmojotpy ku yide'en wyaañ: “Øts me n'u'nk'ajtpy, jøts tø mets mjuyky'ajtin ixyam nmø'øy.” ³⁴ Xjats ja Dios jade'en wyinaty tø ttanibiktaaggi jøts ku ja tyikpidsø'ømt ja Jesús jap oo'kpi jutjotpy, jøts nayide'en ku ka'ap ja ñine'kx wyindigø'øty, jade'en idø'on jap wyaañ ja Dios kyajpxy jap nøkyjotpy: “Nayide'en meets ngunuu'kxt sa øts ja David tø nnøjmi.” ³⁵ Paty nayide'en jadu'ukpi salmo wyaañ: “Ka'ats me Dios Teety ja xyikjatt jade'en jøts øts nnine'kx wyindigø'øty, pø xtsøky'ajtpxi mets.”

³⁶ Janch tiy idø'on ja' ku ja David ja yja'y ojts tpuðøki sa ja Dios ja wyinmaa'ñ myøøjyøø, xjats y'oo'knaa jøts nay jam ñajxøjkiyif ñ ma ja y'apteety'amøj'ajtyindi tø ñajxøkidit, jøts ja ñine'kx nayide'en wyindigø'øty.

³⁷ Pønts ja Dios Teety kø'øm tø tyikjujkyiky jadigojk, ka'ap ja ñajxnine'kx ja jade'en tø wyindigø'øty. ³⁸ Meets migu'uktøjkti, kuwañi xnijawidit ku ja Jesús ja' tu'ugyi xpojkipmaa'kxindip pøn meets ixyam myiktukmadoop. ³⁹ Ja'ayi dø'on tu'umchi niduki'iyi tpojkipmaa'kxp pøni pøn ja janchja'wiyip ja y'ayuujk, jøts ni ja Moisés kyutujk jade'en kyapojkpimee'kxy pøni pøn ja tpadump. ⁴⁰ Øyim mnay'eix'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

⁴¹ Meets nixekpi taxekpidi, pø nigyumaap mee xjawit sa n'adø'tøst;

pø ka' xjanchjawidit øy ja pøn kugajpxy mjadukmadøøyidi,

pø jade'en ne'egi jøts mdyimgyudigø'ødyit.

⁴² Xjats ja Pablo jade'en ttukmadoogijxy ja israelit jaa'y sa ja Dios kyajpxy wyaañ, winets ja myigu'uk jap tmøøtpidsømnaa jam tsaptøjkjotp. Xjats ku jap pyidsømdøø, winets ja Pablo ñimaajyøø pøn ka'israelit jaa'dyi, jøts nayide'en tñigajpxt nay ja'abi ayuujk jadu'ukpi poo'kxin xøøw. ⁴³ Xjats idø'on jade'en ñawya'kxidøø jam tsaptøjkjotp, jamts wyinaty namay ja israelit jaa'y, jøts namay ja abikpyi jaa'y midi nayide'en tpadundip ja israelit chinaa'yin, ja'ats niduki'iyi tpanøjkxtøø ja Pablo ja Bernabé, winets ja ojts yikajpxwejt jøts yikniimaadyøø: “Ejtp idø'on ja Dios kø'øm xtsøky'ajtyim paty ja Dios amumjoojt ja y'øgyajpxy xpaduujniyidit, jøts nijuuni xkamajtstu'uttit.”

⁴⁴ Xjats ku ja tpaatkojmaa jadu'ukpi poo'kxin xøøw, ku ja tjanchpatmadowa'andi ja Dios kyajpxy, winets jawaani kyameengijxy niduki'iyi ja kajp. ⁴⁵ Xjats ku dø'on ja israelit jaa'y jade'en t'ejxtøø, winets ja Pablo yiktami'ama'at'ajttøø ja namay jaa'y jøts yikmi'ambøk-tøø, xjats yikniimaadyøø ku ja jaa'y nugo twindaay'atti.

⁴⁶ Xjats ja Pablo ja Bernabé møk'ampy ojts tmigajpxti, jøts tnimaadyøø:

—Meets israelit jaa'y, jade'en mjapaat'atyidi jøts meets jawyeen myiktukmado'ot ja Dios kyajpxy; ka'ats meets ja xkupøkwā'andi, jade'en nugo mwā'andi jøts ka' pyaāt'atyidi jøts ja Dios y'ø'yajtin xkupøjkijidi, jam øøts ne'egi nøjkx ngajpxwa'kxy mā jaty ja jaa'y kya'israelitjaa'yidi. ⁴⁷ Kumi jade'en øøts ja nwindson'ajtim tø x'ane'emy ku yide'en wyaafi:

Tø me nbikta'aky jøts øts n'øgyajpxy n'ø'yayuujk xukmado'ojit tuki'iyi ja naxwii'ñit jaa'y, jøts xnijawidit sudso'ampy ñitso'ok'attit.

⁴⁸ Xjats ku dø'øn jade'en tmadoodøø pøn ka'israelit jaa'dyi, winets ja yjanchxondaktøø jøts ñawya'añidi kudam ja Dios kyajpxy janch'øy; jøts niduki'iyi ja tmibøjkøxtøø pøn wyinaty ja Dios kø'øm tø tpikta'aky, jøts niijuuni xøøw ja y'anmija'win kyawindigø'ødyit.

⁴⁹ Jade'en idø'øn jam ojts yikajpxwa'kxy ja Dios kyajpxy mā jaty ja kajp jam. ⁵⁰ Xjats ja israelit jaa'dyi ojts møøt tkajpx'ødyidi winaagin ja yaa'dyøjk midi ja kajp tni-tanaadyip, jøts møøt nayide'en ja tø'øxyøjkti midi ja kajp jaa'y windsø'jkijidip jøts midi ja israelit jaa'y tpaduujnidip ja yja', ja'ats ja kajp jaa'y yik'ambøjktøø, xjats ja Pablo ja Bernabé ojts yikjemandi yiktedundi kunim ja tyikpidsømdøø ja'abi etjotp. ⁵¹ Winets ja Pablo møøt ja Bernabé twinaptøø ja pu'ux jam tyekyøjpx, jøts jade'en ttuk'ejxtit ku jade'embi jaa'y ja tka'øyjawidi, winets jam ñøjkxnidi mā ja kajp txøøwi Iconio. ⁵² Xjats ja Jesús yjanchja'wibi pøn jap Antioquía tyandøø, janch ejtni xoni ja ñayjawiyidi ku wyinaty tø tyatøkiyidi ja Espiritu Santo.

Sa yjajttøø sa kyubajttøø ja Pablo ja Bernabé jam Iconio

14 Ku ja Pablo ja Bernabé jap yja'ttøø Iconio jøts jam tyøjkidøø tsaptøjkjotp, winets ojts kyajpxwā'kxti møk'ampy jøts may tpabøjktøø, nayide'en ja israelit jaa'y jøts may pøn jaty jam wyinaty midi' ka' y'israelitjaa'yidi. ² Xjats ja israelit jaa'y pøn tk-ababøjktip ja Dios kyajpxy, ja'ats t'agajpxidøø pøn ka'israelit jaa'dyi jøts ja tyikwinmaamyā'tni ja jaa'y pøn ja Jesús tjanchja'widip. ³ Paty ja ojts tyaa'nidi jeky'ampy ja Pablo møøt ja Bernabé, jøts ku ojts møk tkajpxwā'kxti sa ja Dios Teety ttamidsøjky ja naxwii'ñit jaa'y, winets nay ja' myøk'ajtin møøjyidip jøts mīlā-grī'ajtin ttu'undit jøts nayide'en ja ejxpajt tpikta'aktit, paty ja'agøjxp ojts yiknijawi kudam ja yjanchi midi ja kyajpxwā'kxtip, jøts kudam ja Dios Teety xjanchøjkyindi. ⁴ Jøts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jøts ja Jesús yja'ami. Majtsk jøøjp jap wyinaty ja wyinmaa'ndyi. ⁵ Jøts ja israelit jaa'y kajpxy tundøø møøt pøn ka'ap y'israelitjaa'yidi jøts ñøjkxtøø mā ja kudunk-tøjk, jamts tkajpx'øydøø møøt ja kudunk jøts tmi'ambøjktøø tpaga'atswidetwā'andøø ja Pablo møøt ja Bernabé. ⁶ Kuts ja Pablo ja jade'en tnija'widøø møøt ja Bernabé, xjats ja kyaknøjkxtøø jam Listra jam Derbe, jade'en ja kajp xyøøw midi jam Licaonia etjotp tandip,

jøts wine'enin ja abikyajp jam ni'awidity midi jam abiky etjotpi, ⁷ jamts ja tkajpxwā'kxti ja Dios y'øgyajpxy y'ø'yayuujk midi xyiknitso'ok'ajtindip.

Ku ja Pablo jam Listra yika'jch

⁸ Nay jam mā ja kajp txøøwi Listra, jamts wyinaty chøøni tu'uk ja yaa'dyøjk pakmā'at midi wyinaty niwine'enin kyidyimyø'øpy, tyimyjade'en idø'øn ja kye'jxy. ⁹ Jøts ja pakmā'at jaa'y myadøøpy ja' tuki'iyi pøni sa ja Pablo tyikwā'añ, winets ja Pablo twin'ijxy ku yjawi t'ajot'aty ja pakmā'at jaa'y ja Dios ku cho'okwā'añ. ¹⁰ Winets ojts møk tjanchmigajpxy jøts tnimaay:

—Tatani yø mdeky tiy.

Jøts ja yaa'dyøjk wya'kukøø tukwo'onji'igy xjats jade'eñi yø'øbyijky. ¹¹ Jøts ja mayjaa'y t'ejxtøø ku ja Pablo jade'en tyiktsøjky, winets ja jaa'y yjanchwan-gaktøø jøts wyandøø:

—iTø namajtsk ja Dios xjanchnigidaajkyindi nayide'en ejxim adøm njaa'y'ajtyim!

Tum ja Licaoniit ayuujk kyajpxtip.

¹² Xjats wyandaktøø ku Bernabé ja' Dios Júpiter, jøts ja Pablo Dios Mercurio, ja'agøjxp ku ja kya'amay.

¹³ Xjats ja teety midi jam tump Júpiter chaptøjkjotp kajp'am, ja'ats ojts tyiknijky ja tsakaa namajtsk janch xøxy janch pijyi mā ja Pablo møøt ja Bernabé jam wyinaty; yjanchtawindsø'øgiwyandip ja tsakaa, tyamiy-oxwandip ja tsakaa kitu'uk. ¹⁴ Ku tnija'widøø ja Jesús kyudanaabyi ja Bernabé ja Pablo jøts yjot-may'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsø'øgidi ejxim ja Diosin, winets tyøjkidøø mayjaa'y agujkp jøts møk yide'en wyandøø:

¹⁵ —iMigu'uktøjkti! ¿Tiku jade'en m'adø'øtsti? Pø nay jaa'yts øøts ejxim meedsin, yø' øø nnimimpy jøts mee ndukmado'ot jøts xmajtstu'uttit yø'øbi tunk, ka' yø tyuñ. Pabøjkidi Dios yja' pøn juky'ajtp, pøn tuki'iyi tyik'øyiñ ja tsajp jits ja naajx jøts ja mejy, tuki'iyi midi ja naxwii'ñit ejtp. ¹⁶ Kuwani Dios Teety yujy'aty ku ja naxwii'ñit jaa'y ojts y'ø'y'adø'øtsti kya'ø'y'adø'øtsti. ¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'øy. Ja'agøjxp idø'øn ja tuu tkejxy, jøts pyidsimy ja moojk ja xøjk midi adøm ndajuky'ajtyim, jøts ejtni xoni nnay-ja'wandit.

¹⁸ Øy idø'øn ja mayjaa'y møk yjayiknimaadyi, ka' pøn tmadøø, kuwani tyimyik'ookwā'andi ja tsakaa jøts ja Pablo møøt ja Bernabé jade'en yiktawindsø'øgiwya'andi ejxim ja Diosin.

¹⁹ Winets ja israelit jaa'y winaagin jam choo'ndøø Antioquía jøts Iconio, jøts jap yja'ttøø Listra mā ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaagatstøø. Tyimwyandip idø'øn ja jaa'y jøts ku dø'øn ja wyinaty tø tyimyik'ookti, winets ja t'ukpawejtsnidøø, jøts ja kajp pa'am tyiknøjkxtøø.

²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kyimjabom

choo'ndøø møøt ja Bernabé, jøts ñøjkxtøø mā kajp txøøwi Derbe.

²¹ Winets jam ojts tkajpxwā'kxti sudso'ampy ja Jesús xyiknitso'ok'ajtindit, mā ojts ñamayidi pøn ja Jesús yja' tmibøjktip, jøts ja Pablo ja Bernabé wyimbejtøø mā kajp txøøwi Listra, Iconio jøts nayide'en Antioquía.

²² Ku ja Pablo møøt ja Bernabé jam yjā'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchjā'widip, jøts ku Jesús yja' tu'ugyi tpaduujnidit, nayide'en yiknimaadyøø kuwāni ja ayo'on yikpaaty ku jap ndøkiwya'ānint mā Dios kyutujk, midi ja naxwii'ñit jaa'y ja tyanitanaapy. ²³ Jøts ja Pablo møøt ja Bernabé nayide'en tpiktaktøø ja møjaa'dyøjk mā jaty ja tsaptøjk wyinaty, jøts ku ja wyinaty tø Dios'ajot'atti tø y'ayuu'atti, winets ja Dios ja ttagødøjkidøø jøts kyunuu'kxidit, pø tøxi ja wyinaty tjanchjāwidip.

Ku ja Pablo møøt ja Bernabé yjā'jty jadigojk Antioquía jam Siria etjotp

²⁴ Xjats ku ja ñajxtøø jam Pisidia etjotp, jøts ja yjā'jt-tøø jam Panfilia etjotp. ²⁵ Ojts ja tkajpxwā'kxti ja Dios kyajpxy jam Perge kajpkøjxp, jødsnim ja ñøjkxtøø jam Atalia. ²⁶ Jamts ja ttatøjkidøø barki jøts ja ñøjkxti Antioquía, jam kajpkøjxp mā ja wyinaty tø yikugajpxaagidi tø yikunuu'kxāagidi, jøts Dios ja kyunuu'kxidit ku ja wyinaty jade'en ja tyunk tyiktso'onda'akti midi ixyam wyinaty tø tyik'abajtiñidi. ²⁷ Jøts kuts ja jam Antioquía kajpkøjxp yjā'jttøø, winets ja jam tnānkñamyujkidøø pøn jaty ja Jesús tjanchjā'widip jøts ja ttamimadyakøjxtøø sā jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sā Dios wyinaty tø yik'awajtsxyiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjāwidit ja nwindson'ajtim. ²⁸ Xjats ja Pablo jøts ja Bernabé jam jeky tyāā'nidøø, jeky tmøøtāā'nidøø ja jamit jaa'dyi pøn tjanchjā'widip ja Jesús.

Ku Jerusalén ñamyujkidøø ja møjaa'dyøjk

15 Nay ja'abi tiempi wināagin ja jaa'y choo'ndøø jam Judeit naxjotp jøts ñøjkxtøø mā ja kajp txøøwi Antioquía, jam tta'awanibøjkidøø ja jaa'y pøn wyinaty ja Jesús tjanchjā'widip, jøts tnimaadyi ku ja yāā'dyøjk kuwāni yikmo'odit ja ejxpajt ñe'kxkøjxp samit Moisés jekyip tyikyø'øy ja y'ana'amin, winets ja jade'en yiknitso'ok'atidit ja Dios. ² Winets ja Pablo møøt ja Bernabé møk'ampy ojts møøt ñagyajpxyidi ja jaa'y, jøts ku ka' jade'en y'øyi yø'øbi winmāā'ñ. Winets ja Pablo ja Bernabé yikpiktaktøø møøt wināagin ja jaa'y jøts jam ñøjkxtit Jerusalén, jamts tjaak'atskajpx'øyidit ja'abi winmāā'ñ møøt ja'adi pøn jaty ja Jesús kyudanaabyi'ajtpy, jøts møøt ja møjaa'dyøjk pøn jaty jam møjaa'y'ajttip tsaptøjkjotp.

³ Xjats kyajxtsoo'niyidøø ja janchjā'wibidi jam Antioquía, xjats choo'ndøø jøts jam ñaxti mā ja et txøøwi Fenicia jøts Samaria. Jamts tnigajpxtøø tnimadyaktøø, jøts ku namay ja jaa'y wyinaty tø tmajstutnidi ja møjaa'chinaā'yin pøn jaty ka'israelit jaa'dyi, jøts ttabøjk-

tøø tu'ugyi ja Dios yja'. Xjats ja yjanchxondaktøø ja myigu'uktøjk ku ja jade'en tniija'widøø ja'abi ayuujk.

⁴ Kuts yjā'ttøø ja Pablo møøt ja Bernabé jam Jerusalén, winets ojts kyajpxpøø'kxyidi ja mayjāā'y jøts ja Jesús kyudanaabyi møøt ja møjaa'dyøjk. Xjats ja tnigajpxti tnimadyakti sā ojts ja Dios møk tyukpudøkiyidi pøn ka'israelit jaa'dyi. ⁵ Xjats wināagin ja fariseit jaa'y pøn wyinaty ja Jesús yja' tpaduujnidip, wya'kukidøø jøts wyandøø:

—Kuwāni yø tpaduujnidit Moisés kyutujk pøn ka'israelit jaa'dyi øy yø Jesús yja' yjayikpaduñ, jøts kuwāni ejxpajt yikmo'odit ñe'kxkøjxp.

⁶ Winets jadigojk ñamyujkidøø ja Jesús kyudanaabyi jøts ja møjaa'dyøjk sudso'ampy yikajpxwimbett yik'adsojimbett. ⁷ Tø wyinaty jeky tkajpx'øyidi, jøts ja Pedro tyanaagyukiyi'ñ jøts tnimaāy:

—Meets migu'uktøjk, mee mniija'wip jøts ku øts ja Dios jekyip xwiwich, jøts øts ndukmado'ot ja jaa'y pøn ka'israelit jaa'dyi, sudso'ampy ja nwindson'ajtim xpojkpimaa'kxindit jøts ja tmibøktit. ⁸ Wā'ats ja Dios t'ixy sā jadu'uk jadu'uk nwinmāā'yindi, jøts yide'en'ampy yiknijawi ku Dios ja tø kyupikyidi ja'abi jaa'y, ku tø tyuktatøkiyidi ja y'Espíritu Santo nayide'en ejxim adøm ojts xmø'øyim ja kunuu'kxin. ⁹ Ka'ap ja Dios pøn ttsøky tkatsøky, tyumkupijky ja' wan tønøni, ka'ap ja t'ixy wan pøn t'israelitjāā'yi uk wan pøn tka'israelitjāā'yi, patyts ja nayide'en tø yikpojkipimaa'kxti pøn ka'israelit jaa'dyi ku ja tø tjanchjāwidit. ¹⁰ Migu'uktøjk, ztiku xmimaydi xmidajti pøn sā ja Dios tø tpiktā'aky, jøts ja' xapaatti pøn ja Jesús tjanchjā'widip? zTiku kawinaak winmāā'ñ xaguwaanidi? Nika'ats adøm ja ka'pxy n'ukpaduu'-na'andi, ni ja n'apteety'amøj adøm ja ka'pxy tø tka'ukpaduunidi. ¹¹ Pø ka'axi jade'en y'øyi, njanchjā'wa'amp adøm ja' ku ja Jesús xyiknitso'ok'ajtyindi kyø'ømdsøky, nayide'en sām ja' pøn ka' y'israelitjāā'yi.

¹² Xjats niduki'iyi y'amongøxtøø, jøts tpatmadoodøø ku ja Pablo jøts ja Bernabé tnimadyā'akti sā ja Dios møk pyudøjkiydøø, ku ja myilagritundi jøts ja Dios y'e-jxpajt tpaduujnidøø ja' y'etjotpti pøn ka'israelit jaa'dyi. ¹³ Ku ja Pablo jøts ja Bernabé kyajpx'abaajttøø, jøts ja myigu'uk midi Jacobo txøøw'ajtmip, ja'ats waan:

—Meets migu'ukti, ukmadowdi waani: ¹⁴ Tø ja Simón Pedro tjanigajpxy sudso'ampy ja Dios tø tmø'øy ja may'ajt myiduk'ojk pøn ka' y'israelitjāā'yidi, jøts ku ja Dios ja nayide'en t'u'nk'aty t'unā'jk'aty ja'abi jaa'dyi.

¹⁵ Kuwāni ixyam jade'en yjaty kumi jade'en ja Dios kyugajpxy ojts tjaadyañ, ku ja Dios yide'en wyaāñ:

¹⁶ Wimbejtøjmiip øts jadigojk, jøts nbiktā'akt nayide'en sām y'ijty ja David tjagyepy ja kutujk; jøts øts nja' niduki'iyi xpaduujnidit pøn ka'israelit jaa'dyi,

¹⁷ jøts niduki'iyi ja naxwii'ñit jaa'dyi pøn jaty ø nja'ajtpy.

¹⁸ Jade'en idø'on wyaāñ ja nwindson'ajtim Dios, pøn tyuknija'wiyi'ñ yø'øbi winmāā'ñ jekyip.

¹⁹ Xjats ja Jacobo tjaaknøjmi ja jaa'y jøts wyaāñ:

—Ka' nugo xmigajpxtit pøn ka'ap y'israelitjāā'yidi, pøn ja Jesús yja' tu'ugyi tpadunwajnidip, pøn tø tmajt-

stutnidi ja myøjaa'chināa'yin. ²⁰ Øy'ajtp ja nøky nga-jxindit, jøts ja'ayi ndukmadoo'indit jøts kidi ja ttsu'utsti midi ja tsamaxan yiktawindsø'jkip, jøts nayide'en ka'ap ja ñiyāa'y ñidø'øxy ñabyøjkxidit, jøts nayide'en ka'ap ja jiyujk tsu'uch ttsu'utstit midi ka' tyaxy, jøts midi yuktsumy'oo'kp, jøts nayide'en ka'ap ja ni'jpy tjøø'kxtit.

²¹ Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yiknigajpx'ity wimboo'kxin xøøw.

²² Winets ja Jesús kyudanaabyi møøt ja møjaa'dyøjkti jøts niduki'iyi pøn jaty tjanchjā'widip ja Jesús, jats ñawyiwejtsidi namajtsk ja jāa'y pøn tmøødidøø ja Pablo jøts ja Bernabé jam Antioquía. Ja'abi jāa'y midi yikwindsø'jkiy'ejttip, tu'uk txøøwi Judas Barsabas jøts jadu'uk txøøwi Silas, ²³ ja'ats tminøjkxtøø ja nøky jøts yide'en ja nøky wya'añ:

“Øøts idø'øn ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'iyi ja nmøøtjanchjā'wibidi, øøts idø'øn ja kajpxpoo'kxin nguejpxy, ngajpxpøø'kxpy øøts niduki'iyi ja nmøøtjanchjā'wibidi pøn ka' y'israelitjāa'yidi, pøn jam tsinaadyip Antioquía, jøts jam Siria, jøts nayide'en Cilicia. ²⁴ Tø øøts nnijawi ku wināagin ya'it jāa'y ojts ñøjkxti mā meets jam, jøts ojts nugo myikwinmaamya'adyidi, ku jade'en mni'ixyidi jøts ku kuwani ja mixyuna'jk yikmo'odit ja ejxa'an ñe'kxkøjpx, jøts ku kuwani ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy. ²⁵ Paty øøts yikxon ngajpx'øyi, jøts øø nbiktā'aky namajtsk ja kugajpxy midi mee m'ats'eixiyip, ja'ats myøødidip ja Pablo jøts ja Bernabé pøn øøts ndsøky'ajtpy, ²⁶ jøts pøn tø tyimñadyamiyoxiyi amumjoojt ja nwindson'ajtim Jesús. ²⁷ Ya'at øø nguejpxy midi txøøw'ajttip Judas jøts Silas, jøts møøt m'ukmadya'aktit jøts mdukmadowiyidit ya'at tuki'iyi. ²⁸ Tø ja Espiritu Santo t'øyjawi, nayide'ents øøts, jøts ka'ap meets mayjøøjp ja winmāa'ñ nmø'øy, øy ku ya'at xpadu'undit: ²⁹ ka' xtsu'utstit midi ja tsamaxan tø yiktawindsø'øgi; jøts nayide'en ka'ap ja ni'jpy xjøø'kxtit, ka' xtsu'utstit nayide'en o ti jiyujk midi yiktsumy'oo'kp, nayide'en ka'ap ja mniyāa'y mniðø'øxy mnabyøjkxidit. Pøni mbadundip yø'øbi winmāa'ñ, tsuj mduu'baattit meets jade'en. Yø'øbi ana'amin øø nguejpxy, Dios mgunuu'kxidip.”

³⁰ Xjats choo'ndøø ja kunøky jøts ñøjkxtøø jam Antioquía. Winets ñamyujkidøø ja jāa'y pøn ja nøky yiktanigaxtip jøts yikmøødyøø. ³¹ Ku ja tpa'ejxtøø, jøts yjanchxondaktøø ku jade'en ja winmāa'ñ yikmo'odi.

³² Kumi yjajttip wyinaty nayide'en ja Judas ja Silas sudso tkajpxwā'kxidit ja Dios kyajpxy. Xjats ttukja'gyukidøø, jøts ja janchjā'wibidi yjanchxondaktøø ku ja jade'en kyajpxjot'amøjkixidi. ³³ Ku jap waani y'uktāa'nidøø, winets ojts tja'ukminawya'kxyidi ja myigu'uk, ojts ja y'ukmø'øñiyidi ja kajpxpoo'kxin jøts ja Dios kyunuu'kxidit, jøts nay jam wyimbejti mā jam choo'ndøø. ³⁴ Xjats ja Silas wyinmāay, winets ja jam tyaañ. ³⁵ Nayide'en ja Pablo jøts ja Bernabé jap

tyaandøø Antioquía, namay ja myigu'uktø møøt, yik'ix-pøjktøø tkajpxwā'kxtøø ja Dios kyajpxy.

Ku ja Pablo myimajtsk ojk chøø'ñ kajpxwā'kxpi

³⁶ Tø wyinaty ja tiempi waani ñaxkojmi ku ja Pablo tni māay ja Bernabé, jøts wyaañ:

—Wan tjāa'myim jadigojk jam magajp mā jaty ja Dios kyajpxy tø nmiwidijtyim, jamts nmigu'uktøjk n'at-s'ejxint sã jam yjatti kyubatti.

³⁷ Xjats ja Bernabé twāa'wā'añ tu'uk ja jāa'y pøn txøøw'ajtp Juan Marcos; ³⁸ ka'ats ja Pablo ja twinjawi jøts ja' tmøødit, kumi tø ja jam wyinaty t'ukyiktañ mā et txøøwi Panfilia, ka'ap ja wyinaty tyikyø'øy ja Jesús kyajpxy. ³⁹ Xjats ñagyajpxidi jeky ja Pablo møøt ja Bernabé, ka' ja wyinmāa'ñ y'uknabyajtniyidi jøts jade'eñi ñawya'kxinidyøø; winets ja Bernabé tmøødiyii'ñ ja Marcos, jøts tyøjkidøø barkijøtpy jøts ñøjkxti mā et txøøwi Chipre, ⁴⁰ xjats ja Pablo ojts twāaji'iky ja Silas. Jøts ja janchjā'wibidi ñimāajiyiøø: “Nøjkx møøt ja Dios, Dios mgunuu'kxidip.” ⁴¹ Xjats ja choo'ndøø, jøts ñajxtøø mā et txøøwi Siria jøts Cilicia. Jamts tkajpxjot'amøjkidøø mā jaty ja tsaptøjk jam wyinaty.

Ku ja Timoteo tjamyøøt'ajty ja Pablo møøt ja Silas

16 Xjats jam yjā'ttøø mā kajp txøøwi Derbe jøts Listra. Jamts tpaattøø tu'uk ja janchjā'wibi, Timoteo ja xyøøw. Ja tyaak, israelit jāa'y ja' jøts yjanchjā'wip ja Jesús ja'; jøts ja tyety, griegit jāa'y ja'. ² Ja mixy Timoteo janchtsojkip ja janchjā'wibidi pøn jap wyinaty tsinaadyip Listra jøts Iconio. ³ Xjats ja Pablo tmøødiwya'añ ja Timoteo jøts pyudøkiyt, jøts ja Pablo wyinmāay jøts ku kuwani jawyeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jāa'y ku jam yjā'attit ja' y'etjotpti, wā'ats ja wyinaty tni jāwidi ku ja Timoteo tyety ka' y'israelitjāa'y. ⁴ Xjats choo'ndøø ñajxtøø mā jaty wyinaty ja kajp jam. Jamts tni gajpxti tni madya'akti ja janchjā'wibidi, jøts t'uktukmadoodøø ti jaty wyinaty tø tkajpx'øyiidi ja Jesús kyudanaabyi møøt ja møjaa'dyøjkti jam Jerusalén, jøts sudso'ampy ja jāa'y øy tsuj yjāa'y'attit pøn ka' y'israelitjāa'yidi. ⁵ Xjats tu'ugyi ja wyinmāa'ñ tpi ktaknidøø amumjoojt ja janchjā'wibidi, mayi'adøtstip ja jabom jabom.

Ku ja Pablo ojts t'ixy agumāa'yjøtpy tu'uk ja Macedoniit jāa'y

⁶ Xjats ja Pablo møøt ja Silas jøts ja Timoteo choo'ngojmidoø, jøts kumi ka'ap ja Espiritu Santo ojts tyikutuky jøts jam ñøjkxtit kajpxwā'kxpi mā et jam txøøwi Asia, winets jam ñajxtøø mā et txøøwi Frigia jøts Galacia, ⁷ jøts jam yjā'ttøø tsawa'an'am mā et jadu'uk txøøwi Misia, jam wyinaty yjatøkiwya'andi mā et jadu'uk txøøwi Bitinia, nika' ja Espiritu wyaañ jøts jam tyøkidit. ⁸ Winets ttayø'øñaxti yøñ'ampy ja Misia y'et ñajax, jøts jam kyidaktøø jam mejy'am mā tu'uk ja kajp txøøwi Troas. ⁹ Jamts ja Pablo koots twingumāay tu'uk ja Macedoniit jāa'y, windanaajyip tam ja jāa'y jøts yjanchminuu'kxā'agiyi, jøts ñi'ixy: “Tun ja may'ajtp,

nax jam ma ja Macedonia et, pudøjkik øøts.”¹⁰ Xjats ku ja Pablo jade'en kyumaay, winets øø nnay'a'ejxyøø jøts øø ndsøø'ñ. Øts idø'on Lucas pøn ya'at nøky tjaapy, øts idø'on ja nayide'en nmøøtsøø'n, jøts øøts ojts nniikxy jam Macedoniit etjotp. Nja'gyukip øøts wyinaty ku øøts ja Dios xwaadsøy, jøts øøts jam nøjkx ngajpxwa'kxy ja øgyajpxy ja ømyadya'aky midi xyiknitso'ok'ajtindip.

Sa yjajttøø sa kyubajttøø ja Pablo møøt ja Silas jam Filipos

¹¹ Winets øø ndøjkxy'ñ barkijøtpy, jøts øø tiy nniikxy jam mejy agujkp ma ja naajx lii'nim txøøwi Samotracia, jøts kyimjabomnim øøts ja mejy ndanajxy jøts øøts jam nja'jty Neápolis. ¹² Jam øø ndsøø'ñ tekyjø'øm, jøts øø nniikxy ma kajp txøøwi jadu'uk Filipos, ja' midi ja romanit jaa'y kø'øm pyiktaktøø. Møj kajp idø'on ja', ni-ma ja kajp jam jade'en wingon kyamøji. Jam øøts kawinaak xøøw n'uktaa'niy'ñ. ¹³ Jamts øø ngajpidsømnaa poo'kxin xøøw et, jøts øøts jam nniikxy møj nøø windump ma ja jaa'y kuwani ejtp ñøjkxti Dios'ajot'ajtpi. Jamts øø n'ixaajky, xjats øø ndukmadøø ja Jesús kya-jpxy ja tø'øxyøjki pøn jam wyinaty tø ñamyukyidi.

¹⁴ Jamts ja tø'øxyøjk pøn txøøw'ajtp Lidia, pøn tsoo'mp jam Tiatora kajpjotp; wetoo'kk ja tyunk'ajtpy, tum ja øy-bi tsuu'nk wet idø'on ja tyøø'kpy. Ja'ats idø'on ja Dios tjanch'ajot'ajtp, jøts nwindson'ajtim ja yikwinmaa'n-byaajtiyøø jøts tjanchjawit sa jaty ja Pablo wyaañ.

¹⁵ Xjats ojts ñøbety møøt ja myigu'uk, winets øø xminuu'kxaajky jøts wyaañ:

—Tundi may'ajt jaa'mindip øts ndøjkjøtpy, jap m'ats-jā'ada'aktit pøni mjanchwamp meets jøts ku øts nwindson'ajtim kyajpxy tø njanchpaduujniyi.

Xjats øø kuwani xyiktaañ.

¹⁶ Winets yide'en yjajty ku øø wyinaty nniikxy ma jaa'y jam Dios'ajot'atti, xjats øø nminabyajtiyi tu'uk ja kiixy midi wyinaty ximaapy, ja miku' wyinaty myøøt'ijtpy, ane'emy idø'on ja y'ity. Ku ja jade'en myiximay janchniimeenbyøjkxyip ja wyindsøn ja' pøn ja y'ijty ana'amiiyip. ¹⁷ Ja'abi kiixy øø xpawidejtøjkiñaa, xjats ojts møk yjanchwā'añ jam mayjaa'y agujkp:

—Ya'atpi jaa'y møk tjanchmidundip ja Dios midi jap tsajpjøtpy, yø' tkajpxwā'kxtip ja Dios kyajpxy sa ja xyiknitso'ok'ajtindit.

¹⁸ Ku jade'en pyawidejtiyidøø kawinaak xøøw, xjats ja Pablo møk y'adsipyiyi jøts t'ejximbijty, jøts tni-maay ja miku' midi ja kiixy wyinaty myøøt'ajtpy:

—Jesús myøø'ajtingøjxp mets miku' majtstu'ut yø kiixy. iPidsøm!

Xjats ja miku' tmajtstuujty nay jaty.

¹⁹ Ku ja kiixy ja wyindsøn tja'ejxnidi ku tø ja wyin-maa'ñ tyigatsni, ku ka'ap ja kiixy y'ukmeenbyøjkn, winets ja Pablo jøts ja Silas yikmatstøø, jøts yiknøjkxidøø kudunk wyindump jam møj maayjotp.

²⁰ Ku jam yikja'jtidøø tiidyumbi wyindump jøts ja tni-maadyøø:

—Ya'at jaa'dyi, israelit jaa'y yø'ødi, møk øøts xjanch'adsipy ya kajpjøjty, ²¹ ku ja kyø'ømdsinaa'yin

øøts kuwani xukpadunwā'añ midi øø ka' njanch-jagupøkwā'añ, jøts ja'abi tsinaa'yin ka'ap øøts ja nni-jawi. Abiky øøts, romanit jaa'y øøts.

²² Xjats ja mayjaa'y yjanchpidø'køjxtøø, jøts ja tiidyumbidøjk t'ana'amdi ja jaa'y jøts wan tyiknijandi tyik'ixjandi, jøts wan ja nawyopi t'ukupøkti namajtsk ja Pablo møøt ja Silas. ²³ Xjats ku yikwojp'abaajtidøø, winets ja tyiknøjkxtøø puxøjkjotp, jøts ja t'ana'amdi ja puxøjk adsinaabyi jøts tni-maadyi jøts waani ttyim-jaty'ejx'etit. ²⁴ Ku ja puxøjk adsinaabyi jade'en ojts yik'ane'emy, winets tyiktøjkiy'ñ jøts kawinaak puxøjk'aaaw ojts tyiknaxy, jødsnim ojts yikni'agii-byatti jam okp. Ku jade'en jam yikpiktaktøø, winets ojts ja kipy yiktanaxkø'ødi ja tyeky kadeni møøt.

²⁵ Xjats ja Dios'ajot'ajttøø jøts t'øødøø ja Dios kyajpxy jap puxøjkjøtpy, møk ja Dios ja tja'myajtstøø. Tsu-u'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyidi.

²⁶ Xjats ku chuu'miy'ñ, winets ja uix møk yjanchmiiñ, winets ja puxøjk møk yjantymy'adijch. Jøts ja puxøjk'aaaw tuki'iyi y'axetutkøjxnaa, jøts ja puxøjk jaa'y pyaktsum nayide'en wyinaakøjxtøø. ²⁷ Xjats ja puxøjk adsinaabyi ojts ñiwijy, jøts ja t'ejxpaajty ja pyuxøjk'aaaw jøts kudam ja wyinaty tø y'awaatskøxni, xjats ja jade'en wyinmay tø ja puxøjk jaa'y tijy pyidsømgøxnidi, winets ja yøchujx ja tju'jty jøts ja kø'øm ñanky'ookwā'añiyi.

²⁸ Xjats ja Pablo ojts t'ejxpaajty ja puxøjk ejx'ejtpi ku ja wyinaty jade'en ñadyunwā'añiyi, xjats tni-maay:

—Kidi jade'en mnadyuñiyi, ka'ap øø ngue'eky, tum ixyap øøts niduki'iyi.

²⁹ Xjats ja puxøjk ejx'ejtpi t'amidøø ja jaj jøts ja ojts pujtp tyøki jap puxøjkjøtpy. Xjats ja yjanchmibejpn jøts ja ojts ñagyuxendya'agyi jam Pablo tyekyjø'øm jøts ja Silas. ³⁰ Xjats ja tyikpidsiemy jøts tyiktiy, yide'en ja tni-maay:

—Migu'ukti, çti ø ndu'ump, sudso'ampy ø nniitso'ok'att?

³¹ Xjats ja Pablo møøt ja Silas ojts t'adsojimbetti, xjats tni-maadyøø:

—Møjawi amumjoojt ja nwindson'ajtim Jesucristo, jøts myiknitso'ok'atyyidit niduki'iyi møøt ja m'u'nk møøt ja mniidø'øxy.

³² Xjats ja Pablo jøts ja Silas ttukmadoodøø ja Dios kyajpxy ja puxøjk adsinaabyi møøt niduki'iyi pøn jaty ja jam wyinaty tyøjkjotp myøøtsinaapy. ³³ Nay jatyits ja puxøjk adsinaabyi tyikwajtsøø ja Pablo jøts ja Silas chaachi, winets ñøjkxtøø nøbajtpi niduki'iyi møøt ja y'u'nk jøts ja ñidø'øxy. ³⁴ Winets ja puxøjk adsinaabyi twaaay kaabyi jap tyøjkjøtpy, janch øy janch tsuj wyinaty ñayja'wiñidi niduki'iyi møøt ja y'u'nk ja ñidø'øxy, kumi tø ja wyinaty ja Dios tjanchjawidi.

³⁵ Xjats kyimjabom'ajty, winets ja tiidyumbidi ttaniguejxy ja kyugajpxy ja puxøjk adsinaabyi, jøts ku ja' tyikutuky jøts tyik'awa'atpidsømniit ja Pablo jøts ja Silas. ³⁶ Xjats ja puxøjk ejx'ejtpi tni-maay ja Pablo:

—Tø n'atsyik'ane'emy, ja tiidyumbitøjk kø'øm ja kya-jpxy tkajtpi jødsik meets jadi'iñi nyikpidsømniit; nøjknidits jotkujk, tø mee m'awa'atpidsømni.

³⁷ Xjats ja Pablo ka' tkupiky, winets tnimaay ja kuga-jpxy:

—Nayi romanit jaa'y øøts, tiku øøts jade'en nyiktuñ jøts ku øøts jade'en mayjaa'y agujkp nyikwøpy, nika'ap øø nyiktiidyuñ jøts jatyi øø nugo nyikpikta'aky puxøjkjøtpy; ¿sudso'ampy øøts ndejint ayu'uch jadi'iñi nyikmajtstu'utwani? ¡Ka' y'øyi! Wan ja kø'øm tmendi ja tiidyumbidi jøts øøts xyikpidsø'ømt.

³⁸ Jøts ja kugajpxy wyimbejtnidøø, jøts ttukmadoo-døø ja tiidyumbi sa ja Pablo ja kajpxy t'adsojimbijty, winets ja tiidyumbi yjanchø'økiñidi ku tnija'widøø jøts kudam ja Pablo jøts ja Silas nayide'en romanit jaa'yidi.

³⁹ Winets ja kudunktøjk tniñøjkxtøø t'atminuukxaktøø ja Pablo møøt ja Silas. Xjats tyikpidsømdøø jap puxøjkjøjty, jøts møk tnimaadyøø:

—Tun may'ajt pidsømdi ya waani kajpjøøjty.

⁴⁰ Xjats ja pyidsømdøø puxøjkjøtpy, jøts ñøjkxti ma ja Lidia tyøjk, jamts ja tminabyajtiddøø ja myøøtjanch-ja'wibidi, kuts ja tkajpxjot'amøjkidøø, winets ja choo'nidøø.

Ku ja Tesalonikit jaa'y yjanch'ambøjktøø

17 Xjats ku jam choo'ndøø, jøts ñaxtøø ma kajp txøøwi Anfípolis jøts nayide'en Apolonia, majtsk ja kajp ttanaxtøø jøts jam yja'ttøø møj kajpjotp midi txøøw'ajtp Tesalónica, jam wyinaty ja tsaptøjk. ² Winets ja Pablo tyøjkidøø kajpxwa'kxpi jam tsaptøjkjotp, sayim ja ttuñ øy maðsoo ma jaty ja wyidity, tigøøk samani jam tyik'ixpijky ja jaa'y wimboo'kxin xøøw.

³ Yide'en ja ojts ttuk'ixpiky pøni sa ja Dios Teety kya-jpxy ojts yikjaadyañ, jøts kuwani mye'ent ja yiknitsokpi, jøts kuwani y'ayo'ombaatt jøts y'oo'kimbaatt, jøts kuwani yjujkyøkt jadigojk. Yide'en idø'øn ja wya'añ:

—Jade'en ja Jesús yjajty midi mee ndukmadøøpy, nay ja' ja Dios Teety kyejpxy yiknitsokpi.

⁴ Ku ja Pablo ja ixpøjkin jam jade'en t'ukyiktandøø, winets ja israelit jaa'y winaagin tmibøjktøø, jøts ja møøt ñabyøjkniyidøø ja Pablo jøts ja Silas, jøts nayide'en namay ja griegit jaa'y pøn ja Dios Teety twindsø'jkidip. Nayide'en namay ja griegit tø'øxyøjk tmibøjkti pøn jam windsø'øgi'ejttip. ⁵ Winets ja israelit jaa'y niduki'iyi y'ambøjktøø pøn jaty ja Pablo kyajpxy y'ayuujk tkagupøjkxidip, ja'ats twaamuktøø ja ka'øypi jaa'y pøn jap nugo widejttip kajpjøtpy. Xjats nugo wyidejtnibøjkidøø jøts ja jaa'y tu'uk tu'uk tyik'ambøjktøø. Winets yja'ttøø tu'uk ja jaa'y tyøjkjøtpy pøn txøøw'ajtp Jasón, xjats awa'an'ampy tyøjkidøø tøjktotpy tajpi kaa'pi. Ja Pablo jøts ja Silas ja' idø'øn jade'en yik'ixaadyip jøts tyikpidsømw'a'andi jøts ja tyiknøjkxtit mayjaa'y agujkp. ⁶ Kumi ka'ap ja tpaatti jap tøjkjøtpy, winets ja tmatstøø ja kudøjk møøt ja myøøtjanch-ja'wibidi, xjats tpawetstøø tpakoo'tstøø, kudunk wyindump tyiknøjkxtøø, xjats ja Pablo jøts ja Silas yikxiguyaxtøø, jøts jade'en wyandøø:

—Ja'abi jaa'y pøn widejttip jøts tuki'iyi ja ñaxwii'ñit jaa'y tyikwinmaa'nmyatkøxti, tønim ja ya nayide'en yja'tmidi, ⁷ jøts ya'at Jasón ja tø tyikja'ada'aky tyøjkjøtpy. Yø'øbi jaa'y tuki'iyi y'ixwetswängøjxtip ja møj wind-

søn César kyutujk midi adøm ngajp xnitanajyamp. Jade'enxi wya'andi ku ja ja møj windsøn jadu'uk pøn txøøw'ajtp Jesús.

⁸ Ku ja tmadoodøø ja jaa'y møøt ja kudunktøjk, winets niduki'iyi yjanch'ambøjktøø. ⁹ Xjats ja Jasón kuwani tmøøpy ja meeñ ja kudunk jøts ja yikmajtstu'uttit; jøts yiknimaadyøø ku kuwani tyimbyidsø'ømdit ja Pablo møøt ja Silas jam kajpjotp jawyeen, jaanimts ja myeeñ ja jadigojk wyimbett. Winets jade'en yikmajtstuttøø møøt ja myigu'uk.

Sa yjajttøø sa kyubajttøø ja Pablo møøt ja Silas jam Berea

¹⁰ Xjats nay jatyi koots ja Pablo møøt ja Silas myøøtjanchja'wibi kyajxtsoo'nidøø jøts jam ñøjkxti ma kajp txøøwi Berea. Ku jam yja'ttøø winets nay jatyi ñøjkxti jam tsaptøjkjotp. ¹¹ Yuyjts ja ne'egi yjaa'y'atti ja'abi israelit jaa'dyi, ka'ap ja tyimyjade'enidi sam ja'adi pøn jam tsinaadyip Tesalónica. Chojktip ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky ma ja Dios kyajpxy jap yja'ayi, pøni tiy janch idø'øn ja' sa ja Pablo ja ñi'mxyidi. ¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpabøjktøø pøn ana'amdip, ja yaa'y ja tø'øxy. ¹³ Xjats ku ja israelit jaa'y pøn jam tsinaadyip Tesalónica tni-ja'widøø ku wyinaty ja Pablo tkajpxwa'kxy nayide'en ja Dios kyajpxy jam Berea, winets ñøjkxti ja israelit jaa'y jam Berea, jøts jamts jaa'y nugo tyikjot'ambøjktøø.

¹⁴ Jøts ja Pablo ja janchja'wibidi jatyi kyajxtsoo'niyøø jøts ja ñiikxy jam mejy'am, xjats ja myigu'uk japyi t'ukyiktaanaa midi txøøw'ajttip Silas jøts Timoteo.

¹⁵ Xjats ja Pablo yikjamyøøt'ajty jøts tmøødidøø jagambaat ma kajp txøøwi Atenas. Xjats ja Pablo tkajxjimbity ja ayuujk jøts ñøjkxtit ja Silas møøt ja Timoteo pojyi'iky, jøts ja jam tminabyaaididit ma ja wyinaty.

Sa yjajty sa kyubejty ja Pablo jam Atenas

¹⁶ Ixam idø'øn ja Pablo wyinaty t'awixy ja Timoteo jøts ja Silas, jøts ja ka'ap yjanchjotkuki ku jap kajpjøtpy t'ixy janchmay ja awanax ja tsamaxan midi'ibi ja dios'ajttip. ¹⁷ Kumi ka' yjotkuki, winets jam ñiikxy tsaptøjkjotp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabom ja ñiikxy maayjøtpy, japts nayide'en møøt kyajpxy myadyaajky pøni pøn jaty jap pyajtpy. ¹⁸ Jamts wyinaty ja ixpiky jaa'dyi winaagin midi y'ixpøjktip ja epicureo y'ixpøjkin, jøts jam nayide'en jadu'uk midi y'ixpøjkmidip ja estoico y'ixpøjkin, ja'ats ojts tpatmadowdi ja Pablo ku ja tkajpxwa'kxy pøni pøn idø'øn ja Jesús'ajtp, jøts ku kuwani ja ñaxwii'ñit jaa'y wyimbettit jadigojk pøn jaty tø y'øøky. Winets ja ixpiky jaa'y winaagin yide'en nawyajnidøø jøts wyandøø:

—¿Ti dø'øn yø chaachnigajpxy yø yaa'dyøjk, yik-mibøjkip idø'øn yø tijy ku jadinø'øn yjanchkajpxy?

Jøts jadu'uk t'adsojimbity:

—Wa' yø yjawi kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjkxøø mā ja tjagyapti juni tundaajk. Ja' ja et xyøøw Areópago, jamts tyiktøødøø jøts tniimaadyøø:

—Ja' øøts nnijawiwampy yø wenk ixpøjkin midi mmimimpy. ²⁰ Wenkts yjawi xkajpxy, nnijawiwampy øøts ti jade'en tyijpy ku jade'en mwa'añ.

²¹ Paty ja Pablo yik'amidøøy jade'en, kumi jade'en tuki'iyi ja Atenas jaa'y yujuky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxidit sa ja kø'øm wyinmaydi, winets ja jemy ixpøjkin tpaatti jade'en.

²² Winets ja Pablo wya'kukiyyi'ñ jam mayjaa'y agujkp mā jam yjuntitundi, jøts ja wya'añ:

—Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti midi mdios'ajttip.

²³ Kuts øts jam wyinaty n'et'ixy mā meets mdios xwind-sø'øgi, jamts ø ndayø'øbeyjty tu'uk ja altajr midi jap wyinaty ja letri tmøøt'ajtp midi yide'en wamp: "Ja Dios ya'at y'altajr midi kayiknija'wip." Øy'ajtp, ja'abi dios mi-di mee mwindsø'jkip jøts ka' xnijawidi pøni pøn ja', ja'ats meets idø'øn jam ndukmadøøpy pøni pøn ja'.

²⁴ Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tniwindsøn'ajtkøjxp wa'n tsajpi wa'n nnaajxi. Jøts ka'ap ja Dios kuwani tu'ugyi chøøni tsaptøjkjotpy midi jaa'y yik'øyip, ²⁵ jøts ka' Dios ti tyigø'y'ajtxi midi'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøk'ajtin, jøts pøni ti jaty ndajuky'ajtyindip.

²⁶ Tu'uk ja Dios Teety tpiktaajky adøm n'apteety'amøj midi niduki'iyi ja naxwii'ñit jaa'y y'apteety'amøj'ajttip. Tø ja ttanibiktaagi nayide'en ju-ni ja kya'axtit, nayide'en ja chinaadyaajk tmo'ot mā jaty ja chøønidit. ²⁷ Ja'agøjxp ja Dios ttuñ jøts ja adøm nwinmaa'nmyee'nindit pøni pøn ja'. Øy udy'a'aky nbaajttindit, ka' yagam dios, wingon ja møøt n'ij-tyindi. ²⁸ Pø Diosxi xyikujuky'ajttindip ku nnajxindi ndøjkindi; pø nayide'enxi meets mmigu'uk wya'añ wi-naagin pøn wijtyi, ku yide'en wya'andi ku ja Dios x'u'nk'ajtyindi. ²⁹ Pøni janch jade'ents jaa ku ja Dios x'u'nk'ajtyindi, ka'apts ja Dios jade'en nnaajtsja'wandit jøts ku ja y'oori ne'egi, uk pyuxplati ne'egi, uk chaad-sechi sa jaty ja jaa'y ja kø'øm wyinmaa'ñjotpy tyikpid-sømdi. ³⁰ Dios ka' ja y'ijty ttunk'aty ja jaa'y kya'øwyin-maa'ñ pøn tø ñaxti, jøts ixyam tuki'iyi t'ane'emy ja ñaxwii'ñit jaa'y øy yjamadsowi jøts wan tmajtstu'utti ja kya'ødyunk. ³¹ Kumi tø ja Dios Teety ttanibiktaagi ti xøøw ti et ja nøjxk ttidyuñ ja naxwii'ñit jaa'y; jøts tø ja tpikta'aky ja ejxa'an ku ja ojts tyikujukpyiky jadigojk ja nwindson'ajtim Jesús, jøts ja naxwii'ñit jaa'y jade'en ttuknijawi jøts ku dø'øn ja yja'aji pøn idø'øn me'emp.

³² Xjats ku ja Pablo jade'en ja ayuujk tyiknajxy ku jaa'y yujukpyiky jadigojk oo'kpi jutjotpy, winets ja Atenas jaa'y winaagin yjanchtaxeknibøjkidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi xøøw xjaakniga-jpxy.

³³ Xjats ja Pablo jade'eñi tmajtstuujty. ³⁴ Jamts ja jaa'y wyinaty winaagin pøn tjä'gyukidøø ja ayuujk, jøts ojts

tpaduujnidi ja Jesús yja'. Ja'abi jaa'y nidu'ugin txøøw'ajtp Dionisio pøn jam windsøn'ajtp mā ja juni tundaajk txøøw'aty Areópago. Jøts jam nayide'en tu'uk txøøw'aty ja tø'øxyøjk Dámaris, jøts jam ja niwinaagin ja myigu'uk.

Sa yjajty sa kyubejty ja Pablo jam Corinto

18 Xjats ja Pablo chøø'ñ jam Atenas jøts ñijky mā kajp txøøwi Corinto. ² Jamts tu'uk tminabyajttøø ja israelit jaa'y pøn txøøw'ajtp Aquila midi jam ku-gajp'ajtp mā et txøøwi Ponto. Ja'ats wyinaty namd-so'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'øn ja wyinaty jade'en tø tyuñidi pøn ja italiit jaa'y wyindsøn'ajttip, ja'ats tyikutuky jøts yikajxid-sømgøjxnidøø niduki'iyi ja israelit jaa'y pøn jaty jam wyinaty tsinaadyip Roma. Xjats ja Pablo ojts t'at-smiga-jpxy ja Aquila jøts ja Priscila, ³ jøts ja jam tmøøttaa'ñ tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky. ⁴ Jøts ja Pablo wimboø'kxin xøøw ñijky tsaptøjkjotp mā ja jam tni-gajpxy tni-madya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsøondøø jap Macedonia, jøts ñamja'tti Corinto mā Pablo jam wyi-naty, winets ja Pablo tu'ugyi tpadøjkyyi'ñ ja kajpxwa'kxin, jøts ka'pxy ttukmadøy ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip. ⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsepajpxy. Winets ja Pablo ja wyet twixijty, ja ejxa'an jade'en tmø'øy jøts ku jade'en jaayibaat tmajtstu'utt, winets wya'añ:

—Mgø'ømbøky meets wyinaty ku m'anmija'win wyindigø'ødyit; øts ka' mee n'uktunk'ajtni. Ejxti sa x'e-jxti, ixyam øts jam ne'egi nnøjkxt kajpxwa'kxpi mā pøn kya'israelitjaa'yidi. Tø net jaabaat nmajtstu'utti.

⁷ Winets jam chøø'ñ tsaptøjkjotp, jøts ñijky kajpxwa'kxpi mā tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtpy ja Dios ja nayide'en. ⁸ Jøts ja Pablo jade'en kyajpxwa'kxy Justo tyøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'øxy, pøn ja tsaptøjk niwindsøn'ajtp, ja' xyøøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbajtkøxti. ⁹ Xjats ja Pablo tu'ukpi koots ja nwindson'ajtim ñimaajyøø, jøts ja jade'en tjä'wiyi'ñ kidi jaa'y kyuma'ay ku ja ñi'mxyi:

—Kidi mdsø'øgi; jaa'kajpxwa'kx, kidi m'amøñ.

¹⁰ Ka'ap pøn sa mduñi, ixya me møø n'ity. Ja øts ja jaa'y ya may kajpøøjty njagyepy pøn øts n'ayuujk xmibøjk-wajniyip.

¹¹ Winets ja Pablo jam tyaa'ñ Corinto tukjumøjt jagu-jkp, jøts ja jaa'y ttuk'ixpiky ja Dios kyajpxy.

¹² Xjats tu'ukpi xøøw yjajty ku ja Galión wyinaty myøjwindsøn'aty jam Acaya, winets ja israelit jaa'y tmi'ambøjkti ja Pablo, jøts tyiknøjkxti mā ja kutujktaajk jam, ¹³ jøts ttukmadoodøø ja møj windsøn yide'en:

—Yā'at jāa'y ttukmibøjkp ja jāa'y jøts ku ja jade'en t'ajot'attit ja Dios sam ka' tyimy'ukpaat'ajtniyi. Ka'ats adøm ngutujk jade'en t'ukupøjkni.

¹⁴ Xjats ku ja Pablo wyinaty tyimgyajpxwā'añ, winets ja Galión tnimaay ja israelit jāa'y:

—Ku jeexyip ja kajaa winmaa'ñ, uk ja møk ayo'on jee tø tyuñi, øts ja jeexyip nyikwingukip meets israelit jāa'y; ¹⁵ kumi ka'ats yjade'eni, jabi nugo ayuujkxi yø' jøts mgø'ømgutujk meets yø', ka'ap øts yø x'uk-paat'ajtni, yikwingukidi yø pøni sã xyikwingukidi. Ka'ap øts yø'øbi ndiidyunwā'añ.

¹⁶ Xjats ja israelit jāa'y yikajxpidsømgøjxtø ja' kutu-jktaajkjøtpy. ¹⁷ Winets ja griegit jāa'y tmajtstø ja Sóstenes, pøn windsøn'ajtp jam tsaptøjkjotp, jøts jamy tñaxmiwojpidø jam yikutujkpi tøj'agø'øm, jøts ja møj windsøn Galión ka' tyimdyunk'aty niwinø'ønin.

Ku ja Pablo jadigojk yjā'jty jam Antioquía, winets ja myidigøøk ojk chøø'ñ kajpxwā'kxpi

¹⁸ Xjats ja Pablo yjaaktaa'niyi'ñ jeky. Winets ja myigu'uk tjaak'ukajxpoo'kxkøxnāa niduki'iyi ku ñøjkxwā'andi barkijotp jam Siria, møøt ja myigu'uk Aquila jøts ja Priscila. Xjats yjā'ttøø tekyjø'øm jam mejy'am mā txøøwi Cencrea, winets ja Pablo kø'øm ñabyiktaajkxiyi ja ejxa'an, jøts ja wyāay tke'jpy ku wyinaty tø tuki'iyi tpaduñ midi wyānda'aky'ajtpy. Winets barkijøtpy tøkiniðø. ¹⁹ Jøts yjā'ttøø mā kajp jam txøøwi Efeso, jamts ja Pablo ja myigu'uk t'ukyiktaañ jøts jam ñijkxy tsaptøjkjotp mā ja ojts tminagyajpxyi ja israelit jāa'y pøn jam namyujkidip. ²⁰ Winets ja Pablo øy yjayikminuu'kxaajky jøts jap waani tyāa'nit, ka'ats ja tkupijky. ²¹ Xjats ja møøt y'uknagyajxpoo'kxiniyøø, xjats tnimaay:

—Ja'agøjxp øts yam nniikxy ku øts jam Jerusalén nyiknaxwā'añ ja xøøw midi wingomp; kuwāni øts jadigojk nme'ent jøts mee n'ats'ext ku Dios wyā'ant.

Xjats jadigojk tøjkiyi'ñ barkijøtpy, jøts chøø'ñ jam Efeso. ²² Xjats ku ja yjā'jty mā kajp txøøwi Cesarea, winets jam choo'ngojmāa tekyjø'øm jøts ja ñijkxy Jerusalén, jam ja t'atskajpxpøø'kxy ja myøøtjanchjā'wibi, winets yjøptaajky mā kajp txøøwi Antioquía. ²³ Jamts ojts kawinaak xøøwin tyāa'ni Antioquía, winets chøø'ñ jadigojk jøts t'ayø'øgyixy jadigojk mā wyinaty tø wyidity mā et txøøwi Galacia jøts Frigia, jøts ja myøøtjanchjā'wibi tkajpxjot'amøki.

Ku ja Apolos ojts kyajpxwā'kxy jam Efeso

²⁴ Winet'ets ojts nay ja'abi tiempi yjā'aty jam Efeso tu'uk ja israelit jāa'y pøn txøøw'ajtp Apolos, jøts pøn kugajp'ajtp Alejandria. Ja'abi jāa'y janch tsuj janch øy ja kyajpxwā'kxy, janch ñijā'wip idø'øn wā'ats ja Dios kyajpxy. ²⁵ Tø ja wyinaty t'ixpiky ja Dios kyajpxy mā wyā'añ jøts ku ja nwindson'ajtim tsojk myeenwā'añ ja naaxwiñ. Ja'ayi ixpøjkin ja ñigajpxpy sã Juan Bautista ojts yik'ixpiky, jøts tigøjxp ku jāa'y ja tyiknøbejty. ²⁶ Xjats ja Apolos møk kyajpxøjkxiyi'ñ jam tsaptøjkjotp; kuts ja Priscila jøts ja Aquila ja jade'en tmadowdi,

winets ja abiky tjiwāawdøø, jøts ojts ka'pxy ttukmadowdi ku ja Jesús tø wyinaty y'atsmeni, jøts ti jaty ja ojts ttuñ. ²⁷ Xjats ku ja Apolos jam wyinaty ñaxwā'añ mā et txøøwi Acaya, winets ja janchjā'wibi pøn jam Efeso ja nøky tyik'øydøø, jøts ja janchjā'wibi tkajpxñigajxidøø pøn jam Acaya, jøts øy tsuj jam tyikjā'attit ja Apolos. Kuts ja jam yjā'jty Acaya, winets møk tjaakpudøjkxiyi'ñ pøn jaty ja Dios tø wyinaty y'ayo'ejxingøjxp tyukjanchjā'wi ja nwindson'ajtim Jesús, ²⁸ jøts ja jam kyajpxwā'kxy mayjāa'y agujkp, jøts wā'ats ttukmadoogijxy midi ka' mibaat pøn tkajpxyo'ont. Tyukmadoow tuki'iyi ku ja israelit jāa'y kyatiwyinmaydi, jøts pøni sã ja Dios kyajpxy jap yjaadyañi ku ja Jesús yiknitsokpi'aty, pøn ja israelit jāa'y yjajøp'ej'ejtipp.

Sã yjajty sã kyubejty ja Pablo jam Efeso

19 Ku ja Apolos jap wyinaty Corinto jøts ja Pablo jam ñajxy kojpkjotp, jøts yjā'jty jam Efeso mā tpaajty namay ja myigu'uk pøn jaty ja Dios tja'myajtstip. ² Winets ja Pablo jam tyiktiy jøts tnimaay:

—¿Tø meets ja Espiritu Santo mdatøkiyi ku ojts xjanchjawidi ja Jesús?

Jøts ja t'adsojimbettøø:

—Omik øøts idø'øn ja nnijawit jøts kudam ja Espiritu Santo jaa.

³ Winets ja Pablo jadigojk tyiktiy:

—¿Sudso'ampyts ojts mnøbatti?

Xjats ja t'adsojimbettøø:

—Jade'en øø nnøbejty sami Juan Bautista ja jāa'y tyiknøbejty.

⁴ Xjats ja Pablo wyāa'ñ:

—Nugo ejxa'an idø'øn ja Juan Bautista myøøy ja jāa'y ku ja yiknøbety, jade'en'ampy ja jade'en ttuñ jøts ja jāa'y jade'en yiknijawidit jøts ku ja tjanchyiktigatsti ja chinaa'yin. Nayide'en ja tnimaay jøts ja amumjoojt t'ajot'attit pøn wyinaty menwampnim, ja Jesús idø'øn yiktejp wyinaty menwamp yiknitsokpi.

⁵ Xjats ku jade'en tmadoodøø ku ja Pablo jade'en tni-gajpxy, winets ojts ñøbatti ja nwindson'ajtim Jesús køjxp; ⁶ ku ja Pablo jade'en kyønixajidøø, jøts ja Espiritu Santo ñimejnidi, winets ja abikpyi ayuujk ojts tkajpxti, jøts tkajpxwā'kxti ja Dios y'ayuujk pøni sã ja Dios wyinmaa'nmyø'øyidi. ⁷ Nimakmajtsk ja wyinaty yjāa'y'atti.

⁸ Tigøøk po' ja Pablo jap yø'øy'ijty jam tsaptøjkjotp mā jam møk'ampy kyajpxwā'kxy, jøts ttukmibiky jade'en ja jāa'y sudso'ampy ja Dios ja nitanaa'yin tpiktā'aky. ⁹ Jamts wināagin pøn tkamibøjktip, ja'ats møk ja wyinmaa'ñ tpiktaktøø jøts jam mayjāa'y agujkp tjanchtaxe'ekti ja Dios kyajpxy. Xjats ja Pablo ja møøt ñamyatstuujtniyøø pøn ja ka'øy ayuujk tjagyaptip, winets ja tmøødiñāa ja myøøtjanchjā'wibi jøts tmøødiyii'ñ mā jāa'y tu'uk txøøwi Tiranno pøn ja ix-pøjktāajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy.

¹⁰ Jade'en idø'øn ja jam tyuñ majtsk jumøjt, ja'agøjxp idø'øn ja jāa'y ojts tñijā'wigyøxti jagambaat ja Jesús kyajpxy, jade'en ja israelit jāa'y jøts nayide'en pøn

ka'israelit jaa'dyi, pøn tsinaadyip Asia etjotp. ¹¹ Jøts ja Dios møk tmø'øy ja myøk'ajtin ja Pablo jøts ja milagri ja ttuun, ¹² jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi ttatsoktø, jøts ja miku' jade'eñi myajtstuujtido.

¹³ Jam wyinaty niwinaagin ja israelit jaa'y pøn nugo widejttip kajp kajp. Ja' ja tyunk'ajttip ja miximaaky ja mimuu'kk, jøts jade'en ja miku' ttukmajtstu'utti ja jaa'y, nay ja Jesús myøk'ajtin yiktunwajnip, jøts tnøjmi ja miku':

—Øts wamp, majtstu'ut yø jaa'y Jesús myøk'ajtingøjxp midi kyajpxyø'øpy ja Pablo.

¹⁴ Tu'uk ja israelit jaa'y pøn txøw'ajtp Esceva, pøn ja teety niwindsøn'ajtp, ja'ats idø'on ja y'unajk jade'en adøstip, niwixujk wyinaty yjaa'y'atti. ¹⁵ Xjats ku ja jade'en ttundi, winets ja miku' y'adsojimbejtijidø, jøts yiknimaadyø:

—Ja' ø n'ejxkapy pøn txøw'ajtp Jesús, jøts nayide'en ja' pøn txøw'ajtp Pablo; jøts meets ka' mee n'ejxkapy pøn ja mibø meets.

¹⁶ Winets ja jaa'y pøn wyinaty ja miku' tmøet'ajtp, jøts møet ñamyajtsiyø ja niwixujkpi jaa'y, jøts ja jade'en myimajada'agyidi ja miku', jøts niduki'iyi yikakøjxidø janchwindsaachi jøptsaaçi, niwaj'ats ixwaj'ats idø'on ja yjanchpidsømnidø jap tøjkjøtpy.

¹⁷ Ku dø'on ja jade'en yjajty jam Efeso, winets niduki'iyi tnija'widø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widø jade'en ja ayuujk, winets niduki'iyi ja jotmay yjanch-paajtidø, jøts tu'ugyi ja nwindson'ajtim yja' tmøjpi-ktajkø.

¹⁸ Xjats nayide'en namay pøn jaty tmibøjktø ja Jesús yja' winets ja pyøky tuki'iyi tkajpxnaxkøjxtø, sa y'ijty kya'øy'adø'øtsti. ¹⁹ Jøts nayide'en may pøn jaty y'ijty tyundip ja miku' tunk winets ja kya'øñøky tuki'iyi tniøgyøxnidø jam mayjaa'y y'agujkp. Xjats ku tpayø'ødyø ja nøky ja chow, wixijxmyajk mil idø'on tpayø'ødyi tum ja plati meeñ. ²⁰ Jade'en idø'on ja nwindson'ajtim Jesús ja myøk'ajtin møj tnanxy'ijxyiyi.

²¹ Xjats ku dø'on jade'en yjajty, winets ja Pablo jade'en wyinmay jøts jam t'ats'ejxwaj'ajti ja myøet-janchja'wibi jam Macedonia y'etjotp, jøts nayide'en Acaya y'etjotp, winets jam yja'atwaj'ajti jadigojk Jerusalén. Jøts nayide'en wyaj'ajti, ku jam y'uknaxt Jerusalén jøts nayide'en ñøjkxt Roma. ²² Xjats ku jade'en wyinmaay ja Pablo, winets ja pyudøjkibi tkejxy namajtsk jam Macedonia. Timoteo ja xyøw ja pyudøjkibi jøts jadu'uk Erasto, jøts ja Pablo jam jawaani yjaaktaaj'niyiñ Asia.

Ku ja Efesit jaa'y yjanch'ambøjktø

²³ Winet'et ja Efesit jaa'y tyiktseptaj'akwaj'andi ja Jesús yja'. ²⁴ Tu'ugyi dø'on ja' pøn jade'en tyiktso'ondaajk ja ayuujk, Demetrio ja xyøw. Ja'abi tunk idø'on ja yjagyepy, tum ja plati dø'on yiksandi'øyip, jøts nayide'en ja mutsk tsaptøjkunajk tyik'a'øyiñaxy nayide'en sami dios Diana çaptøjk t'ixy. Janch

nimeenbyøjktip idø'on ja tyunk ja' pøn jaty jap møet tyuñ. ²⁵ Xjats ja Demetrio twaadsøoy niduki'iyi pøn jaty nay yø'øbi tunk tmøet'ajttip, xjats ja tniimaay:

—Migu'uktøjkti, mnija'widipxi ku yø'øbi tunk nduk-tanajxindi janch øy janch tsuj ku ya njanchmeem-byijkyindi; ²⁶ kumi m'ijxpy meets, mmadøøpy meets ku ja Pablo jade'en tkajpxyø'øy jøts wyaj'ajti ku ka' yø' Diosi midi jaa'y yik'ø'yip sa adømin; jade'en ja Pablo ja jaa'y namay tø ttukmibiky, kidi yayip nugo yjaty, niduki'iyi dø'on ja Asiit jaa'y ja tnija'winidi. ²⁷ Ka' yjanch'øyi, janch tsø'øgi møet yø', tsojk adøm ndunk jade'en wyindigø'øyindit, jøts nayide'en yø dios Diana çaptøjk tsojk yø nayide'en kya'ukyikmøjpiktaknit pøn yø twindsø'øgidi pøn jaty yaj Asia tsinaadyip, jøts pøn jaty tsoo'ndip o manajax o magajp.

²⁸ Ku ja mayjaa'y jade'en tmadoodø ja Demetrio y'ayuujk, winets ja yjanch'ambøjktø jøts niduki'iyi wyandø:

—Janch møj adøm ndios Diana jøts ka' kyudigø'øty!

²⁹ Xjats ja kajp jaa'y xem yam yjanch'adøtsnibøkidø, jøts ja Macedoniit jaa'y namajtsk yikmajtstø pøn txøw'ajttip Gayo jøts Aristarco midi ja Pablo myøetwidijtpy. Xjats yikpawejtstø yikpakoo'tstø, xjats yiknøjkxidø jap møj tøjkjøtpy ma ja kajp ja yjunti tundaajk jap tjagyapti. ³⁰ Jamts ja Pablo nayide'en tyøkiwyaj'ajti jøts ja myigu'uk t'atskugajpxwaj'ajti pøn wyinaty tø yikmatsti, xjats ja nay ja myøetjanchja'wibi pøn møet wyidity ka'ap ja myajtstuujtido. ³¹ Winets ja Pablo myiwin'ijxy nayide'en tkajxtø ja y'ayuujk pøn jam windsøn'ajttip Asia, jøts ku ka' jam tpadøkit ja myigu'uk. ³² Xjats ja jaa'y jam junti tundaajkjøtpy nugo yjanchkajpxjø'økti, øy sa tu'uk jadu'uk yjanchwaj'andi kumi tø ja jaa'y wyinaty namay yjanchyø'ømyukti, jøts ni tkanijawidi namay pøni tigøjxp idø'on yø'ømyukti. ³³ Xjats tu'uk ja israelit jaa'y ja myigu'uk tyukmadoojo pøni ti ayuujk idø'on jap ñiyø'ømyuktip, ja' xyøw Alejandro, ja'ats ja myigu'uk ojts kuwani ñajtswetsiyi jøts jam kyajpxt mayjaa'y agø'øm. Winets ja Alejandro xyajijky, ja' tyijpy ku çajpxajy jøts ja niduki'iyi y'amo'ondit, ja' kyugajpxwampy ja myigu'uk midi tø yikmatsti namajtsk. ³⁴ Ku ja Alejandro yik'ejxkajpy kudam ja y'israelitjaa'y, winets ojts jinaxy yjanch-jaakajpxjø'økti. Kajpxti ja majtsk hora'an, xjats wyaj'andi:

—Janch møj adøm ndios Diana jøts ka' kyudigø'øty!

³⁵ Xjats ja eskribaan ojts kø'øm tyik'amøñ ja may-jaa'y, jøts tniimaay:

—Meets Efesit jaa'y, ukmadowdi. Niija'widip niduki'iyi ja naxwii'ñit jaa'y ku yø Efesit jaa'y t'ejx'etti adøm nmøjdios Diana çaptøjk, jøts nayide'en yiknijawi ku n'ejx'ijtyim ja y'awanax midi kidajk tsajpjøtpy. ³⁶ Kumi janch idø'on ja yjajty, kidits nugo mdsø'øgidi, ka' pøn ti ttuñ, tukween meets et, tsuj mjaaj'ajti ³⁷ kumi yaj'at jaa'y midi meets ya tø xyikmiñ ka' yø ti ttundi, jøts nika'ap yø tjemdejti ttedejti adøm ndios Diana. ³⁸ Jøts Demetrio møet ja tyumbi, pøni jaa'adi pøn møet ñañi'øøniwyaj'andi, mibajk yikpayø'ødyit jam kudunk wyindump, jøts tniçajpxtiit kija' ja pyøky sudso'ampy

ñañi'ðøniyidi. ³⁹ Pøni wenk winmaa'ñ yø' midi meets ixyam m'amidøøpy, mibaat myø'omyuktit jøts yikxon ngajpx'øyi'indit møøt ja kudunktøjk; ⁴⁰ tø ja wyinaty kya'øyi ku jotmøñ jam nyikni'øø'na'andit jam møj windsøn wyindump, jøts ku ja jotmøñ wyā'ant ku adøm ja møøt ñachep'ijxya'am. Niti winmaa'ñts adøm sudso'ampy n'adsojimbejtindit, ku jotmøñ t'amido'ot tigøjpx yā jade'en n'adijchindi ngajotkujkindi.

⁴¹ Xjats ku ja eskribaān jade'en kyajpx'abajtjiyih'ñ jøts yø'øwya'kxnidøø niduki'iyi ja jaa'y.

Ku ja Pablo wyidijty Macedoniit etjotp jøts nayide'en Greciit etjotp

20 Xjats ku ja mayjaa'y jade'en ñiyjotkukidøø, winets ja Pablo ja myigu'uk twāadsoogijxy jøts ja ojts tjaak'ukajpxwejni, ojts ttukmadøy midi ja wyinmaa'ñ'ajtpy; winet møøt y'uknagajpxpoo'kxiniyi jøts jam ñijkxy mā et txøøwi Macedonia. ² Winets jam ojts tkajpxpoo'kxixy tjot'amøkajpxkixy niduki'iyi ja myigu'uk mā jaty jawyeen wyinaty tø ñaxy, winets jam choon'ngojmā jøts jam yja'jty mā ja Grecia et. ³ Jamts y'uktaa'niyih'ñ tigøøk po', xjats ku jam choonwāni barkijøtpy jøts ñøjkxwā'añ Siria, winets nay jamiy tni-jā'wiyih'ñ kudam ja israelit jaa'y ñiwinmayiyi jøts yik-matst jap barkijøtpy. Winets wyinmaa'y jøts ne'egi ñøjkxt tekyjøm, paty jadigojk nay jam wyimbijty Macedoniit etjotp. ⁴ Ja' ja wyinaty yjamyøøt'ajtpy niwix-ujk ja myigu'uk pøn txøøw'ajttip Sópater pøn ku-gajp'ajtp Berea, jøts ja Aristarco, jøts jadu'uk Segundo pøn kugajpidip Tesalónica, jøts ja Gayo pøn kugajpip Derbe, jøts jadu'uk txøøwidi Timoteo, jøts ja Tíquico, jøts jadu'uk Trófimo pøn jam kugajp'ajttip Asia. ⁵ Ku jam yja'tti Filipos, jamts øts wyinaty n'awixy, øts Lucas nxøøw midi yā'at nøky tjaapy. Xjats ja niwixujkpi jaa'y cho'onjawyeenidøø, jøts øøts jam ndāāñ møøt ja Pablo, jøts øøts jamnim x'awixy jadigojk mā kajp txøøwi Troas. ⁶ Nay jamiy øøts ja xøøw njāakty-imy'ukyknajxy jam Filipos, ja'abi xøøw ku tsapkaaky yikay midi kalevaduri møøt. Xjats øøts jam ndsøø'ñ xøguixy jøts øøts ja barki jam ndatøjkiñāā, jødsnim øøts kyimagoxk xøøw njā'jty jam Troas mā øøts ja nmigu'uk nnajtspajtiyih'ñ, jamts øøts ojts ndāā'ni wixujk xøøw.

Ku ja Pablo ja myigu'uk ojts tmigajpxy jam Troas

⁷ Ku dyomingixøøw'ajty jøts ja Jesús yja' yø'omyukti, jøts ja tsapkaaky tyikwā'kxwā'āndi sā ja nwind-søn'ajtim ojts tñajstuni jøts tñankyayī, xjats ja Pablo jap nayide'en kyajpxwā'āñ. Kumi kyimjabom ja wyinaty choonwāni paty idø'on ojts jeky'ampy kyajpxy kunim myøjtsuu'miyih'ñ. ⁸ Jap ojts ñamyukyidi tigøøk nipatøjk-ijxy mā jap wyinaty lampiri may yjajy; ⁹ jøts tu'uk ja mixy jam wyinaty chøøni wentāni'am pøn txøøw'ajtp Eutico. Kumi jeky ja Pablo kya'amaāy, winets ja mixy jamiy mya'uu'yjøknaā jøts tu'ugyi ojts tyimyaanijky, winets jam ojts kyunaxy jam nipatøjkøjpx jøts ñaxki-dāajky najxkøjpx, jam øøky yikwejtsji'jky. ¹⁰ Jøts ja

Pablo tniwinajky jøts jam ñagyøxmuujtsøø oo'kpi ñikøjpx jøts tkøbatxajiyih'ñ, jøts tnimaa'y ja myigu'uk: —Kidi mdsø'øgidi; jujky yø'.

¹¹ Winets ja Pablo jadigojk pyatøjkigoyjmi jap nipatøjkijxy; japts ja tsapkaaky ttukwa'kxy, jøts kyaadyøø; winets yjaāka'amaāy kunim xiijñiyih'ñ, jøts ñøjkxnaā. ¹² Xjats ja jaa'y tjanchtaxondaktøø ku ja mixy ja øy tsø'øky tyiknøjkxnidi.

Ku ja Pablo chøø'ñ jam Troas jøts ñijkxy Mileto

¹³ Winets øø ndsoonjawyeeniyih'ñ barkijøtpy, jøts øøts jap n'aweixwā'āñ ja Pablo mā kajp txøøwi Asón, tekyjøm ja yø'øwya'āñ ku ja jam ñøjkxwā'āñ. ¹⁴ Ku øøts ja nminabyajtiyøø jam Asón, winets øøts ja møøt barkijøtpy ndøjkijyih'ñ, jøts øø nmøøtnijky mejñinaxy mā kajp txøøwi Mitilene. ¹⁵ Jøts øøts jam ndsøø'ñ jadigojk, jøts øøts kyimjabom jam nnajxy ja' y'awemp mā et jam txøøwi Quío, winets øøts njā'jty jadu'ukpi xøøw mā kajp txøøwi Samos. Jøts øøts nnijkxy poo'kxpi mā kajp txøøwi Trogilio, jøts nay kyimjabomgøjmyi øø njatkojmi mā kajp jam txøøwi Mileto. ¹⁶ Jade'en idø'on yjajty kumi ka'ap ja Pablo jeky tyiknaxwā'āñ ja xøøw jam Asia etjotp, paty kyanijkxy Efeso; kumi ja' ku tsojk yja'atwā'āñ Jerusalén jøts jam tyiknaxwā'āñ ja Pentecostés xøøw.

Ku ja Pablo ttukmadøøy ja Efesit møjaa'dyøjk yā'atpi ayuujk

¹⁷ Ku øø njam'ajty Mileto, winets ja Pablo twāadsøøy pøn jaty jam møjaa'dyøjk'ajttip mā tsaptøjk jam Efeso, ¹⁸ xjats ku ja yja'ttøø jøts tnimaa'y:

—Meets mnija'wip sā øts yā Asiit etjøøjty n'øyjaā'y'ajty ku øts yā miduk'ojk ojts nmiñ, jøts ixyambaat jade'eñim njāā'y'aty. ¹⁹ Mnija'widip sā øts ejtp nbadu-uñ ja nwind-søn'ajtim Jesús y'ayuujk jøts ka'ap øts nnamyikexyiyi, njanchkuyāajxip øts ku ja jaa'y tkatsok-ti ja Jesús yja'. Jøts nayi mnija'wip meets sā øts yā ojts n'ayo'ombāaty ku øts ja nmigu'uk israelit jaa'y xjem-dundi xedundi. ²⁰ Ka'ats meets ndamajtstu'uty ja øgya-jpxy midi meets kø'øm myiktu'ump, ku ø nnigajpxy nayide'en mayjaa'y agujk jøts adøjkjøjty nayide'en. ²¹ Niduki'iyi øts ndukmadoogixy jade'en ja israelit jaa'y jøts nayide'en pøn ka'israelit jaa'dyi, jøts ku tma-jtstu'uttit ja kya'ødyunk amumjoojt møøt ja Dios, jøts tmøjawidit tjanchjawidit ja nwind-søn'ajtim Jesucristo. ²² Ixyam øts kuwāni nnijkxy Jerusalén ja'agøjpx ku ja Espiritu Santo møk xwāadsøy, ka'ap nnijawī pøni sā øts jam nøjkx njaty. ²³ Jade'eñi nnijawī pøni magajp nnijkxy njā'aty, jade'en øts ja Espiritu Santo xuknijawī jøts ku kuwāni nyiktsu'umt jøts jam møk n'ayo'ombāatt. ²⁴ Ka'ats øts yø nmøjpikta'aky; wan ø t'øøky, ka'ap ø nnabya'ayøyi ja'agøjpx jøts øts øy jotkujk kuwāni nyikyø'øwya'āñ yø ndunk, kunim yjøpkøxt midi øts nwind-søn'ajtim Jesús tø xmø'øy, jøts øts ja jaa'y øy tsuj ndukmado'ot ku ja Dios kø'øm tpa'ayøy ja ñaxwi-i'ñit jaa'y.

²⁵ Tø øts yā ngajpxwa'kxy ja Dios myøk'ajtin sã ttani-tani ja yjã'y, ixyam inet najtsja'wip øts jøts ku meets ka' n'ukniwimbejtnit. ²⁶ Paty meets ixyam ndukmad-owa'añ jøts ku nipøn nganadyapøkyjawiit põni jaa wi-naagin tyuu'tigøødyi. ²⁷ Kumi tø øts nnigajpxy tuki'iyi põni sã ja Dios ja wyinmaa'ñ tpiktaajky, ka'ap øts midi n'ayu'uch'aty. ²⁸ Jøts nayide'en meets kø'øm mnay'e-jx'etidit, jøts niduki'iyi nayide'en ja migu'uktøjk x'e-jx'ettit, kumi tø meets ja Espiritu Santo mbikta'agiyi jøts mdaãndi ejx'ejtpi põni pøn jaty ja Jesús yja' tpadu-ujnidip, pøn ja nwindson'ajtim Jesús kø'øm kyu'o'jkim-baajtip. ²⁹ Nija'wipts øts ku øts yā ndsoont jøts mye'endit wenkpi jã'y, jøts myikwinmaa'nmya'at-wa'anidit, jøts tyikutigøøwya'ant ja Jesús yja'. Jade'en idø'on y'adø'øtswa'andit kakeey miy'uk tyikutigøy ja borreegi'u'nk. ³⁰ Jøts nayide'en meets winaagin nøjkx xwin'øndi ja mmøøtjanchja'wibi, jøts ja ukmibøktit midi ka' tyiyi yjançi. ³¹ Paty øyim mnay'ejx'etidit; ja'myatsta'am ku meets tigøøk jumøjt xinaxy tsunaxy ngadamajstu'uty ja kajpxwejin ayo'ejxingøjpx.

³² Meets migu'uktøjkti, Dios møk mbudøkiyidip, jøts nayide'en myikti'iwynmayiyidit y'øy'ayuujkøjpx midi xamidsojkindip sã ja x'ayo'ijxyindi, jøts nayide'en myikmo'odit ja øy'ajtin ja tsuj'ajtin møøt ja'adi ni-duki'iyi põni jaty ja Dios wyinaty tø tyikpøkwya'ach.

³³ Ka' meets yā ti n'amidøøy, ni meeñ, ni wet, niti.

³⁴ Wa'ats xnijawidi ku øts kø'øm ojts nnay'amiduniyi, jøts øts kø'øm nbaajty põni ti jaty øts xka'ejtxøø, nduk-paajt øts nayide'en ja nmigu'ukti ja yja' pøn jaty ø møøt nwidijty. ³⁵ Ejtp øts ja nnigajpxy jøts ku jade'en mnamyidunidit, jøts xpudøkidit ja mmigu'uk pøn ja yja' ka'ejtxip, ja'myatsti ja nwindson'ajtim Jesús y'ayu-ujk sã ja wya'añ yide'en: "Ne'egi møj ja xondaajkin ja wyimbidsø'mxiiyi põni windsø'jkip, jøts ka'ap ja' pøn yikwindsø'jkip."

³⁶ Xjats ku ja Pablo jade'en kyajpx'abajtyii'ñ, winets møøt ñagyxendyaajkøø ja myigu'uktøjk jøts ja Dios t'ajot'ajttøø. ³⁷ Winets niduki'iyi ja myigu'uk wyinmaa'ñ yjanchmendøø jøts yjançyaxtøø, xjats ja Pablo yikyukxajnax jøts yiktsu'kxy. ³⁸ Janchjotmay'oo'knidip idø'on ja wyinaty ku ja Pablo jade'en wya'añ jøts ku ka' nijuuni xøøw y'ukyikniwimbejtnidit. Winets tmøøt-nøjkxtøø mã wyinaty ja barki jam.

Ku ja Pablo ñijkxy jam Jerusalén

21 Xjats ku øø nmajtstuujty ja nmigu'uk jam, winets øøts barkedøtpy ndøjkiñaã, jøts øø tiy ndyimñijkxy mã ja et txøøwi Cos jam mejkyujk'am, jøts øø kyimjabom nja'aty mã txøøwi Rodas, jamts øøts jadigojk ndsøø'ñ jøts øø nja'aty mejy'am mã txøøwi Pátara. ² Jamts øø nbaajty jadu'ukpi barki midi wyinaty nøjkxp mã et txøøwi Fenicia, winets øøts jap ndøjkiyi'ñ. ³ Jøts øøts jam nyø'øy mejyjotp, winets øøts n'ixy anajy'ampy tu'uk ja et midi jam mejkyujk'am, ja' xyøøw Chipre, jøts øø nja'jty Siria ñaxjotp. Ja ku ja barki wyinaty tyiktanwa'añ ja tsimy mã kajp txøøwi Tiro, xjats øøts jam n'uk'awidijty. ⁴ Nay jam øø nmin-abyaajtyiøø ja nmøøtjanchja'wibidi, xjats øøts jam

nmøøtaañ wixujk xøøw; winets ja nmigu'uktøjkti tni-maadyi ja Pablo jøts ku ka' ñøjkxt jam Jerusalén, kumi tø ja wyinaty ja Espiritu Santo tyukniyawiyidi ku jam sã yjatt. ⁵ Ku øøts wixujk xøøw n'uktsinaay winets øø ndsoonwani. Xjats øø niduki'iyi ja nmigu'uktøjk møøt ja ñidø'øxyi jøts møøt ja y'una'jkti øø xpadsøø'ñ, xjats øøts ojts xnajtskaxi jam mejy'am, winets øøts ja møøt n'ukuxanaañã, jøts øøts møøt ndios'ajot'ajty. ⁶ Winets øøts jam ja møøt n'uknagajpxpoo'kxiniyøø, xjats øø ndøjkiyi'ñ barkedøtpy, jøts ja wyimbejtnidøø tyøjkwindump.

⁷ Xjats øø ndsøø'ñ jam Tiro, jøts øø nja'jty mã kajp txøøwi Tolemada, jamnim øøts nminawya'kxyøø ja barki jøts øøts ja nmigu'uk n'ukmigajpxy, xjats øøts ja møøt n'uktaañ'niyi'ñ tukxøøw. ⁸ Winets øø kyimjabom ndso'ongojmaa møøt ja Pablo pøn jaty øø møø nwidity, jøts øø nja'jty jam mã kajp txøøwi Cesarea. Winets øøts nnijkxy jam tu'uk jã'y tyøjkjotp pøn txøøw'ajtp Felipe, jøts pøn ja øy'ayuujk tmiwidejtp, jøts nayide'en y'ijty tunk'aty tyikwa'kxy ja jii'kxy, ja'ats øøts jam møøt ndaãñ. ⁹ Ja Felipe jam ja wyinaty ja nimaktaxk ja ñøøx pøn ka'aním y'amatskidi, ja'ats tkajpxnaxtjip ja Dios y'øgyajpxy pøn ti jaty ja ttukajpxnaxwajniyidip. ¹⁰ Tø øøts jam wyinaty ndaã'ni jeky ku tu'uk ja Dios kyuga-jpxy yja'jty pøn txøøw'ajtp Agabo, jøts pøn tsoo'mp jam mã et txøøwi Judea. ¹¹ Ja'ats øøts ojts xmigajpxy, jøts ojts ja Pablo chum yiknixaji winets ñadyabaktsu-jmiyøø jøts nayide'en ñadyakøtsujmiyøø, jøts jade'en ja ejxa'an ja Pablo yikmøøy, jøts yiknøjmi:

—Ja Espiritu Santo dø'on wamp jøts ku ja israelit jã'y jam jade'en nøjkx mduñiyi Jerusalén, jøts myikøyakt mã ja yikmøjkutujkpi pøn ka'israelit jã'ydyi.

¹² Xjats ku øøts jade'en nnimadøøy møøt nmigu'uk pøn kugajp'ajttip Cesarea, winets øøts ja Pablo møk njanchjanimãay jøts ka' ñøjkxt jam Jerusalén. ¹³ Xjats ja Pablo y'adsojimbijty:

—¿Tiku mya'axti jøts øts nugo xyikjotmay'ookti? Wan twanjaty, ngupøkp øts wan øts tyikøtsumy tyikpaktsumy. Jøts põni xyik'ookwandip øts jam Jerusalén, ngupøkp øts ja nayide'en nwindson'ajtim Jesús wyin-maa'ngyøjpx.

¹⁴ Xjats kumi ka'ap øøts ja Pablo xkajpxkyupiky, winets øøts jade'eñi n'amøøñ, xjats øø nwaãñ:

—Wan tjaty põni sã Dios kø'øm tyamidsøkyi.

¹⁵ Ku dø'on jade'en y'uknaxjy ja kajpxy, winets øøts ndsimy nyik'øyi'ñ, jøts øøts jam nnøjkxwa'añ Jerusalén. ¹⁶ Winets øøts ja nmigu'uk winaagin xjamyøøt'ajty midi tsinaadyip Cesarea, jøts tu'uk midi kugajp'ajtp Chipre, ja' xyøøw Mnasón midi wyinaty jekyip ja Dios kyajpxy tø tpadøjkniyi, ja'ats øøts xyik-ja'ada'akwamp jam Jerusalén mã wyinaty ja tyøjk tjagyepy.

Ku ja Pablo ojts tmigajpxy ja Jacobo

¹⁷ Xjats ku øøts jam nja'jty Jerusalén, jøts ja nmøøt-janchja'wibidi janch ejtni xoni øø xyikja'jty. ¹⁸ Winets øøts kyimjabom nmøøtnijkxy ja Pablo jam Jacobo tyøjkwindump mã wyinaty ja møjãã'dyøjkti niduki'iyi.

¹⁹ Xjats ja Pablo tkajpxpøø'kxy niduki'iyi pøn jaty jam wyinaty, jøts jatyi ttamimadyaknibøjkøø tuki'iyi sã jaty yjajty ku ja Dios ja myøk'ajtin jade'en tnanky'ijxyiyi jam mã jaty ja jamdi pøn ka'israelit jaa'dyi. ²⁰ Xjats ku døøen jade'en tmadoodidøø ja Pablo kyajpxy, winets yjanchxonjajtøø ja myigu'uk jøts tmøjpiktaktøø ja nwind-søn'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mil'ampy tø tmibøkti ja Jesús yja', jøts nay ja' niduki'iyi wãndip jøts ku kuwãni ja Moisés kyutujk yikpadu'unt. ²¹ Jøts wãndip ja' ku mets ja israelit jaa'y jade'en xukmadøymidi jagamgajp tsinaadyip, jøts ku ka' ttunk'ãttit mididi Moisés kyutujk'ajit jøts ku ka' ja mutsk mixy'unã'jk ja ejxã'ãñ yikmo'ot ñe'kxkøjxp, ni ngatu'unindit ja ngøømdsinã'yin. ²² ¿Sudso'ampy yø ndu'unindit? Janchnamyukidip inet ja nmigu'uktøjkti ku tnijawidit ku yã tø mjã'ãty. ²³ Øy'ajtp ne'egi jade'en xpadu'unt: Ja yã nimaktaxk nmigu'ukti pøn ja wyãnda'ãky jap tjagyaptip tsaptøjkjøtpy. ²⁴ Møødi jøts ja wã'ãts'ajtin xpaãttit, jøts xkujuuuyit ja wyãnda'ãkyti jøts nayide'en jap xnãnkyaabiyit, jøts yiknijawit ku ja wyãnda'ãky tø tyik'adukti, jøts tnijawidit pøni ka'adam meets ja Moisés kyutujk xjanchpaduuniyi. ²⁵ Jap øøts ayuujk jadu'uk njããkjagyepy, kumi tø øøts ja nøky jade'en nguexy mã jaty ja Jesús yja' pøn ka' y'israelitjaa'yi, jøts øø ndukmadøymidi jøts ka'ap nugo tmijotmay'ooktit ja israelit jaa'y chinã'yin. Ja'ayi øø ndukmadøymidi jøts ku ka'ap ja tsu'uch tssu'utstit mididi ja tsãmaxãn yiktawind-sø'jkjip. Nayide'en ka'ap ja ni'jpy tjøø'kxtit, jøts nayide'en ka'ap ja jiyujk tsu'uch tssu'utstit mididi ka'øy'oo'kp, jøts nayide'en kidi ja ñiyã'y ja ñidø'øxy ñabyøjkxyidit.

Ku ja Pablo yikmajch møj tsaptøjkjøtpy

²⁶ Xjats ja Pablo tmøødiyii'ñ ja nimaktaxkpi jaa'y, jøts kyimjabom ojts tyiktso'onda'ãkti sudso tpaãttit ja wã'ãts'ajtin. Xjats møøt tyøjkijii'ñ jap møj tsaptøjkjøtpy jøts ttukmadoowa'ãndi ja teety juuni yjøpkøxt ja'abi jotmay. Yø' tyijpy ku døøen ja yjøpkøxtit winets nidu'uk nidu'uk tyikme'endit ja yojxin.

²⁷ Xjats ku wyinaty wixujk xøøw tyikã'pxwanidi ja yjotmay sudso tpaãttit ja wã'ãts'ajtin, winets ja Pablo ja israelit jaa'y jap y'ejxpaãjtiyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyii'ñ, winets ja jaa'y ñãnky'ambøjkøxidøø ja xem ja yã, winets tmãjtswã'ãndi ja Pablo, ²⁸ jøts tjanchtaya'ãxti tjanchtajokti jøts wyã'ãndi:

—iMeets Israelit jaa'y, pudøjkik øøts! Wan tmãjchindi yã'ãtpi yãã'dyøjk pøn kajp kajp widejtp, jøts ja jaa'y jade'en ttuk'ixpiky jøts ku ka'ap adøm ndsinã'yin y'øyindi, jøts ja Moisés kyutujk nayide'en t'abaãxi jøts nayide'en adøm ndsaptøjk; jøts jinaxy ixyam tyimy-jãã'adi'ich ku ja griegit jaa'y yã tjãaktyimgyuwaã'wi, jøts jade'en tyikmã'ãty adøm ngunuu'kxchãptøjk.

²⁹ Jade'en ja israelit jaa'y wyã'ãndi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Trófi-

mo. Jøts jawãndipyim idøøen ja jade'en tø net ja Pablo tmøøtnijkxy ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjknibøjkidøø, winets ja Pablo yikjødøjtpidsiimy jap tsaptøjkjøtpy, jøts ja tsaptøjk jaty tyik'adujktøø. ³¹ Tyimyik'ookwãndip ja wyinaty, ku ja soldãdi ñiwindsøn tniã'wiyii'ñ ku ja kajp wyinaty nugo yjanch'adøtsnidi. ³² Winets ja myiwindsøn ja ttuknija'wigyixy jøts ja pujtp yjanchjã'ttøø jap mã ja mayjãã'y jap wyinaty. Kuts ja yik'ejxpaãttøø møøt ja masyoldãdi, winets ja Pablo jade'eñi yikmajtstuuity jøts ka' y'ukyikwojpnãã. ³³ Xjats ja windsøn twinguyø'øyiyii'ñ ja Pablo, winets ja Pablo yikmajch, xjats ja windsøn tyikutujky winets ja Pablo adsow aduuk yiktagøtsuummy ja puxkadeen, xjats ja windsøn tyiktiiy pøn jaa'y ja', ti tundigø'øyin ja wyinaty tø ttuñ. ³⁴ Xjats ja jaa'y ja xem ja yã nugo yjanchkãjpxjø'ktøø, ni sudso'ampy ja windsøn tjanchkamadooguki, winets tyikutujky jøts jap tnãnkyiknijkxyi mã ja soldãdi kyutu-jkããjk japti. ³⁵ Ku jap wingon tyikjã'tti mã eskaleri jap, winets ja jaa'y tjanchjããkwojpwã'ãndi ja Pablo ãmbøjkingøjxp, paty ja soldãdi ojts køjxp tsãpkø'ødi ja Pablo; ³⁶ janch mayjãã'y idøøen ja wyinaty pameejnip, jøts tjanchtaya'ãxti tjanchtajokti:

—iWan tpa'øøky!

Ku ja Pablo yjanagyugajpxøø mayjãã'y wyingujkpy

³⁷ Ku wyinaty ja Pablo jap tyøkiwyãni soldãdi kyutujk-tããjkjøtpy, winets ja Pablo tjãnøjmi ja windsøn:

—¿Kidi y'ø'y'att ku nmigajpxt?

Xjats ja windsøn t'adsojimbijty yide'en:

—Øy'ajtp pøni mjaajtpy griegit ayuujk. ³⁸ ¿Kidi ja egip-titjãã'yip mets, pøn ja tsep nãmnim jawaani tkayiktso'ondãkp, pøn ja yikjãã'y'oo'kpi jam ojts tmøøtsøøni nimaktaxk mil jam tøøts'etjotp?

³⁹ Xjats ja Pablo t'adsøøymidi jøts tnimaãy:

—Israelit jaa'y øts. Jam ø ngue'jxy Tarso mididi jam møj kajp'ajtp Ciliciit etjotp; tun ja may'ajit jøts øts yø jaa'y nmigajpxt.

⁴⁰ Xjats ja windsøn tyikutujky jøts jaa'y tmigajpxt, winets ja Pablo jap eskalerikijxy wyã'k'øyiyii'ñ, jøts ja'ayi xãji'iky jøts ja jaa'y y'amo'ondit. Xjats ku ja jaa'y y'amongøxtøø, winets ja hebreit ayuujk ja tkajpxøjkijii'ñ:

22 —Meets migu'uktøjkti jøts møjãã'dyøjkti, uk-madoodidik øts n'ayuujk mididi ngajpxwampy.

² Xjats ku ja jaa'y tmadowdi jøts ku ja Pablo tkajpxy ja hebreit ayuujk, winets niduki'iyi y'amondøø, jøts ja Pablo tnimaãy:

³ —Israelit jaa'y øts, jam ø ngue'jxy Ciliciit etjotp mã kajp txøøwi Tarso, jøts øts yã tø nyeeky Jerusaleen, jøts øts ja' xyik'ixpijky mididi txøøw'ajtp Gamaliel, wã'ãts øts ja xuknija'widi adøm ndsinã'yin pøni sã ja møjãã'chinãã'yin. Ojts øts idøøen ja Dios yja' ka'pxy nbaduñ amumjoojt jade'en sã meets ixyam xuñin. ⁴ Øts y'ijty nmøjmidsep'ajtpy pøn jaty ja Jesús yja' tpaduujnidip, nyik'ooktibaãt øts ja y'ijty, jøts nyiknijkxy ja yãã'y ja tøøxy jap puxøjkjøtpy. ⁵ Wã'ãts ja teetywindsøn tni-jawidi møøt ja møjãã'dyøjk, kumi køøm øts ja xmo'odi

ja kutujk jøts øts ja jam nminijkxy Damasco mā wyinaty adøm nmi'israelit jaa'dyi. Jøts øts ja jam n'ixā'ay pøn jaty wyinaty tpaduujnidip ja Jesús yja', jøts øts ja nyikmeenwā'añ aguwanikøjxp jøts nyik'ayo'ombaaat-wā'añ.

Ku ja Pablo tnmadyaajky ja chinaa'yin ku ja tyiktigajch

⁶Xjats ku øts ojts nminijkxy ja'abi winmaa'ñ, jam wyinaty wingon nja'atwani Damasco kujkxøw et, winets øts ojts jotmøn ja jaj xnawidity midi janch møk tsamamp, jøts n'ixy ku kyidaajk tsajpøtpy. ⁷Winets øts jami nnaaxkidajky, jøts øts nmadøø ja ayuujk ku øts yide'en xnimaay: "Saulo, Saulo, ztiku ø xjemdunwā'añ xedunwā'añ?" ⁸Xjats øts nyiktiiy jøts nnimaay: "zWindsøn, pøn mets?" Jøts ø x'adsøø: "Øts Jesús Nazaretit jaa'y, ja' pøn mjemdumpy mdedumpy." ⁹Xjats øts njamyøøt yjanchø'jkidøø ku ja jaj t'ejxpaat-tøø, ja' ka'ap ja tmadoodøø ku øts nyikmigajpxy. ¹⁰Xjats ku øts idø'on jade'en nyikmigajpxy, winets ø nnimaay: "zTi windsøn ndu'ump, sudso'ampy ndaabyaatt?" Winets nwindsøn'ajtim xnimaay: "Pidø'øk jøts mnøjkxt jam Damasco, jamts tuki'iyi myiktuk-mado'ot pøni ti jaty mdu'ump." ¹¹Kumi tø øts wyinaty ja jaj xyikwinjøøxy xyikwinapy, winets ja nmigu'uk jam x'ukwejtsnidøø, jøts øts xyikja'ttøø jam Damasco. ¹²Jam wyinaty tu'uk ja jaa'y pøn txøøw'ajtp Ananías, ja' idø'on tiiy tjanchpadump ka'pxy ja Moisés kyutujk. Xjats niduki'iyi ja israelit jaa'y pøn jaty jam tsinaadyip Damasco, yjanchojktip idø'on ja' ja Ananías. ¹³Xjats øts ja Ananías ojts x'ixy, jøts øts xnimaay: "Migu'uk Saulo, tawin'ejx yikxon yø mween jadigojk." Jøts øts jaty ojts nwin'ejxpiky, xjats nmigu'uk n'ejxpaajty. ¹⁴Jøts ø xnimaay ja Ananías: "Ja Dios Teety pøn adøm n'apteety'amøj pyadundip jekyip, ja' kø'øm tø mdsøkyi jøts me mduknijawiyit ja y'øwyinmaa'ñ, jøts ñanky'ijxyiyi ja nwindsøn'ajtim Jesús pøn tum tsuj ja winmaa'ñ tmøøt'ajtp, ja'ats kø'øm ja y'ayuujk mduk-madooljyip. ¹⁵Ja'agøjxp ja Dios jade'en ttuun, jøts mets nøjkx xkajpxwa'kxy ja kyajpxy y'ayuujk, jøts xuknijawit tuki'iyi ja naxwii'ñit jaa'y sã tø x'ixy jøts sã tø xmadøø. ¹⁶Jøts ixyam, ztiku nugo mgo'kni? Pidø'øk jøts mnøbatt, janchjawī amumjoojt ja nwindsøn'ajtim Dios yja' jøts myikpøkywā'añdsiyit."

Ku ja Pablo tnmadyaajky sudso'ampy ojts yikexy jam mā jaa'y ka' y'israelitjaa'yidi

¹⁷Ku øts idø'on jade'en njajty, winets øts jadigojk nwimbijty yã Jerusalén, jøts øts jap nniijkxy tsaptøjkøtpy Dios'ajot'ajtpi. Japts øts ja nwindsøn'ajtim xmigajpxy, jade'en øts ja n'ixy kidim ja jaa'y kyuma'ay, jøts ø xnimaay: "Putyi yã tsoon Jerusalén, ka'ap inet ja tmøjpikta'aktit sã øts inet n'ayuujk xjakajpxiyit." ¹⁹Xjats ø nnimaay: "Mets teety, ñija'widip ja' ku øts jam y'ijty nniijkxy mā jaty ja tsaptøjk, jøts øts jam nmach pøn jaty tpadundip mets mja', jøts øts ja ndagubety, yikxon njanchwiwøpy jøts nyikniijkxy puxøjkøtpy. ²⁰Ñija'widip ja nayide'en ku øts jam wyinaty ku ja Esteban jam

y'ø'jky midi mets m'ayuujk ojts tkajpxwa'kxy, jam øts wyinaty nayide'en ndani, jøts øts nwaañ nayide'en jøts tyik'ookit. N'ejx'ejtidøø øts ja yik'oo'kpi ja wyet." ²¹Xjats øts ja nwindsøn'ajtim xnimaay: "Putyi, jagam me ngajxwā'añ kajpxwa'kxpi mā jaty pøn ka' y'israelit-jaa'yidi."

Ku ja Pablo ja soldadi windsøn yikpuxøjkøjkiyøø

²²Xjats ku ja Pablo jade'en yjakajpxy, winets ja may-jaa'y møk'ampy yjanchkajpxjø'ktøø, xjats wyandøø: —iWan tpa'øøky yø'øbi jaa'y! iKa'ap y'ukpaat'ajtiñi jøts yjaaksøønit! ²³Xjats ja mayjaa'y tjanchtayax'adø'øtsti jøts ja wyet tjanchajpwøjti, jøts ja pu'ux nayide'en tjanchwijø'økti, ²⁴paty ja windsøn nayide'en tyikutujky jøts ja Pablo jap yikpøjkø'økt jap windsøn kyutujktaajkjøtpy. Xjats ja windsøn tyikutujky jadigojk jøts yikwopt, jøts kuwani ttuknigajpxwā'añ tigøjxp ku ja mayjaa'y jade'en myid-sep'atyiyi. ²⁵Xjats ku ja Pablo tø wyinaty yikøtsumni yikpaktsumni jøts yikwopwā'añ, winets ja Pablo tni-maay ja soldadi pøn jap wyinaty: —zMbaat'ajttip meets jøts meets ja romanit jaa'y xwopt midi ka'anim yiktiiyduñ? ²⁶Ku jade'en tmadøø pøn ja soldadi t'ana'amp, winets ja jaty tniijkxy ja wyindsøn, jøts tniimaay: —Ejxim ku jade'en m'adø'øtst, zikidi xnijawi ku yø' romanitjaa'y? ²⁷Winets ja windsøn twingunøjkxyiñ ja Pablo jøts tyiktiiy: —zMjanchromanit jaa'y mets? Xjats ja Pablo t'adsojimbijty jøts tniimaay: —Paty ja' øts. ²⁸Xjats ja windsøn tniimaay ja Pablo: —Janch kajaa øts nmeen tø nyiktuñ ku øts yã nromanitjaa'y'atwā'añ. Xjats ja Pablo tniimaay: —Ka'ap øts yã ti jade'en tø ngujuy, ja' ku øts yã tø ndyimgye'exy. ²⁹Xjats ku dø'on jade'en yjajty, winets ja soldadi jadi'iñi yjiyø'øgyøxnidøø pøn ja Pablo t'ukwopwandip. Xjats ja windsøn ojts nayide'en chø'øgi kudam ja' ry-omanitjaa'y pøn wyinaty tø tkøwøøndi tprakwøøndi.

Ku ja Pablo yiktanay'øiyøø ja israelit jaa'y myøjkutujk adsinaabyi wyingujky

³⁰Xjats ja windsøn kuwani tnijawiywā'añ tigøjxp ku ja Pablo ja israelit jaa'y ñi'øøniyi. Xjats kyimjabom tñankwyinajkiyøø ja puxkadeen, jøts tñankwyaamu-jkiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaañijky jøts tyikajpxwā'añ jap windsøn y'agui'ptyi.

23 Xjats ja Pablo twinguwā'jkiyñ pøn jaty jap wyinaty møj windsøn'ajttip, jøts tniimaay: —Migu'uktøjkti, wā'ats Dios t'ixy ku øts ka'ap ja Dios nmidundigøø, ejtp øts jotkujk nnayjawiyi.

²Winets ja møjteetywindsøn tyikutujky midi txøøw'ajtp Ananías, jøts tniimaay pøn ja Pablo jap wyi-

naty wingon møøt tyani, jøts ja Pablo yik'akojxjø'økt.

³ Xjats ja Pablo t'adsøø ja møjteetywindsøn:

—Ti windsøn mets idø'øñ jade'en, nayide'en ja Dios mduniyit! Pøni mgutujk'adsinaapy tam mets, ¿sudsots øts jade'en xnankyoxwə'añiyi pøni jap tam ja kutujk xmøødi?

⁴ Xjats ja y'adsoodøø pøn jaty ja Pablo jap wyinaty møøt wingon y'ity, jøts ja Pablo yiknimaay:

—¿Jade'endam idø'øñ xmigajpxigøø ja møjteety-windsøn?

⁵ Xjats ja Pablo y'adsøø:

—Migu'ukti, ka' øts yø nnijaw i kudam yø myøjteety-windsøni; janch jade'en ja Dios kyajpxy wyə'añ ku wyə'añ: "Kidi xmigajpxigøø pøn jam yikutujktip mgajp-køjxp."

⁶ Winets ja Pablo jam t'ejkajpy ku majtsk piky ja windsøndøjk jamdi. Jam wyinaty pøn ja' tpadundip ja saduceit ixpøjkin, jøts nay jam ja'amidi pøn tpadundip ja fariseit ixpøjkin, paty ja Pablo møk ojts kyajpxwa'kxy, jøts wyə'añ:

—Meets migu'uktøjkti, fariseit jəə'y øts jøts fariseit jəə'y øts ndeety. Ja' meets ixyam xatiidyump ku øts n'awijxy'aty jøts ku ja oo'kpi jadigojk yujukpyiky jap oo'kpi jutjøtpy.

⁷ Xjats ku ja Pablo jade'en wyə'añ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyami-gajpxyidi kunim majtsk piky ja wyinmaə'añ yjajttøø. ⁸ Ja saduceit jəə'y wəmp jøts ku ka'ap ja oo'kpi yujukpyiky jadigojk jap oo'kpi jutjøtpy, jøts ku nayide'en ka'ap ja ankilis mə, jøts ni anmija'win jøts ni miku' niti kya'ity. Jade'en idø'øñ ja saduceit y'ixpøjkin; xjats ja fariseit y'ixpøjkin tuki'iyi ja tjanchjəwidi. ⁹ Xjats niduki'iyi kyajpxjø'ktøø; winets winəəgin ja kajpxwejpi wyə'kukiyyi'ñ pøn tnija'widip ja Moisés kyutujk, jøts pøn ttsojktip ja fariseit y'ixpøjkin, ja'ats ojts wyə'andi:

—Yə'at jəə'y ka' ti tundigø'øyin tjagyepy, jotmøñ ku yø tø myigajpxyi tu'uk ja ankilis uk øy ti, ka' y'øyi ku ja Dios yja' nugo ndatøjka'andit.

¹⁰ Xjats kumi janch møk idø'øñ ja jeky ñagyajpxidøø, winets ja soldadi windsøn tjøpjawi ku ja Pablo jotmøñ ja mayjəə'y y'uknujkwə'kxniyit. Winets ja soldadi ja twaadsøø, jøts ja Pablo jam yikwejtspidsiemy mayjəə'y agujk, jøts jap jadigojk tyiknijkxy soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy ku-mə'ayjøtpy ja nwindsøn'ajtim Jesús, jøts ñi'ixmxyiyi:

—Pablo, jotmøk nabyikta'agi, nayide'en jam nøjkx mgajpxwa'kxy mə ja møj kutujktaajk jam Roma, nayide'en sam øts n'ayuujk tø xkajpxwə'kxiyi yə Jerusalén.

Ku ja Pablo yiktanibiktaajkøø jøts ja y'amaa'tsk'oøkt

¹² Xjats ku jade'en ja Pablo kyumaay, winets ja israelit jəə'y winəəgin tkajpxy'ajttøø ja Pablo jøts tyik'oøktit, møk'ampy idø'øñ tyimñawyəjnidoø, ka'ap ja tkugayidit tku'uugidit kunim ja Pablo tyimyik'ejxnəxt, kunim ja tyimyik'oøktit. ¹³ Wixijkxy ñaxy idø'øñ ja jəə'dyi pøn

idø'øñ ja Pablo jade'en tkajpxy'ajttøø. ¹⁴ Winets ja ñiwixijkxyi jəə'y jap ñøjkxtøø mə ja teetywindsøn jap wyin'aty møøt ja møjəə'dyøjkti, jøts tniimaadyøø:

—Tø øøts idø'øñ ndyimñagyajpxyi, ka'ap øøts ngu-gaayiwya'añ ngu'uugiwyə'añ, kunim øøts ja Pablo ndyimy'ejxtnim øøky. ¹⁵ Meets niduki'iyi pøn jaty yə kutujk adsinaadyip, amidowdi ja soldadi windsøn jøts jabom yə ja Pablo tyikme'ent mee mwindujy, jade'en xwindəəyidit ja windsøn jøts ku ka'pxy yik-payø'øwya'añ ja pøky, jamts øøts wyinaty tuu'am n'aweix'ity, jøts jam yø y'oøkt.

¹⁶ Xjats ja Pablo pyøøpy tnija'wiyi'ñ ja ayuujk ku ja yjamy ja jəə'y yik'ookwə'añi, winets ja yjamy ja ojts ttukmadøø mə ja soldadi kyutujktaajk jap. ¹⁷ Xjats ja Pablo twaadsøø tu'uk ja soldadi, jøts tniimaay:

—Møøt nøjkx yə'at mixy jap windsøn wyindujpy, jap ayuujk yø tu'uk tkajpxwə'añ.

¹⁸ Winets ja soldadi tmøødiy'i'ñ ja mixy jøts ttukmadøø ja wyindsøn, jøts tniimaay:

—Tø øts ja Pablo xyəəjxi midi jap tsumy, jøts øts tø xnøjmi jøts øts yə'at mixy nyikme'ent, jap ayuujk tu'uk tkajpxwə'añ.

¹⁹ Winets ja mixy kyøjø'øm ja windsøn y'ukwejtsøø, yiknijkxyi abiky jøts yiktøøji:

—¿Ti øts idø'øñ xamigajpxwəmp?

²⁰ Xjats ja mixy t'adsøø:

—Jade'en ja israelit jəə'y ayuujk tø tpiktə'akti jøts tø tkajpxy'atti, jøts mets myik'amido'ot ja Pablo jøts jabom xyiknøjkxt jap yikutujkpidi y'agui'py, ja'agøjxp tijy ku ka'pxy tpayø'øwya'andi ja pyøky. ²¹ Təəyidip ja', kidi xmibiky, jap ja jəə'y yu'uch y'aweixwə'andi niwix-ijky ñaxy jap tuu'agui'py. Tø dø'øñ ja møk ty-imñawyə'añidi jøts ka' tkugaayiwya'andi tku'u-ugiwya'andi kunim ja Pablo tyimyik'oøktit; jam inet idø'øñ ja y'aweixti, ja'ayi mets ja nugo x'uk'adsojim-bett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawyə'kxøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyəəjxyi'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjøp'ejxidit pøn tekyjø'øm yø'ødyip, jøts ja nidugui'pxy myajk ja kawaəgyøjxpidi, jøts nayide'en nimajtsk magø'pxy ja takuu'møøtpidi. Ja'ats jam nøjkx-tip Cesarea jøts choondit koots təxujk yaxp. ²⁴ Xjats ja windsøn nayide'en t'ane'emy jøts ja Pablo kyawaəy nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjəəw yikøyakt mə ja møj yikutujkpi Félix jam. ²⁵ Xjats ja windsøn ja nøky tyik'øyyi'ñ jøts ja soldadi ja yiktamigajxyi'ñ, yide'en ja nøky wyə'añ:

²⁶ "Øts nxøøw Claudio Lisias midi møj soldadi windsøn, øts mets ja kajpxpoo'kxin ndaniguejpxy mets møj yikutujkpi Félix. Tu'uk øts ja ayuujk nguexy. ²⁷ Jade'en ja israelit jəə'y tø y'adø'øtsti, tu'uk yə'at jəə'y tsumdøø midi mets ixyam ndagøødjkip. Yø' wyinaty

yik'ookwandip, xjats ku øts ojts nnijawi kudam yø' ry-omanitjaa'yi, winets ø nninijkxy møøt ja soldadi, ja'agøjxp ja jaa'y kyayik'o'jkøø. ²⁸ Xjats kumi nni-jawiwypamy øts tiku yikni'øøni, jøts nyiknijkxy jam ma ja israelit jaa'y myøjkutujk'adsinaabyidi, ²⁹ ja'agøjxp yjawi ojts yikni'øøni ku ja ojts tkamimadøy ja israelit jaa'y kyø'ømgutujkti, ka'ats pyaat'aty jøts ku tyik'ooktit, jøts ni kyapaat'aty jøts puxøjkjotp y'ett. ³⁰ Tø nyik-tuknijawi ku ja israelit jaa'y ñiwinmayiyi jøts yik'oogiyit, paty øts ixya nnajtskajxi, paty øts nayide'en tø nduk-madøy pøn tni'øø'ndip yø Pablo, wan jam tyikwin-gukidi jam mets mwindump. Yø'øyi kajpxy me ndaniguejpxy. Dioskujuyip."

³¹ Ku dø'øn jade'en ja soldadi ja kutujk yikmøødyøø, winets koots tmøøtso'ondøø ja Pablo jøts jam tmøøt-ja'ttøø ma kajp txøøwi Antipatris. ³² Winets ja soldadi jam kyimjabom wyimbejtnidøø midi tekyjø'øm yø'ødyip, jøts ja kawaachinaabyidi tjaa'kmøøtnøjkxtøø ja Pablo ³³ jam Cesarea, jøts jam tkøyaktøø ja nøky ma ja møj yikutujkpi jam jøts nayide'en ja Pablo yikøyajky. ³⁴ Xjats ja møj yikutujkpi tpa'ijxy ja nøky, winets tyiknidøøjøø pøniti jaa'y ja Pablo, xjats t'adsoodøø ku ja Cyiliciitjaa'yi, ³⁵ xjats ja Pablo yikni'øø'nyip:

—Jaanim øts nmado'ot ja mgajpxy ja m'ayuujk kunim ja mye'endit pøn nni'øø'nyip.

Winets tyikutujky jøts ja Pablo yikpøkjø'økt ma Herodes ja møj kyutujktaajk jam, jøts jam tñanky'ejx'i-tyiyi.

Ku ja Pablo yjanagyugajpxiyøø møj windsøn Félix wyingujkp

24 Xjats kyimagoxkxøøw'ajty, winets ja møj teety-windsøn Ananias yja'ttøø jam Cesarea møøt ja møjjaa'dyøjk, jøts tu'uk ja kajpx'øyi'bi pøn txøøw'ajtp Tértulo. Jade'en ja møj yikutujkpi jam twinguwa'jkidøø, jøts ja Pablo tni'øøni'wya'andi. ² Xjats ja Pablo jap nayide'en tyikmendøø, winets ja Tértulo ttami'ñi ja møj yikutujkpi Félix sa Pablo kya'ø'y'adi'ich, jøts wya'añ:

—Mets møj yikutujkpi, dioskujuyip. Tsuj jotkujk xjagyepy ja mgajp, ka' ma ti tsep tyuñi mets mwi-yy'ajtingøjxp. ³ Ejtp øøts jotkujk xmø'øy jøts øøts jotku-jk nnaxy ndøki ømyadsowi, janchkunuukxy øø njawi mets møj yikutujkpi. ⁴ Mets m'ukmaa'kxp, jøts ka'ap øts mdiempi nugo nyikwindigø'øty. Jøts njanchminu-u'kxakpy jøts ja tsojkin xjagyapt, jøts øøts n'ayuujk waani xmadoojit. ⁵ Tø øøts wa'ats nnijawi ku ya'atpi jaa'y tu'uk nugo y'ayo'onduñ, jøts tñankñawya'kxyi ja israelit jaa'y wyinmaa'ñ ma jaty yø wyidity, jøts yø' tñigubajk'ajtp pøn tpadundip tu'uk ja nazaretit jaa'y y'ixpøjkin. ⁶ Nayide'en ya'at jaa'y tkuwaawi ja griegit jaa'y jøts øøts ndsaptøjk jade'en nugo xyikma'jtiiyi; paty øøts idø'øn yø tø nmach jøts øø njatidyunwa'añ sa øøts ngutujk wya'añ; ⁷ ja soldadi windsøn Lisias øøts jade'en nugo xump jøts ttatøki øøts nwinmaa'ñ, jøts aguwanikøjxp yikpiky yø Pablo, ⁸ jøts øøts xnøjmi pøni pøn nañi'øø'nyip wan ya tmendi me mwindujy, jøts me xpayø'øty jøts xnijawit tuki'iyi sa øøts ja øø'nin nbikta'aky.

⁹ Xjats ku ja Tértulo jade'en kyajpxkijxy, xjats ja myigu'uk israelit jaa'dyi pøn jaty jap wyinaty nayide'en tø wya'andi jøts ku ja janch wya'añ ja Tértulo, ka'ap ja tyaayi. ¹⁰ Winets ja gobernador Félix ja Pablo tyikajpxy, xjats ja Pablo yide'en wya'añ:

—Mets møj yikutujkpi, nay ø ndsøjkpy øts jøts nwin-danit ja nbøky mets mwindujy, kumi nnija'wip øts ku mets ya jeky yjumøjtyip tø myikutujktsøø'ni. ¹¹ Mets kø'øm m'ukyiktiidyøkip øts n'ayuujk pøni ka' xjanch-jawi, ku øts jam wyinaty myakmajtsk xøøwipnim tø njä'aty jam Jerusalén Dios'ajot'ajtpi. ¹² Ka'ap øts jam wyinaty pøn møøt nnachepkajpxyi, nisa øts ja jaa'y ngayik'adi'ich jam møj tsaptøjkjotp, ni jam ma jaty ja çaptøjk ja'adi, ni jam møj kajpøtp. ¹³ Ya'atpi jaa'dyi niti tñankny'ejxidit midi øts yø xani'øø'ndip. ¹⁴ Yø'øyi øts wa'ats nnigajpxy jøts ku nbaduñ ja Dios midi øøts ejtp nbadumpy. Ka'ats øts yø nmigu'uk israelit jaa'dyi t'ø'yjawiði sa nbaduñ. ¹⁵ Njanchja'wip øts ja Dios nayide'en sam yø tjanchjawi ku øø njøp'ixy ku ja Dios ja oo'kpi jadigojk tyikjuykpyiky, øy ja oo'kpi y'øyi kya'øyi pøni sa ja y'atsøøniði. ¹⁶ Ja' ndsøjkpy jøts øts ja Dios ejtp nmi'ø'y'ajtnit jøts nayide'en ja naxwii'ñit jaa'dyi.

¹⁷ Tø øts mawyeen n'atswidity kawinaak jumøjt, jøts øts jadigojk tø nwimbity Jerusalén, jøts øts nmigu'uk nmay'atwa'añ n'ayo'ejxwa'añ, jøts ja Dios nayide'en nwindso'øgiwya'añ. ¹⁸ Ja'ats øts jap wyinaty ndumpy tsaptøjkjotpy sudso ø nbaatt nwa'ats'ajtin, ku øts ja is-raelit jaa'y jap xpaajtøø midi tsoo'ndip Asia, ka'ap øts ja mayjaa'y wyinaty nmøødi, ka'ap pøn ti ttuñ. ¹⁹ Ja'abi dø'øn ya mibaat me'endip pøn øts jap ojts xpaatti jøts øts ya xni'øøniði, pøni ñija'widip ja' ku øts jap ndundigøy tsaptøjkjotpy. ²⁰ Uk ku ka' mye'endit sa øts idø'øn nwa'añ, wan ya'at tñigajpxti pøn jaty ixyaadi, pøni ojts øts ja nbøky nyiktapaaty ku øts ojts nyik-tidyuñ jap kutujk adsinaabyi wyindujpy. ²¹ Uk jotmøñts øts jade'en xukpøky'atti ku øts ojts møk nmi-gajpxjø'økti, jøts øts yide'en nnimaay: "Meets ixyam xidypump ja'agøjxp ku øts njøp'ixy jøts ku ja oo'kpi jadigojk yjujkyiky jap oo'kpi jutjøtpy." Jade'en øts nni-maay.

²² Xjats ku ja møj yikutujkpi Félix ja Pablo y'ayuujk tmadooji, winets jaayi tkajpxuky ja payø'øyin ja'agøjxp ku nayide'en tñijawi sa ja Jesús yjanchja'wibi yjaa'y'at-ti, paty jade'en tñimaay:

—Wan t'uk'awijxñim jade'en kunim ja mye'ent ja møj soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

²³ Winets ja møj yikutujkpi t'ane'emy ja soldadi jøts ja Pablo chumy'ettim, jøts tñøjmi nayide'en jøts ja Pablo ja myigu'uk kuwani y'atsmigajpxit, pøni pøn jaty mendip kidi ja tkayiknaxnidi.

²⁴ Xjats ja Pablo jap tya'añ winaa'k xøøwin, winets ja møj yikutujkpi tmøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøøy jøts tñigajpxt sudso'ampy ja Jesús yja' yik-janchjawi. ²⁵ Xjats ja Pablo yikxon jade'en tñigajpxy sudso n'øyja'y'ajtindið sam ja Dios ttsøkyin, jøts

kø'øm nayide'en nnay'ejx'ejti'indit, jøts ku Dios ja naxwii'ñit jaa'y nøjxk ttiduyuñ. Winets ja møj yikutujkpi ojts ja' tkudsø'øgi jøts ja Pablo yiknimaay:

—Nøjxni ixyam, kunim ø n'awatsit jøts jadigojk nwaadsø'ot.

²⁶ Xjats ja møj yikutujkpi may ojk ja Pablo twaadsøø, jade'en ja yjawinmay jøts ja myeenmyo'ojit ayu'uch, winetnimts ja tmajststutt. ²⁷ Majtsk jumøjt idø'on jade'en ñajxy, nugo tjaximiwaadsow'ity ja Pablo. Winets ja møj yikutujkpi tyigajtsnaa, jøts jadu'uk tyøjkiyñ'ñ pøn txøw'ajtp Porcio Festo. Jøts kumi ka'ap ja møj yikutujkpi Félix tmidsep'atwa'añ ja israelit jaa'y, ja'agøjxp idø'on ja Pablo jap tyaañ tsumy.

Ku ja Pablo twingunøjkxøø ja møj yikutujkpi Festo

25 Xjats ja Festo tyøjkiyñ'ñ møj yikutujkpi jam Cesarea, jøts kyidigøøk xøøw chøø'ñ jøts jam pyatøjkiyñ'ñ Jerusalén. ² Jamts ja teetywindsøndi møøt ja israelit møjaa'dyøjkti twinguwa'jkidøø ja møj yikutujkpi Festo jøts ja Pablo yikni'øøni. ³ Xjats ja møj yikutujkpi yik'amidøø ja may'ajt, jøts ja Pablo tniqaxit jøts jam tyikme'ent Jerusalén. Jade'en ja israelit jaa'y wyinaty tø tjaniwinmayidi jøts ja Pablo y'ookt tuu'ajy. ⁴ Xjats ja møj yikutujkpi Festo t'adsojimbijty jøts ku ja kø'øm tsojk wyimbetwa'añ jadigojk jam Cesarea, kumi ixjam ja Pablo tsumy y'ity. ⁵ Winets tnøjmi ja israelit jaa'y møøt ja teetywindsøndi:

—Wa'n tjaa'myindi ne'egi niduknax pøn jaty ku'aaw'attip, jamts xni'øønidit pøni tødam ja'abi jaa'y tyundigøø.

⁶ Xjats ja Festo waani tyaa'niiyñ'ñ Jerusalén tuktujk xøøwin uk majk xøøwin, winets wyimbijty jadigojk. Xjats kyimjabom ttawa'jtsiyñ'ñ ja kyutujktaajk, winets tnankñajtswaaw'wiyøø ja Pablo. ⁷ Xjats ku ja Pablo twinguwa'jkiiyñ'ñ ja møj yikutujkpi, winets ja israelit jaa'y nayide'en twinguwa'jkidøø pøn jam wyinaty tø choondi Jerusalén. Xjats ja Pablo mayjøøjp møk yjanchyiktani'øøni ja tyundigøø'yin, niti tiy'ajtin tkananky'ijxyidi. ⁸ Xjats ja Pablo kø'øm ñagyugajpxyiyi jøts tnimaay ja møj yikutujkpi:

—Nipøn niti ngadamidundigøø, ni ja israelit jaa'y kyutujk jøts ni ja chaptøjk, jøts ni ja romanit jaa'y myøjyikutujkpi ngamidundigøø.

⁹ Xjats ja Festo, kumi tyunwajnip ja may'ajt ja israelit jaa'y jøts y'øjyawiyidit, xjats ja Pablo tyiktiy jøts yiknimaay:

—¿Mnøjkwamp jam Jerusalén? Jamnim øts nbayø'ø-ty ja mbøky.

¹⁰ Winets ja Pablo t'adsojimbijty jøts tnimaay:

—Paat'ajtp øts yaayi nyiktiiduyunt, kumi ja møj windsøn César ja kø'øm tø tpikta'aky yø kutujktaajk. Wa'atsxi me xnijawi ku øts ka' yø israelit jaa'y ti ndamidundigøø pøn jap wamp jøts øts ja nbøky ngu'oogit, ¹¹ ka'ap ø nwa'añ jøts øts ngagupøkt ja o'jkin; jøts pøni ka'adam yjanchi midi øts yø' xani'øø'nidip, nipøn kya-paat'atyiyi jøts øts xkøyaktit ma israelit jaa'y. Wamp øts jøts ja møj windsøn César øts kø'øm xiiduyunt.

¹² Xjats ku ja Pablo jade'en kyajpxkijxy, winets ja møj yikutujkpi møøt tkajpx'øiyiñ'ñ ja pyutanaabyi, winets yiknimaay ja Pablo:

—Tø kø'øm mwa'añ ku ja møj windsøn César mdiiduyuniyit. Ja'ats idø'on mninøjkxp.

Ku ja Pablo twingunøjkxøø ja rey Agripa

¹³ Xjats ku ja Pablo jade'en yiknimaay kuts tu'uk ma-jtskin ja xøøw ñajxy, winets ja rey Agripa ojts ñinijkxyiyi møøt ja Berenice, ja'ats t'atskajpxpoo'kxtip ja Festo.

¹⁴ Winets jam ojts kawinaak xøøw tyaa'nidi, xjats ja Festo ttamimadyaajky ja rey sa ja Pablo pyøky jap, jøts tnimaay:

—Ja ya tu'uk ja jaa'y midi ja møj yikutujkpi pasadi puxøjkjøtpy yiktaañ. ¹⁵ Ja'ats møk pyayø'ødyip ja teetywindsøndi møøt ja israelit møjaa'dyøjkti. Xjats ku øts ojts n'øch Jerusalén, winets øts jam ojts xwinguwa'agidi, jøts øts møk'ampy xnimaadyi jøts øts nnankyik'oogit yø Pablo. ¹⁶ Xjats øts nnøjmi jøts ku ka'ap jade'en ja romanit kyutujk wyaa'añ, ka'ap pøn ayu'uch nugo ñanky'oogidit, kuwani ja payø'yin tyunit jøts kø'øm ñawyindaniyidit pøni ti pønjabøn ñi'ñ'mpy. ¹⁷ Ku ya yjattøø ja israelit jaa'y, ka'ap øts tiempi nugo nyikwindigøø, jaty kyimjabom ja ngutujktaajk ndawa'jtsiyñ'ñ jøts ja Pablo nnankyikmejni.

¹⁸ Ku ja myendøø pøn jaty øø'ndip, ni tu'uk ja tka'ukta-paagnidi ja pyøky midi'ibi øts idø'on n'ukjøp'ijxy.

¹⁹ Ja'ayi nugo yiktani'øø'nip ja chinaa'yin, jøts nayide'en pøn txøw'ajtp Jesús, pøn ojts y'øøky jøts ja Pablo wyaa'añ ku ja yujky'aty. ²⁰ Jøts øts ka' nmidagabyaaty sudso'amp øts kø'øm nyikjøpkøxt yø'øbi winmaa'ñ, paty øts yø Pablo n'amidøø pøni nøjkwamp Jerusalén jøts jam yiktiiduyunt. ²¹ Kumi yø' kø'øm waan jøts jam yiktiiduyunt ma ja møj windsøn César Augusto, paty øts jap nyiktsumy'ity kunim øts jam ngaxt møj windsøn windump.

²² Xjats ja rey tnimaay ja Festo jøts ku ja nayide'en tpatmadoowa'añ ja Pablo kyajpxy. Xjats ja møj yikutujkpi t'adsojimbijty, jøts tnimaay:

—Jabom ja x'ukmado'ot.

²³ Xjats kyimjabom'ajty, winets ja rey Agripa yjattøø møøt ja ñidø'øxy Berenice, xjats ojts yjanchyikmøjpi-ktajki jøts jap tyøjkidøø møj tøjkjøtpy møøt ja soldadi windsøndi, jøts nayide'en ja møjaa'dyøjkti pøn jaty jam kugajp'ajttip. Winets ja Festo twaadsøø ja Pablo, ²⁴ jøts ttukmadøø niduki'iyi ja windsøndøjkti, jøts tnimaay:

—Mets rey Agripa, jøts tuki'iyi pøn jaty ya tø myendi, ixya dø'on ja jaa'y midi ixyam mbatmadoowajnidip y'ayuujk. Tø øts idø'on ja israelit jaa'y namay øy xmi'øøndi ya'at køjxp jade'en ja jøts nayide'en jam Jerusalén, ejtp ø xnøjmidi jøts mibaat ku yø tyimy'ookt. ²⁵ Ka'ats yjawi ti møj tundigøø'yin tjagyepy jøts ja' tku'oogit; kø'øm yø t'amidøø jøts jam nøjxk yiktiiduyunt ma ja møj windsøn Augusto jam, paty øts nayide'en jam ndyimgyajxwa'añ. ²⁶ Meets migu'ukti, ka'ap øts nmidaabyaaty ti øky øts ndapaatp ya'atpi jaa'y, sudso'amp øts øky nyik'øyt jøts tñijawit ja nmøjwind-

søn, jøts paty øts ixyam nyikmiñ mee mwindujy, jøts me rey Agripa x'ukpatmado'ot jøts øts xuknijawit mid'i'ibi ayuujk øts idø'on ngaxp. ²⁷ Janchnigyumaap ø njaty ku øts ja pøkyjaa'y nugo njanch'ukaxt, jøts ni ngatukmado'ot øts nmøjwindsøn pøni ti pøky yik-tani'øø'nip.

Ku ja Pablo tngajpxy ja chinaa'yin jam rey Agripa wyindump

26 Winets ja rey Agripa tniimaay ja Pablo: —Mbaat'ajtip jøts me kø'øm mgajpxt. Xjats ja Pablo ja kyø' tyikpidi'jky, jøts yide'en kyajpxøjkiyih'iñ:

² —Njanchtaxondakpy øts ku øts xyikajpxwə'añ ja mets mwindujy, jøts øts kø'øm nwindanit tuki'iyi pøni sə jaty øts ja israelit jaa'y xka'ødeyti. ³ Øy'ajtp nayide'en kumi mets mnija'wip tuki'iyi øøts ndsi-naa'yin sə øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidøy jøts waani x'ukmado'ot øts ngajpxy.

Sə ja Pablo chinaay myijawyeen ku ka'anim tyiktigach ja chinaa'yin

⁴ Nija'widip nmigu'uk israelit jaa'y niduki'iyi sə øts njaa'y'ajty jam ndigam ku nmutsk'ajty, jøts nayide'en sə øts njaa'y'aty jam Jerusalén ixyambaadyim. ⁵ Pøni ñigajpxwandip wan tngajpxti, kumi ñija'widip yø' nayide'en ku øts mutskyi ja fariseit ixpøjkin nbadøjkiyih'iñ mid'i' ka'pxy tpadundip ja Moisés kyutujk. ⁶ Ja'agøjxp øts nyikni'øøni ku øts njøp'ixy ku ja Dios Teety ja oo'kpi jadigojk tyikjujkyiky jap oo'kpi jutjøtpy, kumi jade'en ja Dios Teety kø'øm ja wyandaajkin tmø'øy øøts n'apteety'amøj jøts jade'en ttu'unt. ⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'a-jot'attit ja Dios jøts tja'myatsti jøpy ux. Mets rey Agripa, nay yø'øbi winmaa'ñ øts idø'on yø nmigu'uk israelit jaa'y xkada'øyja'widip, jøts øts xani'øønid. ⁸ Ka' mee nayide'en xjanchjawi jøts ku ja Dios ja oo'kpi tyikjujkyiky jadigojk?

Sə ja Pablo jawyeen tjemduuñ tteduuñ ja Jesús yjanchja'wibidi

⁹ Øts kø'øm ojts nwinmaa'mbyaaty jøts øts ja Jesús Nazaretit yjanchja'wibidi ojts o sə nduujniyi, jøts ø møk nyik'ayo'ombaattø. ¹⁰ Jade'ents øts idø'on jam n'adijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmiyt; jøts nayi waan øts idø'on jøts y'ooktit. ¹¹ Kawinaak ojk øts idø'on kø'øm ja møk nyik'ayo'ombaattø, jøts kuwani ndukmajtstu'utti ja yjanchja'win. Jade'en øts idø'on n'adijch mə jaty ja chaptøjk, janch awa'an'ampy øts idø'on nbawidijty jagamgajp paat.

Ku ja Pablo jadigojk tniimadyaajky sə ja chinaa'yin tyiktigach

¹² Nay yø'øbi winmaa'ñ øts wyinaty nminijxpy jam Damasco sə øts ja teetywindsøn wyinaty ja kutujk tø xmø'øy. ¹³ Winets ø kujkxøow et jam tuu'am ojts n'ejx-paaty tu'uk ja jaj mid'i tsajpjøtpy kyidaajky, janch møk idø'on ja yjajy nika'ap ja xøow jade'en yjajy, jøts øøts ja jaj ojts tuki'iyi xnawidity pøn jaty øts jam wyinaty nmøøt. ¹⁴ Winets øøts niduki'iyi nnaaxkidaajky, jøts øts nmadøoy tu'uk ja hebreit ayuujk ku ø xniimaay: "Saulo, Saulo, ztiku ø xjemdunwa'añ xedunwa'añ? Kø'øm mnay'ayo'onduniyi jade'en kidi tsakaq ku ja ti tnepy jøts ja kø'øm kujp ñadyukyø'ødyiyi." ¹⁵ Winets nni-maay: "¿Windsøn, pøn mets?" Winets øts jaty nwind-søn'ajtim xniimaay: "Øts Jesús Nazaretit jaa'y, nay ja' pøn mjemdumpy mdedumpy. ¹⁶ Pidø'øk wə'kuki, ja'agøjxp øts ixyam kø'øm nnaanky'ijxy jøts øts xmi-du'unt, jøts mgugajpxy'att pøni ti jaty ixyam nduk'ijxpy, jøts pøni ti jaty me njaaktuk'exp. ¹⁷ Øts mets nnøø'-mo'op nduu'mo'op jam israelit jaa'y etjotp, jøts nayide'en mə ja jaa'y kya'israelitjaa'yidi mə mets ixyam ngajxwə'añ. ¹⁸ Yide'en idø'on jam nøjx mduñ, jøts ja jaa'y xkajpxwejt jøts ja ka'øy winmaa'ñ tmajt-stu'uttit, jøts ja tsuj winmaa'ñ tpabøktit. Kidi ja mi'ku' y'ana'amin t'ukupøjkiniyidi, ja Dios yja' tu'ugyi pyadu-ujnidip; jade'en xukmado'ot jøts ku øts nja' xjanch-ja'widit, jade'en'ampy yikpojkipmaa'kxtit, jøts nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tø wyinaty tyikpøkwyə'ach."

Ku ja Pablo tpaduuñ ja ayuujk mid'i tsoo'mp tsajpjøtpy

¹⁹ Mets rey Agripa, nbaduujni øts idø'on tuki'iyi sə jaty øts ja Jesús xniimaay ku øts ja y'ayuujk nmadoojoø mid'i jap tsoo'mp tsajpjøtpy. ²⁰ Winets øts jam n'uktuk-madowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'ydyi, jade'en øts jam n'uktukmadøoy jøts ja pyøkytu'unin tmajtstu'uttit jøts ja Dios yja' tu'ugyi tpaduujniyidit, nayide'en tsuj yjaa'y'attit jøts jade'en tnaanky'eixidit ku ja chinaa'yin tø tyiktigatsti. ²¹ Ku øts ja jaa'y jade'en ngajpxwejt ja'agøjxp øts ja israelit jaa'y jap xmajtstøø tsapjøjkjøtpy jøts øts ja xuku'oogiwya'andi. ²² Møj øts ja Dios ja pudøjkin xmø'øy ku øts ixyambaat ja kyajpxy y'ayuujk ngajpxwə'kxiyi, jøts ø ndukmadøy niduki'iyi pøn jaty ixpiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadøy, yø'øyi ngajpxy nayide'en sə ja Dios kyugajpxy jøts sə ja Moisés ojts wyə'andi, ²³ ku ja yiknitsokpi kuwani y'ayo'ombaatt jøts ku ja wyinaty tø y'øøky, ja'ats myijawyeen tunjøpip ku ja yujkpyøkt jadigojk jap oo'kpi jutjøtpy, jøts jade'en øøts njaa'y ttuknijawit ja wə'ats'ajtin møøt tuki'iyi ja naqxwii'ñit jaa'y.

Ku ja Pablo tjadukmibøkwaañ ja rey Agripa jøts tpadu'unt ja Jesús yja'

²⁴ Xjats ku dø'øn ja Pablo jade'en ñagyugajpxiyi, winets ja møj yikutujkpi Festo møk'ampy yjanchkajpxy, jøts ja Pablo yiknimaay:

—Mjanchmo'tp me Pablo! Yø m'ixpiky'ajtın me nugo myikmo'jtıp.

²⁵ Xjats ja Pablo t'adsojimbijty jøts tnimaay:

—Mets øy møj yikutujkpi, ka'ap øts nmø'sty; tiy øts idø'øn nwa'añ midi øts ngajpxy. ²⁶ İxya dø'øn ja rey Agripa pøn yø'øbi winmaa'ñ wa'ats tnija'wip, paty øts ya jotmøk ngajpxy yø' wyinduuy; wamp øts idø'øn ku yø' tnijawı tuki'iyi, kumi ka'ap ja jam ayu'uch yjajty mi-di øts idø'øn nnigajpxy. ²⁷ İMjanchja'wip mets rey idø'øn sa ja Dios kyugajpxy wya'andı? N'ijxy øts ku yjawi xjanchjawi.

²⁸ Xjats ja rey wyaañ:

—Kuk øts jeexyıp jawaani xjaaktukmadøy, tøk øts yø jeexyıp ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjawit, wa'ambim ja Dios niduki'iyi tjanchjawidit pøn jaty øts n'ayuujk ya tø xmadooji.

³⁰ Ku dø'øn ja Pablo jade'en kyajpxkijxy, winets ja rey niduki'iyi wya'kukidøø møøt ja møj yikutujkpi, jøts møøt ja ñidø'øxy jøts pøn jaty jap wyinatyi, ³¹ winets abiky ñøjkxti jøts jap tkajpx'øyidi ja Pablo pyøky, jøts yide'en ñawyajnidøø:

—Ka'ap yø'øbi jaa'y yjawi ti ttuñ jøts yø' tku'oogit, jøts ni nayide'en kyapaat'atyi jøts jap puxøjkjøtpy y'ett.

³² Winets ja rey Agripa tnimaay ja møj yikutujkpi Festo:

—Tø yø jeexy yikmajtstu'uty ku yø jeexy kø'øm tka'amidøy jøts ku ja møj windsøn César tyiidyuniyt.

Ku ja Pablo yikejxy Roma ma ja møj kutujktaajk

27 Xjats ja møj yikutujkpi twinmaadyøø, winets ja Pablo yikajxwa'andı jam Italia møøt ja myibuxøjk jaa'y pøn jaty jap wyinatyi tsumdyi, jøts nayide'en øts nmøødi pøn ya'at nøky tjaapy. Winets ja soldadı pyøkjø'jkidøø midi txøøw'ajtp Julio jøts midi tñigubajk'ajtp tukpiky ja soldadı, ja' xyøøw ja soldadı tukpiky Augusto. ² Jam wyinatyi nayide'en tu'uk ja Macedoniit jaa'y midi kugajp'ajtp Tesalónica, ja' xyøøw Aristarco. Winets øø tuknax ndøjkijy'ñ møøt ja Pablo jap barkijøtpy, jam ja barki wyinatyi tø chøøñ Adramitio, jøts ñøjkxwa'añ ma jaty ja kajp jam Asiit etjotp. ³ Xjats øøts jam ndsøø'ñ Cesarea, jøts øø kyimjabom njā'atı ma kajp txøøwi Sidón, jamts ja soldadı Julio t'ayo'ixy ja Pablo, jøts ja myıgu'uktøjk t'atstukmigajpxy jøts ja myıgu'uktøjk yikpoo'kxiyi. ⁴ Xjats øøts jadigojk ndsøø'ñ Sidón, winets øøts ja poj møk'ampy xjøp-kuyø'øyiyi'ñ, paty øø kuwani nnayø'øy aga'ñ'ampy ja et midi txøøw'ajtp Chipre, ma ja poj tuda'aky yø'øy. ⁵ Xjats øøts ja mejy ndanajxy jam Cilicia y'et'amidiy jøts

nayide'en Panfilia y'et'amidiy, winets øøts njā'jty ma kajp txøøwi Mira jam Licia y'etjotp.

⁶ Jamts ja soldadı tu'uk t'ixaay ja barki, jøts ojts t'eix-paaty tu'uk midi tø wyinatyi chøøñ Alejandria jøts jam ñijky Italia, jøts øøts jadigojk xyiktøjkijy'ñ xjats øø nd-søø'ñ. ⁷ Kawinaak xøøw øøts idø'øn jade'en udyā'agyı n'awidijty, jøts øøts awisā jam njanchja'jty jam Gnido kajp y'amidiy, kumi ka'anim wyinatyi ja møk poj y'amøki winets øøts jade'en'ampy jadigojk n'awidity Salmón kajp y'amidiy. Xjats øø nnayø'øy ma ja mutsk naajx jam mejy kujk'am midi txøøw'ajtp Creta. ⁸ Xjats øøts jade'en awisā njanchjanayø'øy ja naajx mejyjotp, xjats øøts awisā njā'jty ma kajp txøøwi Buenos Puertos jam Laseit kajp wingon.

⁹ Tø øøts wyinatyi jeky ndaa'niñi mejyjotp, janch tsø'øgi møøt wyinatyni, jade'en'ampy ku wyinatyi ja xuxpyoı myenwani paty ja Pablo tjanimaay ja yik-barkiyø'øbyi, ¹⁰ jøts wyaañ:

—Meets mıgu'uktøjkı, ka' yjawi y'øyt ku ndso'ongo-jmı'ındit, nnajtsja'wip øts ku yjawi mayjøøp n'ayo'om-baajtındit, windigø'øpy yø barki møøt ja pyıktā'aky, nayı kø'ømbaāt yjawi adøm nwindigø'øyındit.

¹¹ Ka'ats ja soldadı ja Pablo y'ayuujk tmbøjkøø, ja' ne'egi pyabøjk ja barki wyindsøn jøts ja yikyø'øbyi.

¹² Janch møk idø'øn xyuxy jøts yjanchpøjy jam Buenos Puertos, paty namay yjanchwandøø jøts øy'ajtp øøts jam ne'egi ndsoont, jøts pøni majadaıp øøts jøts njā'att Fenice midi nay jam tımp Creta y'etjotp, jamts øø nyıknaxt ja xuxtyuu ja'agøjxp ku ja poj ka'ap jam jadine'en tyøki.

Ku ja poj yik'adøtsnibøjkıñaa ja mejy

¹³ Xjats ku ojts waani y'amøki ja poj, winets pyøjkeeky jaduktamajñ jøts ja jaa'y wyandøø øy'ajtp jøts yjaakyø'ødyit. Xjats øø ndsøø'ñ, jøts øø nyø'øy mejpya'am et, jøts øø nnajxy Creta wingon. ¹⁴ Kuts waani y'ijty, winets ja poj møk'ampy yjanchmıiñ midi yiktejp Nordeste. ¹⁵ Ja'ats ja barki møk tjøpkuwojppøø jøts nugo wyejtsma'jtiyøø, jøts ni sudso'ampy ja kya'ukyikmajadaajknıyi ja poj, xjats øøts ja ndyimy'uk-majtstutni, wan tyıknıjky pøni ma tyıknıjky. ¹⁶ Xjats øøts jam nnajxy ja' yjøkø'øm ma ja naajx lıi'nım mejkyuk'am midi txøøw'ajtp Clauda, ma jam ka'ap jadine'en møk pyøjy. Jamts ja mutsk barki midi yikpa-jidøjtp, ja'ats øøts awisā njanchyiktøjkijy'ñ jap møj barkijøtpy. ¹⁷ Kuts øøts jade'en nyıkatkijxy ja mutsk barki, winets ja møj barki ja møj tejpıy yıktā'awøø'n-mujky. Xjats kumi tsø'øgidıp ja jaa'y ku ja barki jam tyøkit pu'jotp midi txøøw'ajtp Sirte, winets ja majpxy møj wet twejtstøødøø midi ja poj møøt tminamyajtısp, ¹⁸ jøts øøts ja tsımy jamyı tuki'iyi nguwojnaxkijxy mejyjotp; ¹⁹ jøts kyımdigøøk xøøw ixanımts øøts ndy-ımy'ukuwojnaxkøjxni tuki'iyi ti jaty ja barki jap wyinatyi myøøt'ajtpy. ²⁰ Kawinaak xøøw øøts jade'en nugo agubajkpy njanchyø'øy, nıti øø nga'ıjxy ni xøøwi ni maadsa', ja'agøjxp ku møk yjanchtuuyøøch. Ka'ap øø n'ukjøp'ejxni jøts øøts jam jujky nbıdsø'ømt mejyjotp.

²¹ Xjats øøts jade'en kawinaak xøøw n'ayuu'ijty, winets ja Pablo ojts wyā'kuki jam jaa'y agujkp jøts wyaañ:

—Migu'uktøjkti, øy'ajtpik jeexy kuk øts n'ayuuik xmadoidøø, winetsik ngatso'oñindøø jam Creta jøts ya'atpi ayo'on jeexy jane'en ngapaajtyindi. ²² Kidi mjotmay'ookti, øy yø barki wyinaty yjawindigø, nipønts kya'ookt. ²³ Mnija'wip meets ku øts ja Dios Teety nmøøt n'ity, jøts ku øts ja y'ayuuik nbaduujniyi, ixyamgoots øts nwindson'ajtim tu'uk tø xaniguexy ankilis ²⁴ midi øts tø x'atsnøjmi: "Ni mgatsø'øgit Pablo, kuwani jam Roma xwinguwa'agit ja møj windsøn César, ja'agøjxp ja Dios myiknitso'ok'atidit niduki'iyi, jøts nipøn tu'ugin kya'ookt ya barkijøøjty." ²⁵ Paty migu'uk ixyam nnigajpxy, møkpiкта'akti mwinmaa'ñ, njanchja'wip øts ja Dios jøts nnijawi ku kuwani jade'en tyikjatt sa øts ja ankilis tø xnøjmi. ²⁶ Ja' ku kuwani ja møk poj jam nøjx xnajtsjibejpi'indi ma ja naajx jam mejjotp.

Jade'en idø'øn ja Pablo tnimaay ja myigu'uk.

²⁷ Majtsk samani øøts idø'øn wyinaty tø nwidity barkijøtpy, winets øøts jam ojts koots njā'aty ma møj mejy txøøwi Adria, møk idø'øn ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyø'øbyi tnajtsja'widøø ku ja barki ja naajx yjawi tpaatwani. ²⁸ Winets tkejpxti ja nøø kyøjnk'ajtin, xjats t'ejxti ku ja ee'pxmaktujt metri kyøjnki; xjats jawaani yjaakyø'odyøø jøts jadigojk tkejpxkojmidi, xjats t'ejxti ku ja ee'pxtaxujk metri kyøjnki. ²⁹ Winets chø'jkidøø ja yikbarkiyø'øbyi ku jotmøn ja barki jam winguwopit møj tsaagøjxp, winets ja yikbarkiyø'øbyi ja møj pux'a-jo'jk twendidøø maktaxk, xjats ja tniwøjidøø kunim ja jap nøøbatki'py muum y'ajø'øky, xjats ja barki jade'en wyā'k'amøkiyi'ñ. Janch tsø'øgijawi dø'øn ja jam tyiknaxti ku pojin yjanchkaxijñi. ³⁰ Jøts wyinmaydi ja yikbarkiyø'øbyi jøts kya'akwa'andi jam møj barkijotp, winets jam nøjxxti barkijøp'am, jade'en ñadyiyi ttunwa'andi jøts ja pux'ajo'jk tjaakpiкта'akwa'andi jap mejy'ok'ajpy, ja'agøjxp ojts tyikpidsømwā'andi ja mutsk barki jøts jade'en kya'akwa'andi. ³¹ Xjats ja Pablo t'ejxpaajty, jøts jade'en ttukmadøø ja soldadi jøts nayide'en ja myisoldadi, jøts tnimaay:

—Ku yø yikbarkiyø'øbyi ya kyata'andit, ni sudso'ampy adøem ya ngapidsøø'mindit.

³² Winets ja soldadi tmidsujkidøø ja mutsk barki jøts nøøjotp tyiknaxkidaktøø, ja'agøjxp jøts nipøn kyaka'akt.

³³ Xjats ku xijndyaajky, winets ja Pablo tnimaay ja myigu'uk jøts o winø'ønin kya'adyit, jøts tnimaay:

—Tø yjawi myajtsk syamaniñi ku jade'en mgama'adi jøts ni mgakaydi. ³⁴ Øts wamp jøts winø'ønin mga'adyit jøts ja møjaaaw xpøktit, pø ixyam inet nipøn inet tu'ugin kyawindigø'øty.

³⁵ Xjats ku ja Pablo jade'en tkajpxwijy ja myigu'uk, winets tnixajiyi'ñ tu'uk tsapkaaky jøts ja Dios ttamø-jā'wiyi'ñ jam myigu'uk wyinguujkp, jøts ja kø'øm kyaay. ³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en. ³⁷ Majtsk magø'pxy ja

tugui'pxmyaktujt øøts jap wyinaty njaa'y'aty barkijøtpy. ³⁸ Xjats ku kyaagyøxtøø, jøts ja ariimbajk kunchi'am tuki'iyi jami t'ukniwibejpatkøxnidøø mejjotp, jøts jade'en ja barki tyiktøø'tskyidøø.

Ku ja barki mya'jty jam mejy'am

³⁹ Xjats ku dø'øn xijndyaajky, winets ja yikbarkiyø'øbyi ni tka'ejxkapti ja naxwii'ñit pø ma dø'øn jam wyinaty tø tyaandi, ja'ayi ku t'ejxpaatti ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømwā'andi ma ja nøø jam t'ejxti ja pyaa'. ⁴⁰ Xjats tmidsujkidøø ja pux'ajo'jk midi ja barki tmaç'h'ejtp, jøts ja japyi tyiktāandøø mejy'ok'ajpy. Winets ja jøpmiweenguipy tka-jo'ongøxtøø midi ja barki twejtsyø'øpy, jøts ja mājpxwyet nayide'en jam tkudidyøø barki jøp'am. Xjats ku ja poj ja tmaçh, winets ja barki jam udyā'aky y'ukyø'øpyidsømwā'andi jam mejpya'am. ⁴¹ Xjats jam ojts adsu'jky tyøki ma ja nøø jam ñawyinaxyiyi, winets ja barki yjøøjp jam ojts møk'ampy kyutopi pu'jotp, ma ja nøø jam wyinaty yø'øy'awidity. Jamts niwinø'ønin kya'ukyu'kxni, xjats ja mejy møk'ampy ojts pyetyiyi jam y'ix'am'ampy, jøts ja barki'øjx jade'eñi ja nøø tyakø'jtsigøjxyøø. ⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jotmøn kya'aktit jam mejjotp. ⁴³ Ka'ats ja soldadi wyindsøn ja Pablo tnankyik'ookwa'andi paty ka' tyikjajty, ja'ayi t'ane'emy pøni pøn tjajtp ja nøøyumk wan ja jawyeen tnødøkidi jøts myeipyidsø'ømdit. ⁴⁴ Jøts nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'ødyi, uk øy'ajtp nayide'en barki pidasikøjxp. Xjats idø'øn jade'en niduki'iyi jujky myeipyidsømdøø.

Sa yjajty sa kyubejty ja Pablo jam ma naajx txøøwi Malta jam mejjotp

28 Ku øøts idø'øn jade'en tum jujky jam nbidsiimy mejjotp, xjats øø nnija'wiyi'ñ kudam ja et jam txøøwi Malta midi jam mejkyuk'am. ² Winets øøts ja Malta jaa'y jam janch tsuj xwindsø'jkii'ñ, jøts ja jøøn tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaajxyi'ñ niduki'iyi, jøts øø nnay'ajo'kxyit. ³ Winets ja Pablo nayide'en t'atskajpmuky ja tø'øts ja'axy, ja'ats wyinaty yjøn'o'jxip winets ja awā'andsaa'ñ jam tu'uk pyidsiimy ja'ax agujkp ku ja jøøn y'ikyiyi. Xjats ja Pablo yiktsu'jch kyøjø'øm. ⁴ Xjats ku ja kugajp t'ejxpaatti ku ja jiyujk jam tyiñi Pablo kyøjø'øm, winets ñawyajnidøø:

—Yikjaa'y'oo'kpi ya'at yjawi, øy jap mejjotpy yjabid-simy jujky, ixyamts kø'øm ja Dios ja tiidyu'unin tø myø'øyi jøts y'ookt.

⁵ Xjats ja Pablo tjønwejtsiyi'ñ ja tsaa'ñ jøts jade'en myatstuujtyøø, nisa dø'øn ja Pablo kyø' kyajajty. ⁶ Tum jade'en idø'øn ja jaa'y ja tjøp'ejxti juuni ja kyø' kyex-pøkt, uk juunits yik'oogiyit. Ku dø'øn ja jade'en tja-jøp'ejxtøø, xjats t'ejxti ku ja Pablo niti kyajatyiyi, winets ja wyinmaa'ñ jaty tyiktigatstøø jøts ñawyajnidøø ku ja Pablo Dios ja'.

⁷ Xjats ku dø'on jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y tniwind-søn'ajtp, ja' xyøøw Publio, ja'ats øøts jam xwaa w tyøjkjotp, jøts øøts jam tigøøk xøøw janch tsuj xyikja'a-daaiky. ⁸ Jamdam wyinaty Publio tyeety pyiky jøøm-ba'am, jøts nayide'en ja ni'jpya'am tmøødi, winets ja Pablo ojts tninijky jøts t'atsmigajpxy. Ja'ats ojts tkud-sapkaajpxy jøts ja pamaa'y jaa'y myøkpiky ku ja ojts tkønixajy. ⁹ Winets ja Pablo niduki'iyi ja pamaa'y jaa'y ñimejniyøø pøn jaty jap wyinaty kugajp'ajttip jøts jade'en choktøø. ¹⁰ Winets øøts may ja may'ajti jadi'iñi nyikmøø'y, xjats ku øøts jap barkijøtpy ndsoonwaañi, xjats øøts tuki'iyi xmøøy pøni ti jaty øøts xka'ejtixp.

Ku ja Pablo yja'jty jam Roma

¹¹ Tø øøts jam wyinaty tigøøk po' ndsinaañi jam Malta, jøts øøts ja tu'uk ndatøjkiy'iñ ja barki midi jam nayide'en tyiknajx ja xuxpyoj. Jamts ja'abi barki majtsk ja dios awanax txox'aty midi tyejtij dios Castor jøts ja dios Pólux; ja'abi barki dø'on ja wyindsøn kugajp'ajtp Alejandría. ¹² Xjats øøts jade'en ndsøø'ñ, winets øø nja'jty ma kajp Siracusa, ma øøts ndaañ tigøøk xøøw. ¹³ Jamts øøts ndsøø'ñ jadigojk jøts øø nniikxy Regio. Jøts øø kyimjabom ndsøø'ñ, winets ja wimbatpoj myi-iñ, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli. ¹⁴ Jamts øø nbaajty wi-naaagin nmigu'uktøjk pøn ja Jesús yja' tpaduujnidip, ja'ats wandøø jøts øøts ja jam nmøøtaa'niit tu'uk samani, winets øøts jam tekyjø'øm ndsoo'naa jøts øøts nniikxy Roma. ¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tuu'am ma kajp txøøwi Foro de Apio, jøts nayide'en øøts jam ojts ja winaaagin xpatsøy ma ja'taajk txøøwi Tres Tabernas. Xjats ku ja Pablo ja myigu'uk twin'ijxy, winets ja ttamøja'wiyi'iñ ja Dios jøts jotkujk ja ñayja'wiyøø. ¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn. Winets ja Pablo yiknimaaay jøts ja tyøjk abiky t'ixa'at, ja'ayi ku nugo tu'uk ja soldadi y'ejx'ityiyi.

Ku ja Pablo kyajpxwa'kxy jam Roma

¹⁷ Xjats ku dø'on jam jade'en ja Pablo chinaay tigøøk xøøw jam tyøjkjotp, winets twaadsøø ja israelit jaa'y ja myøjaa'dyøjkti, xjats ja ñamyujkidøø, jøts ja Pablo tnimaay:

—Migu'uktøjkti, niti øts ngadamidundigøø ja nmigu'uk israelit jaa'dyi, jøts nika'ap øts nayide'en nmidundigøø ja møjaa'chinaay'in, kuwanits adøm nmigu'uk israelit jaa'y xmajch jam Jerusalén, jøts øts ojts xkøyaky puxøjkjotp ma romanit jaa'y kyutujk jam. ¹⁸ Ku øts nyikti'dyuuñ, winets øts jadi'iñi xmajtstu'ut-wandi ja'agøjpx ku øts nbøky ni tu'uk xkapaajtidi midi'ibi øts xuku'oogiwyandip. ¹⁹ Ka'ats ja israelit jaa'y tyikjatwa'andi jøts jadi'iñi nyikmajtstu'utt, ja'agøjpx øts kuwani n'amidøøy jøts øts ja xiidyu'unt ja romanit

møj windsøn. Ka'ap øts ja' ya nnimiñ jøts øts nmigu'uk israelit jaa'y ja' ndani'øønit. ²⁰ Yø' meets ixyam ndaniwaaadsøøpy, jøts meets ka'pxy ndukmado'ot tigøjpx ku øts jade'en puxkadeen kowiiñ n'ity; ja'agøjpx ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkyiky jap oo'kpi jutjøtpy.

²¹ Xjats ja møjaa'dyøjk t'adsojimbettøø, jøts wyandøø:

—Ni tu'uk øøts ja israelit jaa'y ñøky ya xkapaaty mets køjpx, jøts ni tu'uk adøm nmigu'uk israelit jaa'y nisa kyawa'añ. Ka'ap pøn mga'ødyijyiyi pøn jam tsoo'mp jøts ya tø yja'aty. ²² Nija'wip øøts ku yø' o madsoo yik-pagajpxy pøn yø jemy ixpøjkin tjanchja'widip, paty øøts ndsøky'aty jøts øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyujkidøø ma Pablo jap wyinaty tø yja'ada'aky. Winets ja Pablo jøpyi kyajpxøjkiy'iñ kunim chuu'iyi'iñ ja xøøw. Jøts jade'en ttukmadøøy sa nwindsøn'ajtim Dios ja ñaxwii'ñit jaa'y ttanitani ja kyutujk. Ja'ats tyukmadøøpy sa ja Moisés kyutujk, jøts nayide'en sa ja Dios kyugajpxy ojts ttukjaadyañ, jade'en idø'on ja udyaa'ky tjadukja'gyukiwyaañ ku ja Jesús ja yiknitsokpi pøn ja israelit jaa'y yjøp'ejtixp. ²⁴ Xjats winaaagin tja'gyukidøø, jøts niwinaaagin ka' tmibøjktøø sa ja Pablo tjanigajpxy; ²⁵ xjats kumi ka'ap ja nidukna x tmibøjktøø, winets ja choonwanidøø, jøts ja Pablo jadigojk tnimaagyojmi:

—Janch tiydani idø'on ja Espiritu Santo wyaañ midi ja Dios kyugajpxy Isaías tyukmadoow ja n'apteety'amøjti, ku ja yide'en wyaañ:

²⁶ Nøjkx x'atsnøjmi yø'øbi jaa'y:

Wa'ats meets xjamado'ot, jøts ka' xmøjpkta'aktit, nayide'ents wa'ats xja'ejxtit, jøts ka' x'ejxkaptit;

²⁷ jabi yø'øbi jaa'y kawine'enxi kyujuuniidi,

janch wenk myadowdi,

jøts wimbeets ñabyiktā'agyidi;

paty ka'ti tmøjpkta'akti,

jøts ni tkadamadowdi ja tyatsk,

niwinø'onin ja kyubajk kyaja'gyukidi,

jøts ni tkadyimiykwimbetti yø wyinmaa'ñ ok nbojkpi-maa'kxt.

²⁸ Nijawi meets ku ja Dios ja yiknitso'ok'ajtin øøts ixyam ngajpxwa'kxtsoo'ni ma jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaañ, winets ja israelit jaa'y choo'nidøø, ja'ats møk'ampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'niiy'iñ ma ja tyøjk jam t'ajuudyuky, tyajotkujk'ajtpy ja Pablo pøn jaty jam atsmigajpxiyip. ³¹ Jotkujk idø'on ja tkajpxwa'kxy ka' ti jotmay, tyuk'ixpijky ja jaa'y sa ja Dios Teety ja kyutujk ttanitani ja yjaa'y, jøts nayide'en ttukmadøø sa yjajty kyubejty ja nwindsøn'ajtim Jesús, xjats jade'en nipøn kya'adsejpiyøø.

ROMANOS

Ku ja Pablo tñijayi pøn tjanchja'widip ja Jesucristo jam Roma

1 Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaabyi'att. Yide'en idø'on wə'ats kajpxy nbiktaajkin, ja' øts idø'on tø xanibiktaagi jøts øts ja ngajpxwə'kxit ja kyajpxy ja y'ayuujk midi nitso'ok'ajtin xukpaajtimp.

² Pø mā windi'ixyip Dios Teety yø tñigajpxni, jøts ja kyugajpxy ttukyiknaxy yø'øbi winmaa'ñ yø'øbi ixpøjkin jap mā y'ity ja kyajpxy ja y'ayuujk, ³ jøts tñigajpxy ja Dios U'nk pøn nwindson'ajtim Jesucristo'ajtp. Ku ja tñigajpxi ja yjaə'y'ajtin ja ñaxwiiñ'ajtin, ja rey David idø'on ja y'apteety'ajtpy; ⁴ kuts ja dios'ajtin, jats ja tyikni-gaxi'jky ku xemikøjxp jadigojk yjujkyjky jøts kyutujky møk'ampy, jøts ku dø'on ja Dios U'ngi. ⁵ Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts yə ñaxwiiñ yja'attit pøn tjanchjawidip pøn tpaduujnidip ja Dios yja' o mā'et o magajp. ⁶ Jøts meets idø'on nayide'en mjaə'y'ajtmi, nayi tøxi ja Dios mwi'ijxyidi jøts meets ja Jesucristo mja'atidit.

⁷ Meets idø'on nnija'ayidip niwine'enin jam md-søøniði mdanidi Romit kajpkøjxp, niwine'enin ja Dios mdaba'ayøyiði ja chojkin, jøts ja mdamidsøkyidi jøts ja amuum mnadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswə'añ

⁸ Jawyeen øts ja Dios Teety ndukmøjawī ndukunuu'kxyjawi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy mād-soo sə ja janchja'win xjagyapti. ⁹ Diosts testigi'ajtp pøn øts ja y'U'nk ja kyajpxy ja y'ayuujk ngajpxwə'kxi amumjoojt, ku meets ejtp nja'myech ku øts ja Dios nmidsapajpxy. ¹⁰ Ejtp øts ja Dios n'amidøy nbøktsøy jøts tyik'amøjatt jøts mee n'ats'ext, ja' kø'øm kyunuu'kxingøjxp. ¹¹ Ja ku nbaətwə'andi n'ejxwə'andi jøts nmo'owə'andi yin waan ja pudøjkin sə Dios ttsøky, jøts yjaəkmøjitt yjaəkmayit ja m'ajot'ajtindi. ¹² Jade'en'ampy øts idø'on ndijy jøts nixem niyam nnagyajpxjot'amøjka'andit nyiknigaxø'jkindit, jade'engøjxp sə jadu'uk jadu'uk njagyeyjyindi ja janchja'win.

¹³ Uknimadowdi migu'uktøjkti, kawinaək ojk øts jam tø njanchjanøjkxwə'añ jøts mee n'ats'ext, ni ixyam-

baətnim ø nganijky. Jade'en'ampy øts jam njanøjkxwə'añ jøts meets ndukmadowə'añ ja Dios yja', jøts ø n'ext sə wyingaxi'iky øts ja ndunkjøjpp, sam ø tø n'ixy abikyajp mā jaty ø tø nwidity. ¹⁴ Xpaat'ajtpxi øts niðuki'iyi pøn ka'israelit jaa'dyi, wan ja t'ixpikyidi tka'ixpikyidi; ¹⁵ jøp'ijxy ø nnanky'ityi jøts mee nayide'en ndukmado'ot ja Dios y'øgyajpxy ja Dios y'ømyadya'aky, pøn jaty jam Roma tsinaadyip.

Sə ja møk'ajtin tjagyepy ja Dios y'øgyajpxy ja Dios y'ømyadya'aky

¹⁶ Ka' øts ja Dios y'øgyajpxy y'ømyadya'aky ndat-sø'ødyuujniyi, pø ja'axi ja' myøk'ajtin ja'axi ja yik-tumpy, jøts ja ñitso'ok'atti pøn tjanchja'widip ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'ymidi. ¹⁷ Yø'øbi øgyajpxy ømyadya'aky tñigajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios kyajpxy y'ayuujk tyiktaəñ ku wyaañ yide'en: "Pøn kupøjkip ja Dios, ja yjanchja'win ja ttukpaətip ja xemikøjxpit tsinaə'yin."

Ja ñaxwii'ñit jaa'y pyøky

¹⁸ Jap tsajpøtpty ja Dios tyiktsøøñ ja møj ayø'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyanankñijawiyajnidip ja Dios yja'. ¹⁹ Yjanijawidip wə'ats jøts tigøjxp pyaət'aty ku ja Dios yiknijawit, pø tøxi ja kø'øm tyuk'ijxyidi ²⁰ sə ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijawi ku yik'ixy sə ja tø tyik'øyi ja ñaxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaət'atyidi ja'abi jaa'y jøts ja yiktamaa'kxtit jøts ku dø'on ja Dios ja tkanijawidi. ²¹ Øy ja tjanijawidi ja Dios jade'en, ka'apts ja twindsø'øgidi, ka'ap ja tmøjawidi tkunuu'kxyjawidi sam ja Dios pyaət'atyin. Ne'egi wimbet'ampy ja ne'egi wyinmaydi, ja' tyajotkøjxtip midi niti kawamp jøts ja wyinmaa'ñ kya'øyiði, wimbets ku-goots y'ejtnidi. ²² Øy ja yjawa'andi jøts ku ja wyi-jyaa'yidi, jade'ents ja yjatti pøn niti tkajajtip; ²³ tøts ja t'ixwejtsidi ja Dios kyunuu'kxin, midi nijuuni kawindigøøpy, jøts ja tyikmøjtøkidi ja jaa'y yja' ja awa-ñax midi windigøøpy ejtp, joon paət y'awanax, tsaa'ñ paət y'awanax, uk nayide'en øy midi jiyujk midi mak-taxk ja tyeky.

²⁴ Yø'øgøjxpts idø'on Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwyinmaa'ñ (midi'iyim ja y'ijty y'ukjagyajtpip), jøts jade'en

tsø'dyumbim y'adø'tstī nixem niyam; ²⁵ ja ku ka'ap tjanchja'widi ja Dios tyi'ajtin. Ja' ne'egi myibøjktip ja tum ja taay, jøts ja ja' tø twindsø'øgidi ja pikta'aky midī ja Dios tø t'ødyuñ, jøts ni ja Dios ne'egi kø'øm kyayik-windsø'øgi, pøn paa't'ajtip amuum ja windsø'jkin. Jade'en idø'øn ja y'ejxi tyi'yi.

²⁶ Patyts idø'øn Dios ja tø y'ixmachidi jøts ja jade'en y'am'adø'tstī chaach'adø'tstī; ja tø'øxyøjk paa't ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaa't'aty jøts ja jade'en y'adø'tstī. ²⁷ Jøts yaa'dyøjk nayide'enmīdi; ka' t'uknitanaa'niidi ja yaa'dyøjk'ajtin ku ja tø'øxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'tstī, ja ayo'onts idø'øn ttagidajkidip jøts jade'en tyuktuñidi ku tkamøjpikta'akti ja Dios.

²⁸ Kumi ka'ap ja Dios tñijawiwya'andi, patyts ja tø myajststūdyidi jøts ja y'axøøkwinmaa'ñ tyikma-jada'akti, jøts jade'en y'adø'tstī sam ka'ap pyaa't'aty. ²⁹ Tum ja ka'øbyi winmaa'ñ yjagyajtpip, ja kawindiy'ajtin ja axøøk'ajtin, y'ama'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yik-jaa'y'o'ktip, kudsep yjaa'y'ajttip, win'øø'ndip jøts tum wenk øy pøn tñimadyaagidi.

³⁰ Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øbyi wyinmaa'ñ'ajttip, ka'ap tyeety tyaa'k tmimad-owdi, ³¹ ka'ap yja'gyukidi, ka'ap y'ayuujk tpadundi, ka'ap yujy'ajtin tjagyapti, ka'ap tjattī jøts myaa'kxuktīt jøts ka'ap pøn t'ayo'ejxti. ³² Yjanija'widip wə'ats sə Dios tyikutuky; wə'ats tjanijawidi pøn jade'en adø'tstip jøts ku ja kyudigø'dyit xemikøjxp. Jøts nijade'en tkadama-jtstū'utti, tyun'adø'tstip jade'en jinaxy. Tyaxondaktip ku t'ejxti nayide'en y'adø'tsmidi jadu'uk jadu'uk.

Tiy'ajtingøjxp ja Dios tyi'dyūñ

2 Ja'agøjxp ka' mbaat'aty jøts ja myiktamaa'kxt øy sə mjawə'añ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiki ja ayo'on, mbayø'øpy jadu'uk jøts m'adø'tspts jade'en kø'øm. ² Nnija'windipts adøm jøts ku Dios tiy'ajtingøjxp tyi'dyūñ ku ja ttukniiduki ja ay-o'on pøn jade'en adø'tstip. ³ Jade'en mets yjawī mwani mdukniwə'adsip mets ja Dios xijy ja ayo'on, metsxi mdanipijkpy ja mmigu'uk ja ayo'on pøn jade'en adø'tstip, mja'adø'tstip meets jade'en kø'øm. ⁴ Uk ka' idø'øn xtsojki ja Dios y'øy'ajtin ja Dios tyudə'aky'ajtin, ni xkamøjpikta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin. ⁵ Møk ja mwinmaa'ñ xjagyepy jøts ka'anīm xmijotjimbity ja Dios jøts xyiktigatst ja mdsinaa'yin. Kø'ømyi ja m'ay-o'on xyikmiweni xyikajaji, midī nøjxk yikpatp yik'ejxp ku ja Dios ja tyi'dyū'unin tiy'ajtingøjxp tyikme'ent, ⁶ ku ja ttagubatt tu'uk tu'uk sə jaty pønjabøn tø y'adi'ich. ⁷ Pøn tpaatwəndip ja kunuu'kxin ja øy'ajtin xondaajkin midī xemikøjxp, jade'en'ampy ku ejtp øy yikxon yjaa'y'atti, ja'ats idø'øn Dios mo'ojidip ja juky'ajtin midī xemikøjxp; ⁸ pønts nay'ama'at'ajtiyip jøts ka' tpadundi ja tyi'byi yjançpi, tum ja ka'øbyi tyundip,

ja'ats ambøjkin'ampy Dios tiidyunidip. ⁹ Møk y'ayo'odit niduki'iyi, y'amjattit chaachjattit pøn ka'øy'adø'tstip, ja israelit jaa'dyi jøts nayide'en pøn ka'israelit jaa'dyi.

¹⁰ Pønts øyjaa'y'ajttip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja øy'ajtin jøts ja windsø'jk'ajtin.

¹¹ Kumi ka' Dios pøn t'ø'y'ixy tka'ø'y'ixy wan ja tponi; ¹² pøni pøn tkanija'widip ja kutujk midī ja Moisés ja Dios Teety møøjyi piri pøkyundip, nayide'en ja nøjxk wyindigøydi, ni ja kutujk kyatsokit; pønts tjanija'widip ja Moisés kyutujk jøts pyøkyun'adø'tstī, nay ja'abi kutujk ja jaayi nøjxk yiktatiidyundip. ¹³ Ka'ap ja Dios tkupiky pøn nugo tmadoodip ja kutujk jøts ka' tpadundi. ¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybi midī ja Moisés kyutujk y'ane'emy øy ja ja'abi kutujk tjagajagyapti, kyø'ømgutujk ñamyayi yiktundip, ¹⁵ jabi yikwingaxø'k-tipxi ja' sə jaty ja yjaa'y'atti jøts ku ja kutujk tjagyapti. Ja kyø'ømwinmaa'ñ ni'øøniyidip sə y'ø'y'adø'tstī kya'ø'y'adø'tstī. ¹⁶ Ja'abi xøøw yikniyawit ku ja Dios Teety tpikta'akt ja Jesucristo jøts tiidyu'unt niduki'iyi ja jaa'y ti jaty pønjabøn tø ttu'uch ayu'uch, sam ø tø nni-gajpxi ja yiknitsokpi ayuujk.

Sə ja israelit jaa'y ja Moisés kyutujk ñadyamøjyidi

¹⁷ Mets wəmp jøts ku me israelitjaa'yi, jøts ku xpadu-ujni ja Moisés kyutujk jøts mnadyamikajxp ja mDios.

¹⁸ Wə'ats xnijawi sə Dios ttsøky, jøts wə'ats mdukni-jawiyi ja kutujk midī'ibi øy midī'ibi tsuj. ¹⁹ Mnay'a-jə'wiyip jøts ku xjaty xnøø'mo'ot xuu'mo'ot ja jaa'y pøn wimbeets kugoots ejttip. ²⁰ Mnay'aja'wiyip jøts ku xjaty sə xyik'ixpøkt pøn tkanija'widip pøn tkaja'-gyukidip, pø japxi kutujkjøtpy xkajts'ixy ja wejin kajin, ja tyi'byi yjançpi. ²¹ Myik'ixpijkpy ja mmigu'uk, çti kuts kø'øm xkatunjøpi sə ja m'ixpøjkin xyikyø'ø? Ku mgajpxwa'kxy, jade'en mwə'añ ku ka'ap y'øyi ja maa'tsk, maa'tspts mets kø'øm, çtigøjxp ku kø'øm mmeech? ²² Mets mwəmp jøts ku ka'ap pyaa't'aty jaa'y ñiyaa'y ñidø'øxy ñabyøjkxiyidit, jøts çti'ajtp ku jawyeen jade'en kø'øm m'adi'ich? Ni mets kø'ømbaāt xkatsøky ja awənaç, mwimaa'tsidipts ja çaptøjk ti jaty ja yjagyeypy. ²³ Mnadyamikajxp mets ja kutujk, mmi-undigøøpyts ja Dios ku ka'ap jade'en xuñ sə ja kutujk wyə'añ. ²⁴ Paty idø'øn ja Dios kyajpxy wyə'añ: "Pøn ka'israelit jaa'dyi, ja' tka'ødyejtip ja Dios ku meets tum jiwimbet xunguixy."

²⁵ Pø wan wine'enin xjançyiktuñ ja Dios y'ejxpajt mne'kxkøjxp ku xpaduñ ja Moisés ja kyutujk, kuts ja ka'ap xpaduñ, jade'en ja tpaaty ejxim ja ejxpajt jeexyip xkamøøt'aty. ²⁶ Pønts ja ejxpajt kyamøøt jøts pyad-umy sə ja kutujk wyə'añ, jade'en ja tpaaty jøts ku ja ejxpajt ja jeexyip tmøødi, øy ja windii ja ejxpajt yja-gayiktu'unxinim. ²⁷ Pønts ja ejxpajt ka'ejtxip jøts pyad-umy ja kutujk øy ja kø'øm tka'ixpiky, mdabayø'øyip mets ja' ku xkabaduñ ja kutujk, øy mets ja jap xja'ixy jøts ku ja jap kyøxja'ayi jøts øy mets ja ejxpajt xjamøøt'aty. ²⁸ Ka'apts ja jade'en tijy jøts ku ja y'israelitjaa'yi pøn jade'en nugo nikijxy nānky'ejxp, jøts ni

ja' ka' yik'ejxpajtijy midi nikijxy ja'ayi yiktump. ²⁹ Ja' idø'on israelit jaa'y pøn amuum tpadump, jøts ja' ejxpajtin'ajtp midi yikwinmaapy am jotp, jam anmi-ja'wingøjxp, midi ka'ap mā kyøxja'ayi, midi ka'ap mā kyaxi'iky. Pøn jade'en tpadump, kupiky ja y'ity jam Dios wyingujkp, kidi jaa'y wyingujkyip.

3 ¿Tiku yikajpxy ja israelit jaa'y? ¿Ti wyā'añ ja ne'kxkøjxpit ejxpajt? ² Janch møk yjapaat'atyidi ja'agøjxp ku ja' ja Dios kyajpxy y'ayuujk tyami'a-jot'ajtidi jøts ja tpadu'undit. ³ ¿Tits idø'on ja'adi? Øy ja tkabadundi jade'en, ¿winets ja Dios tmajtstu'utt ja y'øy'ajtin? ⁴ ;Niwindem! Jinaxy ja Dios tyiktuñ ja tyiibyijanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tñimadyaajky ja Dios Teety:

Ja mgø'øm'ayuujk me Dios Teety myika'pxy tñidyumbipidsøjmiip,

ku wyinaty nugo mwinmaa'ñ'ijxyidi ja'adi pøn mgamøjpktaajkiyip.

⁵ Sam winaa'in wyā'andi yide'en: ku adømbøkyøjxp tijy ja Dios ja y'øy'ajtin tyiknigaxi'iky, ¿sats adøm idø'on ja'abi ayuujk njā'gyukandit? ¿Ka' idø'on ja Dios y'øy'i ku ja nyikjotmajtyindi, jøts ja ayo'on xjaniguejxyindi?

⁶ ;Nijuuni ka' yjade'eni! Ku Dios jeexyip kya'øyi, ¿sudsots ja jeexyip tñidyuñ ja naxwii'ñit jaa'y?

⁷ Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, ¿sudsots ø nyikpøky'ixy jøts ku øts nbojpkpitumbijaa'y? ⁸ ¿Winets ja tum øy wyimbejtxit ku pøn ttuñ tum ja ka'øybi? Jade'en ja jaa'y winaa'in kya'øwyinmaydi jøts wyā'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

Niduki'iyi ja pøky xaja'jtyindi

⁹ ¿Tits adøm idø'on? ¿Ku adøm n'israelitjaa'yindi, paty adøm jawaani njāaktyimy'øyindi, jøts nika' pøn jade'endi? ;Ka'ap yjade'eni! Pø tøxi nnigajpxy jøts ku tum ja pøky yik'adsøni, wan t'israelitjaa'yidi uk wan tka'israelitjaa'yidi. ¹⁰ Ja'agøjpxi jap nøkyijpxy yide'en wyā'añ:

Ka' pøn y'øyi, nitu'ugin kya'ity pøn øy;

¹¹ nipøn kyaja'gyuki,

nipøn tkanijawiwya'añ ja Dios.

¹² Tum ja wenk tuu' tø tpøjknidi, windigøy ni'ijtyi yjattit.

Ka' pøn tjtømay'aty ja øwyinmaa'ñ, ok idø'on tu'ugin ja'abi twinmaa'ñ'att.

¹³ Tum ja axøøk kajpxy pidsømp y'aawjøtpy yukjøtpy; ja win'øø'nk ja'ayi majyip.

Wingajpxnaxpxim kyajpxy;

¹⁴ tum ja ka'øybi kyajpxpidsømdip, kixy kyubety wyā'andi.

¹⁵ Jøts ja'ayi majyidip ku tñibutti tñiga'akti ja yik-jaa'y'oo'k;

¹⁶ ja' tyunk'ajttip ku yikudigø'ødyit ku y'ayo'on-du'undit,

¹⁷ jøts ka' tñijawidi ja øy'ajtin ja tudā'aky'ajtin.

¹⁸ Niwine'enin tkawinmaydi jøts twindsø'øgidit ja Dios.

¹⁹ Jøts yiknija'wip sã jaty ja Moisés kyutujk wyā'añ, ja'ats ja yikta'ana'amdip ja israelit jaa'dyi pøn ja tø yik-tanibiktaagidi, ja'agøjxpts ne'egi amøñi tyimy'ettit, jøts jade'en niduki'iyi ja naxwii'ñit jaa'y tpaattit ja Dios tyiidyu'unin; ²⁰ nipøn ja Dios tka'øy'ext øy ja tø tjabaduñ midi ja kutujk ñi'ane'empy, jøts ja'ayi ja ñiga-jpxy ku adøm nbojpkpitumbijaa'yindi.

Janchja'wingøjxp ja nitso'ok'ajtin yikpaaty

²¹ Jats jadu'uk ja winmaa'ñ sã Dios xkupøjkin. Yjady-imyjanigajpxy ja Moisés ja kyutujk ja kø'øm, jøts nayi tø ja Dios kyugajpxy ja nayide'en tñigajpxti. ²² Ja' idø'on ja Dios Teety kyupijky pøn tjanchja'widip, pøn t'ajot'ajttip ja nwindson'ajtim Jesucristo; kyupijky ja øy pøn, ka'ap ja pøn jadu'uk jadu'uk twenk'ixy, ²³ niduki'iyixi jaa'y pyøkyundi, jøts ka'ap pøn tminaxy ja pyøky jam Dios wyingujkp. Jagam jixkø'øm ndsi-ña'yindi, ni sudso'ampy ja ñitso'ok'ajtin ja ngapaaj-ta'am. ²⁴ Ejxim ja Dios Teety y'øyi ku ja jaa'y tyiknitso'ok'aty nwindson'ajtim Jesucristo køjxp, jøts jade'en tmay'aty ku tkupiky. ²⁵ Ja Cristo ja Dios Teety pyiktaajk jøts ja tkudanaajyt ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin ku ja njanchja'win, jøts ja Dios Teety jade'en xukni-ja'win ja y'øy'ajtin ja tyudā'aky'ajtin, jøts ku ja tkadagubety ja pøky midi tø yiktuñ jawyeen ku ja nwindson'ajtim tkagu'ooginim ja pøky. ²⁶ Ja'agøjxp jade'en yjaty jøts nnija'win jøts ku Dios Teety y'øy'ajtin tyiy'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

²⁷ ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkiwyandip ja tunk mā Dios, ku ja kutujk nadyijyi tpadundi pøn ja janchja'win tkajagyajptip. ²⁸ Jade'ents yik'ixy yiknijawi jøts ku janchja'wingøjxp ja jaa'y yikupiky jam Dios wyingujkp. Ka'ap ja yikpayø'øy pøni sã ja tø tpaduñ tkabaduñ ja kutujk sã ja y'ane'emy.

²⁹ ¿Ti ja israelit jaa'y nugo ja Dios Teety y'ejx'ijtpy, jøts ja ka'ap t'ejx'ity pøn ka'israelit jaa'dyi? Ka'ap yjade'eni, pø tum ja'axi amuum tja'ajtp. ³⁰ Tu'ugyi Dios, ka'ap ja Dios kyawinaagi; jøts pøni pøn tmøøt'ajtp ja janchja'win, ja'ats ja Dios kyupijky, wan tmøøt'aty uk tkamøøt'aty ja ejxpajt ñe'kxkøjxp sam ja israelit jaa'dyi. ³¹ ¿Ja'agøjxp adøm ja kutujk nga'uk-padu'unindit ku ja janchja'win nmøøt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

Sã ttunjøpi ja Abraham

4 ¿Ti adøm n'apteety'amøj Abraham tyuun jøts Dios ja ojts kyupiky? ² Ku jeexyip ja Abraham ja'agøjxp ja Dios kyupiky ku ja wyinaty tø ttuñ tigati, nadyamøjjiypts ja jeexyip. ³ Yide'ents jap nøkyijpxy wyā'añ: "Ojts ja Abraham tjanchjawi ja Dios, ja'ats ja Dios y'øyja'wiyi'ñ jøts ja ojts tkupiky." ⁴ Ku pøn øy ti tunk ttuñ jøts ku ja yikmijuy, ja tyunkts ja

yiknimiju'uyip, ka'ap ja niñamyay'ati tpaaty, ja' ja kyudøjkip ku ja tø tyuñ. ⁵ Pønts ja tunk tkada'ødyøjkip mā Dios, øy ja ti tjugatuñ, jøts ku ja ja'ayi tjanchjawi ja Dios ku ja pojkpitumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjagyepy ja janchja'win, jøts ja tmay'aty jade'en ku ja tkupiky. ⁶ Nayide'en ja David ojts wyā'añ ku ja ojts tnigajpxy sã ja jaa'y xyonda'aky pøn ja Dios kyupijky, jøts ja ka' tmøjpkta'aky pøni sã ja jaa'y tø y'adi'ich. ⁷ Yide'en ja wyā'añ:

Nekim ja jaa'dyi pøn ja Dios ttamaa'kxidip ja tyundigø'øyin, jøts ja ka'ap myøjpktaajkxyidi ja pyøky. ⁸ Nekim ja' pøn ja nwindson'ajtim pyojkpimee'kxpy.

⁹ Ja'ayi dø'øn nugo jade'en nekim t'ejxtip pøn ttundip ja ejxpajt ñe'kxkøjxp, uk nayide'en idø'øn ja'amidi pøn tkatundip ja ejxpajt? Nnija'windipts jøts ku ja Abraham ja'agøjxp ja Dios ojts kyupiky ku ja ja'ayi tjanchja'wi. ¹⁰ Juunits idø'øn ja jade'en yikupijky? Tø wyinaty ja Abraham jaween ja ejxpajt yikpiktaajki, uk ka'anim? Ka'animts ja wyinaty ttuñ ja ejxpajt. ¹¹ Oojknim ja Abraham ojts yikpiktaajki ja ejxpajt ku ja ojts yiktsuky ja ñe'kx, ejxa'an ja wyā'añ jøts ja yiknijawi ku Dios ja tø kyupiky yjanchja'wingøjxp. Jade'ents ja Abraham ttunjøpiyi'ñ, jøts ja nayide'en ni-duki'iyi janchja'wingøjxp yikupøkti øy ja tmøøt'atti tkamøøt'atti ja ejxpajt ñe'kxkøjxp. ¹² Janch jade'en ku ja Abraham idø'øn kyudanaaby'ajtp pøn ja ejxpajt tmøøt'ajttip, kidi ja'agøjxpip ja ja'ayi ku ja tø yik-tu'unxidi ja ejxpajt. Jade'en'ampy ja tijy jøts ku ja tpa'e-jxti, jøts ja nayide'en tjagyapti ja janchja'win sã ja Abraham, ku ja wyinaty ka'anim ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawi

¹³ Jade'en ja Dios wyānda'aky, jøts ja Abraham møøt niduki'iyi wine'enin ñajtska'axidi yikmo'odit amuum ja naajx kajp wine'en y'ity naxwiiñ; kaja'agøjxppts ja wānda'aky ojts yikpikta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jøts ja' ja wyinaty tø tyagupiky. ¹⁴ Jøts ku jeexyip ja'ayi yikupøkti pøn tpadundip ja Moisés kyutujk, jøts ja'ayi jeexyip yikmo'odi ja Dios y'ø'ajtin, ka'ats jeexyip tyuñ ja janchja'win, jøts ni ja Dios jeexyip ja wyānda'aky niti kyawā'añ. ¹⁵ Pø ttiidyumpxi ja kutujk; mats ja kutujk kya'ity, ka'ap jam ti yikmidundigøy, jabi niti ana'aminx jam.

¹⁶ Jade'en'ampyts idø'øn Dios ja twāndaajky ja'agøjxp ku ja janchja'win ojts t'ixy, jøts ja tmay'att ni-duki'iyi pøn nayide'en ja janchja'win tjagyajp sã ja Abraham. Kidi ja'ap ja Dios tyamiwāndaajki ja y'ø'ajtin pøn tpadundip tkabadundip ja kutujk, pø ja'axi tyamiwāndaajki pøn tjanchja'widip ja Dios sam ja Abraham ttunjøpiyi'ñ. Jade'ents idø'øn ja tpaaty, ja' ñamyayi tnigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip ¹⁷ jam Dios wyingujkp, pø nayi Diosxi ja yjanchja'wiyi'ñ ku wyā'añ ja Dios kyajpxy: "Tø me nbikta'aky møjaa'y'ajtpi o ma'et o magajp." Janch møj ja Dios, øy ja tyikju-

jkpyøkt pøn tø y'oo'kni tyigøøñi, jøts nayide'en tnanky'ijxyi o ti pikta'aky midi ka'ejtpnim.

¹⁸ Øy ka'ap ti jøp'eixin, ka'ap ti winmaa'ñ, ojtsts ja Abraham ja tjanchjawi jøts yjøp'ijxy ja', xjats idø'øn ja jade'en may jaa'y ñamyayi tnigubajk'aty sã u'nkteety y'u'nk y'unā'jk tnideety'aty, jade'en sã dø'øn Dios ja wyinaty tø ñii'mxyi ku ja wyā'añ: "Janch may ja m'u'nk m'unā'jk xpaatt." ¹⁹ Magø'pxy ja Abraham wyinaty ja yjumøjt jøts ka'ap ja sã tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'unā'jk t'ukpatnidit. ²⁰ Ka'ap ja sã tijy, ka'ap ja tka'øyja'wiyi ja Dios wyānda'aky, ne'egi ja amumjoojt tpiktaajky ja yjanchja'win jøts ja tmøjawi tkunuu'kxy-jawi ja Dios, ²¹ jøts ja tu'ugyi tjøp'ijxy jade'en jøts ku Dios tjagyepy møk'ajtin, jøts ja ttu'unt jade'en sã ja wyā'añ. ²² Jade'en'ampy ja Dios ja ojts kyupiky ku y'i-jxyi jøts ku myajada'aky ja yjanchja'win.

²³ Jøts ku dø'øn Dios ja jade'en tkupijky ja yjanchja'win, kidi ja Abrahamip ja ja'ayi kyupøjkip jøts ja jade'en yikjaadya; ²⁴ pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo, ²⁵ pøn ojts yikøyaky jøts y'ooft adøm nbøkyøjxp, jøts jade'engøjxp ojts xemikøjxp yju-jkpyiky jadigojk jøts adøm nyikupøjkint jam Dios wyin-gujkp.

Øwyimbidsimy ku xkupøjkint ja Dios

5 Kuts ja Dios Teety xkupøjka'an ja njanchja'win, jøts jade'en ja nmiduda'aky'ajtin ja nwindson'ajtim Jesucristo køjxp. ² Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'e-jtindip tu'ugyi ja nwinmaa'ñ jøts ja xondaajkin xmø'øyindi, jøp'ijxy nyik'ijtyindi jøts ku ja nbaajta'andit amuum ja y'ø'ajtin. ³ Jøts nayide'en adøm ja ka'ap nwindijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit, ⁴ jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip midi ja Dios tø xanibiktaajkandi. ⁵ Jøts ka'ap majtsk'aaaw majtskjojt n'ejtindit, pø tøxi ja Dios amuum xmø'øyim ja y'ø'ajtin ja pya'ayo'owin ku ja tø xuktatøjka'am ja y'E-spiritu Santo.

⁶ Ku adøm wimbeets kugoots nmijajtyim ja nbøky, niti nitso'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaay' pyøky ku ja tø y'øøky. ⁷ Ka'ap pøn nugo tnigyu'oogi jadu'uk, ni jade'enbaat øy pøn mabaat yjadyimya'øyjaa'yi; pø wants winaaagin pøn ñay'a'ejxyit jøts ja tku'oogit. ⁸ Xjanchojkimpts adøm ja Dios ku adømgøjxp y'øøky ja nwindson'ajtim Jesucristo, øy adøm njapojkpitumbi-jaa'yandi. ⁹ Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjkx xuknit-so'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindson'ajtim Jesucristo køjxp. ¹⁰ Njagami'ø'ajtyindip adøm ja Dios, jøts

adøm ja jade'en xjaaktu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbojpkikøjxp. Mats ku ja ixyam yjujky'aty xemikøjxp, jøts ku adøm ja tømijotjimbijtyindi ja Dios, zti jats adøm ndejint ja winet xka'ukyiknitso'ok'ajtna'ant? ¹¹ Xon'ejtndamdi adøm ixyam ja'agøjxp ku ja nwind-søn'ajtim Jesucristo tømukmigu'ukwa'añim jadigojk ja Dios Teety.

Ja Adán jøts ja Cristo

¹² Jøts tu'ugyi ja jaa'y pøn pøkyun'okwaañ ja naxwi-iñ, jøts ja o'jkin tigø'øyin jade'en'ampy ñaxkidaajky, niduki'iyi øy pøn pyaadyi ja'agøjxp ku ni'ijtyi nayide'en tømijotjimbijtyindi. ¹³ Ku ja kutujk wyinaty kya'itynim, jaayim ja pøky wyinaty ja naxwi-iñ; jaa ku ja Dios ka' tpayø'øñim, pøm ka'animxi ja kutujk wyinaty te. ¹⁴ Ku ja et ja xøøw ñajxy midi tso'ondaajk Adán ñikøjxp jøts yjöpkiy Moisés ñikøjxp, jøts wine'en pøn pyøkyundøø, ja' idø'øn ja o'jkin tigø'øyin mimajadaajkidøø, øy ja tjagajagyapti ja'abi pøky midi ja Adán tyuun ku ja tkamimadøø ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmadip, xjats tømiyiñ ja nwind-søn'ajtim Jesucristo.

¹⁵ Windemts ja møøt n'uk'ejxkijpxyin ja Adán tyundigø'øyin møøt ja Dios y'ø'ajtin midi ja xmø'øyindip. Tu'ugyits ja jaa'y pøn ja pyøky tømukno'jka'andi niduki'iyi jøts windigø'y n'ejtna'andi; jøts tu'ugyi ja nayide'en ja nwind-søn'ajtim Jesucristo pøn ja Dios xuknitso'ok'ajtin ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi. ¹⁶ Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigø'øyin ja'ats yikpayø'øpy jøts tømijotjimbijtyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyin, øy wine'en tømijotjimbijtyindi. ¹⁷ Ku ja tu'ukpi jaa'y tømijotjimbijtyindi, ja'agøjxpts ja o'jkin myajada'aky jøts ja yikudigøy, møjts ja Dios jøts ja ttuñ ja may'ajtin, jøts ja tyaky ja myø'ajtin midi yikjujky'ajtp xemikøjxp ku tu'ugyi njanchja'want ja nwind-søn'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigø'øyin, nayide'en ja nwind-søn'ajtim Jesucristo y'ødyu'uningøjxp ttukpaajty niduki'iyi ja naxwii'ñit jaa'y ja nitso'ok'ajtin, jøts ka'ap ja møk tiddyunin tpaattit pøn jaty tjanchja'widip. ¹⁹ Tu'ukts ja jaa'y pøn kamadoow, jøts ja'agøjxp ja pøky xaja'atkijxyindi; nayide'ents ja tu'ukmi pøn tuki'iyi tmi-madoow ja Dios Teety, jøts ja'agøjxp adøm nyikupijkyindi jam Dios wyingujkp.

²⁰ Jøts ku ja kutujk yikpiktaajky, ja' ja yiktanibik-taajkiyñ jøts ja pøky wa'ats yik'ejxkapt; jøts ja pøky møjta'adøtsp ja', jinaxys ja Dios y'ø'ajtin myø'ajtin tyikmøji'adi'ich nayide'en. ²¹ Sam ja pøky myajada'aky ku ja tyiknaxkida'aky ja o'jkin tigø'øyin, xjats ja Dios ja y'ø'ajtin nayide'en tyikmajada'aky sudso ja xkupøjkin,

jøts ja nwind-søn'ajtim Jesucristo køjxp xmø'øyindi ja jujky'ajtin xemikøjxp.

Ka'ap ja pøky myajada'aky ku ja Cristo yjujky'ajtin nmøøt'ajtyindi

⁶ zTits njaaktu'unindip? zJaaktyimbyøkyun'adøjt-sindip adøm idø'øn ja'agøjxp ku tømijotjimbijtyindi jøts ku ja Dios xu'unxim ja may'ajt ku ja xpo-jkpimee'kxyindi? ² Ka'ap jade'en pyaadyi! Pøm tømijotjimbijtyindi adøm nmajtstuujtyindi ja pøkyun'ünin; zJøts sudso adøm jade'en nbøkyun'adøjtsin? ³ zTi ka'ap xnijawidit ja nnøbajtin, ti ja tyijpy? Pøm ja'agøjxpxi adøm tømijotjimbijtyindi jøts nmøøt'ejtindit ja nwind-søn'ajtim Jesucristo, jøts yiknijawit jøts ku adøm ja nbøky ja tømijotjimbijtyindi xmi'o'jka'andi. ⁴ Møøt adøm ja Cristo ñamyayi nnaxøjka'andi jøts ja møøt n'øøky'ijtyindi, jøts ku ja yjujkyijky xemikøjxp jøts adøm nayide'en nbajtmajan ja jemchinaa'yin midi ixyam jøts midi xemikøjxp, sam ja Dios Teety ja tyukmimadaajkøø ja o'jkin, jøts ja myø'ajtin myø'øyi, jøts ja yjujkyijky xemikøjxp. Nay ja'ats idø'øn yiktump ku ja nnøbajtin yikpaaty.

⁵ Pøni tødams adøm ja Cristo nmøøt'ø'jkyim nayide'en sam ja o'jkin ja tømijotjimbijtyindi adøm ja', jøts ku ja yjujkyijky xemikøjxp jøts nayide'ents adøm ja nmøøtjujkyøjkma'andi. ⁶ Nnijawindipts adøm sa jaty tømijotjimbijtyindi, jøts ja' ja Cristo myi'o'jk jam kruskøjxp, jøts adøm ja nbøky xniwaajchim jade'engøjxp ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sa jaa'y ja wyindsøn tmiduñ, jade'en ja pøky ñamyayi yikmiduñ. ⁷ Pønts tømijotjimbijtyindi, tøts ja pøky ja ñiwaajtsniyi. ⁸ Pøni nmøøt'ijtyindi ja Cristo øy ja møøt nja'ø'jkyim, njøp'ijxy'ajtyindi ja' jøts ku ja møøt njuky'ajtin xemikøjxp, ⁹ pømijotjimbijtyindi jøts ku ja Cristo tømijotjimbijtyindi xemikøjxp, nijjuun kya'uk'oo'knit, nijjuun kya'ukmimadaajkniyt ja o'jkin. ¹⁰ Tuk'ojkyi ja ja'ayi ttuku'o'jkiyñ amuum ja pøky; jøts ja ixyam xemikøjxp yjujky'aty amuum ja Dios Teety tømijotjimbijtyindi. ¹¹ Jøts nayide'ents meets idø'ønmidit, øøky tigøy ndejint mnabyikta'agiyidit jøts ja pøky jade'en xkayikmøj'attit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjxp ku ja nwind-søn'ajtim Jesucristo xmøøt'atti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwyinmaa'ñ, øy sa mduktunwa'añidit pøni sa ja ttsøky. ¹³ Kidi mnagyøkyidi mæ pøky, jøts ja kidi mduktuñidit ja ka'ø'ajtin. Ne'egi amuum mnayoxidit mæ Dios, jøts ja mduktunidit tum ja øy'ajtin. Ka'ap meets ja pøky xukmijuky'ajtnit, jabi tømijotjimbijtyindi meets ndejint tømijotjimbijtyindi, jøts tømijotjimbijtyindi jadisøjk, jøts ja jujky'ajtin tømijotjimbijtyindi xemikøjxp. ¹⁴ Jøts ja pøky ka'ap meets ja m'ukmimajadaajkniyt, pøm kidi ja Moisés kyutujkixi meets mnitanajaayip, ja Diosxi meets ja kyunuu'kxin mdanitanajaayip.

Ja ejxpajt madya'aky ku ja jaa'y ja wyindsøn aguwanī tmiduñ

¹⁵ ¿Sudsots adøm? ¿Jaaktyimbyøktyun'adøjtsindip adøm ja'agøjxp ku ja Dios xanitanāa'yindi ja y'øy'ajtin, ku adøm ja kutujk ka'ap xiidyu'uñindi? ¹⁶ Jøts mni-ja'widipts wā'ats ku tu'uk ja windsøn x'ukmi- dundøkidit, tu'ugyits ja xwindsøn'attit jøts ja' kuwanī mmimado'odip, pø ja'axi wyinaty mdumbi'ajtidip. Nayide'ents idø'on tpaaty ndejint ku ja pøky xmi- mado'odit, ja' meets idø'on ndejint windsønbøjknip øy ja yjayik'øøky jyatyiktigø, uk nayide'ents ku tu'ugyi ja Dios xmimado'odit jøts jade'en xu'undit sã ja ttsøky. ¹⁷ Janch møj ja Dios ku ja y'ixpøjkin xpaduujnidi midit tø myiktagidøkidi, jøts ja pøkytunk tø xmajtstu'utti midit y'ijty niwā'añ myik'ejtniyidip. ¹⁸ Tøts ja pøky mniwā'achidi ku ja ka'ap m'uknimajadaajkniyidi, jøts tø xpatwā'jkidi ja øy'ajtin midit ja Dios yja'ajtpy. ¹⁹ Jade'en ndukmadowdi sã ø najtsjawī xmadodø'ødit, jøts nayide'en xnadyamiyoxidit ja Dios. Sãm y'ijty mnagyøkyidi amuum jøts xundi ja ka'øy'ajtin ja axøøk'ajtin, nayide'ents idø'on amuum ja Dios xnadyamiyoxidit, jøts xuujnidit ja y'øy'ajtin jøts amuum xmøøt'ettit ja Dios, tu'ugyi xagødøkidit ja md- sināa'yin.

²⁰ Ku meets ja pøky y'ijty mganiwā'achinim, ka' meets y'ijty xuujni ja Dios yja', ja tiy'ajtin øy'ajtin; ²¹ jøts ¿ti jade'en tø xpøkti? Mdatsø'odyundip ja ixyam jadi- gojk, pø ja'ayixi ja yajkpy ja o'jkin tigø'øyin. ²² Kuts tø mniwā'achidi ja pøky jøts ja Dios y'øy'ajtin tyiy'ajtin tø xpadøjkiyidi, yø' tiy myiktu'undip, yø' mmo'ojidip sud- so xmøøt'ettit sudso xmidu'undit amuum ja Dios, jøts xpaattit x'ejxtit ja jujky'ajtin xemikøjxp. ²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja jujky'ajtin ja Dios xamay'ajtimp midit xemikøjxp yik- patp, ku møøt n'ejtin ja nwindsøn'ajtim Jesucristo.

Amajtsk'ajtingøjxp tu'uk ja ejxpajt madya'aky pyidsimy

7 Mee migu'uktøjkti, meets mnija'wip sã ja kutujk wyā'añ, jøts mnija'wip jøts ku ja yã ja kutujk tmøøt'aty ja møk'ajtin ku jaa'y jaagya yjujky'attinim. ² Ku n'ukpiktaajkint, ku tu'uk ja tø'øxyøjk y'amajtsk'aty, kutujkøjxpts ja tmøøt'amajtsk'aty ja ñiyāa'y pøni jaakjujky'ajtpnim ja'; kuts ja y'øøky ja ñiyāa'y jøts ja nayide'en ja kutujk ñiwā'achi, ku y'øøky pøn ja y'ity møøt y'amajtsk'aty. ³ Kuts ja tø'øxy jadu'uk yāa'dyøjk t'adsø y jam ja ñiyāa'y yjajujky'atynim, pøkyts ja tyumpy; kuts ja kyu'øøgyi, niwāajtsip ja kutujk ja', øy ja møøt jadu'uk ja yāa'dyøjk y'amajtskit, jøts ka'ap ja pyøkyi.

⁴ Jade'ents mee migu'uktøjk idø'onmidit pøni niwine'en ja Cristo mja'atyidi, myikniwā'ats'ajtniyip meets ja Moisés kyutujk, tøxi mee ñamyayi ku'øøky mdañ ku ja pøky tø wyindigø y jøts ja wenkpi xpadøkidi. Ja Cristo meets ixyam mja'ajtniyidip pøn ju- jkpyøjk xemikøjxp, ja'agøjxp ja yjajty jøts jade'en'ampy nmidu'unindit ja Dios. ⁵ Ku adøm y'ijty pøky y'agujk

ndsinaa'yimnimdi, jøts ja kutujk ja' ja wyā'añ jøts ja tyikjinaxy adøm ja nga'øwyinmāa'ñ, ku ja ngabadu'uñindi jøts ja niti nitso'ok'ajtin xkadukjøp'i- jxyindi. ⁶ Ixyamts tø xniwāajchim ja'abi kutujk, tø ja ñamyayi ngu'ø'jkyim jøts ja tø xuk'ixmajchim ja myøk'ajtin; jøts adøm tø n'awā'atspidsø'ømyindi, tu'u- gyits nmidu'unint ja Dios jøts ja y'Espiritu Santo ja je- my jujky'ajtin xukmi'ejtint midit xemikøjxp, jøts ka'ap ja'abi møjāa'gyutujkin x'uk'ana'amnandit midit y'ijty nbadu'uñindip.

Ja pøky midit xmi'ejtp

⁷ ¿Wā'anīm jøts ku ja kutujk pyøkyi? ¿Ka'ap! Ku je- exyip ja kutujk kya'ity, ka' øts jeexyip nnijawī ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwā'anxant. ⁸ Ja'agøjx- pts ja pøky tø myøjtøki jøts ja myøj'aty. Pøni sã ja kutu- jk yja'ane'emy jade'ents øts ja nnijawī midit'ibi' ka'øy, jøts øts ja jinaxy nduñ sãm øts y'ijty nga'adi'ich ku øts ja kutujk nganijawinim. Ku ja kutujk kya'ity, ka'ats ø nnijawī midit pøky. ⁹ Tø øts jade'en njaty ku ja kutujk ka' nnijawinim, tøøp ø njawī n'adi'ich, ka' njawī ja pøky. Kuts ø tø nnijawī sã kutujk y'ane'emy, jøts øts ja nbøky njawī yjaaktyimyajadak'adi'ich, jøts øts ja kawindem paadyim xuk'ijxy ja øy'ajtin ja kunuu'kxin. ¹⁰ Wimbet øts ja nduñ sã ja yja'ane'emy, midit'ibik øts idø'on xuk- paatp ja øy'ajtin, tø øts ja ne'egi xyikpøkyety. ¹¹ Ja pøky ne'egi nanmyøjtøjkiyip pøni sã ja kutujk y'ane'e- my jøts øts ja win'øø'nin tø xmø'øy. Nay ja kutujk øts jadigojk xanikajpxp ja o'jkin tigø'øyin.

¹² Ja kutujk, øy ja', jøts øy wā'ats yikutuky nayide'en, øy'ajtingøjxp tiy'ajtingøjxp yikutuky. ¹³ Jøts pøni øy tam ja kutujk, ¿sudsots øts ja xpayø'øy, jøts øts ja ñamyayi xuk'ejnī ja o'jkin tigø'øyin? Jøts øy ja kutujk, ja pøky øts jade'en xyik'ejtnip øøky tigø, ka' ti jøp'ejxin, jøts øts ja jade'en xuknijawī jøts ku ja' pyøkyi; tamibøki mi- di øy, jøts øts ja kutujk jade'en xuknijawī jøts ku ja pøky ni sudso'ampy kya'øyi.

¹⁴ Jøts nnija'windip adøm jøts ku ja kutujk Dios tja'aji. Jøts pojkipitumbija'a'y'ajtp øts, jade'en'ampy øts ja pøky xmimajada'aky. ¹⁵ Ka' øts nja'gyuki pø ti ø xajtp, tum jiwimbejts ø nduñ, kuts ja njatunwā'añ midit øy, ja kya'øybi øts ne'egi xmimajadakp midit njagatun- wampy. ¹⁶ Kuts øts ja nduñ ja ka'øybi midit nja- gawampy, jade'engøjxp nnijawī ku ja kutujk y'øyi, ja'abi kutujk ka'axi tyikutuky jøts ja'abi ndu'unint. ¹⁷ Ki- di øtsip ja kø'øm ñamyayi jade'en ndyimyjatumpy, ja pøky jade'en adøtsp midit ø nnikøjxp'ajtpy. ¹⁸ Nnija'wip øts sã jaa'y'ajtin yikjagyepy, niwine'en ja ka'øy'ajtin kyayikmøødi; njatsøky'ajtpy øts jøts ja øybi ndu'unt, ni ka'apts øts ja nduñ. ¹⁹ Ka' øts ja øybi tsujpi nduñ midit njatsøjkpy, tum ja ka'øybi ø ndun'adichpy midit nja- gatunwampy. ²⁰ Kuts øts idø'on ja nduñ jade'en midit ø ngatsøjkpy, ka'ap øts ja kø'øm ndsøkyøjxp nduñ, pø ja pøkyi øts ja jade'en xuktump midit ø nnikøjxp'ajtpy.

²¹ Jade'en njaty ngubety, ku øts ja njatunwā'añ midit øy midit tsuj jøts tum ja ka'øybi ø ndumpy. ²² Wamp øts n'am njotp jøts ku øts ndsojki ja Dios kyutujk; ²³ kuts ø

kø'øm nnay'ijxyi, jøts ø njawi jøts ku ja jaa'y'ajtin ka'ap jade'en ttsøky sam ø njawinmay, ja pøkyts idø'on xuktump midi ø nnikøjxp'ajtpy, jøts ja' ø xkamajststutp jøts ja øybi ndu'unt.

²⁴Ja Dios øts ndagødøjkp ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'ad-sinaapy ja pøkytu'unin, ja' ja mimajadaajkip. iTi ø njanch'ayøøy! ¿Pøn øts ja pøky xuknitso'ok'atp midi øts jam nikøjxp'ajtpy, midi øts xyik'ookwamp xyiktigøøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. janch møj ja Dios!

Ja juky'ajtin midi Dios xmøø'yimp

8 Pøn tmøøt'ejttip ja Jesucristo ka'ap Dios Teety ja mibaat tyaguwaniyidit jøts ja y'ayo'odit, kumi ka'ap ja t'ukyikmøj t'ukyikmøjtøjkiñidi ja pøky. ²Ja Espiritu Santo midi tyajkp ja juky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwa'ach midi øts øøky tigøy tø y'ity xyik'e-jtnip. ³Jade'en'ampy ja kutujk y'ijty kyamajada'aky ku adøm n'ambojkpitu'uñim nadsaachpøjkpitu'uñim. Tøts ja Dios Teety tkexy ja y'U'nk, jøts ja nayide'en tnanky'ijxyi sam ja jaa'yin, jøts ja tku'o'jki ja pøky. Xjats ja tø tmimajada'aky jade'en'ampy ja pøky, jøts adøm ja ka'ap x'ukmimajadaajkna'am. ⁴Ja'agøjxp ja jade'en tø ttuñ jøts adøm ja kyutujk ja wa'ats nbaduujna'am, pø ja'ayixi adøm ja Espiritu Santo yja' nbawinmaa'ijyam, jøts kidi kø'øm winmaa'ñip adøm nyikmajadaajkyim.

⁵Pøn kaniwaajtsipnim ja pøky, ja' yjotmay'ajttip sa kø'øm wyinmaydi; pønts tpaduujnidip ja Espiritu Santo yja', nay Diosts chøky'ajtin ja ja'ayi pyaduujnidip. ⁶Jøts ku jade'en njotmay'ajtin sa kø'øm nwinmaa'yin, yø yjade'embidø'øn yikwindigøøpy; kuts njotmay'ajtin ja Dios yja', ja'ats xukpaajtimp ja juky'ajtin xemikøjxp, jøts ja øy'ajtin midi Dios yajkpy. ⁷Pøn ja kø'øm winmaa'ñ tyiktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutujk ja ttsojki, jøts nika'ats tja'jtmidi sa tpadu'undit. ⁸Paty idø'on pøn ja'ayi ttundip ja kyø'ømwinmaa'ñ midi pøkyøøt, ka'ap Dios ja mibaat jade'en twindsø'øgidit.

⁹Jøts meets, kumi ka'ap meets x'ukyiktuni ja mgø'ømwinmaa'ñ, ja Diosts meets ja y'Espiritu Santo mjagyajpip, ja' mee myikjuky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espiritu Santo, ka'ap Cristo ja yja'aty nayide'en. ¹⁰Pøni mmøøt'e-jtidipts meets ja Cristo, øøky windigøyts ja pøky ñamyayi ñøjkxni møøt ja mnine'kxti, jøts ja anmija'win ne'egi yjuky'aty ja'agøjxp ku ja Dios tø mgupikyidi. ¹¹Pøni mjanchmøøt'ajtidipts ja Dios Espiritu Santo, midi ja nwindson'ajtim Jesucristo ojs jadigojk xemikøjxp yikjukpyiky, nay ja Diosts meets ja mnine'kx kø'øm yikjukpyøkip, jøts jadigojk xemikøjxp mjuky'attit.

¹²Jøts xpaat'ajtindip adøm, migu'uktøjk, jøts ka'ap njuky'ajtindit pøky agujkpy midi ttuktump ja kø'øm winmaa'ñ. ¹³Pøni mdunwandipts jade'en sa ja pøkytu'unin, øøky mee m'ejtni, kudigøy mee m'ejtni; pøni m'ajot'ajttipts ja Dios Espiritu Santo jøts ja xukmima-

jada'akti ja mbøky, mjuky'atpts meets jade'en xemikøjxp.

¹⁴Ja' ja Dios Teety y'u'nk'ajtpy pøn ja Espiritu Santo ja tyukpudøjkp jøts ja wyinmaa'ñ ja tyiktøøji tyiktudaajki. ¹⁵Ku myikmo'odi ja Espiritu Santo, kidi ja'ajip ja myiktanimøø'yidip jøts meets tsø'øgi jawi myik'etidit, pø ja Espiritu Santoxi meets ja Dios mmøø'yidip jøts m'u'nk'atidit ja Dios, jøts ja' idø'on xyikwa'anindip amgujk jotkujk ku adøm ja ndeety'ajtyim. ¹⁶Ja'abi Espiritu Santo majada'akp, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi. ¹⁷Ja' adøm xja'ajtindip, paty adøm nayide'en ja Dios xmøø'yindit ja juky'ajtin midi ja tø twanda'aky, midi ja xmøøpwy'a'anindip. Midi ja Cristo yikmøøpy, nay ja'ats adøm yikmøø'yindip. Pøni ngupøjkyindip adøm ja ay-o'on sa ja tø y'ayøy, winets adøm ja nay ja'abi øy'ajtin xukpaajtint midi ja yikmøøy.

¹⁸Kidi nayide'enip ja' sa adøm icyam ja ayo'on nbaaj-tyindi, ka'ap ja jade'en tmi'abaaty midi dø'øn Dios kyunuu'kxin'ajtpy, midi dø'øn jaanim nbaajtindip n'e-jxindip. ¹⁹Tuki'iyi midi ja Dios tø tyikøjy, yjanchja'awe-jxnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngip, pøn jaty ja yja'ajtpy. ²⁰Nayide'en amuum ja naxwii'ñit tø y'ayo'ombaaty Adán pyøkyøjxp, kidi kyø'ømmdsojkingøjxpip ja naxwii'ñit ja jade'en yjaty, ja Dios ja jade'en tø tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt, ²¹jøts ja Dios ja yikti-gajtsmyit amuum, nay ja'abi øy'ajtin tpaatt midi ja jaa'y yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tø pyøkyety, ku ja tø wyindigøy. ²²Jade'en icyam yjaty ja naxwii'ñit midi ja Dios tø tyikøyi, sam tu'uk ja tø øxyøjk y'amnipiky chaachnipiky ja y'u'nk ku kye'exy, amuum tmigii'pxy tmibø'øty. ²³Jøts kidi ja naxwii'ñit jade'en ja'ayi tyimy-jajtp, nayide'en adøm njajtma'an ku adøm tø ayo'on nbaajtyim, øy adøm ja Dios ja y'Espiritu Santo tø xmøø'yim ejxpajt'ajtin, ja'agøjxp ku xjaaktukpaat-wa'añimnimdi midi paat'ajtyidip pøn jaty ja Dios u'nk'ajtidip. Njantyimyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtindit ejxim tu'uk ja u'nkteedyin, jøts ja xyiktigajtsa'ant ja nne'kx. ²⁴Janchja'wingøjxp ja'abi nitsoojkin yikpaaty; kuts ja janchja'win yikmøøt'aty, ja' idø'on tyijpy ku adøm n'awijxyindinim midi ngapaajtyindipnim. Jaa ku ja jeexyip yikmøøt'ajtni, ¿tits idø'on jaakyik'aw-exp? ²⁵Kuts adøm idø'on jade'en njøp'ijxyindi midi kayikmøø'yindipnim, yiktudakpy ja tsinaa'yin jøts ja winmaa'ñ ja'.

²⁶Jøts nay ja Dios Espiritu Santo adøm xpudøjkamp ma nayja'wiyam nduu'dujkyim, ku ñiti winmaa'ñ, ñiti aaw, ñiti ayuujk ngajagyepyindi, jøts ka' ja winmaa'ñ nbaajtyindi sudso nmøøtmadyaajkint ja Diosu'nk. Nay Espiritu Santots kø'øm ja Dios Teety t'amidoop ja pudøjkin sa nduu'baajtint nduu'ejxint, ja'agøjxp ku tjaty sudso øy ja Dios Teety tminuu'kxa'akt. ²⁷Jøts wa'ats ja Dios Teety xnija'wa'am sa jaty pønjabøn wyinmay, jøts ja ñimadøyi Espiritu Santo sa jaty ja

wya'añ ku ja xku'amido'owam sam ja Dios Teety kə'əm ttamidsəky pən jaty ja yja'ajtpy.

Cristo kəjxp nmajadaajkyindi

²⁸ Nnija'windipts ku ndsojkindit ja Dios, yajkpts ja pudəjkin ja' pəni mə jaty sagasa njajtyindi, jəts jade'en tyik'əpyidsimy pən jaty ja tə twi'ixy, sə ja jawyeen tə ttanibiktaagi kə'əm. ²⁹ Tə ja Dios Teety twi'ixy patki'jyi ja yjaa'y jəts ja tə twiwich. Təəyip ttanibiktaagi jəts yjaa'y'attit nayide'en sə ja Dios U'nk yjaa'y'aty, pən tnigubajk'ajtp ja jaa'y pən jaty ja Dios Teety ja'ajtidip, tum uch tum migu'uk ja tjawi niduki'iyi. ³⁰ Pən ja Dios tə ttanibiktaagi jade'en patki'jyi, jəts ja tə twaadsəy; kuts ja tə ñimiñyi, jəts ja tə tkupiky, winets ja nayide'en tə ttamini'adsəwi ja əy'ajtin amuum.

³¹ ʔSats adəm ja nwa'anin ndejint? Pə amuumxi adəm ja Dios məət n'ijtyindi, ʔpənts adəm xnimyimajadaajkip jade'en? ³² Ka'ap ja Dios t'amə'at'ajty ja y'U'nk, kyəyajk ja' jəts ja y'ookt adəm nbəkyəjxp; ʔsudso də'ən ja ndejint adəm xkaməgyəjxint tuki'iyi midi myəət'ajtpy, pəni tədam ja kyə'əm U'nk jawyeen tə xanigəjxim? ʔTiku də'ən ja ndejint tkayakt? ³³ Əy pən tjani'əniwya'añ ja jaa'y pən ja Dios tə wyi'ijxyidi, pə Diosxi ja kə'əm tə kyupikyidi, ³⁴ ʔpənts ja mibaat nidyaniğutujk'atidip jəts ja tpaattit ja ayo'on? Pə ja Cristoxi ja tə kyu'oogyidi, jəts nay ja'ats tə yujkpyiky xemikəjxp, Dios Teetyts ja amuum məət y'ity, jəts ja' adəm jam xni'amido'owamp pəni sə ndyimyajtyindi ndyimgyubejtyindi. ³⁵ Ku xpa'ayə'əyim ja Cristo, ʔpən adəm ja xni'idyukmajtstuujtimp ja pya'ayo'owin? Nipən adəm ja xkadukmajtstuujtint, wan tjati'ayo'oni, əy nja-jotmay'əjkyim, əy njayikjemdu'uñindi njayikte-du'uñindi, wan yuu tja'ity, uk ku wet naəmy xka'e-jtxindi, uk ku tsep, uk o'jkin tigə'əyin yjayikpaaty. ³⁶ Pə yide'enxi jap nəkyijxy wya'añ:

Ejtp əəts ja jaa'y xyik'ookwə'añ ja'agəjxp ku əə nbaduujni ja mja';

jade'en əəts nyiktuñ sə jiyujk sə borreek y'ookwə'añ. ³⁷ Əy adəm jade'en njajtyindi, ne'egits adəm ja jinaxy ndyimyimajadaajkyindi ja' myək'ajtingəjxp pən ja pya'ayo'owin tə xmə'əyindi. ³⁸ Jade'ents ə nwa'añ jəts ku niti nipən xkadukmajtstuujtint mibaat ja Dios pya'ayo'owin, nja'ə'jkyindi njadigə'əyindi, uk njady-imyajujky'ajtyindi. Ni ja ankilis ja xkadukmajtstuu-jtindit uk yjayikutujkpitəjkidi, yjadyimyjaja'ajidi pən jap tsajpətpy uk yjamajidi. Ni ja xəəw ni ja juməjt midi ixyam yə'əpy, uk midi memp kidəkpnim, nija' adəm ja xkadukmajtstuujtindit. ³⁹ Wan ti tkəjxp, uk wan ti tkəjki, wine'en Dios tə tyikəjy niti kyamayi yjade'embj jəts adəm nmajtstuujtindit ja Dios pya'ayo'owin, midi ja tə tyiknigaxi'iky nwindson'ajtim Jesucristo kəjxp.

Dios ja Israelit jaa'y tə wyi'ijxyidi

9 Tiy janch ə ngajpxy, pə ja Cristoxi əts njanch-ja'wip, ka'ap ə ndaəbyaaty; ja Dios əts y'Espiritu Santo wə'ats xuknija'wip jəts ku əts tiy'ajtingəjxp nga-jpxy. ² Janch jotmay'oo'kp əts, ndyimchaachkyuw-

ma'ayip əts kajaa, ³ jəts wəmp əts, əy meets ayo'on patki'py ndyimgyu'ettit jəts ja Cristo ngaməət'etnit pəni tsojkip jade'en, nugo ku əts nmigu'uktəjk n'ədyuñ jəts xpaattit ja Dios, wine'en ndukojp'aj-tyindi. ⁴ Ja Israelxi ja tyee'ty'apidip, jəts ja' Dios tə y'a'e-jxyidi jəts yjagyepyidi. Jəts ojts ja kə'əm ja Dios kyunuu'kxin t'ejxyidi tnija'wiyidi, jəts ja' ja məəjyidəə ja tiy'ajtin sudso ja jadigojk ñitanidyidit ja Dios. Jəts nay ja' ja ttagədəjkiyidəə ja Moisés kyutujk, jəts ja windsə'jkin midi ja tyu'undip jam mə ja çaptəjkti. Jəts nay ja' ja Dios ttukmidəajnidəə ja wyanda'əky jəts ku ja y'ədyunidit. ⁵ Tu'ugyi əəts kugoja'adi pən jaty israelit jaa'dyi; jəts nay ja' ja tyee'ty'apidip pən adəm ndeety'ap'ajtyindip, nayide'ents ja Cristo, pə adəmxj ja' ñamyayi njaa'y, jəts kəjy ja'ani ku ja amuum tñitanit ti jaty ejtp naxwiñ, pə Diosxi ja', windsə'əgi winjawi ja y'ity xemikəjxp. Jade'en idə'ən ja y'ejxi. ⁶ Kidits nwa'añim jəts ku ja Dios tkayik'aduknim ja wyanda'əky midi ja məjaa'y Israel yiktaniwandaajkəə wine'en y'ap y'ok ja tə ñajtska'axidi. Ka'ap ja Dios ja'ayi tə twi'ixy ja'ayi pən ja Abraham y'apteety'ajtp; pə yide'enxi Dios ja wyinaty tə ñi'ixy: "Nayi mets mnigojpk'ajtpy ja Isaac y'u'nk y'una'jkti pəni wine'en ja ñajtska'axidi."

⁸ Jade'ents adəm nnija'wa'am jəts ku Dios ka'ap t'u'nk'aty pəni mə pən jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' də'ən Dios y'u'nk'ajtpy pən tje'əjxtip ja wyandaajkin. ⁹ Pə yide'enxi ja Abraham ja Dios ñiməajyəə ku ja Dios wyandaajky: "Tiempj kəjxp ə nme'ent, u'nkpaətp yə mnidə'əxy Sara."

¹⁰ Jəts kidi ja'ayipts nadyu'ugyi yiktamiwandaajki ku ja y'u'nk ja tpaatt. Jabi nayide'enxi ja Rebeca ja y'una'jk tpaətməə pən ja Isaac tyee'ty'ajti, adəm ja ndeety'aməj. ¹¹ Jəts ka'anım ja wyinaty yjaja'atinim, kidyimkyaxtipnim ja wyinaty, ka'anım ja wyinaty yiknijawi sə ja y'adə'əttit əy ka'əy, jəts ja Rebeca ja Dios ojts ñi'ixy: "Ja myəjpi tmidu'ump ja myutskpi." Nayide'ents ja məət tuknəx tijy ku wya'añ ja Dios kya-jpxy: "Nwinja'wip əts ja Jacob, jəts Esau ka'." Xjats ja Dios jade'en xuknija'wa'am jəts ku ja kə'əm twi'ixy kyə'əmdsojkingəjxp pəni pən ja y'a'ejxip. Ka' tməjpk-təajkiyi ja y'ədyu'unin kya'ədyu'unin.

¹⁴ ʔTits adəm ñikyajpximp? ʔTi ja adəm nwa'anint jəts ku Dios ka' tyiy'adi'ich? iPə ka'axi! ¹⁵ Pə yide'enxi ja Moisés yikniməay: "N'ayo'ejxp əts ja' pəni pən ə kə'əm n'ayo'ejxwampy, pəni pən ə kə'əm nba'ay-oowampy." ¹⁶ Jade'en'ampyts ka' çəkyi jəts adəm ngə'əmwinnməə'ñ ndamajadaajkint, pə ja Diosxi kə'əm x'ayo'ejxindipnim. ¹⁷ Pə patyxi ja Dios kyajpxy wya'añ ku Dios tñəjmi ja jaa'y pən windsən'ajtp jam Egipto: "Ja'agəjxp məj windsən tə nyikjaty jəts əts ja nmək'ajtin nyikwingaxi'iky ku mets nmimajada'əky, jəts əts nxəəw o mədsoo yiknijawit." ¹⁸ Xjats idə'ən jade'en ja Dios t'ayo'ixy pəni pən ja y'ayo'ejxwampy, jəts ja twinməə'mbyiky pəni pən ja kyayik-madogukiwyampy.

¹⁹ Winets meets idə'ən x'adsojimbett: "Pəni janch ku yjade'eni, ʔtigəjxp Dios təky'ixy ja jaa'y? Jəts ʔpənts

mibaat t'ukwindso'op ja Dios?" ²⁰ Jøts jaa'yts adøm, jøts zjaaktyimbyøn meets ku meets Dios yja' xk-agupøjkit? zTi ja ja tu'jts tnimaañit ja ñijaa'y pøn ja tø yik'øyyi: "zTiku øts jade'en tø xyik'øyi?" ²¹ Pø ja tu'jt-sna'abixi kø'øm pajtíp pøni sã ja kø'øm tyik'øyiwyã'ãñ ja na'aknaajx; øy ja tyik'øyt ja tu'jts tu'uk midi øy midi tsuj jøts ja tu'ugyi ttanibiktaagi ti ja wyã'ant, uk øyts ja nay ja'abi naajx tna'at jøts ja tyik'øyt jadu'uk ja tu'jts midi øy ti ñiwyã'ant.

²² Ku ja Dios tmidani jøts tmidudã'aky'aty ja jaa'y pøn ja tø yikjotmã'adyi, pøn tyimyjapaajtniyidip jøts y'ayo-odit uk jøts ja tyimgyudigø'dyit, ti ja kamaa'niyip, ixë ja ayo'on ja ttuktagida'aky jøts ja myøk'ajtin ja jade'en tnanky'ejxit. ²³ Ots ja Dios jade'en ttuun, ka'ats adøm ja jade'en tø xuu'ñim, ja'agøjxp ku adøm ja xpa'ayø'øyindi jøts tnanky'ijxyi jade'en mabaat ja tjagyepy ja myøk'ajtin, jøts ja t'ayo'ijxy pøn ja patki'jyit tø twi'ixy jøts ja ttukpaatwã'ãñ ja y'øy'ajtin. ²⁴ Tø ja Dios kø'øm xwi'ijxyindi, ku ja winaagin twi'ijxy ja is-raelit jaa'y, jøts nayide'en winaagin pøn ka'israelit jaa'dyi. ²⁵ Sam ja Dios ja kyajpxy ttamigaxiyiñ ja kyugajpxy Oseas, ku ja wyaañ yide'en:

Pøn øts y'ity ngaja'ajtpy, ja' øts nja'bøkp,
pøn øts y'ity ngatsojktip, ja'ats ø ndsoktip.

²⁶ Nay jam et ja xemijjkyi Dios ja kø'øm yja'bøkidit mã ja yiknimaadyø: "Meets, ka' mee nja'aty."

²⁷ Kuts ja israelit jaa'dyi, pø yide'enxi ja kugajpxy Isaías wyaañ: "Øy ja Israel mabaat ja y'u'nk y'unã'jk yjamøjdi yjamayidi sam nøø'abu' myayin, niwinaagints ja'adi pøn nitso'ok'attip, ²⁸ jabi ka'pxy ja Dios ja y'ayuujk tpadu'unt sã ja tø wyã'ãñ, ku ja tyiknaxkida'akt adsu'jky ja tiidyu'unin yã naxwiiñ." ²⁹ Sam ja Isaías wyi-naty jekyit tø wyã'ãñ:

Ku ja Dios jeexyit tø tkayiknitso'ok'aty winaagin ja aats ja kugoj midi yikojk'ajtp,

tø adøm jeexyit jade'en njajtna'am sã Sodomit kajp sã Gomorrit kajp ku ja tø kyudigøgyøjxti.

Sã israelit jaa'y tka'øyjãwidi ja øgyajpxy ja ømyadyã'aky

³⁰ zTits adøm ngajpxindip? Yjanchjã'wingøjpxxi Dios ja tø kyupikyidi pøn ka'israelit jaa'dyi, yam ja y'ity tka-jotmay'atti sã Dios ja kyupøkidit jøts ja ne'egi tø kyupikyidi. ³¹ Jøts ja israelit jaa'y, pøn ja kutujk tpadundip jøts ja jeexyit ja' ja Dios tyagupikyidi, ka'ap ja ne'egi yikupøkti ja'agøjxp ku ja kutujk ka'pxy tk-abadundi. ³² Ka'ap ja twinmaydi jøts ku Dios ja tyagupøkidit ja janchjã'win, ja' Dios ja tijy tagupøkidip ti jaty ja tyundip. Ja'ayi ja tyamøjti, ja'agøjxpts wingu-wopi jøpkuwopi tmijatti ku ja nwindson'ajtim tø myiñ. ³³ Jade'en yjatti sam yiknigajpxy mã jap nøkyijxy wyã'ãñ yide'en:

Nyikaxø'økp øts jam Jerusalén tu'uk midi ja jaa'y nay'adsepi yjawip jøts ka'ap ja pøn myayit;
pøni pøn ja tjanchjã'wip, ka'ap ja windigøy yjatt.

10 Møk øts, migu'uktøjk, ja tsojkin njagyepy jøts øts ja Dios n'ajot'aty, jøts ø n'amidøy nbøksøy jøts ja israelit jaa'y tnitso'ok'attit. ² Jade'en ø nwã'ãñ

jøts ku ja tjatsojkti ja Dios, jade'en'ampy ku ka'ap tjatti. ³ Ka' tñijãwidi sudso Dios tkupiky jaa'y; kyø'ømgutujk ja' yiktundip, ja' ja tijy tagupøkidip ja Dios, ni tkamøjpkita'akti ja' midi Dios ja tagupøkidip. ⁴ Pø ja'agøjpxxi ja Moisés kyutujk kya'uktuni, pø ixaanixi ja Cristo jøts tum ja'ats ja Dios kyupijky pøn ja tjanch-jã'wip.

⁵ Jøts ku Dios ja kutujk xagupøjkint, pø yide'enxi ja Moisés ja tjaa'y: "Pøni pøn tpadunwamp ja kutujk, ka'pxy tpadu'unt winets yikjuyk'attit mã Dios." ⁶ Jøts ku Dios xkupøjkin janchjã'wingøjxp, yide'enxi ja wyã'ãñ: "Kidi mwã'ãndi: zPøndam nøjxpx tsajpøtpy? —jøts ja Cristo mye'ent—; ⁷ jøts ni mgawã'ãndit: zPøn jap nøjxpx mã ja o'jkin?" —jøts yjuykpyøkt ja Cristo xemikøjxp. ⁸ Pø ka'axi yjade'eni, pø yide'enxi ja wyã'ãñ: "Ka'ap yjagami ja nitso'ok'ajtin, ixã ja xmøødidi wingon", ku xjanchjãwidit sã ja øgyajpxy ømyadyã'aky mduknijãwyidi midi øø ngajpxwa'kxpy. ⁹ Ku mwã'ãndit jøts ku ja Jesús ja' nwindson'ajtin'aj-tyindip, jøts xjanchjãwidit amumjoojt jøts ku Dios Teety ja tø yikjuykpyiky xemikøjxp jadigojk jap oo'kpi y'agujky, winets xpaattit ja nitso'ok'ajtin. ¹⁰ Ja' ja Dios xagupøjkimp ku ja amuum njanchjã'want, jøts ku n'am njotp pyidsø'ømint ja ayuujk, jøts nwã'ãnint jøts ku ja Jesucristo ja' nwindson'ajtim'ajtyindip, ja' xyiknit-so'ok'ajtindip. ¹¹ Pø yide'enxi jap nøkyijxy wyã'ãñ: "Pøni pøn ja tjanchjã'wip, ka'ap ja windigøy yjatt."

¹² Tu'ugyi nwindson'ajtim ja tñitani, wan t'israelit-jaa'yidi uk wan ja tka'israelitjaa'yidi; ka'ap ja pøn t'eix-mã'aty, myøøpy kyejxy ja kyunuu'kxin pøni pøn ja t'a-jot'ajtp, may'ampy ja tmø'øy. ¹³ Jabi yide'enxi wyã'ãñ ja kyajpxy y'ayuujk: "Pøni pøn amumjoojt ja nitso'ok'ajtin t'amidoop nwindson'ajtimgøjxp, ja'ats nitso'ok'attip."

¹⁴ Kuts ja pøn tkajanchjãwidinim, zsudots ja t'amido-jidit ja kyunuu'kxin? zSudso ja tñijanchjãwidit ku ja jeexyit kyayiktukmadowdinim pøni pøn ja', ku jeexyit kya'ity pøn ja nidyukmadowidip ja øgyajpxy ja ømyadyã'aky? ¹⁵ Pønts tkajpxwã'kxp ja øgyajpxy ja ømyadyã'aky, zsudso ja jeexyit tñikyajpxwã'kxti ja øgyajpxy ja ømyadyã'aky ku Dios ja jeexyit kyakexyidi? Pø patyxi jap nøkyijxy wyã'ãñ: "iNdaxondaajkimp ja jaa'y pøn tkajpxwã'kxp ja Dios y'øgyajpxy y'ømyadyã'aky midi xukmado'owimp ja øy'ajtin ja tu-dã'aky'ajtin!"

¹⁶ Ka'apts jaa'y niduki'iyi tmøjpkita'akti ja øgyajpxy ja ømyadyã'aky. Jade'en ja ttundi sã ja kugajpxy Isaías tñigajpxy ku ja wyã'ãñ: "Dios Teety, zpøn ja m'øgyajpxy ja m'ømyadyã'aky yjãwi tø t'ukjanchjãwi?" ¹⁷ Winet ja janchjã'win yikjagyepy ku ja tø nmadø'øyim jawyeen ja øgyajpxy ja ømyadyã'aky midi ja Cristo nigajpxip.

¹⁸ Ti kuts ø nyiktø'øt, jøts ø nwã'ãnt: zWan ndejint tø xkamadowdi ja øgyajpxy ja ømyadyã'aky? iPø tøxi xja-madowdi! Jabi ja'agøjpxxi jap nøkyijxy yide'en wyã'ãñ:

Tø ja øy madsøo yikmadowdi pøn ja tø tkajpxwã'kxti,
tø ja øgyajpxy ja ømyadyã'aky øy madsøo yjã'aty yã naxwiiñ.

¹⁹ Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxy ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets,

pøn tkanija'widip, ja'agøjxp meets ja xami'ambøkt.

²⁰ Jøts ja Isafas ja Dios yjaaktyimyikwa'anymi yide'en:

Pøn øts y'ijty xka'ixaadyip, tøts øts ja ne'egi icyam xpaatti;

tø øts ne'egi nñanky'ijxyi pøn øts y'ijty xkanija'widip.

²¹ Jøts ja Isafas ja Dios yjaakyikwa'añi ku ja tñigajpxy ja israelit jaa'y: "Tø øts kawine'en njawaadsøy ja jaa'dyi pøn kawindiy'oo'ktip, pøn niwine'enin kamadoodip."

Ja Israelit jaa'y pøn winaagin tpattip ja nitso'ok'ajtin

11 Jøts ø nyiktiðyøki: ¿Tø ja Dios tyimyajst'uty ja Israelit kajp, ka'ap ja t'ukupøjkni? iPø ka'axi! Israelit jaa'xyi øts kø'øm, tu'ugyi ja Abraham yik'aadsi yikøjki, ja Benjamín ø ndeety'apip. ² Jekyip ja Dios yø tja'biky yø israelit jaa'y; jøts icyambaat tkamajst'uty. ¿Ti ka'ap meets ja Dios kyajpxy y'ayuujk xnija'wiyi, ku yiknimadya'aky ja Elías, pøn ja Dios kyugajpxyip, ku ja ojs Dios t'ajot'aty jøts Dios ja ojs ttukmadøy sa Israelit jaa'y y'adø'øtsti? Ku ja wya'añ yide'en: ³ "Dios Teety, tø mgugajpxy yik'oo'kixyidi, tø yikjeitkixy ma jaty myikwindsø'øgi, nadyu'uk øts njaaktañ, jøts xyik'ookwandip øts nayide'en." ⁴ Jøts Dios ja ojs yide'en y'adsøyi: "Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax midi Baal yiktejp." ⁵ Nayide'ents idø'øn icyam yjajtkojmi, ja winaagin pøn ja Dios tø wyi'ijxyidi, pøn ja kø'øm tø ttanibiktaagi y'øy'ajtingøjxp. ⁶ Ti tundaajk ja jaa'y øy ti pøn tjatuñ jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'øy'ajtin. Ku jeexyip jade'en kø'øm ja' yiktama-jada'aky, jade'ents ja jeexyip tpaaty jøts ka'ap ja Dios y'øy'ajtin ti niwya'añ.

⁷ Xjats ja israelit jaa'y jade'en winaagin tkapaatti sa y'ity yjawinmaydi, tømsts ja tpaatti ja øy'ajtin pøn ja Dios kø'øm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukyidi ja Dios yja'. ⁸ Jøts idø'øn ja jade'en jyaty sa jap nøkyijpxy wya'añ: "Dios ja kø'øm tuujnidip jøts ja kyadukjawiidi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en icyambaat yjatti." ⁹ Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uu-jkin,

jøts nay ja'ayi tyapøkpyattip jadigojk jøts ja yiktagubattit.

¹⁰ Wan t'etti wimbeets kugoots jøts kyaja'gyukidit, jøts ja xemikøjxp yiktagubattip.

Sa nitso'ok'ajtin tpaatti pøn ka'israelit jaa'dyi

¹¹ ¿Ku dø'øn ja israelit jaa'y jade'en ja Dios tø tyuñidi, tø ja tyimwyindigøøgyøxti? iPø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin

pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi. ¹² Ku ja israelit jaa'y jawyeen kø'øm tø tk-agupøkti ja Dios y'øy'ajtin ja'agøjxpts ja tø yikmo'odi pøn ka'israelit jaa'dyi, jøts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmijotjimbe-jtkøxtit ja Dios, ¿ja ti ka'ats ja naxwii'ñit jaa'y ja kunuu'kxin nayide'en jawaani møj tpaattit?

¹³ Nyiknaxwampy øts nayide'en aaw ayuujk, jøts ø ndukmadoowa'andi meetsti pøn ka'israelit jaa'dyi. Pø meetsxi tø nyiktaniguexy ku øts ja Dios tø xkexy, jøts xnijawidit jøts ku øts ja ngajpxwa'kxin ka' niñugøji.

¹⁴ Kidi wanik jade'en winaagin nitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin. ¹⁵ Jabi jade'enxi ja naxwii'ñit jaa'y tø tpaatti ja nøø' ja tuu' sudso ja Dios myaa'kxujkin tpaajtidit, ku ja Dios tø t'ats'ejxma'aty ja israelit jaa'y. ¿Tits idø'øn tyimyikpøtp ku ja israelit jaa'y ja Dios jadigojk t'awimbetidit? Ja nitsoojkin idø'øn ja jadigojk pyatp pøn windiy'ejtnidip. ¹⁶ Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujt-skojpk ja', nayide'ents inet ja tmi'ett amuum tuki'iyi møøt y'awaj y'axeeñ.

¹⁷ Jade'ents idø'øn ngajpxin ja israelit jaa'dyi sa ja kipy awaj midi ja olivo kipy y'awaj'ajtpy, jøts meets jade'en pøn ka'israelit jaa'dyi sa jadu'uk pa'olivo kipy y'awaj midi niñugo øy ma ujtsjøjty ejtp. Kuts ja yikajts-pøøty midi ja israelit jaa'y kipy'ajttip ndejint, jøts meets ja mja' ne'egi jam yikøx'øøch ma dø'øn jam ja jadu'ukpi awaj tø wyinaky. Jøts meets ja jade'en xpaat'aty ja jujky'ajtin midi xemikøjxp, tu'ugyi ja m'aats mgojpk ñamyayi y'etti. ¹⁸ Ka'ats mnadyamikaxidit, kidi xuktamøjidi xuktamutskidi ja israelit jaa'y pøn ñamyayi ixwejtsidip ja Dios. Pøni m'adø'øtswandip jade'en, jawidi jøts ku nayi israelit jaa'y ñikøjxp idø'øn ja nitso'ok'ajtin tø mnimiñidi, kidi mgø'ømnikøjxpipti.

¹⁹ Mjawa'añ meets: "Janch jade'enimts, tøts ja yjiwa'akti jøts øøts ja icyam ngudanaañip."

²⁰ Jade'en'ampyts ja yik'ixwetsti ku tkajanchjawidi ja Dios, jøts meets myikupiky jade'engøjxp ku ja xjanch-jawidi. Kidits mnamyikexyidi, øyim yikxonim tud'a'aky mnabyikta'agit. ²¹ Pø m'ejxtipxi mnija'widipxi ku Dios ja israelit jaa'y ja tkadamee'kxy, jøts nayide'ents meets ja mgadamaa'kxmiiyt ku jade'en m'adø'øtstit. ²² Jøts m'ejxtip mnija'widip jøts ku Dios janch øy, jøts tum ja tiy'ajtin yiktumpy. Møk ja ttiðyuiñ pøn ja mi- dundigøjyip. Mmi'øy'ajtipts meets ja', jøts tu'ugyi xpayø'øyidit ja y'øy'ajtin; pøni ka'ap jade'en xpadundi, nayide'ents nøjxk mjatti sa ja israelit jaa'dyi. ²³ Kuts ja israelit jaa'y jadigojk tmijotjimbettit ja Dios jøts tjanch-jawidit amumjoojt, kupøkidip ja jadigojk jøts ja ju-jky'ajtin myo'ojidit midi xemikøjxp; tyu'ump ja Dios jade'en, ti ja ka'ukmajyip. ²⁴ Sa meets ja tø mgupiky, jøts ka'ats meets mja'israelitjaa'yi, jøts tøts meets ja mmø'øyi ja nitso'ok'ajtin, iti kuts ja israelit jaa'y kyayikupøktit, pø ja'axi ja y'ity tyimyjapaat'ajtidip!

Ku Israelit jaa'y ñitso'ok'attit xemikøjpx

²⁵ Meets migu'uktøjkti, ndukmadoowandip icyam jøts xnijawidit sã Dios ja wyinmaa'ñ tmøøt'aty, jøts ka' nugo mnay'agajpxidit jøts ku meets wijy'ajtin amuum xmøøt'ajtkixy: tø Israelit jaa'y ñamyayi y'amutski. Ejtp-nim ja jade'en kunim ja yikupøktit namay pøn ka'Israelit jaa'dyi. ²⁶ Ku nøjkk jade'en tø y'ukjaty, winet-nimts ja Israelit jaa'y ni'ijtyi ñitso'ok'attit, pø patyxi jap nøkyijxpy yide'en wya'añ:

Kaxø'økp tu'uk ja Israelit jaa'y, ja yiknitsokpi, jøts ja' ttukniwa'ats'atp ja jaa'y ja ka'øbyi pøn jaty ja Jacob t'aadsidip tkøjpkidip.

²⁷ Jøts ngajpxy n'ayuujk øts wyinaty jade'en nyik'adujkpy,

ku øts ja nyikpøkwy'a'atsttit.

²⁸ Pøn israelit jaa'dyi, pøn tkagupøjktip ja øgyajpxy ja ømyadya'aky sudso ja nitso'ok'ajtin yikpaaty, ejxma'jt-niyidip ja Dios ja ñamyayi jøts meets ja mgunuu'kxyi; ka'apts ja Dios ja tyimy'ixmachidi, tsojkidip ja' ja'agøjxp ku ja Dios kø'øm tø twi'ixy ja møjaa'dyøjk.

²⁹ Pø ka'axi Dios ja jadigojk tpiky pøni ti ja yajkpy; pøni tø ja twi'ixy ja jaa'y, ¿sudsots ja nugoyi t'ixmatst jadigojk? ³⁰ Meetsxi ja Dios y'ijty mga'ukmimadøøpy, kuts ja israelit jaa'y ja tø tkamimadowdi, xjats meets ja Dios tø m'ayo'ijxyi. ³¹ Jøts ja nayide'en yjatti sã meets y'ijty xkamimadøyin ja Dios, ja'agøjxp ja jade'en ttuñ jøts ja jadigojk t'ayo'ext nayide'en sã mee tø myik'ayo'ijxyin. ³² Ja Dios jade'en kø'øm tø ttanibiktaagi jøts ja niduknax kyayikmimado'ot, ja'agøjxp ja jade'en ttuñ jøts o pøngapøn tuknax ja ttuk'ext ja pya'ayo'ajtin.

³³ ¡Ka'ap jade'en ti tmi'abaaty sã ja Dios ja øy'ajtin tjagyepy, sã ja wijy'ajtin, sã ja ja'gyukin tmøødi! Ka'ap pøn tmiwinmaa'nbyaaty pøni sã wyinmay, pøni midi tyunwampy, mã ñøjkwã'añ yjã'atwã'añ. ³⁴ "¿Pøn tniñi-jã'wip sã ja Dios wyinmaa'ñ? ¿Uk pøn ja tyukjaty jøts ja jade'en ttu'unt? ³⁵ ¿Uk pøn ja Dios jawyeen ti tø tmøøy, jøts ja ja' ttaguyãki midi ja xmøøyimp?" ³⁶ Tum ja Dios amuum tja'ajtkøjxp jøts ja' tyik'øyigyøjxp, jøts ja tyiktunwã'añ pøni ti jaty ja tø tyik'øyi. ¡Kunuu'kxy etpyim ja Dios xemikøjxp! Jade'en idø'øn y'ejxi tyi.

Midi chøjkpy ja Dios ku ja nnadyagødøjkant

12 Kø'øm mee migu'uktøjk ja Dios amuum mnadyamiyoxit. Øy'ajtp jøts jade'en xu'undit mi-di ja y'øyja'wip kyunuu'kxyja'wip, ja' ñamyayi mdawindsø'øgidip ja Dios. Ku ja x'ayo'ijxyindi, jade'en mee nminuu'kxã'aky jøts jade'en xu'undit. ² Kidi jade'en mdsinay'adø'øtsti sã xuktu'uñin ja kø'ømgutujk, ja kø'ømwinmaa'ñ. Mijotjimbetti ja Dios jøts ja mwinmaa'ñ nayide'en tyigatsttit, winets ja jujky'ajtin xpaattit midi amuum myiktigatsidip jøts jade'en xni-jawidit midi ja Dios chøjkpy, ja øbyi ja tsujpi midi ja Dios mda'øyja'wiyidip, midi øy wã'ats pidsømp.

³ Yide'en øts ja Dios xanigutujk'aty y'øy'ajtingøjxp, jøts ja' mee ndukmadøøpy, kidi nugo mnadyamøjpik-tã'agyidi pøni ti jam jadu'uk jadu'uk yjajtpy. Pøni

mabaat ja Dios kø'øm tø mdukjatyidi, ja' mja'gyukidip. ⁴ Ka' nduknax'ajtyindi, nayide'en sam ja nine'kx yik-jagyepy may jøøjp yikmøødi, jøts ka' tum ja' wya'añ pøni ti tu'uk wya'añ, ⁵ nayide'ents adøm idø'ønmididi, øy adøm mabaat njamaya'am, tu'ugyits adøm ja Cristo xja'ajtyindi, jøts nixem niyam ni'amuki n'ijtyindi sã kø'teky tkamajststu'uty ja nine'kx.

⁶ Kija' ja Dios xyikwinmaa'nbyaajtyindi pøni sã ja kø'øm ttamidsøky nidu'uk jaty. Wants tyiktunkpaaj-tyindi øy yikxon. Pøni tø Dios xmøøyim ja wejin kajin jøts ngajpxnajxa'ant ja y'ayuujk midi ja tø xmøøyim, ndu'unindipts ja jade'en pøni mabaat ja janchja'win xukjagyeyjyindi; ⁷ jøts pøni tøts ja xmøøyim ja wejin kajin jøts ja nmigu'uk nduujna'ant ja y'øbyi, mbadu'unindipts idø'øn ja jade'en. Jøts pøni pøn ja Dios tø myøøyi jøts yik'ixpøkt, ja'ats idø'øn ja tyu'ump; ⁸ jøts pøni jamts pøn tø yikmøøy jøts tkajpxjot'amøjkit ja myigu'uk, ja'ats idø'øn ja tyu'ump. Pøni jamts pøn øy ti tyajkwã'añ, ka'ap kyø'ømwin-maa'ñ tyikyø'øty jøts ja ja' ttaguyãkit øy ti. Pøni jamts pøn yikmøøpy jøts ja tnøø'mo'ot ttuu'mo'ot ja myigu'uk, yikxonimts t'ext tudã'aky'ampy; jøts pøni pøn tpudøjkidip ja ayoobi jaa'y pøn ti ka'ejtxidip, ejtni xoni dø'øn tpudøkidit.

Sã pyaät'aty' ttu'undit pøn ja Cristo yjanchja'widip

⁹ Nabya'ayowidi nixem niyam. Yikjiwã'akti ja ka'øbyi, jøts tundi ja' midi øy midi tsuj, midi ja Dios kyupiky'ajtpy. ¹⁰ Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyind-sø'øgyidi nixem niyam, kidi pøn xkamøj'ejxti.

¹¹ Jotmay'atti ja Dios, kidi mnuuxidi, amumjoojt xmi-du'undit ja Dios.

¹² Taxonda'akti jøts ku ja myikmo'odit midi mjøp'ejt-tp; jøts kidi nugo x'ayojidi wine'en mjemjatti mdejatti, jøts kidi x'ixmatsti ja Dios'ajot'ajtin niyuuni.

¹³ Pøni jam ti kya'ijtyxidi pøn ja Dios yjanchja'widip, pudøkidits; øyim yikxon xyikja'attit xyiktsoondit pøni pøn mbaajtidip m'ejxidip mjønnotp mdøjktotp.

¹⁴ Pøni pøn mga'ødyuujnidip, tagødøkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

¹⁵ Xonda'akti nayide'en pøni xondaktip ja mmigu'uk, tsaachjawidits nayide'en pøni jiidyp yaxtip.

¹⁶ Namyayidi nixem niyam, yikxon mdsøønidit mdanidit. Kidi mnamyikexyidi, møøt'etti pøn ayoobi jaa'y'ajttip. Kidi mwã'andi jøts ku meets nadyu'uk tuki'iyi xjaty.

¹⁷ Pøni tø pøn mga'ødyuñidi, kidits meets ja nayide'en xunwimbejtmidi. Ejtp xu'undit ja y'øbyi øy madsoo. ¹⁸ Yik'amijatti mabaat mmajada'akti, jøts yikxon xmøøtsøønidit xmøøtanidit ja mmigu'uktøjk, amuum ja tudã'aky'ajtin xyiktu'undit. ¹⁹ Kidi mee migu'uk kø'øm xagubety ja mmidsep pøni sã ja mduñidi, ja Diosxi kø'øm yik'ayo'ombaa'diditnim; jabi yide'enxi jap nøkyijxpy wya'añ: "Øts xpaat'ajtp jøts øts ja ndiidyu'undit; øts ja ndagubattip, nømpxi Dios."

²⁰ Jøts nayide'en ja wya'añ, jøts ku tijy x'ødyu'undit pøn

mmijotmā'jtīdip, wan ja tka'uknagymayidi. ²¹ Kidi ja ka'øybi mmimajada'agyi, jaa ja xmimajada'akt ku tum ja øybi xu'unt.

13 Mimadowdi ja windsøndøjk. Pø Diosxi kə'øm tə tyikutuky jøts ja kudunktøjk yja'attit. ² Pøni pønts ja tkamimadoowampy, ja' idø'øn ja wyinaty kyamimadøøpy pøn ja tə tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjcx yiktiidyundi. ³ Jøts kidi ja'ajip ja kudunktøjk ñi-ja'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwin-gunøjkxit ja kudunktøjk, jaa'y'ats yikxon jøts ja kudunktøjk niti mgadamatsit, ⁴ pø ja'axi Dios ja tə tyanibiktaagiyidi jøts ja øybi xu'unt. Kuts kə'øm mga'øyjaa'y'att, pøkyjawits mets ja mbøky; pø kidi nu-gojipxi ja kudunktøjk ja møk'ajtin tjagyapti ku ja tyiidyundi, pø ja'axi Dios ja tə tyanibiktaagiyidi ku ja tə tyikutuky, jøts ja tiidyu'undit tiy'ajtingøjxp pøn tundigøødyip. ⁵ Ja'agøjxp pyaat'aty xiimado'odit ja kudunktøjk pø mwinmaadyipxi, kidi ja'agøjxpip ja nu-go xundi jøts ja mgatiidyundi. ⁶ Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tə tyanibiktaagiyidi jøts ja jade'en ja tyajuky'ajtin tpaattit, jøts jade'en mjaaknigudunk'atiyidit.

⁷ Migubajtkøxtits pøni pøn jaty jam mmiyoj'ajttip. Pøni jam pøn kyayakñim kyagubetynim, wants ja tyak-ti; uk jamts pøn ti tkagujyynim tkagubetynim, wants ja tkugujuy tkugubety; pøni pøn jam ja windsø'jkin tyiktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyiktigøøpy, wan t'amigu'uk'aty ja myigu'uk. ⁸ Ka' ti pøn xamiyoj'attit, ja tsojkin ja pa'ay-o'owin ja' idø'øn tiy xem yam mjagyaptip; ku jade'en xu'undit, ja kutujks meets idø'øn wyinaty jade'en tə xmimadøy. ⁹ Pø nømpxi ja Dios y'ana'amin: "Kidi mniðø'øxy kidi mniyaa'y mnabyøjkxiyidi, kidi myik-jaa'y'øøky, kidi mmeech, kidi mdaay'aty, kidi xami'a-ma'at'aty ja mmigu'uk pyikta'aky"; jøts tuki'iyi ja Dios y'ana'amin tu'ugyi ja yide'en y'ayuujkpidsimy: "Mba'ayo'op ja mmigu'uk nayide'en ejximdam kə'øm mnabya'ayøyin." ¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkixy ku ja tsojkin nyik-tu'unint, jøts jade'en niwine'en ja kutujk kyayikmidundigøy.

¹¹ Jøts tə tyimbyaaty ja et ja xøøw, tajotigøjyidi ja Dios yja'. Tyimwyingomp ja ayo'on winets xpaattit amuum ja nitso'ok'ajtin. Nax'adøtsp ja et ja xøøw, ka'ap y'ity jaa'kjade'en ku njanchja'wiy'okwa'añindi miduk'ojk ja Dios y'øgyajpxy ja y'ømyadya'aky. ¹² Ka'pxnip ja et ja xøøw, tyimdyukmibaat'ajtpy ja Dios; wants tmajtstuujtyindi ja ka'ødyu'unin ja pøkyu'unin, jøts jøp'ijxy nnanky'ejtna'andit, tum ja øybi wa'atspi nyik-tu'unindip midi kapøkmyøøt. ¹³ Wan tuda'aky tjaa'y'ajtna'andi sam pyaat'aty pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsaj'pxp, nmiga'ayin nmi'uujkin, uk nnamyøøt'atwa'añindi øy

pøn møøt, uk ja tsep ja' njotmay'ajtyimp, uk ndami'a-ma'at'ajtyindip ja nmigu'uk øy ti. ¹⁴ Kidi jade'en m'adø'øtsti, tu'ugyi nwindson'ajtim Jesucristo xpadu'undit sa ja ya chinaay, jøts kyamøjtøkidit ja mbøkyu'unindi.

Kidi mmigu'uk xpagajpxy

14 Pøni jam pøn myajada'aky kyamajada'aky yjanchja'wingøjxp, kupøktits, kidi sa xejti, øy ja wyinmaa'ñ yjaganayide'endi sam meets ja mja'ajin. ² Ja may pøn tjøø'kxtip øy ñityi, jøts nayide'en pøn amaay'ejttip, pøn nugo u'nkjii'kxy tsujkxjii'kxy ttojkk-tip, jøts wya'andi jøts ku ja' chøkyi Dios wyingujkp. ³ Pønts tjøø'kxp øy ti, ka'ap ja tka'øyjawit pøn amaay pøn wi'ijxy øy ti tjøø'kxp; jøts nayide'en ja'ami, ka'ap ja pyagajpxmit, ka'ap ja sa ttejmit pøn øy ti tjøø'kxp, pø tøxi Dios ja kə'øm kyupikyiyi, ⁴ jøts ja'ats midundip. ⁵ Mjaaktyimbyønts meets ku meets ja xpagajpxt, yamts ja Dios ja tmiduñ? Wan ja t'øyi uk tka'øyi, ja wyindsønts ja paajtip pøni sa ja kə'øm tyuñi. Jøts yik'øyip ja', ⁶ ti Dios ka'ukmajyip ku ja tka'ukyik'øyt myøk'ajtingøjxp?

⁷ Jøts jaa jadu'ukmidi pøn wändip tu'ugin ja xøøw yik'amaay'att, jøts jadu'uk wyamidit ku ka' pyaat'aty ni midi xøøw kyayik'amaay'att, tum jade'en ja xøøw tu'u-gyi. Kija'ats tñitanidit ja wyinmaa'ñ tigøjxp ku jade'en wyinmaydi. ⁸ Pøn t'amaay'ajtp tu'uk ja xøøw, ja Diosts ja tyawindsø'jkip; jøts pøn tka'amaay'ajtp, nay ja Diosts ja jade'en wyindsø'jkinmo'op. Jøts pøn tjøø'kxp øy ti, nay ja Diosts ja tyukmøja'wip tyukunuu'kxy-ja'wip; jøts pøn amaay'ajtmidip, ka' ti tñiyjii'kxy, nay ja Diosts ja tyawindsø'jkip ku ja jade'en tñuñ, jøts ja ttuk-møjawi ttukunuu'kxyjawi amuum.

⁹ Ka'ap pøn nugo ñiyjuky'aty, ka'ap pøn nugo ñiy'øøky. ¹⁰ Ku nujuky'ajtyindi, Dios xyikjuky'ajtindip, jøts pøni o'jkindipts, nay ja'ats xkwent'ajtindip. Jøts jade'en yiknijawi jøts ku ja amuum xja'ajtyindi øy adøm njajuky'ajtyim, uk nja'ø'jkyim njadigø'øyim adøm. ¹¹ Pø ja'agøjpxpi ja Cristo yjukpyijxy xemikøjxp ku ja tmimajadaajky ja o'jkin, jøts ja tu'ugyi ixyam tñitanaagyixy øy midi'ibi.

¹² Tigøjxpts ku mee kə'øm ja mmigu'uk xabayø'øy sa y'adø'øtsti? Jøts ni xkatsokti paat meets ja'. ¹³ Pønts xijy ta'amp, pøn kanaxp jam Cristo wyingujkp? Pø ja'axi xabayø'øyindip ja nbøky, ja' xiidyu'unindip. ¹⁴ Pø yide'enxi jap nøkyijxy wya'añ:

Øyi madsoo n'ity, jøts øts nwingujky niduki'iyi jaa'y kuwani ñagyuxendyakøxidit.

Jøts wya'andit ku øts ja'ayi tu'ugyi ndios'aty.

¹⁵ Jade'ents idø'øn, kija' idø'øn ngøyajkint jam Dios wyingujkp pøni sa nidu'uk jadu'uk tə njaa'y'ajtyindi ja naxwiñ.

Ka'ap ja nmigu'uk nyikwinmaamya'jtindit

¹⁶ Paty ka'ap nnabyagajpxandit nixem niyam. Ne'egi ja' njotmay'ajtindip sudso ja nmigu'uk ngayikpøkpya-jtindit. ¹⁷ Tumwa'ats nwindson'ajtim Jesús tə tñanibik-taagi, ka' ti nugo kə'øm tyimiykøkpyety; kyø'ømwin-

maa'ñ ja' pøn nōmdip jōts ku øy ti kya'øyi kyawa'ādsi. ¹⁵ Jōts ku ja jii'kxy midi kayik'ødyejp kayikwa'atstejp nnadyabagajpxandit nugo, ¿ti pya'ayo'owints jade'en njagyejpyindip? Paty ka'ap pyaāt'atyi jōts ja nyik-mōjindit pōni ti ja nmigu'uk yjii'kxyindip, jōts jade'en ngaduk'ayoojindit ja nmigu'uk, jōts ka'ap ja yjanchja'win kyudigø'ty. ¹⁶ Kidi ja' xui' midi yjawi ja mdsi- nāa'yin ja mjanchja'win yiktabagajpx. ¹⁷ Kidi ja kaagyip jii'kxyip xagupøjkindip ja Dios mā ja kyutujk amuum ttanitani ja yja', pø ja øchinaa'yinxi ja chøjkpy ja tuda'aky'ajtin ja xondaajkin midi ja Espiritu Santo xmø'øyindip. ¹⁸ Pøn jade'en tmidump ja Cristo, ja' Dios chøjkpy jōts øyja'wiyip ja jaa'y ja'.

¹⁹ Wants tjaaknija'wa'andi sudso nbaajitindit ja tuda'aky'ajtin midi nyiktu'unindip jōts ja nnadyabudøjkandit nixem niyam, jōts jade'en myøk-taajkindit ja njanchja'win. ²⁰ Kidi ja ngø'øm ja' adøm nugo nyikmajadaajkindip, jōts adøm ja Dios yja' ngayikmøjtøjka'andit. Øy ni midi jii'kxy yja-gayikpøkpyety, jade'en ne'egi pyaāt'atyi jōts ja' xka-jø'kxtit midi ja mmigu'uk kya'øyja'wip jōts ja jade'en xkayikpøkyā'at. ²¹ Ne'egi øy'atpts ku ja tsu'uch ka' xtsu'utstīt, uk xka'uuuktīt ja vino, uk xkatu'undit o ti, nugo ku ja mmigu'uk xkayikwinmaa'nmya'attī, nugo ku kyapøkpyatti jade'en'ampy jōts kyatuu'tigø'ødyit. ²² Dios ja ja'ayi mduknija'wip pōni sã mets ja mwin-maa'ñ xyikyø'øy. jJotkujk ja jaa'y pøn kyabadumpy mi-di ja pyøkyja'wip! ²³ Pønts tjøø'kxp øy ti majtsk aaw majtsk joojt, kø'ømts ja ñankpyøkpyetyi ku ja tjii'kxy, kumi ka'ap jotkujk tjii'kxy; jōts ti jaty kayiktump jotku-jk'atyim, pøky ja'.

Ja' mdu'ump midi ja mmigu'uk tya'ødyøkip

15 Pøn jaty møk tjagyajptip ja janchja'win, xpaat'ajitindip adøm jōts nbudøjka'andit pøn ja yjanchja'win tu'ugyi tkamøøt'ajitipnim, jōts kidi adømyi kø'øm nnabya'ayø'yindi. ² Nidu'uk jaty adøm xpaat'ajtyindi jōts ja ndabudøjka'am midi ja ødyunidip jōts ja yjanchja'win myøjtā'aktit. ³ Pø ni ja Cristoxi ojs kø'øm kyanabya'ayøyi, ne'egi ja yjaaktyimyajty jade'en sã jap nøkyijpxy yide'en wya'āñ: "Tum øts ja tø xaja'atkixy sã jaty ti jaty mgayikta'ødyundip mgayik-ta'øñimaadyip." ⁴ Pø ja'agøjpxxi ja Dios ja kyajpxy tñankyajyøø jōts adøm ja nnija'wa'an ti jaty ja ñigajpxpy ja y'ixpøjkin, ja'ats adøm ja xmø'øyimp ja kajpxjot'amøki jōts tuda'aky ngupøjkindit o ti ayo'on, jōts tu'ugyi ja awejx'ajtin yikmøøt'att ku yikpaatt ja xemikøjxpit jujky'ajtin. ⁵ Ja Dios Teetyts adøm xyikmajadaajkindip o ti ayo'on jōts ja xkajpxjot'amøjka'an. Wants ja mbudøkiyidi jōts mdsøønidit mdanidit yikxon nixem niyam, sã nwindsøn'ajtim Jesucristo tñajstū'uni, ⁶ jōts tu'ugyi ni'amuki xja'byaattit xkajpxpaattit ja Dios Teety pøn ja nwindsøn'ajtim Jesucristo tyetya-ajtpy.

Ku ja Dios y'øgyajpxy y'ømyadya'aky yikajpxwa'kxy ma jaa'y kya'israelit jaa'yidi

⁷ Nagyupøkidits nixem niyam, kidi sã mnadyijyidi mnawya'añidi, nagyupøkidi nayide'en sã adøm nwindsøn'ajtim Jesucristo tø xkupijkyindi Dios Teety wyindsø'jkin wyinja'wingøjxp. ⁸ Pø israelit jaa'yxi ja Cristo ñimimpy jōts ja tpudøkit, jōts jade'en ja Dios Teety ja wyandaajkin tyik'adujkit midi ja møjaa'dyøjk wyinaty tø yiktamiwanda'agidi. ⁹ Jōts nayi ñimeen ja' pøn ka'israelit jaa'dyi, jōts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'āñ:

Nja'byaātp mets ngajpxpaatp mets øy mā naajx øy magajp, mā jaty ja jaa'y chøøni pøn ka'israelit jaa'dyi, jōts n'øø't jōts nxu'uxt mets windsø'jkingøjxp.

¹⁰ Jōts nayide'en wyami ja Dios kyugajpxy:

Mxonda'aktit tuknax pøn ka'israelit jaa'dyi møøt ja is-raelit jaa'y pøn ja Dios ja'ajtyidip.

¹¹ Jōts jap abiky mā jap wyami:

Møja'wimyidi kunuu'kxyja'wimyidi ja Dios ni'ijtyi pøn ka'israelit jaa'dyi,

kajpxwa'kximyidi ja myøk'ajtin o magajp.

¹² Jōts yide'en Isaías tyukjadya'anmiyøø ja Dios:

Ja Isaí ñikøjxp pyidsø'ømt pøn ñiwindsøn'ajtmip pøn ka'israelit jaa'dyi;

ja' ja tu'ugyi tyamiguy'ejtip ja ñitso'ok'ajtin.

¹³ Wan ja Dios mmø'øyidi ja xondaajkin ja tuda'aky'ajtin, midi xukjøp'ijxy'ajitindip ja kyunuu'kxin ku ja njanchja'wint, jōts jade'en ja ajot'ajtin tu'ugyi mdukmī'etidit Espiritu Santo myøk'ajtingøjxp.

¹⁴ Migu'uktøjkti, jade'en ø nwa'āñ jōts ku meets amuum xjagyepy ja nadyamiyoxi'ajtin jōts ja ni-jawi'ajtin. Wa'ats ja xnijawidi, jōts n'a'ejxip øts jōts ku xjatti jōts nixem niyam mnagyajpxwejidit. ¹⁵ Ja'agøjxp mee ndanijayi ya'at nøky, jōts ndukja'myatstīt tu'uk majtsk ja møj winmaa'ñ midi paat'ajtyidip ja yikxon ja'gyukin. Tø øts ja Dios xanipiky y'øy'ajtingøjxp jōts øts jade'en ngajpxwejt. ¹⁶ Ja' øts ndamidumpy ja nwindsøn'ajtim Jesucristo ku øts ngajpxwa'kxi ja y'ø-gyajpxy ja y'ømyadya'aky mā ja jaa'y kya'israelit jaa'yidi jōts ja tpaattit ja nitso'ok'ajtin. Ja'ats øts ndagøðøjkyp ja Dios, wan ttajotkujk'atyidi jōts kyupøkidit ku yikpøk-wya'ādsidit ja Espiritu Santo.

¹⁷ Ku øts jade'en nmiðuñ ja Dios Teety, xondaap øts jōts øts ja møk ndukmøjawi ndukunuu'kxyjawi, ku øts njanchjawi ja nwindsøn'ajtim Jesucristo. ¹⁸ Ka'ap øts ti nugo ñikyajpxy midi øts ja Cristo kø'øm xkaduktump xkadukpatp jam jaa'y agujkp pøn ka'israelit jaa'dyi, jōts tmimado'odit ja Dios. Tø dø'øn jade'en tyimyjaty, tø dø'øn jade'en tyimyikmadøy sã ø nnigajpxy, ¹⁹ ku tñank'ijxyi ja myøk'ajtin, tyikaxi'iky ja ejxa'an, tyikaxi'iky ja milagri'ajtin, jōts jade'en yik'ixy yiknijawi ja Espiritu Santo myøk'ajtin. Jade'ents øts nnigajpxkixy øy mādsøo ku ø ngajpxwa'kxi ja Cristo y'øgyajpxy y'ømyadya'aky midi nitso'ok'ajtin xukpaajtin, nwidity ø Jerusalén uk nja'aty øts jambaat Ilirico etjotp. ²⁰ Ja' øts ndajotigøøpy jōts øts jade'en ja øgyajpxy ja

omyadya'aky tɔ ngajpxwa'kxy, midi tniɣajpxp ja nit-so'ok'ajtin, ma niwindii kyayiknimadɔynim ja Cristo xyɔɔw, jɔts ka'ap ɔts nay ja'abi kajp tɔ n'anɔjkxi ma jadu'uk ja jaa'y jawyeen tɔ tyiktso'onda'aky ja Cristo y'ixpɔjkin. ²¹ Jade'en ɔts tɔ nduñ sɔ ja Dios kyajpxy y'ayuujk wyə'añ:

Ja' ja ne'egi ejxiyip nijawiyip pɔn ja niwindii kamadobaajtipnim, jɔts yja'gyukidip ja ne'egi pɔn ja niwindii kanimadoodjidipnim.

Ku ja Pablo ttanibiktaagi jɔts ñɔjkxt Roma

²² Ku ɔts ja ngajpxwa'kxk ngayiktsojk'abaadi, ja'agɔjxp meets tɔ nga'ajts'ixy, tɔ ɔts kawinaak ojk nja'ukniwinmayi jɔts ɔ nnɔjkxt ma meets jam. ²³ Tɔts ɔts ja ndunk y'abaadi yam ya'at etjotp ma ɔts yam, jɔts jekyip ɔts njaniwinma'ayini jɔts mee nninɔjkxt. ²⁴ Yamnimts ɔts inet jam n'uknaxt ku ɔ nnɔjkxt jam España jɔts mee n'uk'ext, jadya'ts ɔts jam wyinaty xpudokidi, jɔts ɔts jam nja'att ma ɔts idɔ'on nnɔjkxwa'añ. ²⁵ Jerusalén ɔts ixyam nniikxy, pudɔjkin ɔts nyikniikxy jɔts ɔts ja ngɔmo'owa'andi pɔn jaty jam Dios ja'ajtidip, adɔm ja nmɔɔtjanchja'wibidi. ²⁶ Ja' tɔ tyikmukti meeni pɔn tsinaadyip jam Macedonia jam Acaya, jɔts ja ttanigaxti ja ayooobi jaa'y pɔn tsinaadyip jam Jerusalén, adɔm ja nmigu'uktɔjkti pɔn ja Dios ja'ajtidip. ²⁷ Tɔ twinmaydi jɔts ku jade'en y'ɔyi jɔts ja jade'en ttu'undit, pɔ tɔxi ja israelit jaa'y ja ñamyayi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiiyidi, jɔts ja ttbudokidit ja israelit jaa'y ti jaty ja iiy yjagyajtip. ²⁸ Kuts ɔts yɔ n'uktun'abaadit ku ɔts ja wyinaty tɔ ndagɔdɔkidi ja pudɔjkin, winets ɔ ndsoont jɔts ɔ nnɔjkxt jam España, uk naxpts ɔts jam ma meets jam. ²⁹ Jɔts wa'ats ɔ nni-jawi jɔts ku ɔts ja Dios amuum ja kyunuu'kxin xabudoki, jɔts ɔts ja Cristo ngajpxwa'kxit ja y'ɔgyajpxy ja y'omyadya'aky ku ɔts jam nɔjkx nja'aty.

³⁰ Tundits migu'uktɔjk ja may'ajt nwindson'ajtim Jesucristo kɔjxp jɔts Espiritu Santo pɔn xukja'wimp ja tsojkin ja pa'ayo'owin, jɔts meets nayide'en mnadyamiyoxidit ɔts ndunkjɔj, ku meets ja Dios x'amido'ot ja may'ajt jɔts ɔ xpudokit. ³¹ Amidowdi ja Dios wan ɔts x'agɔ'duky x'axajtuky, jɔts kidi myajada'akti ja jaa'y pɔn tkagupɔjkti ja nwindson'ajtim yja' jam Judea, jɔts nayide'en x'amido'odit jɔts ejtni xoni tkupɔktit ja pudɔjkin pɔn tsinaadyip jam Jerusalén, pɔn ja Dios ja'ajtidip, midi ɔts yam ndaninɔjkwandip, ³² jɔts pɔni yikajtpy Dios jɔts ɔts ɔy jotkujk nja'att ma meets jam, jɔts ɔts jam n'ukpoo'kxt. ³³ Diost mjagyapidip pɔn amuum ja ɔy'ajtin xondaajkin tyajkp. Jade'en idɔ'on ja yjatt.

Ku ja Pablo tkajpxpɔ'kxy ja myigu'uk pɔn jam Roma

16 Mjaty'ejtip ja Febe, adɔm ja nmɔɔtjanchja'wibi pɔn tump jam tsaptɔjkjotp jam Cencreat kajpjt. ² Kupɔkti ja' yikxon, tundi may'ajt Dios kɔjxpit sam pyaat'aty, pɔ tu'ugyixi ja Dios yikjanchjawi.

Pudɔkidits jɔts xmo'odit ti jaty jam ka'ejtixp, tɔ ja may'ampy xjanchpudɔjkandi, ɔts paat ja kɔ'om tɔ xpudoki.

³ Kajpxpoo'kxti nayide'en ja Priscila mɔɔt ja Aquila, pɔn tɔ nmɔɔtundi jɔts ɔɔts ja Jesucristo yja' nyikyɔ'ɔyiyi. ⁴ Ja'agɔjxpti ɔts ixyam njujky'aty ku ja kyɔ'ɔmjuky'ajtin ja o'jkin jɔp'am tpiktaktɔɔ, nugo ku ɔts ja'ayi jade'en xyiknitso'okti; xemikɔjxp ɔts ja Dios ja ndamɔjawit, jɔts nayide'en ja ttamɔja'wimiyidi niduki'iyi ja nmigu'uktɔjk, pɔn tjanchja'widip ja Jesús ma jaa'y kya'israelit jaa'yidi. ⁵ Kajpxpoo'kxti nayide'en ja migu'uktɔjkti pɔn namyujkidip jam Priscila jam Aquila tyɔjkjotpti. Kajpxpoo'kxidit ɔts ja nmigu'uk Epeneto, pɔn midu'uk tjanchja'wiy'okwaañ ja nwindson'ajtim Jesucristo jam Acaya etjotp. ⁶ Kajpxpoo'kxti ja María midi jadine'en tmidump ja Dios ma meets jam. ⁷ Kajpxpoo'kxidit ɔts ja nmigugajp ja Andrónico jɔts ja Junias, pɔn ɔts mɔɔt tɔ nbuxɔjksɔnidi; janch'ɔyjawi ja y'etti sam nayide'en ja Cristo kyudanaabyitɔjkti, jɔts jawyeen ja ne'egi tjanchja'widi ja Cristo, oojknim ɔts.

⁸ Nayi mgajpxpoo'kxtip ja Amplias, pɔn ɔts ɔy mɔɔt namyayi Cristo kɔjxp. ⁹ Jɔts nayi kajpxpoo'kxti ja Urbano, pɔn ɔts ojts nmɔɔtuñ ku ɔɔts ja nwindson'ajtim yja' nduujni, jɔts kajpxpoo'kxti nayide'en ɔts ja nmigu'uk Estaquis, ¹⁰ jɔts nayide'en ja Apeles pɔn kawinaak ojk tɔ ttamajada'aky ja yjanchja'win Cristo kɔjxp, ɔy ja wine'en ja ayo'on yjajiktanipiky. Jɔts kajpxpoo'kxti nayide'en ja Aristobulo mɔɔt ja y'u'nk ñidɔ'ɔxy. ¹¹ Kajpxpoo'kxidit ɔts ja nmigugajp pɔn txɔɔw'ajtp Herodión, jɔts nayide'en ja Narciso, jɔts pɔn jaty jam tsinaadyip ja' tyɔjkjotp, pɔn ja nwindson'ajtim tɔ tjanchjawi. ¹² Jɔts nayide'en xkajpxpoo'kxtit ja Trifena mɔɔt ja Trifosa, pɔn amuum tmidundip ja nwindson'ajtim, jɔts nayide'en ja Pérsida, adɔm ja nmigu'uk pɔn kawine'en kujk tmiduñ ja Dios. ¹³ Jɔts nayide'en xkajpxpoo'kxtit ja Rufo, pɔn amumjoojt tjantyimyjanchja'wip ja nwindson'ajtim, jɔts kajpxpoo'kxidi ja tyaaak nayide'en, jade'en ɔts ja njawi sam ɔts ngɔ'ɔmdaagin. ¹⁴ Kajpxpoo'kxti ja Asíncrito, ja Flegonte, ja Hermas, ja Patrobas, ja Hermes, jɔts mɔɔt niduki'iyi ja migu'uktɔjkti pɔn ja Dios yjanchja'widip, pɔn jaty ja jam mɔɔtti. ¹⁵ Nayi kajpxpoo'kxti ja Filólogo mɔɔt ja Julia, jɔts ja Nereo mɔɔt ja myiga'axkiixy, jɔts ja Olimpás nayide'en xkajpxpoo'kxtit mɔɔt niduki'iyi pɔn jaty ja jam mɔɔt, pɔn ja Dios yjanchja'widip.

¹⁶ Nadyukniyawiyidi ja kajpxpoo'kxin nixem niyam sɔ Dios ttsɔky. Mdanigaxidip ja kajpxpoo'kxin pɔn jaty ja nwindson'ajtim Jesucristo yjanchja'widip ɔy madsoo.

¹⁷ Migu'uktɔjkti, mjatyimy'ejxtibim pɔn yiktseptɔjkidip pɔn yiktundigɔɔdyip. Ja tsep ja nugo yiknaxki-də'akwəndip jɔts mee mnawya'kxit, pɔ ja'axi ja yikma'atwəndip midi meets tɔ myiktukmadɔy, pɔ ka'axi ja yjade'eni midi mee tɔ xjaty midi mee tɔ xnijawi, jade'en ne'egi tyimbyaat'aty ku xpuwa'atstit. ¹⁸ Ka'yɔ'ɔbi jaa'y tmidundip ja nwindson'ajtim Jesucristo, kɔ'om yɔ ñayjotmay'atyidi ti yɔ ejtxidip ka'ejtxidip, jɔts twin'ɔɔndi ja jaa'y pɔn tkanija'widipnim, ɔy ja Dios yja'

nadyijyi amyujy tsaachyujy tmigajpxti. ¹⁹Jøts ñijā'wip øy pøn sã meets xpaduujni ja Dios yja'; ja'agøjxp mee ndajotkujk'aty. Ja' øts ja'ayi ndsøjky jøts xwin-māā'ñ'attit sã xu'undit ja tum ja øybi, jøts kidi ja ne'egi mjaakmayidi ja ka'øybi. ²⁰Jøts ja Dios pøn ja øy'ajtin xondaajkin amuum tjagyajp, tsojk ja nøjkx ja miku' myøk'ajtin tyikwindigøjyi, jøts ja niti majadaajkin tka'ukpatnit meets mwingujky. Paatti ja nwind-søn'ajtim Jesucristo ja kyunuu'kxin.

²¹Nayi mdanigajxidipts ja Timoteo ja kajpxpoo'kxin pøn øts møøt nduñ, jøts nayide'en Lucio, møøt ja Jasón, møøt ja Sosípater, øts nmigugajp nmigunaajxti.

²²Nayi mgajpxpoo'kxmīdip ja Tercio nwind-søn'ajtimgøjxp, pøn øts ya'at nøky ndukjaapy.

²³Jøts nayide'en mgajpxpøø'kxyidi ja Gayo. Ja' tyøjkjotp øts yam ndsøøni, jøts nay ja' t'anuu'kxyajkp ja tyøjk mā ñamyukyidi pøn jaty ja Dios yjanchjā'widip. Jøts nayide'en mdanigajxidip ja kajpxpoo'kxin ja Cuarto jøts ja Erasto, pøn ja ya'at kajpmeeñ myachomujkpy.

²⁴Mo'ojīdip ja nwind-søn'ajtim Jesucristo ja kyunuu'kxin mee niduki'iyi. Jade'ents øts idø'øn nd-søky'aty.

Ku ja Dios y'ukyik'ajot'ajtni

²⁵Tmøjā'windits tkunuu'kxyjā'windits ja Dios, wan mbudøkiyidi jøts ja mjanchjā'win tu'ugyi amumjoojt xyik'ettit sã mduknijāwiyidi ja øgyajpxy ja ømyadyā'aky, sã ja nitso'ok'ajtin yikpaaty midi øts ngajpxwa'kxpy, ja Jesucristo y'ixpøjkin. Jøts ja' yø' midi ja Dios jekñim tø tnigajpxy, midi ja jeky tø xkadukni-jā'wa'am jøts ku ja jayimni jødsnim ja naxwii'ñit cho'onda'aky. ²⁶Ïxyamts ja tø yiknijāwinim ku ja kya-jpxy y'ayuujk tø ttukjaadyañ ja kyugajpxtyøjk, sã kø'øm tyikutuky ja Dios Teety xemikøjxpit. Jøts ja tuki'iyi yik-tuknijāwidi ja kajp ja naajx jøts tjanchjāwidit jøts tpaduujnidit ja yja'.

²⁷¡Tu'ugyi Dios Teety møj jøts ja' tu'ugyi tni-jā'widyaapy, wants xemikøjxp ja tkupiky'aty tmadøy'aty adøm ja nwind-sø'jkin ku ja njā'byaajtindi ngajpxpaajtindi amuum nwind-søn'ajtim Jesucristo køjxp! Jade'ents idø'øn ja y'ejxi tyiyi.

1 CORINTIOS

Ku ja Pablo tñijayi ja janchja'wibi jaa'dyi pøn jam Corinti tsinaadyip

1 Øts idø'øn Pablo'ajtp. Tø øts ja Dios Teety xamid-søky jøts øts tø xwaaðsøy jøts øts ja Jesucristo ngudanaabyi'att. Møøt ja Sóstenes, pøn nayide'en tjanchja'wip ja Jesucristo, ²ixyam ø nnijayi ja Corinti jaa'y pøn jaty ja Dios Teety tø tñijawidi jøts tø tkupøkti ja chojkin ja pya'ayo'owin møøt ja y'ana'amín Cristo Jesús køjxp. Pø ja Dios Teetyxi meets tø mwi'ijxyidi jøts ja amuum xamiyoxtit ja mdsinaa'yindi møøt nayide'en pøn jaty ja tjanchja'wyimidip, pøn jaty tkajpxatmidip ja nwindson'ajtim Jesucristo, pø tum ja'axi amuki nwindson'ajtyindip nixem niyam. ³Pajtidi kupøjkidi ja Dios Teety y'øy'ajtin kyunuu'kxin møøt nayide'en ja nwindson'ajtim Jesucristo yja'.

Sa ja kunuu'kxin yikpaaty Cristo køjxp

⁴Ejtp øts ja Dios Teety ndamøjawi ndakunuu'kxyjawi ku meets ja kunuu'kx'ajtin tø xpaaty Cristo Jesús køjxp. ⁵Paty meets ja Dios Teety ja møj øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyunuu'kxin ja'agøjxp ku ja Cristo yja' tø xpabøjkidi. ⁶Tø meets idø'øn ja xjanchyikwindiy sa jaty ja Cristo tø yiknimadya'aky. ⁷Ku meets jade'en mdsøønit mmo'o'ojidipts ja Dios pøn ti dø'øn ja ttamidsojkip, ixa mee x'awijxy ja xøøw ja jumøjt ku ja nwindson'ajtim Jesucristo ñanky'eixpaadiyit jadigojk. ⁸Ja Diosts ja møk'ajtin mmo'o'ojidip jøts tu'ugyi mdsinaa'yin xyik'ettit, jøts wyinaty niti mgayiktaniwanbatti ku ja nwindson'ajtim Jesucristo jya'att. ⁹Pyadumpy ja Dios ejtp ja y'ayuujk. Ja'ats tø mwaadsøyidi jøts ja y'U'nk xmøøtsinaajyidit, ja nwindson'ajtim Jesucristo.

Ja' ñi'ane'empy jøts tu'ugyi chøønidit

¹⁰Migu'uktøjkti, nwindson'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøønidit, tu'ugyi winmaa'ñ xmøøt'attit jøts tu'ugyi xmøøt'attit midi mdajotigø'dyidip. ¹¹¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwa'añ kuts ja Cloé myigu'uk yø xukmadowdi ku meets jam mnamyijotma'adyidi. ¹²Yide'en øts idø'øn tø nyiktukmadøy ku mee tumdigach ja m'ayuujk; nømbik mum wya'andi: "Øts ja Pablo møøt", jødsik ñømidit: "Øts ja Apolos møøt"; uk nømidiptsik: "Øts ja Pedro møøt"; jødsik jam ñømidit: "Øts ja Cristo møøt." ¹³¿Sud-sots idø'øn, uk tø dø'øn ja Cristo may ñawya'kxyi? ¿Ti

tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety? ¹⁴Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y; ¹⁵jøts jade'en mgawa'andit ku mee tø mnøbety øts køjxp. ¹⁶Ïxa njaakja'myech jadu'uk jøøn jadu'uk tøj kuts ja Estéfanos nayide'en tø nyiknøbety, jøts jade'eñi nipønxi øts jyawi tø njaga'ukyiknøbajtni. ¹⁷Ja'agøjxp øts idø'øn jade'en tø n'adi'ich ku øts ja Cristo tø xkakexy yiknøbatpi, ja'axi øts ja xaniguexy jøts øts ja jaa'y ndukmado'ot ja nitsoojkin ayuujk, ka'ats øts ja janchkajajtni nnigajpxy sam ja ixpiky jaa'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wyijy'ajtin ja'

¹⁸Ku jyayiknimadya'aky ja Cristo y'o'jkin jam kruskøjxp, løki o'jkin ja jaa'y ja ttejt pøn tø yiktanibik-taagidi jøts ja øy'ajtin tkapaattit; pønts ja Dios tø tkupøjkidi ja ñitsoojkin ja pya'ayo'owin ka'ap ja jade'en wya'andi, nømp ja wya'andi jøts ku Dios myøk'ajtin jade'en tyiknigaxi'iky. ¹⁹Pø yide'enxi ja nøky wya'añ midi jap jaabyety ejtp:

Ka' øts ja y'ixpiky'ajtin ja wijy jaa'y nmøjpiktaajkit, jits ka'ap ø ngupøjkit ja ñimado'owin ku øts ja nimadoobi jaa'y xjamigajpxmit.

²⁰¿Mats idø'øn ja ixpiky jaa'y tyundi, jøts ja yik'ixpøjkpidi, jøts ja jaa'y pøn tñigajpxtip tñimadya'aktit ti jaty ya tuujni naxwiñ? Kawejin kakajinxi ja Dios ja tø tyikwimbijty midi ya naxkijxy yiktejp wejin kajin.

²¹Wa'ats Dios tñijawi jøts ku ka'ap pøn myi'abaadyiyi ja wyijy'ajtin sam ja wijy jaa'y yjawnmaadya'an pøn tk-agupøjkit ja'abi winmaa'ñ. Ja' ja ne'egi tyukpaatp tyuk'ejxp ja nitsoojkin pøn ja kupøjkxyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²²Tum ja ijxyimbi ka'ijxyimbi ja israelit jaa'y chojkit, jøts ja griegit jaa'y t'amidomidi ja wejin ja kajin; ²³ja Cristots øø nnigajpxy ku ja kruskøjxp tø y'øøky. Nachø'dyuni ja israelit jaa'y ja ttejt, jøts ja griegit jaa'y ñømidit ku ja kyawej'ajtin kyakaj'ajtin. ²⁴Øts ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp. ²⁵Midi ja jaa'y yjanch'uktejtíp Dios ja kyawejin kyakajin, ja' idø'øn ne'egi kamaabyim pidsømp; midits tyejtíp kajot-møk'ajtin ja'ats kidi mibaat pøn myayiyi, yjaaktyimyjinajpxy ja jawaani øy wine'en ixpikyjaa'y yjanamyukyidi. ²⁶Migu'uktøjkti, ejxti nijawidi ku Dios

tø mwi'ijxyidi, o meets jam waani pøn janch'ixpiktyi sam idø'on yā naxwiiñ yiktsøky, jøts nayide'en niwaani pøn yikmøjpiktaaktip, uk jam tigati yikta'ejxkapti yjøn-jotp tyøjkjotp. ²⁷ Tigach ja Dios wyinmaa'ñ, tum ja' ja tø twi'ixy pøn kajotmøjkiti jits ja tsø'ødyumbim jyattit pøn jotmøk nayja'widip yā. ²⁸ Ja' ja Dios tø twi'ixy pøn yā naxwiiñ niti kayiktamøjpiktaaktip jøts jade'en tyikugøxit pøn jaty møjipiktaajkidip ja jaa'y yā naxwiiñ, ²⁹ jøts niti nipøn kyanadyamikaxiyit Dios Teety wyingujkp. ³⁰ Ja Dios Teety idø'on kø'øm tø ja Jesucristo mdukpaaadyidi jøts muki møøt m'ettit; jits nay ja' tø ttuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ij-tyindi, jøts ja nitsoojkin xmø'øyint. ³¹ Jabi yide'enxi ja Dios kyajpxy wyā'añ: "Pøni pøn nay'agajpxwajnip wan ja nwindson'ajtim tnadya'agajpxyiyi."

Ja Cristo kyajpxy y'ayuujk pøn tø y'øøky kruskøjxp

2 Migu'uktøjkiti, ku mee nninijkxy jøts ja Dios kyajpxy ndukmadoooidi, ka'ap øts ja'abi ayuujk nyiktuuñ midi kanimadooni. ² Tu'ugyi øts ojts ja xrpøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tø y'øøky. ³ Janch yik'ayo'owim ngaxi'iky jøts tsø'øgi øts yjawi xjanchyik'oo'knip ku meets jam nninijkxy; ⁴ kuts mee tø ndamimadya'aky jøts tø nduknijawidi ja Dios kyajpxy y'ayuujk, ka'ap øts wi'ijxpyi ayuujk uk kanimadooni ayuujk nyiktuñ sā ja møj nijā'wibidi. ⁵ Ja Dios Espiritu Santo meets ja tø mduknimadøyidi jøts ja Dios tø mbudøkiyidi, jøts meets idø'on xmibøkt kidi ja wijy jaa'y y'ayuujkøjxpip, pø ja Diosxi myø'ajtingøjxp.

Dios Espiritu Santo køjxp idø'on ja Dios Teety ñankñi-jawiyi

⁶ Tiy idø'on, janch møj nijā'wibim øø ngajpxy ku øøts ja jaa'y nmigajpxy pøn jaty jawaani tø tñija'wiñi ja nwindson'ajtim y'ana'amin. Kidi meets jade'en xjā'gyuki ku øøts ja yā'at kajin nyiktuñ sam møj yikutujkpi yā naxwiiñ ttundi, midi tsojk kudigøøñidip. Jabi Diosxi øøts idø'on kø'øm jade'en xyikajpxp. ⁷ Ja Dios wyejin ja kyajin øøts n'ayuujk'ajtpy midi yu'uch yik'ijtpñim, jøts ja' øøts idø'on nnigajpxy ja nitsoojkin midi xemikøjxp ejtp, midi ja Dios yu'uch tø tyik'ity ku wyinaty niti tkayikøjñim. ⁸ Ni tu'ugin ja møj yikutujkpi yø tø tkanimadøy; ka'ap ja nwindson'ajtim Jesucristo ja jeexyip tø tyikruspatti kuk ja tjā'gyukidyøø. ⁹ Jade'ents idø'on ja tø yjätti sā jap nøkyijxpy jaabyetyi:

Nipønim ja tka'ixy, nipønim ja tkamadøy, jøts nipønim ja tkawinmay

pøni ti ja Dios tø ttanibiktaagi

jøts ja tmo'ot pøn jaty ja chøjkpy.

¹⁰ Adømts idø'on ja tø xuknija'wa'am pøni ti dø'on ja tyijpy ku ja Dios Espiritu Santo tø xuknija'wa'am, jaa kuxi ja tñija'wiguixy tuki'iyi, jøts nijā'wiyip ja Dios Teety ja wyinmaa'ñ nayide'en pøni sā jaty ja wyinmay.

¹¹ ¿Pøn idø'on ja t'uknija'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja

kø'øm ejxyip midi ja ñikøjxp'ajtpy. Ja Dios Espiritu Santo nayide'en nadyu'uk tñija'wimyip pøni ti jaty ja Dios Teety wyinmaa'ñ'ajtpy. ¹² Kidi ja naxwii'ñit winmaa'yints adøm tø nyikmø'øyim pø ja Diosxi adøm ja y'Espiritu Santo tø nyikmø'øyim jøts ja xukjā'gyuka'am ja Dios myøjmay'ajtin ja Dios myøjkunuu'kxin. ¹³ Ja Dios Espiritu Santots øø tø xukykyuyj pøni ti jaty øø nnimadyajkpy, ka'ap øøts ja ngø'øm xipiky'ajtin nyiktuñ, paty øøts ja Dios tyiy'ajtin ndukmadøy ja jaa'y pøn ja'abi ayuujk ja'abi winmaa'ñ tñimadooijp.

¹⁴ Pøni pøn ja Dios tyiy'ajtin tkanimadooijp, ka'ap ja tkupøkti pøni ti ja Dios Espiritu Santo yjanigajpxy, nugo ja tijy kawej'ajtin. Ka'ap tñimadøy, kumi ka'ap ja tñijawi sudso ja tjā'gyukit, ja' kuxi ja Dios y'Espiritu Santo tkamøøt'ajtidi. ¹⁵ Pønts ja Dios Espiritu Santo myøøt'ajtpy øy ja tigati tjā'gyukit jøts nipøn ja sā kyanø'ømxit. ¹⁶ Pø nømpxi ja kajpxy jap nøkyijxpy: "¿Pøn idø'on tø t'uknimadøy ja Dios wyinmaa'ñ? Nipøn kyamayj jøts ja Dios tkajpxwejt." Øy ja yjade'en'aty, ja Cristo adøm ja wyinmaa'ñ nmøøt'ajtyimp.

Tu'ugyi øøts ja ndunk ku øøts ja Dios nmiduñ

3 Kuts mee migu'uk ja Cristo y'ayuujk tø ndukmadowdi, ka' meets jade'en nmigajpxy sam idi'in yikmigajpxti pøn ja Dios Espiritu Santo yja' tø ñadyamiy-oxkøjxnyidi, jade'en mee tø nmigajpxy sam ja jaa'y pøn tkajanchjā'widipnim, jøts sam yiktukmadowdi ja mutsk unā'jk, ja Cristo yja'. ² Tum ja' mee tø ndukykyuyj midi jajtni, jade'en mee tø nduñ samimaxu'nk ja'ayi tsejtsk nøø yikmø'øy jøts ka'ap kaaky tojx; ja'agøjxp ku mee mgamayinim midi tsep sam ja maxu'nk tkagupøkti ja tøøts kaaky ja tøøts jii'kxy; nayide'ents meets ixyam ook tigøy m'ity, ka'anim mee mmayi ja tseppi, ³ ja'agøjxp ku nayide'en x'ejtinim sam ja jaa'y pøn ja Dios y'ayuujk tkanija'widipnim, ku mee mnadyami'ekyi tigati; ku mnamyijotmā'adyidi jøts mga'uknamyigajpxwā'anijidi jøts nayide'en mga'uknawyin'ejxwā'anijidi, nayide'en mee xuni sami nugo jaa'y pøn ja nwindson'ajtim Jesucristo tkanija'widipnim. ⁴ Pø kuxi mee mnimy: "Øtsi Pablo møøt", jøts jadu'uk ñømi: "Øtsi Apolos møøt", nayide'en mee m'adi'ich sam idø'on ja jaa'y pøn ni tu'uk ja Dios kyajpxy tkanija'wip.

⁵ ¿Tyimbyøn ja Pablo? jits ¿Tyimbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyik-tunkpaaty jøts meets yja' ja tø xmibøjki. Ja ndunk øø tø nduñ midi øøts ja Dios tø xaguwan. ⁶ Jade'en ja tpaaty, øts idø'on ndejint tø nni'ipy ja tømt, jøts ja Apolos ja tø tnøguway jøts tø t'ejx'ity. Jøts ja Dios, ja'ayits tø tyikmuxe tø tyikyøñ ja tømt. ⁷ Ja Dios idø'on tu'ugyi møj, jøts ja' idø'on tuki'iyi tungøjxp, pø ja'axi ja tømt tø tyiktsø'øky jøts niti ja'adi pøn ja tø tjani'ipy uk pøn ja tø tjanøguway. ⁸ Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sā ja tyunk ja yā tyikyø'øy naxwiiñ. ⁹ Tum tumbi jaa'y øøts idø'on namajtsk. Ja Dios øøts idø'on xumbi'ajtp, jøts meets idø'on mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'øn mdøjk'ajtp midi ja Dios kyøjpy. ¹⁰ Øts idø'øn ja Dios tø xpikta'aky pojtspi ana'ambi, jøts øts idø'øn ja tøjlk tø nbots'okwa'añ, jøts ja wenkpi pojtspi tjaakyikyø'øy ja tunk. Tum a'ejxits ja tsøky sa pønjabøn pyøch.

¹¹ Nipønxi kyapaat'atyi yi jøts ja pøch ja abiky tyikt-so'onda'akt, pø tøxi ja tu'ugyi tyañ midi ja Jesucristo pyøchkojpk'ajtpy. ¹² Kuts ja tøjlk jyaakjayikpøch, ots ja oori jyaakpat, uk ja plåtits, uk tum tsuj tsaa, uk øyts nayide'en ja pu'uy, uk ja miiyts, uk øyts ja wæxkipy, ¹³ ku wyinaty ja tiidyu'unin tyaaty jamnimts ñigaxø'økt pøni sa pøngapøn tø tyuñ; pø tum jøønxi jam wyinaty tump, ja'ats tyiknigaxø'økp pøni ti ja tøjlk tø yiktakøjy. ¹⁴ Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ; ¹⁵ kuts ja wyinaty tyø, windigø'opyts ja tuki'iyi midi ja wyinaty tø tjarøch øy wyinaty awisa yjanch'awa'atspidsimy pøn idø'øn jade'en tø pyøch.

¹⁶ ¿Ka' mee nñijawi ku meets ja Dios Teety mdsap-tøjlk'atyidi jøts ku ja Dios Espiritu Santo jam chøøni? ¹⁷ Pøni pønts tjejtjip ja Dios ja chaptøjlk, yikudigøyip ja Dios ja', ja'agøjxp ku kyunuu'kxyi Dios chaptøjlk, meets ja Dios mdsaptøjlk'ajttip.

¹⁸ Kidi kø'øm mnadyuñidi. Pøni jam tu'ugin xipiky jaa'y ñayjawi, wan nayide'en nabyikta'agiyi ejxim ja jaa'y midi niti tkajajtp, jøts jade'en tpaatt ja wejin ja kajin midi kanæp. ¹⁹ Pø janch jawaani kajaaxi ja Dios wyejin jøts nika' jade'en ja jaa'y y'ixpiky'ajtin. Yide'enxi ja Dios kyajpxy wya'añ: "Ja kyø'øm xipiky'ajtin ja jaa'y tabakjo'opidip ja Dios, jøts ja kø'øm tyuktagidawiyidit." ²⁰ Nayide'ents wyami: "Ñija'wip ja Dios ja' ku nima ky-atuñ ja xipiky jaa'y wyinmaa'ñ." ²¹ Paty meets mganadya'agajpxiyidit nipøn; pø meetsxi mja'ajtpy jøts øy xyiktunkpaattit tuki'iyi: ²² ixa Pablo, Apolos, Pedro, et naxwii'ñit, jujky'ajtin, o'jkin, ixyam'ajtin, jøts midi memp midi ja'tp; ²³ ja Cristots mee mja'ajtidip, jøts ja Dios Teety ja Cristo tja'atmi.

Ja nwindson'ajtim kyudanaabyi tyunkjøjpp

4 Paty meets jade'en xja'gyukit jøts ku øøts ja'ayi ja Cristo nbudøki, ja'ats øø ndunk'ajtpy jøts øø nni-gajpxt ja Dios y'ayu'uch winmaa'ñ. ² Pøni pøn ti tø yiktaguwani, yiknigaxø'økp idø'øn ja' ku ja tpadu'unt. ³ Ka' øts ja nmøjpkta'aky pøni sa meets xnigajpxy xni-madya'aky, uk pøni sats øts ja xejti xwa'andi pøn jaty ya naxwiiñ ja jaa'y tiidyndip. Ni øts paat nganadyunk'aty kø'øm pøni sa ø njaa'y'aty. ⁴ Nitits nganadyapøkyjawi, nñija'wip øts wa'ats ku øts ka' axøøk njaa'y'aty, ka'ats ja njøp'ejxin ku øts ja nbøky kya'ity, ja nwindson'ajtimts ø kø'øm xiidyu'ump. ⁵ Paty kidi x'øyjawiidi kxa'øyjawiidi ixyam tigati; awejxtinim wan ja nwindson'ajtim tyiknigaxø'kixy pøni ti jaty kayik'ejxpatp, jøts nay ja Dios tyiknigaxø'økp pøni sa t'ixy tu'uk tu'uk ja anmija'win, jats ja Dios ja t'øyjawiit uk tka'øyjawiit.

⁶ Migu'uktøjkti, meets m'øy'ajtingøjxp øts jade'en nwa'añ jøts xni'ejxu'uttit ja Apolos uk xni'ejxu'uttit øts. Paty øts idø'øn jade'en nwa'añ jøts nayide'en

mjaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøn. ⁷ ¿Uk jaa dø'øn tu'uk jaa'y pøn jawaani myikwejidip? ¿Ti kø'øm tø xpaatti midi ja Dios tø mga'ukmø'øyadi? Pøni tum ja Diosts tø mmø'øyi, jadits ku mnadyamikexyi pøni ti jaty mmøøt'ajtpy, jade'enxi me mwani ku mets ja kø'øm tø xpaaty pøni ti jam mmøøt'ajtpy.

⁸ Kumeeñ jaa'yin meets yjawi mnayjawi pøn niti tka'ukta'ayoonidip. Windsønin yjawi mnayjawiidi, jøts øø xka'ukja'myatsni. iOgidø'øn tyimyjanch mjanch-windsøn'atti jeexyip, jøts øø nayide'en ja ngutujk xmo'ot! ⁹ Jade'enxi øts yjawi nja'gyuki, pø tø øøts idø'øn ja Dios tyimy'ixoojk xyiktañ; jøts øøts idø'øn yjawi tø nyiktanibiktaagi jøts øø n'oøkt; jøts øøts jade'en ja tsajp ja naajx x'ext xjawit, nayide'en ja Dios y'ankilis møøt ja naxwii'ñit jaa'y. ¹⁰ Maap mo'tp øø nyiktijy ku øøts ja Cristo yja' nbaduujni mee mnadyijiyi møj nija'wibi pøn ntimadoogøjxidip ja Cristo yja'. Ka'ap øø njojmøjki yam meets yikxon myik-windsø'øgi. ¹¹ Ixyambaat øøts yuu ndani'ixy møøt tøødsi, jøts ka'ap øøts nwet nnaamy te; øy øøts jaa'y sagasa xuñ, ka'ap øøts ndøjk te ma øø nboo'kxt, ¹² jøts nmijotkijxpy øøts ndunk nbøjk. Xjamigajpxigøøpy øøts jaa'y, ja øy tsuj ayuujk øøts ja nda'adsojimbijtpy. Ngupijky øøts pøni xpawojp øøts jaa'y. ¹³ Xjanchjaba-gajpxp øøts jaa'y, tuda'akts øøts ja n'ane'emy. Pist-ja'agin øø nyiktuñ uk jade'ents øø nyikjawi ejxim jaa'dyi'ñit jaa'dya'ach.

¹⁴ Ka' mee nñijayi jøts xatsø'ødyu'undit ku jade'en mdsøonidi, n'ana'amwampy meets idø'øn ja'agøjxp ku mee n'u'nk n'unaj'jkin njawi pøn ø ndsojktip. ¹⁵ O meets jeexyip xjamøøt'aty namay ja yik'ixpøjki, ka' meets jadine'en ñamayi mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoo-jkin tø ndukmadowdi jøts ja janchja'win tø xpaatti. ¹⁶ Ixyamts mee n'amidøy jøts ø xpa'ejxtit.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtimgøjxp, jøts pøn ø nayide'en xkamajstutp. Yø' mdukja'myatsidip sudso ø ndsøøni kuts ja Cristo nmibøjki ja yja' sa o magama ndukyikyujti pøn jaty ja Cristo tjanchja'widip. ¹⁸ Jam meets ja mmigu'uk pøn janchnamyikajxniyidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi. ¹⁹ Pøni yikutujkpyts ja Dios, nninøjktipts pojjin. Jamnimts ø n'uk'ext pøni janchtundip idø'øn pøn namyikajxidip uk nugo dø'øn kyajpxti. ²⁰ Ka'axi dø'øn nugo nmadyajkint ku ja Dios yja' nbaduujñidi, pø jatyixi dø'øn ja yikpadungoijt. ²¹ ¿Sudsøts uk mdsø-jktip jøts øts awa'an nnøjkt jøts n'atskastigimo'odit, uk ja yujy'ajtin jøts ja tsojkin ø nminøjcxp ku wyinaty n'ats'ejxti?

Ja' yiknigajpxp ku ja kya'øyi ku pøngapøn ñamyøøt'atyidi nugo

5 Jade'en ja kajpxy yø'øy, jamik ja mmigu'uk tu'uk ja kyudaak tmøøt'aty. Janch møj ka'øy jaa'y'ajtin idø'øn jade'embø tsinaa'yin, ni jambaat yø kyayikupiky

mā ja jāa'y ja Dios tkanijawidi. ² Ĵlots niti meets idø'øn xkidyimbyøkyjawi ku ja mmigu'uk jade'en y'adi'ich? ĴMeetspik idø'øn jeexyip mjetmay'oo'ktøjkip ku mmigu'uk jade'en y'adi'ich! Pøn yaa'dyøjk idø'øn jade'en tø y'adi'ich ka'ap ja y'ukpaat'ajtniyi jøts ja jam xmøøtsøønidit, pawøpy ja pyaat'aty. ³ O meets idø'øn njagamøøtsøøni jamts øts ja nwinmaa'ñ nyik'ity; tøts ja ndiidyuni winmaa'ñjotp pøn jade'en tø y'adi'ich ejximdam øts jam jeexyip ndyimchøøni. ⁴ Namyukidi nwindson'ajtimgøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtin mbudøkiyidit. ⁵ Jøts xyikjiwa'aktit ja jāa'y, wan yā ja miku' yik'ayo'ombaa'dyiyi kunim ja nwindson'ajtim Jesucristo wyinaty myiñ tidiyumbi, janimts ja nøjx yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ĴJa ka' mee xnijawi ku ja ka'ødyumbi ja yja' nugo tyikmiweni? ⁷ Paty kidi xmaa'kxti ja ka'ødyumbi midi tø wyindigøøni, midi jam nugo myikma'jtidip. Jøts øy wā'ats m'ettit. Pø tøxi kø'øm ja Cristo xku'o'ka'am kruskøjxp, jøts ja tø wyindsø'jkin'aty adømgøjxp Dios Teety wyingujkp. ⁸ Ja tiy'ajtin ja øy'ajtin adøm idø'øn ja Dios ndawindsø'jkij'ejtimp, jøts ka'ap niyuuni nyik-møj'ajttint ja y'axøøkpi midi ja anmija'win nugo tyikwindigøøpy.

⁹ Nnimaay meets ku ja nøky ojts tu'uk ndanigaxti, jøts xkamøøtsøønidit pøn jaty ja y'axøøkpi yigaappi pyawinmaadyip jøts tum ja tyunk'ajttip. ¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmiyidit, jøts ja ka'øy jāa'y, jøts ja meengyax jāa'y, jøts ja maa'tspi jāa'y, uk jøts ja tsāmaxan windsø'jkij jāa'y xkadyimy'ukwin'ejxnidit; jabi kuwāñimxi ja yā x'ejxtit ja'abi jāa'y o madsōo.

¹¹ Yide'en øts idø'øn ja ndijy jøts ku meets mganamyukit møøt ja pøn nañikajpxiyip Cristo padumbi, yam ja kya'øyjāa'yi, uk myeengyaxi, uk tsāmaxan windsø'jkibi, uk yja'aji pøn tuki'iyi tkajpxyø'ogyoip, uk pøn ja nøø ja mu'uk ttunk'ajtp, uk myeech. Ja jade'embī jāa'dyi ni xkamøøtka'aty meets idø'øn ja'.

¹² Ka'ap ø xpaat'aty jøts ø ndiidyu'unt ja wenk jāa'y mi-di abiktyi, ja Dios ja paa't'ajtiyip. Meetsts idø'øn mbaat'ajttidip jøts xiidyu'undit ja mmigu'uk. Paty xyikjiwa'aktit ja pøkyumbi midi jam møøt tsinaadyip.

Ku ja kajanchjā'wibi juez ja janchjā'wibi jāa'y tmi'øøndi

6 Ku meets mmigu'uk xni'øøniwyā'añ, Ĵtigøjxp meets idø'øn ja xaninijkxy ja juez pøn tkajanchjā'wip ja nwindson'ajtim Jesucristo, jøts nika' ja xaninøjkxti pøn ja janchjā'win nayide'en tmøøt'ajttip? ² ĴUk ka' meets idø'øn xnijawi ku ja' tidiidyu'undit ja naξwii'ñit jāa'y pøn ja Dios yja' tpaduujnidip? Pøni meetsts mdiidyumpy wyinaty ja naξwii'ñit jāa'y, Ĵka'ats meets idø'øn xjaty sudso xu'undit jøts xiidyu'undit pøni ti jam tuujnip jajtīp? ³ ĴKa' xnijawidi ku ja ankilis paa't ndiidyu'unindit? ĴPøni jade'ents ja wyinaty, ni-jā'wa'ampts adøm idø'øn sudso yā ndiidyu'unindit naξwii'ñ! ⁴ ĴSudso dø'øn ja xaninøjkxti ja wenk jāa'y pøni ti dø'øn yā naξwii'ñ mdsep'ajttip m'ayo'on'ajttip?

Ja' meets ja mdaninijkxy pøn kajanchjā'widip. ⁵ Yā'at-pi dø'øn ti mjanchtatsø'ødyu'undip. ĴNi tu'ugin meets ja jam xkamøøt'aty pøn tjaip ja tidiidyu'unin?

⁶ ĴTsaach'øy idø'øn ja' jøts namajtsk ja janchjā'wibi ñañi'øøniyidi mā ja jāa'y jam kyajanchjawidi?

⁷ Tø'ødyumbimxi mee mjagaxø'kni ku meets jam tukjanchjā'wibi jāa'y mnamyidsep'atyidi. Ku ne'egi amøñi xkamidanidi pøni sā myiktundi. Nisā ne'egi mgawā'andit øy mjayikwimaa'tsti. ⁸ Janch tum wimbet'ampy mee ne'egi xuñ, øy meets ja mgø'øm mmigu'uk sā xuñ midi jagati pøky, uk wime'chpts meets ja' ne'egi.

⁹ ĴUk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'e-jx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajttidip øy ja jya-ga'amajtskidinim, ni ja' pøn jaty ja maxandsāa windsø'jkidip, ni ja' pøn jaty ja wenk tø'øxyøjk uk wenk yāa'dyøjk tmøøt'ajttip, ni ja yāa'dyøjkti pøn ja myiyāa'dyøjk tmøøt'ajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'ogyøxtip jaty, uk pøn jaty ja win'øø'nk ttunk'ajttip. ¹¹ Jam mee muumā pøn jade'en y'ijty tsinaadyip; ka'ats ja ixyam jade'en y'uktsinaañidi pø tøxi ja nwindson'ajtim Jesucristo køjxp pyøkwyatsnidi, jøts ja Dios Teety tø yiktigidøkidi, jøts y'Espiritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

¹² Jade'en ja ayuujk yø'øy ku o tigati nduu'nint, nipøn ja xkadabayø'yint. Øy idø'øn ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaat'atyiyi jøts ja tu'ugyi nugo ndyimyikmajadaajkin.

¹³ Janch idø'øn ku ja kaaky ja tojx yā tø yikpikta'aky jøts ja maatsjotp ñøjkxt, ka'ats ja ne'kx ja' wyā'añ jøts ja nugo yiktapøkyu'unt sām ja wināagin ja'ayi ttunk'atti. Kudigøøpy y'ity ja kaaky ja tojx jøts ja maats nayide'en, ne'egi tampts xemikøjxp ku adøm nne'kx ja Dios Teety ndawinjā'wa'ant ndawindsø'jka'ant jøts ja nayide'en amuum xmøøt'ejtint.

¹⁴ Nayi myøk'ajtin ja yik'awā'amp jøts ja xyikjujkpyøjkin jadigojk sām ja nwindson'ajtim Jesucristo ja ojts tyikjujkpyiky.

¹⁵ ĴKa' mee xnijawi ku meets yø mne'kx Cristo tne'kx'aty nayide'en? ĴØy idø'øn jøts ja Cristo ñe'kx nnixajiyit jøts øts ja nmo'ot ja ka'ødyø'øxyøjk midi ttunk'ajttip ja yāa'dyøjk? ĴNimā yø jade'en kyatīy! ¹⁶ ĴUk ka'anīm idø'øn xnijawidi ku ja ka'ødyø'øxyøjk yik-møøt'aty jøts tu'ugyi ja ne'kx namyayi wyimbejtīni? Pø nømpxi ja nøky wyā'añ: "Tu'ugyi ja nøjx wyimbetti." ¹⁷ Kuts tu'uk ja jāa'y ja nwindson'ajtim Jesucristo tmi-namyayi, tu'ugyits ja nayide'en wyimbejtīnidi.

¹⁸ Paty kidi nugo mnamyøøt'atyidi, wingaktu'utti yø'øbi pøky. Øy idø'øn pøky yjaji, yiktump øy midi'ibi jadu'uk pøky, ka'ats ja jade'en tyimbyaaty sām ja jade'embī pøky, pø ja kø'øm ne'kxi pøkyumbajt tyimwyamp kø'ømmts ñamyayi ja namyidundigøyi. ¹⁹ ĴKa' xnijawidi ku meets ja Dios Espiritu Santo mdsap-

tøj'k'atyidi? ¿Jøts ku ja Dios Espiritu Santo jam chøøni mne'kxkøjx? Pø ni yø mne'kxi mee xkaja'aty, ²⁰ pø janch tsowixi ja Dios tø mjuyidi ku ja y'u'nk tø xku'ay-o'ombaa'ita'am. Paty meets idø'øn ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

Sudso ja amajtsk jaa'y'ajtin ñaxt

7 Ixyam øts ja nøky n'adsojimbijty midi mee tø xaniguexy. Ja øy ja' ku jaa'y kya'amajtskidit; ² jade'ents ne'egi pyaat'aty jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjx ku ja pyøkyi ku jaa'y nugo ñamyøøt'atyidi. ³ Myimado'op idø'øn ja yaa'dyøjk ja ñidø'øxy nayide'en sam ja tø'øxyøjk tmi-madoomit ja ñiyaa'y, jøts jade'en nixem niyam ñadya-jotkujk'atyyidi. ⁴ Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paat'ajtiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paat'ajtmiiyip. ⁵ Nagyupøkidip idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amaay'atidit ku ja Dios wyinaty t'ajot'at-wa'andi, ots ja jade'en ttu'undit. Kuts ja jotmay tyikugøxidit, nayide'ents ja chinaa'yin tyikyø'ogyo-jmidit, ja' ka'uk'øyni ku kya'uknagypøjkniiyidi jøts ja miku' winøø'mbi tyuktunidi ja pøky abiky.

⁶ Ka' mee ndaguwani jøts mga'amajtskidit, amajtski meets pøni jade'en xtsojkti. ⁷ Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

⁸ Pøn jaty ka'amajtskidipnim, uk pøn tø kyu'o'kiñidi, ja' øts idø'øn n'ana'amdip ku yjawi yja'øyi jøts kya'amajtskidit sam øts. ⁹ Pøni ka'ats tmimajada'akti jade'embi tsinaa'yin, wan ne'egi t'amajtskidi pø ka'axi y'uk'øyiñi ku ja wyinaty o pøngapøn t'ukmøøt'ajtni.

¹⁰ Pøn jaty amajtsk jaa'y, ja'ats ø n'ana'amdip jøts ja tø'øxyøjk nijuuni xøøw tkamajtsu'utt ja ñiyaa'y. Kidi øtsip idø'øn jade'en wamp, ja nwindson'ajtim idø'øn jade'en kø'øm ana'amp. ¹¹ Pøni myajtsstutpyts ja tø'øxyøjk ja ñiyaa'y, ka'ap ja y'amajtskit, uk myøøt-nagyajpxipts ja ñiyaa'y jøts jadijojk y'amatskjaa'y'attit. Nayide'ents idø'øn ja yaa'dyøjk pyaat'atyyi ttu'unt.

¹² Yide'ents ø nwami, øy ja nwindson'ajtim jade'en yjagawa'añ, pøni pøn yaa'dyøjk tø tmøøt'amatski tu'uk ja tø'øxyøjk pøn ja janchja'win tkamøøt'ajtp yam ja yaa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaa'dyøjk ja tmajtsu'utt. ¹³ Pøni jamts ja tø'øxyøjk tniyaa'y'aty tu'uk ja yaa'dyøjk pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajtsu'utt. ¹⁴ Pø tøxi ja yaa'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøjk pøn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøjk øy ja janchja'win ja tjagamøøt'aty, ku ja tø tpiky tu'uk ja yaa'dyøjk pøn ja janchja'win tmøøt'ajtp.

Ku ja kyajade'enit, tum kajanchja'wip u'nkts meets ja m'u'nk m'una'jk wyimbidsømni; ka'ats, pø tøxi Dios ja y'øyjaa'y'ijxyidi Jesucristo køjx. ¹⁵ Pøni y'amidøøpyts niidu'ugin ja yaa'dyøjk uk ja tø'øxyøjk pøn dø'øn ja janchja'win tkamøøt'ajttip jøts ñawyakxidit, wants tnawya'kxyidi. Niti ayuujkts tka'ukmidanidit ja yaa'dyøjk uk ja tø'øxyøjk pøn dø'øn ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'yindit. ¹⁶ ¿Ja ti me tø'øxyøjk mdanija'wip pøni myiknitso'okp mets ja mniyaa'y ku ja janchja'win ja tkamøøt'aty? uk ¿ti me yaa'dyøjk mdanija'wip pøni myiknitso'okp mets ja mnidø'øxy ku ja janchja'win ja tkamøøt'aty?

¹⁷ Ots jyasa'ji, tum jade'en idø'øn ndsinaa'yint sa ja nwindson'ajtim ttsøky, jøts pøni sa adøm ja juky'ajtin ja tø xmø'øyim nay jade'en sam wyinaty njujky'ajtyim ku ja Dios ojts xwaadsø'yindi. Jade'en øts idø'øn n'ane'empy ma jaty ja janchja'wibitøjkti. ¹⁸ Pøni wyaað-søøpy ja Dios ja jaa'y pøn ja ejxpajt ñe'kxkijxpy myøøt'ajttip sam ja israelit kostumbri, ka'ap ja ttat-sø'ødyu'unt, wan ja jade'en ttañ; pøni wyaaðsøøpyts pøn ja ejxpajt ñe'kxkijxpy tkamøøt'ajtp, ka'ap ja kuwanikøjx yikpiktaajkit ja ejxpajt ñe'kxkijxpy. ¹⁹ Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk. ²⁰ Jade'en idø'øn jaa'y tya'ant sam ja y'ijty t'ixy ku ja Dios y'e-jxkajpiyi. ²¹ Pøni nugots øy pøn windson mdyimiyi-tuñiyi sam jaa'y jiyujk tsakaa tjagyepy winet ku ja Dios ojts mwaadsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyts idø'øn ja xkupøkt, ka'ap ja jeky xpawinma'aty. ²² Pøn idø'øn wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchjawit, ja nwindson'ajtimts ja ixyam myidunip kø'ømdsøky, ka' juy, jøts ja jaa'y pøn jaty jade'en tkayiknajxtip nayide'en ja ixyam ja nwindson'ajtim kø'ømdsøky tmidunidi, ja Cristo ja' tyumbidi. ²³ Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaa'yin xpadøjkiñidit. ²⁴ Jade'ents migu'uktøjkti, jøts jade'eña'am xyikyø'ødyit ja mjujky'ajtin sam ja Dios tø mbaadyidi ku tø mwaadsøyidi.

²⁵ Tits ø nda'ana'amdip pøn ka'amajtsk jaa'dyi, ka' ja nwindson'ajtim ja sa tnigajpxy; øts idø'øn ixyam ngajpxnaxwampy tu'uk ja nwinmaa'ñ sudso dø'øn yjawi tyuu'baatt tyuu'wetst ja tsinaa'yin. ²⁶ Jade'en ø njawa'añ jøts ja yaa'dyøjk jadi'iñi tya'ant ja'agøjx ku ixyam ja tsinaa'yin janch tsep janch aduky. ²⁷ Pøni m'amajtskjaa'yits, kidits x'ixa'ay sudso ja mnidø'øxy møøt mnamyajtstu'udit; pøni ka'ats m'amajtskjaa'yi, kidits ja amajtsk'ajtin xpawinmay. ²⁸ Pøni m'amajtskipts ka' me mbøkytuñ; pøni amajtskipts tu'uk kiixe' ka'ats ja nayide'en pyøkyumi. Pøni amajtskidip tsep ja chinaa'yin ja tpaattit; ja'ats øts idø'øn njatsøjky ku øts idø'øn jade'en njawa'añ, jøts ja ayo'on xkapaattit.

²⁹ Meets migu'uktøjkti, ja'agøjx øts idø'øn jade'en nwa'añ ku ja nwindson'ajtim wyingoni. Paty ixyam md-sinaañidit yide'en: Pøn jaty ja ñidø'øxy jam, ja Dios idø'øn ja yja' ja ne'egi tyajotmay'o'jkip jøts ja yju-

ky'ajtin tyiknaxt ejximdam ja jeexyip nadyu'uk'aty.
³⁰ Põnts yaxtip jiidyip, jade'en ja chøønidit sam ja' pøn kayaxtip kajiidyip; pøn jotkujk'ajttip xondaktip, jade'en ja chøønidit sam ja' pøn kajotkujk'ajttip kaxondaktip; pønts juudyip kajpxtip, jade'en ja yjuy kyajpxy ja tjawidit ejximdam ja jeexyip tkamøøt'atti. ³¹ Pøn jaty ttaxondip yø naxwii'ñit tsinaa'yin, jade'en ja ñay-jawiyidit sam ja' pøn jaty ja tkadaxondip; jabi kugøxi jøp'amxi yø naxwii'ñit tsinaa'yin y'ity.

³² Ja' meets idø'øn njadamidsøjkpy jøts ka' øy ti nugo xtyimdyajotigø'ødyit yä naxwii'ñ. Ku dø'øn ja yaa'dyøjk kya'amajtskjaa'yi, ja nwindson'ajtim ja ja'ayi pyawinmaapy sudso ja tyikjotkujk'att; ³³ kuts ja y'amajtsk-jaa'yi, ja'ats ja pyawinmaapy sudso ja yjujky'ajtin tpaatt jøts ja ñidø'øxy tyikjotkujk'att. ³⁴ Tigach ja tø'øxyøjk tsinaa'yin tyiknaxy midi ka'amajtsk jøts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigø'øjyip jøts ja amuum ttamioøxy ja ñe'kx møøt y'anmija'win; pønts jam ja ñiyaa'y, ja' miyijotigøøpy jøts sudso ja ñiyaa'y tyikjotkujk'att.

³⁵ Ka'ap øts yä'at nnigajpxy jøts mee niti xkadyim'y'uktunk'atnit, paty øts idø'øn yø nnigajpxy jøts yikxon mdsøønidit sam idø'øn yjapaat'atyiyi jøts ja nwindson'ajtim yja' xmijotigø'ødyit.

³⁶ Pøni jamts ja u'nkteety pøn t'øyja'wip jøts ku yjawi y'øyi jøts ja ñøøx ne'egi y'amajtskit ja'agøjxp ku ja yjawi ja yjumøjt ñaxni jøts ja wyinmaa'ñ tyigatsni, wants jade'en ttuñ pøni øy tjawi, pø ka'axi ja pyøkyi.

³⁷ Pøni jamts jadu'uk ja u'nkteety pøn idø'øn yikxon tpawinmaapy øy tsuj jøts ja ñøøx ne'egi kya'amajtskit, øyts idø'øn ja y'adi'ich jade'en. ³⁸ Paty idø'øn jade'en pøn ja ñøøx tyik'amajtskip, øy adøtsp idø'øn ja wyinaty; pønts ja ñøøx tkayik'amajtskip, jaakty-imwyindøøpts idø'øn ja wyinaty jawaani ku ja jade'en wyinmay.

³⁹ Kutujkøjxp ja tø'øxyøjk tmøøtsøøni ja ñiyaa'y pøni jujky'ajtp ja'; pøni o'kp kudigøøpyts ja', øyts ja pøn tmøøt'amatskiñit, nugo ku nayide'en ja yaa'dyøjk ja janchja'win tmøøt'aty. ⁴⁰ Ne'egi jotkujk ja chøønit pøni ka' y'uk'amajtskiñi. Jade'en øts idø'øn ja ngø'øm-gajpxwejin nyaky, jøts nmøøt'ajtpy øts idø'øn ndiij ja Dios Espíritu Santo.

Sudso ttu'undit ku ja windsø'jk'ñi'ñ yiktaniwa'adit midi yiktawindsø'jkip ja maxandsaa uk øy ti jadu'uk awanax

8 Ixyamts ø nnigajpxwa'añ sudso xu'undit ja kaaky tojxk midi tø yiktawindsø'øgi ja maxandsaa. Wa'ats ja njanija'wa'andi sa ja ndu'unidit; ja'ayi ja nugo nnadyamiguejxyindi ku adøm møj nija'wibim, ka'ap ja nmøjpiktaajkyin ku ja tsojkin ja pa'ayo'owin tyikmøji tyikmayi ja winmaa'ñ. ² Pøni jam ja jaa'y pøn nadya'agajpxip ku ja ti yiin wan tnijawi ja'agøjxp ja jade'en wya'añ ku ja kyawijyi kyakejyi. ³ Jabi y'ejxkajpyts ja Dios ja' pøn ja tsojkip.

⁴ Sudsots idø'øn xu'undit, ¿mga'adyip mjøø'kxtip idø'øn ja' midi ja maxandsaa tø yiktawindsø'øgi? Nni-ja'wa'amp ndøm ku ja maxandsaa kyaDiosi, pø tu'u-

gyixi ja Dios. ⁵ Jaa dø'øn ja jaa'y pøn wandip ku dios ja janch namaydi yä naxwii'ñ jøts jam tsajpjotp, ja'agøjxp idø'øn may ja dios ja jaa'y twindsø'øgidi ku jade'en tja'gyukidi, ⁶ tu'ugyits adøm ja nDios, ja Dios Teety. Ja Dios Teety idø'øn tuki'iyi tø tyik'øyi, jøts ja' adøm idø'øn nnijuky'ajtyindip jøts ja ndamiyojxin ja ndsi-naa'yin. Jats tu'ugyi nayide'en ja windsøn, ja nwindson'ajtim Jesucristo, ja'agøjxp idø'øn tuki'iyi tø y'øyi, jøts ja'agøjxp adøm idø'øn nayide'en tø xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'embi tsinaa'yin. Pøn jaty y'ijty ttawindsø'jkidip ja kyaaky ja tyojkx ja maxandsaa ku ja ixyam ja'abi tkaydi ttojxti jade'eñim ja wyinmaydi ku ja nay ja'abi dios yja' jadigojk ttawindsø'øgidi; kuts ja tpawinmaadyøkidi jøts ja tpøkyjawidi ja'agøjxp ku ja tkaja'gyukidinim.

⁸ Kidi ja' adøm inet jawaani øy nwibejtint pøni kaa'yimp jøø'kximp, nayi ka'ats adøm inet jawaani ka'øy nwibejtint pøni ka' adøm ngaa'yim. ⁹ A'ejxits mee m'adø'øtst, o meets ja xka'aty xojkxt jøts ka'ap ja mmigu'uk ja xukpøkyjawidit, pøni pyøkyjawidipnim ja tuki'iyi ja'agøjxp ku ja yjanchja'win ja ka' yikxon tyu-u'døkidinim. ¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk pøn okwa'añ ja yjanchja'win tyiktso'on-dakpnim, ku mets jam mdsøøni agujk jotkujk jøts xji'kxy ja kaaky ja tojxk midi tø yiktawindsø'øgi ja maxandsaa uk øy ti jadu'uk awanax, ¿ka'ats idø'øn ndejin mbaduu'miyit nayide'en ja mmigu'uk pøn m'a'ejxnaxiyip? ¹¹ Jøts jade'en xyiktuu'tigø'øty ja mmigu'uk ja'agøjxp ku kyatiynim kyaduda'akñim ja yjanchja'win, yam ja Cristo ja tø yjagu'oogyi. ¹² Jade'ents idø'øn, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'øn kø'øm jade'en mmidundigøøpy. ¹³ Pøni ndukpaajtyimpts tam adøm jade'en ja nmigu'uk ja tyuu'tigø'øyin ku yikji'kxy ja maxan wyindsø'jk'ñi'ñ, paat'ajtyiyp ne'egi jøts ja ka'ap jade'en n'uktu'una'ant jøts ja nmigu'uk jade'en ja pøky ngadani'ejxa'ant.

Ti dø'øn paat'ajtyip ja nwindson'ajtim kyudanaabyi

9 Tø øts idø'øn ja Dios xaguwani jøts øts ja ngudanit jøts ja kyajpxy y'ayuujk ja nnigajpxiyit, nipøn jaa'yts ø xkapaat'aty jøts øts ja ndukmado'ot pøni ti jaty ø ndumpy; pø tøxi øts ja nwindson'atim Jesucristo n'ixy, meetsts idø'øn ndunkjøjpaajtpy ku øts ja nwindson'ajtim tyunk nbadøjkiiyi. ² Jaa abiky ja jaa'y pøn ø xka'ejxkaptip jøts ku øts ja Dios xkudanaabyi'aty; meetspits mbaat'ajttip jøts øts jade'en x'ejxkaptit, pø øtsxi meets ja nwindson'ajtim tø ndukmibiky, kuts meets jade'en tø ndukmadøy ja janchja'win jade'ents idø'øn wyingaxi'iky jøts ku øts ja Dios njanchkudani.

³ Yide'en øts idø'øn n'adsøy pøn jaty ø xpagaajpxtip: ⁴ Xpaat'ajtp ø nyikmo'ot ja kaaky ja uujkin, ⁵ jøts xpaat'ajtp ø nayide'en jøts ja nnidø'øxy midi tjanchja'wip ja Dios nbawaamit sam ja jadu'ukpi kudanaabyitøjk ttundi, møøt ja nwindson'ajtim y'ajch y'uch jøts nayide'en sam kø'øm ttuñ ja Pedro. ⁶ ¿Ja ti

øts yø møøt ja Bernabé xpaat'aty jøts øøts ja ngaaky ndojkx nnidu'unt? ⁷ ¿Mā dø'øn ja soldadi kø'øm y'uk-nay'ijxyiyi? ¿Mā dø'øn ja jā'y tka'ukjii'kxy pøni ti tø tni'ipy jøts pøni ti tø tyikpidi'iky? ¿Pøn idø'øn nugo ukuborreegi'ajtp jøts niti kyagida'anxiyi? ⁸ Kidits mwin-maydi ku øts jade'en kø'øm n'awijy, nayide'enxi ja Moisés kyutujk wyā'añ. ⁹ Pø yide'enxi jap jaabyety y'ity nøky kyutujkijxy: "Kidi ja mdsakā ajeñ xyik'okti ku ja xyiktunwā'andit." Kidi ja'agøjxp ja Dios jade'en wyā'añ ku ja tsakā ja ja'ayi tjomay'aty, ¹⁰ pø adømgøjxpxi dø'øn ja ejxpajtin ja jade'en tpiktā'aky. Paty ja kutujk jade'en yikjāy ku adøm ja y'øy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atyiyi pøn yuup tump sām ja' pøn yikpidi'jkpy ja pikta'aky. ¹¹ Tøts øøts ja Dios kyajpxy y'ayuujk namyayi nni'ipy mā meets jam, ¿ka'ats idø'øn y'øyi jøts mee n'amido'ot ja pudøjkin? ¿Ti øø ndajujky'atp yā? ¹² Pøni m'amido'ojp mee tigati ja wenk jā'y jøts meets ja xmø'øy, jawaani kajats øø xpaat'aty.

Øyts øøts ja jade'en xjapaat'aty, ka'ats øøts ja nbayø'øy kuwāni; nmidanaapy øøts ja' pøni ti øøts xjajtp pøni ti øøts xka'ejtxip jøts øøts jade'en ngayiktu-u'duky ja Cristo y'ixpøjkin ja Cristo y'ana'amin. ¹³ Mni-jā'wip meets ku ja jā'y pøn tsaptøjkjotp ttundip, tum ja' ja tyajujky'ajttip pøni ti jam tøjkip. Pøn ja altajr jam t'ejx'ejttip mā ja jiyujk jam y'øøky midi wind-sø'jkin'ajtp, ja'abi tsu'uchts ja yikmøødyip. ¹⁴ Nayide'en ja nwindson'ajtim Jesucristo tø yjanimy jøts ja tyunk ja ttajujky'attit pøn ja nitsoojkin ayuujk tni'gajpxtip.

¹⁵ Nijuuñi ja'abi winmā'añ nugo ngadamajada'aky, ni ja'agøjxp mee nganijayi jøts mee xmo'ot o tigati. iWan øts jade'en ne'egi t'øøky, pø ndajotkujk'ajtpyxi øts ku øts jade'en ndsøøni!

¹⁶ Kuts idø'øn ja Dios y'øy'ayuujk y'øwyinmā'añ njani-gajpxy, ka'ats øts ja nnadyamøjpikta'agyiyi, pø kø'ømxi øts ja tø ngupiky ku øts ja tø nyiktaguwāni. iN'ayøøy øts ku øts nganigajpxt! ¹⁷ Pøni kø'øm tso-jkingøjxpts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ømxi ja Dios xwi'ixy ku øts ja øybi tunkjøjxp xmø'øy jøts jatyiyi ngupøjkøjy.

¹⁸ Ja' øts idø'øn ndajotkujk'ajtpy ku øts ja nitsoojkin ayuujk nni'gajpxy jøts ø niti mijuu'ñ nga'amidøy, øy ja jade'en xjapaat'aty jøts øts ja' ndajujky'att.

¹⁹ Ots ø nipøn njagamiduñ, tøts ø kø'øm nadyamid-søkyi jøts mee nmidu'unt, jøts ja Cristo jade'en ndukpaattit. ²⁰ Kuts ja israelit jā'y nmøøtsøøniidi nayide'ents ø ndsøøni sām ja chøøniidi jøts øts ja Cristo jade'en ndukpaattit; ja Moisésxi øts idø'øn ja kyutujk n'atskupøjkyp øy øts ja'abi kutujk xjaga-paat'aty. ²¹ Kuts øts abiky nnøjkmxi mā ja Moisés kyutujk tkayiktuujniidi, nayide'ents ø ndsøøni sām ja chøøniidi, øy øts idø'øn ja Dios kyutujk ja'ayi nyik-møjtøjkiyi, pø ja Cristoxi øts ja y'ana'amin nbaduujnip. ²² Kuts ø nmøøtsinaamyidi pøn ja yjanchjā'win tyiktu-u'døjkyidi'pnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'ā-gyi sām ja'adi jøts øts ja jade'en nyikjotkujk'att. Tøts idø'øn tu'uk tu'uk njā'gyuki pøni sām ja chøøniidi, jøts

øts ja jade'en ndukpaattit ja Cristo. ²³ Ja'agøjxp øts jade'en nduñ ku øts ja nitsoojkin ayuujk nni-gajpxwā'añ, jøts ø wyinaty nayide'en nbaaty ja kunuu'kxin ja øy'ajtin møøt ja'adi pøn jaty tjanch-jā'widip yā'atpi ayuujk.

²⁴ Mni-jā'wip meets ku jā'y pyujtkjepxti,amay ja yjaputti tu'ugyits ja pujtkejpxpi myajada'aky jøts ja tpiky ja ñibuty. Paty idø'øn nayide'en mbuttit jøts ja øy'ajtin xpaattit. ²⁵ Pøn jaty tuki'iyi t'a'ejxigyøjxp ku kyuyatwā'añ jøts kyuyajta'aky yikxon, ka'ats ja sām yjaty ku tyimgyuyajtni. Ja'agøjxpts ja jade'en kyuyata'akti jøts ja tpektit ñiguyaty midi idø'øn ja kuyajtpi pyøjktip ku ja myajada'akti, jøts ka'ap ja xemikøjxp y'ity; ja xemikøjxp pikta'aky adøm yā naxwiiñ nbatnājxyim mi-di wyinaty yikmøø'yimp xemikøjxp. ²⁶ Nni-jā'wip øts wā'ats midi'ampy ø nni'jxpy ka' øts nugo nbuty wim-beets kugoots; nbaatp øts idø'øn ja' midi ø nbaat-wampy, ka' øts nugo n'adi'ich. Ka' øts jade'en nugo ngojxwidity jøts øts nika' ti ndukpety. ²⁷ Jawyeen øts yikxon nnay'a'ejxiyi jøts øts nne'kx ndukmibiky pøni sām øts idø'øn ja ndsøky pøni ti øts idø'øn ndunwampy, jøts øts kidi ndøjk jawyeen tsø'ødyumbim njaty Dios wyingujkp yām øts ja jā'y tø ndukmadowdi sud-so'ampy ja nitsoojkin ja pa'ayo'owin ja tpaattit, jaa ku øts ne'egi nga'ukpøjknit ja niduñ.

Ja' yikni'ana'amp jøts ja maxandsā uk øy ti jadu'uk awānax kyayikdiosjawit

10 Mni-jāwidip migu'uktøjk idø'øn ku ja mø-jā'a'dyøjk niduki'iyi ja Dios ja yoots tyadu-u'wajidøø, jøts nayide'en niduki'iyi ja Dios øy tyuktanajxidøø ja Tsajpts Mejy. ² Jade'en idø'øn ja ndejint niduki'iyi tpaattøø ja nøbajtin jøts ja tmøø'tetti Moisés. ³ Niduki'iyits nayide'en tjøø'kxtøø ja tsajpjotpit jii'kxy, ⁴ jøts nayide'en niduki'iyi t'uktøø ja tsajpjotpit nøø. Pø ja'abi nøøjxi ja y'uktip midi jam mu'tp tsagøjxp midi payø'øydip. Ja Cristots idø'øn ja myøk'ajtin ñanky'ejxip jam tsagøjxp. ⁵ Namayts ja'adi pøn ja Dios Teety tkami-madoodøø jøts ja jamyi abak etjotp y'oo'knidøø.

⁶ Ejxpajtin adøm idø'øn yā xmø'øyindip paty idø'øn ja jade'en yjatti jøts adøm ja ka'øybi tsinaā'yin ngatso-jkint sām ja ttundi. ⁷ Paty kidi meets ja maxandsā xwindsø'jkyinidi sām ja ttundøø niwinaagin, jøts sām idø'øn ja yiknigajpxy nøkyjøtpy: "Winets ja jā'y kaabyi ukpi y'ixakti jøts twinxødundi ja maxandsā." ⁸ Ka'ap adøm idø'øn xem yām nugo nnamyøøt'ajta'ant kija' uk tu'ugyi ja amajtsk jā'y tyik'ettit ja ñiyā'y uk ja ñidø'øxy, sām ja jā'y tkamøjpiktaktøø wināagin ja y'amajtsk'ajtindi, jøts ja'ayi tukxøøwyi tku'oo'kyidi ja pyøky ni'ee'pxigøøk mil. ⁹ Ka' mibaat ja Dios tyudā'aky'ajtin ndana'ejxin uk nugo nwinmā'añ'e-jxwā'anin sām ja jā'y wināagin y'adøtstøø midi ja tsā'a'ñ ojts yikxon chu'tstigøyidi. ¹⁰ Jøts nisā xkatejtit ja Dios pøni sām ja mduñidi. Ka'ap jade'en m'adø'øtstt sām wināagin y'adøtstøø ku ja tka'ødyejti ja Dios, ja' midi ojts tyagida'agyidi ja ayo'on ku Dios ja tyumbi tkejxy midi ja o'jkin ojts tyukpaadyidi.

¹¹ Adømgøjxp idø'on jade'en ja mōjāa'dyøjk yjajttøø kyubattøø, jøts nay adømgøjxp ojts jaabyety jade'en tyañ jøts yø n'ejxpaj'tajtint jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyiidyu'unin xøøw. ¹² Pøn jaty yjawi nisā kajattip, pøn dø'on yjawi øy tsinaadyip, wants ja tnay'e-jx'ityidi jøts ja kyawinmaa'nmya'attit. ¹³ Nay ja ayo'on mididi ixyam mdanajxtip ku yik'ejxmatsti ja mjanch-jā'windi pøni mjanchpadundip idø'on uk ka'; nayja'abi ayo'on idø'on øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyjøjxk xanaxtit ja ayo'on mididi kamidanaa'ni. Kuts wyinaty ja ayo'on tyimyjawani møk mbaadyidi, ja Diosts mmo'ojidip ja wyinmaa'n sudso ja xmimada'aktit.

¹⁴ Paty migu'uktøjk idø'on ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'embi tsinaa'yindi. ¹⁵ Wā'atsxi xnimadowdi sa mee nnøjmi wijy kejy ti sa m'ejxidi. Kø'ømts yikxon x'ukpayø'odyit pøni janch kidi yjade'eni sa ø nwa'añ. ¹⁶ Ku adøm ja tsapnøø kunuu'kxy n'uujkyindi ja Dios adøm idø'on jade'en nwindson'øjka'am, ja Cristo dø'on ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi ñi'kxyindip mididi ja y'øy'ajtin xukpaajtimp ku ja ojts xku'o'jka'am jam kruskøjxp. ¹⁷ Øy adøm njana-maya'am tu'ugyits adøm ja tsapkaaky ndamujkyindi, patyts adøm jade'en amuum tu'ugyi n'ijtyindi Dios wyingujkp pøn jaty tjanchjā'widip ja Cristo.

¹⁸ Ejxtits ja Israelit kajp mā ja jāa'y tkaydi tjøø'kxti ja windsø'jk'iñi; ja'ats idø'on ja ñamyayi tu'ugyi yik'e-jtidip, tu'ugyi ja tumjade'en wyinmaydi nixem niyam. ¹⁹ Ka'ap øts idø'on nnimy ku ja maxandsaa uk jadu'uk øy ti awanax yujkyidi, jøts ka'ap ø nnømi ku ja tsu'uch jawaani øy mididi ja yiktawindsø'jkidip. ²⁰ Yide'enxi øts idø'on ja njatijy, pøn jaty ja Dios tkanija'widip jøts ja windsø'jkin ja tpiktā'akti tsamaxan uk øy ti jadu'uk awanax wyindum y'agø'øm, ja miku' dø'on ja wyindsø'jkidip jøts ka'ap ja Dios; ja'ats meets idø'on ngadamidsøjkpy jøts ja miku' yja' xkupøjkidit. ²¹ Ka'ap ja mbaat'atyidi jøts mee majtsk jøøjp mdsøønit yam meets ja nwindson'ajtim ñi'jpy xja'uujkyi, jøts nayide'en x'uujkmiyidi ja miku' ñøø; yamts meets ja nwindson'ajtim ñe'kx xjøø'kxyi jøts ja miku' yji'kxy xjøø'kxmiyidi. ²² ¿Ja ti adøm tø ndøjkiñam? ¿Nugo taguyajtpi jøts jade'en ja nwindson'ajtim nugo nyik'ambøjkint? ¿Ja tyimyaabaat adøm nmøj'ajtin jøts adøm ja ne'egi nyik'amutska'ant?

Ka'ap ja ngø'øm ja' n'ixa'ayint, ja tsojkin ja pa'ay-o'owin ne'egi ndamiyojxin ja nmigu'uk

²³ Janch ja jade'en idø'on sam ja ayuujk wyā'añ ku o tigati nduu'nint, nipøn ja xkadabayø'øyint; øy dø'on ja jade'en yjawa'añ, ka'ats tuki'iyi y'ødyuñ pøni ti yik-tump; jabi ka'axi ja Dios yjanchjā'win jade'en tuki'iyi xatøjka'ant. ²⁴ Ja nmigu'uk adøm idø'on ja y'øy'ajtin n'ixaajya'amp jøts ka'ap ja ngø'øm ja' nugo ndunk'ajtint ja'ayi.

²⁵ O mee tigati xjøø'kxt pøni ti jaty mjuudyip maayjotp, ka' xyiknidøwidit mā ja tyiktsoondi, ku nugo mnadyagumayidit; ²⁶ jabi nwindson'ajtimxi ñaxwii'ñit yø' jøts tuki'iyi pøni ti jaty yā ejtp naxkijxy.

²⁷ Pøni mwaajidipts ja jāa'y kaabyi pøn ja janchjā'win tkamøøt'ajtp, kupøkti panøjkxti jøts kaydi jøø'kxti pøni ti myikmøødyip jøts ka'ap ja xyiktø'ødit pøni ti pøni pøn yiktawindsø'øgi, jøts niti xkagumayjawidit. ²⁸ Kuts jam tu'ugin ja jāa'y jotmøñ wyā'ant ku ja'abi tsu'uch ja maxandsaa tø yiktawindsø'øgi, ka'ats meets ja xjøø'kxt, jøts ja mmigu'uk xkanankñagyumayiyidit ku ja nugo ñabyøkyjawiwyidit ja'agøjxp ku ja janchjā'win ja okwā'añ tyiktøwdinim tyiktudā'aktinim. ²⁹ Ja mmigu'uk øts idø'on ja wyinmaa'n nnigajpxip, ka' mets mja'.

Jamts pøngapøn tyiktø'ødit jøts wyā'andit: "¿Sudsots ja wenk jāa'y nyikmøjtøjkiyit ne'egi ja wyinmaa'n jøts øts nja' nika'? ³⁰ Jabi n'ajot'ajtpyxi øts ja Dios ku ngay ñi'kxy, ¿tits øts idø'on xabagajpxtip kuts ja'abi kaaky ngupøkt?" ³¹ Ots ja yjade'eni, pøni mgaadyip m'uktup uk pøni ti jatyts mdundip, tum ja Dios køjxp ja xu'undit jøts ja jade'en xyikmøjtøkidit. ³² Kidi mee xuñ mididi ja mmigu'uk tyadigø'odyip: ni ja israelit jāa'y jade'en xkatu'undit, ni ja' pøn ka'israelit jāa'y'ajttip, ni ja' pøn ja Dios Teety tø myø'øyidi ja janchjā'win jøts ja nwindson'ajtim tmibøjktit. ³³ Kuts øts, ja' ø n'ixaapy sudso øts ja nmigu'uk nyikjotkujk'att; ka' øts ngø'øm øy'ajtin n'ixa'ay, jøts øts nmigu'uk yikxon chøønidit jøts wyinaty ja nitsoojkin yikmo'odi.

11 Tundi nayide'en pøni sa ø nnajtstuni, pø nay ja Cristoxi ø nni'ejxuujtip ja chinaa'yin.

Sa yjāa'y'attit ja tø'øxyøjk mā ñamyukyidi ja janch-jā'wibidi

² Migu'uktøjkti njanchtakajxakpy meets ku ø xjā'myatsti, jøts ku nayide'en xpadundi ti jaty tø ndukmadowdi. ³ Ja'ats ndsøjkpy jøts xjā'gyukidit ku tu'uk tu'uk ja yāa'dyøjk ja Cristo ñigubajk'aty, jøts ku ja yāa'dyøjk ja ñidø'øxy tñigubajk'ajtmi jade'en sam ja Dios Teety tñigubajk'aty ja Cristo. ⁴ Pøni ka' ja yāa'dyøjk ñagyuju-jptu'udyi ku Dios t'ajot'aty uk kuts ja Dios yja' tjani-gajpxi, kyamøjpiktakpy idø'on ja Cristo ja' pøn ñigubajk'ajtiyip. ⁵ Pøni ka'ats ja tø'øxyøjk ñagyujuuxyi ku ja Dios t'ajot'ajtpi tyøki, uk kuts ja Dios yja' tjani-gajpxi, kyamøjpiktakpyts idø'on ja ñiyāa'y ja', nayide'enxi ja tpatni kidi ja jeexyip tø ñagyukaa'p-tu'udyi. ⁶ Pøni ka'ap ja tø'øxyøjk ñagyujuuxyi, wants ne'egi tñagyuka'aptutkixyi. Pøni tyatsø'ødyumpts jade'en ja kyubajk keepy, wants ne'egi tpiktā'aky ja kyujuux. ⁷ Nagyujuptu'udip idø'on ja yāa'dyøjk pø ja Diosxi ja myøj'ajtin ja chuj'ajtin ja yiknigaxø'jkip ku ja nayide'en tø yik'ø'yiyi sam ja Dios t'ixy. Jøts ja tø'øxyøjk ja ñiyāa'y myø'ajtin ja yiknigaxø'jkidip. ⁸ Kuxi ja Dios tyik'ø'yiyi'ñ pø ja yāa'dyøjkxi ñikøjxp ja Dios tju'jty ja tø'øxyøjk. ⁹ Yāa'dyøjkøjpxxi ja tø'øxyøjk y'ø'yiyi'ñ, jøts ka' tø'øxyøjkøjxp ja yāa'dyøjk y'ø'yiyi'ñ. ¹⁰ Patyts idø'on ja tø'øxyøjk ñagyujuuxit jøts ja jade'en tyiknigaxø'økt ku ja yāa'dyøjk ja y'ane'emyi, jøts ja Dios y'anakilis nayide'en yjotkujk'attit. ¹¹ Nnija'wa'ampts adøm, ku ja

janchja'win nmøøt'ajtyindi, ku ja yaa'dyøjk jøts ja tø'øxyøjk kuwani tu'ugyi y'etti. ¹² Janch tiyxi dø'øñ ja' ku dø'øñ ja tø'øxyøjk y'øyihiñ, ja yaa'dyøjkts ja Dios yiktuun, nayide'en yjanchi ku tø'øxyøjk ñikøjxp kye'exy yaa'dyøjk ya naxwiiñ; ja Diosts jade'en wamp.

¹³ Kø'øñ mee x'uknigajpxt pøni øyide'en ku ja tø'øxyøjk ja Dios t'ajot'att kuwa'ats, jabi ka'axi ja y'øyi.

¹⁴ Tsø'ødyumbim ja yaa'dyøjk pyidsimy ku ja wyaa'y ja tyikyon'anaxy, ka'ap adøñ jade'en ngostumbri yø'øyi. ¹⁵ Yiktakajxakpts ja tø'øxyøjk ku ja wyaa'y ja yøñ, pø tøxi ja yiktanibiktaagi jøts ja wyaa'y ja kyubajk ttanipett. ¹⁶ Pøni pønts tkaja'gyukiwyamp sa øts idø'øñ tø njawa'añ, ñijawip idø'øñ ja' ku øøts ka'ap ja wenkpi winmaa'ñ nyiktuñ jøts ni ja' jade'en kyawinmaamyidi pøn jaty ja Dios tø wyaa'mukyidi wyejtsmukyidi øy madsoo, ja'agøjxp ku ja tø tjanchjawidi ja Dios.

Ku kya'ukyikmøjpkta'ni ja nwindson'ajtim kyaajyik y'uujkik midi ja ñajtstu'unip ku ja y'a'ux'ajty

¹⁷ Ku meets yam nnijayi kidi ngajxa'akwampyp meets, ku yjawi mjanamyukyidi niwine'en ja mga'øpyidsø'mxyidi jøts ni mga'ødyuñidi ja yjawi. ¹⁸ Jade'en øts ja jaa'y xumdamimadya'akti kuk mee mjanamyukyidi mnawya'kxibik meets jam jøts mjanamyee'kxyidi; nmibijky øts idø'øñ, pø jade'en idø'øñ jam yjanchjaty. ¹⁹ Kuwanidsik idø'øñ mnawya'kxidit jøts idø'øñ ñigaxø'øktit pøn idø'øñ Cristo yja' yjanchpaduujnidip, jøts pøn idø'øñ nugo nadyejidip jøts ku Cristo ja tpadundi. ²⁰ Kuts meets idø'øñ jade'en mjanamyee'kxyi, nika'ats meets ja nwindson'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ. ²¹ Anaxukpimxi meets jam kø'øñ a'ux xninijkxy ku ja ka'ayin tpaaty, jamts muum kyaku'uxyidi jøts muum nugo tyimy'ukmuktigøøñidi. ²² ¿Ti ka' meets mdøjk te ma' mga'adyit? Mgamø'ejxtipxi dø'øñ ja janchja'wip jaa'dyi ku jade'en m'adø'østi, jøts namyikaxi mwinbidsø'mdi ku ja mmigu'uk pøn ayoodip jam xwingayidi, jøts ja nugo xuk'ayoojidi. ¿Sats meets idø'øñ nnøjmit? ¿Ndsaa'chka-jxa'akp meets idø'øñ ku jade'en m'adø'øtsti? ¿Nijjuuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtni møøt ja pyabøjkpitøjk

²³ Pø ja nwindson'ajtimxi ø kø'øñ tø xmø'øyi midi mee tø ndukyikyuyj. Ku dø'øñ ja nwindson'ajtim Jesús wyinaty yikøyakwani ux, nay ja'abi uxts idø'øñ ja tnix-ajtyhiñ tu'uk ja tsapkaaky, ²⁴ kuts ja Dios Teety t'ajot'ajty jøts tkajxajky, winets ja t'adujkajky ja tsapkaaky jøts wyaa'ñ yide'en: "Kaydi, øts idø'øñ ya'at nne'kx midi meets mnitsoojkingøjxp inet yikøyakp. Mdu'undip idø'øñ ya'at jade'en jøts øts xja'myajtspajt'attit."

²⁵ Kuts idø'øñ ja wyinaty tø y'a'ux'atti ixjats ja uujk'hiñ tu'uk tnixajtyhiñ jøts yide'en wyaa'ñ: "Ya'at tsapnøø'uujkin idø'øñ icyam tãmp ejxpajt ku ja Dios Teety ja wyanda'aky tyik'aduky sam ja ttami'awa'aniyihiñ ja naxwiiñit jaa'y ja nitso'ok'ajtin. Ixyamts idø'øñ ja

cho'onda'aky ku øts nni'jpy inet wyidsu'unt wyidaxt. Kuts ya'at tsapnøø'uujkin xumitu'undit, øts nja'myajt-singøjxp yø x'adunidit." ²⁶ Jade'ents migu'uktøjk idø'øñ, ja nwindson'ajtim mee mja'myejchp ku meets ja tø mgu'oogyi ku jade'en ja tsapkaaky xka'adyit midi namyayi ñe'kx'ajty, jøts ku ja tsapnøø jade'en x'uku-naxit midi ja namyayi ñi'jpy'ajty kunim ja mye'ent jadigojk.

Sudso ja nwindson'ajtim kyaajyik y'uujkik yikupøkt mi-di ja ñajtstu'unip ku ja y'a'ux'ajty

²⁷ Ja nwindson'ajtim Jesucristo yjamidundigøøpy pøn idø'øñ yikxon tkajøø'kxp tka'uukp ja nwindson'ajtim ñe'kx jøts ja ñi'jpy. ²⁸ Patyts idø'øñ yikxon jawyeen xpawinma'adyit sa ja mdsinaa'yin xyikyø'ødyi, nam-ga'anim wyinajty xni'awidi ja nwindson'ajtim ñe'kx jøts ja ñi'jpy. ²⁹ Ja kyø'øñ ayo'onxi ja y'ixaapy pøn nugo tni'a'wip ja nwindson'ajtim chapnøø'uujkin. ³⁰ Ja'agøjx-pxi dø'øñ may ja mmigu'uk pa'amøøtti jøts kajotmøjk-ti, jøts muum tø y'ookti. ³¹ Kuts adøñ kø'øñ a'ejxi ndu'unint, ka'ats ja nwindson'ajtim jade'en xiidyu'unint. ³² Kuts adøñ ja nwindson'ajtim xiidyu'uñim ja'agøjxp ja ttuñ jøts ja xukja'gyukant jøts ngamøøtkudigø'øyindit ja pojkpitumbi jaa'dyi midi tka-janchja'widip ja Dios.

³³ Paty migu'uktøjk idø'øñ, ku mnamyukidit jøts ja nwindson'ajtim ja chapnøø'uujkin x'atsja'myatsidit, nay'awexidi jøts tu'ugyi mdsapnøø'uuktit. ³⁴ Pøni jam pøn yu'øøky, wan jamyi ne'egi kyø'øñ tøjktotp t'ukay, jøts ja Dios wyinaty kyadukuwanjatiyi ku ja tsapnøø'uujkin ja nugo tyikwa'ant nanntyamu'ugi nanntyaku'uxi. Midi'ibi jaty myiktøødip jaanim øts ja wyinaty nniga-jpxy ku mee n'ats'ext.

Ja wijy'ajtin midi ja Dios Espíritu Santo yajkpy

12 Migu'uktøjkti, jaa ja ayuujk midi ø ndsøjkpy jøts meets ja xnijawit ku Dios Espíritu Santo tyaky ja winmaa'ñ ja wijy'atin jøts ja tmø'øyi ja jaa'y kija'.

² Mnija'wip mee ne'egi wa'ats ku mee wyinaty xkamibikñim ja nwindson'ajtim Jesucristo, ja maxand-saajimts meets tu'uk tu'uk y'ijty ja'ayi mwindsø'jkidip.

³ Paty meets yam ndukmadøy jøts xnijawidit ku pøn wyaa'ant: "¡Miku' yø Jesús!" kidi ja Diosip y'Espíritu Santo ja wyinaty jade'en yikwaajniyip. Uk jadu'uk pøn nugo wyamit: "¡Ja Jesús idø'øñ møj windsøn!" tiyts ja wyinaty yjanchwa'añ pøni Dios y'Espíritu Santo ja wyinaty jade'en yikwaajniyip pøni ka'ats myigajpxigøøpy Dios ja wyinaty.

⁴ Mayjøøjp idø'øñ ja jaa sa pøn øy tigati tjaty, jøts ki-ja' ja yikmøøt'aty pøni sa pønjabøn ja wijy'ajtin tø yik-mø'øyi, tum Espíritu Santo wyingujkpts ja chøøñ. ⁵ May tunkjøøjp yikmøøt'aty, tu'ugyits ja nwindson'ajtim Jesucristo yiktamiduñ. ⁶ Kawinaak jøøjp ja ødyunk nmøøt'ajtyindi, tu'ugyits ja Dios ja xmø'øyindi. ⁷ Ja Dios idø'øñ ja ejxpajtin tu'uk tu'uk tmøøpy ja jaa'y, jøts idø'øñ ja tyiknigaxø'økt ku ja Dios Espíritu Santo ja tmøøt'aty, jøts ja niduki'iyi yikta'øy'att. ⁸ Dios Espíritu

Santo kǒjxp idø'øn ja Dios Teety ja jaa'y tmø'øy ja wyi-
jy'ajtin jøts ja tiy kyajpxwejtít, jøts nayide'en ja jaa'y
tmøømyi ja íxpiky'ajtin jøts ja øy yik'ixpøjktít. ⁹ Jamts ja
jaa'y pøn ja Dios Espíritu Santo janch møj jøts janch
møk ja janchja'win myø'øyidi, jamts pøn yikmøødyip ja
øybi møk'ajtin jøts ja pamaa'y tyiktso'oktít. ¹⁰ Jam pøn-
gapøn tmø'øy jøts íjxyimbi ka'íjxyimbi ja ttu'unt, jøts
jam pøn myøøpy jøts ja Dios kyajpxy Dios y'ayuujk ja
tnigajpxidit; jamts ja' pøn ja Dios tø tyamidsøjkyidi jøts
ja t'ejxkaptít pøn jaty ja ka'øybi winmaa'ñ tyiktundip
jøts pøn ja øybi winmaa'ñ tmøøt'ajttip; jamts
nayide'en pøn tø yiktamidsokti jøts kawinaak ja ayuujk
tkajpxtít midí ja myígu'uk kyakajpxtít; jamts ja'adi pøn
tnímadoodip wā'ats ja ja'abi ayuujk jøts ja tnigajpxtít ti
dø'øn ja tyíjpy. ¹¹ Tu'ugyits idø'øn jade'en y'adi'ich ja
Dios Espíritu Santo, jøts idø'øn ja tyikwa'kxy ja wi-
jy'ajtin pøni ti dø'øn ja pønjabøn tyukjætwapmy kø'øm
ja tø ttanibiktaagi.

Ja nwindson'ajtim tnigubajk'ajtp niduki'iyi ja jaa'y pøn tjanchja'widip ja Dios

¹² Jade'en idø'øn ja Cristo n'ukpiktaajkint sam tu'uk
jaa'y ñe'kx midí janch may tanibiktaagi tum tígach; ots
idø'øn ja kø' ja teky kija' ja tunk tø yiktanibiktaagi,
tu'ugyí ja ñe'kx ja y'ity. ¹³ Nayide'ents adøm idø'øn øy
yjapøni, yja'israelít jaa'yi uk yjaga'israelít jaa'yi, yjagre-
ciít jaa'yi, yjamidumbi jaa'yi uk yjanitøøky jaa'yi, ku
adøm idø'øn tø nnøbejtyim tu'ugyí adøm idø'øn ja
ne'kx namyayi nyik'øya'am Dios Espíritu Santo kǒjxp;
jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøjpyi tmøøt'aty midí jaty ja yik-
tumpy, pø may jøøjpxi ja tmøøt'aty. Jade'ents ja y'a-
muum'aty ku ja ka'pxy tmøøt'aty íjxyim ka'íjxyim. ¹⁵ Øy
yø teky yjawa'añ: "Ka'ap ø nduñ nayide'en sam ja kø'
paty ø nípøn xkatunk'att", kidi ja'agøjxpts ja kya'uk-
paat'ajtniyit ja ne'kx. ¹⁶ Uk y'ukwamít inet ja tåtsk:
"Ka'ap øts ja ween tyunk ndujni paty ø nípøn
xkatunk'att", nigidi ja'agøjxpipts ja ne'kx ja myajtstuu-
jtñiyit. ¹⁷ Ku jeexyí tum ween nne'kx'ajtyim, ¿sudsots
jeexyí nmadø'øyim? Uk kuts jeexyí tum tåtsk
nne'kx'ajtyim, ¿sudsots jeexyí nxuu'ka'am? ¹⁸ Tø
dø'øn ja Dios ttanibiktaajkigyíjxy ti jaty jadu'uk jadu'uk
ja ne'kx tyu'undip sam ja kø'øm tø ttsøky. ¹⁹ Ku jeexyí
tukjøjpyi y'amuum'aty, ¿mats jeexyí ja maybi tyøkidi
midí tyikā'pxtít tuk'amuum ja ne'kx? ²⁰ Jabí nni-
jā'wimpts adøm ku mayjøjöp chøkyi winets njaa'-
gyaxø'jkindit, pø tu'ugyixi ja ne'kx.

²¹ Ka'axi dø'øn ja ween tnøjmít ja kø': "Ka' me nyik-
tunwā'añ"; ni ja kubajk tñanimaamyit ja teky: "Ka' me
n'ajot'aty." ²² Jøts midí idø'øn yjawi ka'a'ejxin kaxø'kp
ja' idø'øn ne'egi yikxon yik'ajot'ajtp, ja idø'øn xyikju-
jky'ajtíndip. ²³ Jøts midits yjawi kayiktsojpk ja'ats ne'egi
n'ejx'íjtyíndip jøts ja nnixøjxyim nnípíjkyim; midits
adøm nganānky'ejxwā'añimp ja'ats adøm janch'a-
maa'y ndø'øñim nyu'uchimp. ²⁴ Jade'en idø'øn ja Dios
tø xanibiktaajka'am jøts adøm ja ne'egi
nmíjotígø'øyint midí yik'ejxp ka' tyuñ, ²⁵ jøts kidi
ki'abikyip nugo øy pøn tyuñ øy sá, pø

nabyudøjkiyidípxi dø'øn ja'adi nixem niyam wan ja sá
t'íjxyidi, jøts ja amuum tyikjujky'ettít tuki'iyi ja ne'kx.
²⁶ Pøni tsaachip o magama tukween ja ne'kx,
amuumts ja pøjkpi āmbi yikjā'wigyixy øy mādsøo; kuts
øy mādsøo tukween yikxon yik'ejxy'ejtmí kunim ja
yikxon chø'øky, tyimñejkpts nayide'en tuki'iyi øy mādsøo
ja ne'kx.

²⁷ Meetsts idø'øn ñamyayi ja Cristo mne'kx'ajttip jøts
jade'en meets ja mbikta'āgyi sam ja kø' teky, ween
āaw tyuñ, uk jadu'uk øy ti midí møøt kya'pxy ja ne'kx.
²⁸ Tøts idø'øn ja Dios Teety ttanibiktaagi ti tyu'undip ni-
du'uk jaty ja jaa'y pøn ja Dios tmíbøjktít: midu'uk, ja
nwindson'ajtim kyudanaabyitøjktí; mímajtsk, pøn tñi-
gajpxidip ja Dios kyajpxy ja Dios y'ayuujk; midígøøk,
pøn yik'ixpøjktít pøn kajpxwejtít; jøts nayide'en pøn
íjxyimbi ka'íjxyimbi ttundip, møøt nayide'en pøn ja pa-
maa'y tyiktsoktít tyikmøkøjktít, møøt ja
pudøjki-bitøjktí, jøts nayide'en ja ana'ambitøjktí, møøt
ja'adi pøn tkajpxtít ja wenk āaw ja wenk ayuujk pøni
sá Dios ja kø'øm yikajpxwā'añidi. ²⁹ ¿Pønts idø'øn
janchja'wibi'ajttip? ¿Niduki'iyi ja nwindson'ajtim tku-
danidí? ¿Tum ja' tnigajpxidip ja Dios kyajpxy y'ayuujk?
¿Tum ja' yik'ixpøjktít? ¿Uk tyumdundip idø'øn ja
íjxyimbi ka'íjxyimbi? Ka' yjade'eni. ³⁰ ¿Tyumøøt'ajttip
idø'øn ja møk'ajtin jøts ja pamaa'y tyiktso'oktít? ¿Uk
kyajpxtít idø'øn niduki'iyi kawinaak ja kanimadooni
ayuujk? ¿Uk ñímadoogøxtít idø'øn pøni sá dø'øn ja
wenk ayuujk wyā'añ? Pø ka'axi. ³¹ Tajotígøyts sudso
xpāattít yø'øbi øy'ajtin sudso ja Dios mgunuu'kxidít
jøts myikwejidít myikajidít. Íxyamts mee ndukni-
jāwíwya'añ ja jawaani øybi tuu' sá øy tsuj
njaa'y'ajtíndit.

Ja tsojkin ja pa'ayo'owin

13 Ku njakajpxt kawinaak ja wenk āaw kawinaak ja
wenk ayuujk øy yjatsajpøtøpit ayuujki uk øyts
yjanāxwíi'ñit ayuujki, pøni ka'ats øts ja tsojkin pøni
ka'ats øts ja pa'ayo'owin nmøøt'aty, nayide'ents ja
tpatni sam tu'uk ja tambur tawā'ats midí nugo jago-
jpk, uk sam ja platiy midí nugo na'amp. ² Øy øts je-
exyí ja Dios kyajpxy ja Dios y'ayuujk tuki'iyi njani-
gajpxi, uk njanija'wigyixyts øts tuki'iyi ti jaty memp ti
jaty kida'kp midí ka' pøn t'íjxñim midí ka' pøn tñi-
jāwinim, uk njamøøt'atyts øts tuki'iyi ja íxpiky'ajtin ja
wijy'ajtin, uk nja'ajot'atyts øts ja Dios kawine'en ku øts
ja íjxyimbi ka'íjxyimbi njatuñ jøts øts ja kojpk ngñdyi-
gach, pøni ka'ats øts ja tsojkin pøni ka'ats øts ja pa'ay-
o'owin nmøøt'aty nitits øts mibaat ngawa'añ, tyimñu-
go øts iiy. ³ Uk njadagumaagyíjxpyts øts ja ayooobi jaa'y
tuki'iyi ja nbikta'āky, uk njanagyøyakyits øts jøts øts ja
jaa'y xyiknitø'øty Dios kǒjxp, niwine'enin øts ja
ngadamajada'akt, pøni ka'ap øts ja tsojkin, pøni ka'ap
øts ja pa'ayo'owin nmøøt'aty.

⁴ Pøn tsojpk pøn pa'ayoop, tudā'āky ja yjā'y'aty; jøts
øy jaa'y ja', ka'ap myígu'uk ja øy ti tamí'ekyi uk niti
tkamo'owa'añ; jøts ka'ap ja ñamyikexyi, ni kyanadya'a-
gajpxiyi ja' pøni ti ja tyumpy. ⁵ Ka'ap ja ka'ø'y'ayuujk ja
ka'øwynmaa'ñ uk ja ka'øchināa'yin ja ttunk'aty; jøts

nika' ñadyamidsojkijxyi tuki'iyi yam ja myigu'uk y'ayøw wyinmay; ka'ap ja tuki'iyi tta'ambiky jøts nika'ap ja ejtp y'ekyi. ⁶ Ja y'øchināā'yin ja myigu'uk ja tyadaxondakpy, kidi kya'øchināā'yin ja ojts ttadaxondā'aky. ⁷ Pøn tmi-danaapy tuki'iyi pøni sã yiktuñ jøts pøni sã yiknøjmi, jøts jyøp'ijxpy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyudā'aky'ajtin ja ttamajada'aky.

⁸ Nijuuni ja tsojkin ja pa'ayo'owin kyagudigøw. Ja'tp ja et ja xøøw ku wyinaty ja kajpxy ja ayuujk kya'ukyikni-gajpxnit midi ja Dios yajkpy, jøts wyinaty nayide'en kawinaāk ja wenk āaw ja wenk ayuujk kya'ukyikajpxni, jøts wyinaty ja xipiky'ajtin kya'uktuni. ⁹ Ka'ap adøm tuki'iyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmado'owimp. ¹⁰ Kudigø'øpyts yā'atpi nija'win ku wyinaty tuki'iyi n'ijxyim nnija'wa'am pøni sã dø'øn tyiyi kya'pxyi tuki'iyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knāā n'ixmatskøjxni øts ja mutsk'ajtin.

¹² Nayide'ents adøm ka' ka'pxy ja Dios yja' nni-ja'wa'am, winjo'ximp adøm yjawi ku ja nja'ejxpaat-wā'āñim; jaanim idø'øn ja wyinaty øy wā'ats n'ijxyim. Ka'ap øts ixyam tuki'iyi nnijawī, jaanim øts ja nøjxk wā'ats yikxon nnijawinim tuki'iyi sã øts ja Dios ixyam wā'ats x'ixy wā'ats xnijawa'an. ¹³ Jade'ents idø'øn ku n'ajot'ajtin ja Dios, ku njøp'ejxin ja nitso'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigøw, ettip yø xemikøjpx; tigajstipts idø'øn nidu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

Ja kawinaāk ayuujk kanimadooni

14 Kajaats idø'øn xmøøt'attit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xnigajpxidit. ² Pø ja Diosxi ja ja'ayi myigajpxpy pøn ja wenk āaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejiyip, ka'apts ja yiknimadøw ti ja kyajpxpy, jøts ti ja jade'en tyijpy. ³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmijidip jøts ja ttukmadowdi ja jāā'y pøn tpabøjktip ja Dios jøts ja yjanchja'win ja myøkta'aktit ku ja yikajpxjot'amøjkidi. ⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk āaw wenk ayuujk; pønts tnigajpxidip ja Dios kyajpxy ja Dios y'ayuujk jøts ja ttukmadowdi ja jāā'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

⁵ Njadamidsøjkpy meets jøts kawinaāk ja wenk āaw wenk ayuujk xkajpxtit; jawaani kajaats mee ndamid-søky jøts ja Dios kyajpxy y'ayuujk xnigajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk āaw wenk ayuujk, jøts ku jeexyip yixx-

on yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxyidit ja yjanchja'win pøn jaty tpabøjktip ja Dios. ⁶ Pøni n'ats'ijxpy meets jøts meets ja wenk āaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nnigajpxt midi ja Dios xuknija'wa'amp, uk ja' midi tiy midi øy, uk ja Dios kyajpxy y'ayuujk mee ndukmadøøpy jøts nda'awa'andit, ja'ats idø'øn ti mjanchpudøkiyidip.

⁷ Wan ja ejxpajt t'ukpiktaajkyim. M'ijxy'ajttipxi xuuix sãw ja kapxyuuix uk ja kow; pøni ka'ap nyiksuunipaaj-tyim, sudsojt jāā'y ja tjā'gyukit pøni ti yikoop, pøni ti yixxuxp. ⁸ Kuts ja jāā'y cheptumidi ku ja puxuuix wā'ats kyawinaā'ñ, ka'ats ja tsep pøn t'a'ejxi. ⁹ Nayide'ents meets idø'øn mjaty; pøni ka' meets ja ayuujk xkajpxy midi yiknimadoop, ¿sudso dø'øn yiknijawit pøni ti dø'øn mgajpxtit? ja' poj mee nugo mmigajpxpy!

¹⁰ Janch jaa dø'øn may yā naxwiin ja ayuujk tigach, jøts tyumnimadoodip ja' pøn ja'abi ayuujk tkajpxtit. ¹¹ Pøni ka'ats ø nnimadøw ja jāā'y pøn ja wenk ayuujk tkajpxp, wenk kugajp jāā'yts øts ja xejt, jøts nayide'en øts ja ndejmit. ¹² Pøni mjanchtajotigøødyip idø'øn jøts ja kunuu'kxwyejin jøts ja kunuu'kxkyajin xpaattit x'ejxtit, ja' dø'øn mmijotigøødyip midi mdabudøkidip ja mmigu'uk jøts ja yjanchja'win ja myøjidit kyajaajidit.

¹³ Paty idø'øn ja jāā'y t'amido'ot ja Dios jøts yikwejit yikajit sudso ttuknimado'ot ja jāā'y pøni ti dø'øn ja kanimadooni ayuujk tyijpy. ¹⁴ Kuts ja wenk ayuujk njadakajpxa'akt, ka'ap øts ja nnimadøw pøni ti ngajpxpy øy øts ja ngajpxaajkin yjatiyi. ¹⁵ ¿Tits øts idø'øn njaaktu'ump? Njayiktuñ øts ja wenk āaw ja wenk ayuujk ku ø n'ajot'att uk ku øts nwin'øøt' ja Dios, ja' ja'ayi tsojkip jøts ku øts nmøøt'att ja ja'gyukin ja madogukin.

¹⁶ Sudso meets ja mmigu'uk mnimadowiit pøn ja wenk ayuujk tkajajttip pøni wenk ayuujk tam meets ja Dios mda'ajot'ajtpy. Kuts ja ka'ap tñimadowdi sã jaty mee mwā'āñ øy meets ja amuki møøt xja'ajot'aty ja Dios, ka'ats ja tjā'gyukidi sã meets ja Dios xnøjmi. ¹⁷ Øy meets ja mdsapkajpxy mabaat yja'øyi, kuts ja ka' yiknimadøw jade'ents ja tpaaty ku meets ka' ti pudøjkin xmø'øw ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi. ¹⁸ Ngajxajkpy øts ja Dios ku øts ja kawinaāk xukajpxy ja wenk āaw wenk ayuujk midi mee ka' xkajpxy. ¹⁹ Kuts ø ngajpxy jøts ø n'awa'āñ ja jāā'y pøn jaty Dios tjā'myajtstip, magoxk āaw øts ja'ayi ne'egi ngajpxy ja ayuujk midi yiknimadoop jøts ka' kawinaāk mil ja ayuujk midi kyayiknimadoop.

²⁰ Migu'uktøjkti, ku ja ka'øyi ku ja pøky xpaattit, jade'en mnabyikta'agidit kidi mutskunā'jk ti kya-mayidinim. Kuts mwinma'adyit, jade'en mwinma'adyit sãw mōjāā'dyøjk yikxon wyinmaadya'an. ²¹ Yide'en jap wya'āñ nøky ja kutujk: "Wenk āaw wenk ayuujk øts nyiktunkpaatp ku øts ja naxwiin'ñit jāā'y øy madsøo nmigajpxt, uk ndanigaxtit øts ja' ja wenk jāā'y midi wenk pujx wenk kajp tso'ondip jøts øts ngajpxy jøts øts n'ayuujk ja xyiknajxidit, nijade'ents øts ja naxwiin'ñit jāā'y nøjxk xkamibøkti, jade'en wya'āñ ja nwind-søn'ajtim." ²² Ejxpajtxi dø'øn jayikmøødyip pøn jaty

tkamibøjktip ja Dios ku dø'øn ja wenk aaw wenk ayuujk xkajpxti jøts ja Dios ja tmibøjktit, kidi ja'ajip ja jade'en kyujajttip pøn tø tmibøjknidi ja Dios. Abiky yja' ja'amidi ku Dios nayide'en myø'øyidi ja ejxpajt ku ja yikxon tyukjatyidi sudso ja tnigajpxidit ja kyajpxy ja y'ayuujk, kidi ja'ajipts ja jade'en tyanibiktajkipp pøn tkamibøjktip ja Dios. ²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuujk, jøts nipøn kyanañimadowidit, kuts ja jaa'y pøn ja Dios tkanija'widipnim jam tyøkidit ma mee mnamyukyidi jøts ja niti nayide'en tkanimadoodidit, zka' meets idø'øn ja mo'tpi jaa'y mdejit? ²⁴ Pøni mgubajtiyipts meets ja jaa'y jøts ja tmadøy ku meets ja Dios kyajpxy y'ayuujk xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmado'ot jøts kudam ja yikpøky'ixy. ²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpikta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyi tsuj, jøts tum tanibiktaagi sam pyaat'aty

²⁶ Yide'en me migu'uktøjk idø'øn yjawi xuñ ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuujk wya'añ; jamts niwinaagin kya'amaamyidi, wenk aaw wenk ayuujk ja yiktundip, jamts pøn tkajpxnajxtip ja wenk aaw ja wenk ayuujk. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjidit. ²⁷ Ku ja wenk aaw wenk ayuujk xkajpxtit midi kanimadooni, nama-jtsk nidigøøk ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuujk. ²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit. ²⁹ Nayide'ents xu'undit pøni mni-gajpxwändip ja Dios kyajpxy ja Dios y'ayuujk, nayide'ents nama-jtsk nidigøøk ja'ayi mgajpxkojt, jøts nayide'en nidu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy. ³⁰ Pøni wyinmaa'nmyøøpyts ja Dios tu'uk ja jaa'y midi jam patmadoop, wants ja tkajpxmi jøts ja y'amo'ont pøn ukajpxp. ³¹ Jade'ents mee mgajpxt niduki'iyi pøni win-maa'nmyøøjyidip ja Dios, jøts jade'en xem yam mnanky'ixpøkidit jøts mnagyajpxjot'amøkiyidit. ³² Tuda'aky idø'øn, tsuj idø'øn ja kyajpxtit pøn ja Dios kyajpxy y'ayuujk tnigajpxidip, ³³ jabi ja øy'ajtinxi ja jotku-jk'ajtinxi ja Dios chøjky, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'øn xu'unt sam niduki'iyi ma jaty ñamyukyidi ja janchja'wibi jaa'dyi midi adøm nmigu'uk'ajtyindip. ³⁴ Ka'ap idø'øn ja tø'øxyøjk xyikajpxtit ku mnamyukidit, pø ka'axi jade'en kyutuky. Mbadu'undip idø'øn ja kuwani sa ja Dios kyutujk wya'añ. ³⁵ Pøni yiktøwändip tigati, jam tyøjkjotp tyiktø'ødit ja ñiyaa'y; ka'axi y'øgyaxi'iky ku tø'øxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xnijawi ja Dios kyajpxy, jøts ku mee ka' nadyu'ugyi xni-

jawi ya'atpi ayuujk. ³⁷ Pøni jam tu'ugin tjawi ku tnijawi sudso ja Dios kyajpxy y'ayuujk tnigajpxit, uk tø tjawi ku ja Dios Espiritu Santo tø wyinmaa'nmyø'øyi, paat'ajtip jøts tjagyukit ya'atpi ayuujk midi meets ixyam ndaniguejpxy jøts ku nwindson'ajtim yø tkutujki.

³⁸ Pøni ka'ats ja tkutujkawi, ka'ats ja nayide'en ja ejkajpin pyaat'aty. ³⁹ Jade'en migu'uktøjk, jotmay'at-ti sudso ja Dios kyajpxy y'ayuujk xnigajpxidit, jøts kidi xpayø'ødyi pøni kyajpxtip ja jaa'y ja kanimadooni ayuujk; ⁴⁰ tum øy tsujts idø'øn ja xu'undit, ka'ap anaxukpim.

Ku ja Cristo yujukpyiky jadigojk

15 Ja' migu'uktøjk ixyam ndukja'myatswändip midi tø njanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'øn tø xkupiky, jøts nay yø' meets idø'øn ixyam mdsinaa'yin'ajtpy. ² Ja'agøjxp meets idø'øn nayide'en ja Dios myiknitsø'øgyidi, pøni mbadundip idø'øn midi tø ndukmadowdi, jøts pøni tu'ugyi dø'øn ja mjanchja'win xyikyø'ødyi.

³ Ja' meets idø'øn tø ndukmadøy midi ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm nbojkpitumbijaa'y'ajtyindi sam jap nøkyijpxy yjaabyetyi jøts jade'en ja wya'añ; ⁴ jøts nayide'en tø ndukmadowdi ku tyikjutøjkidi, jøts ku ja kyimidigøøk xøøw yujukpyiky sam nayide'en ja nøky tnigajpxmi; ⁵ jøts ku ja ojts jadigojk ñanky'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabyitøjk jam wyinatyi. ⁶ Jøts nimagoxk magø'pxñaxy ojts y'ejxmiyi ja janchja'wibi jaa'y tuktøñi, may nay jaa'yjuky'attinim wi-naagin tø y'ooknidi. ⁷ Jøts ojts y'ejxmiyi ja Jacobo midi Santiago yiktejp, jøtsnim niduki'iyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'øn øy tsuj tø njagatso'onda'aky n'uktejint sam ja'adi. ⁹ Ja'agøjxp øts idø'øn øy ngamøji ngakøjxpi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyidi, jøts ni xjagapaat'aty øts jøts ø nwindson'ajtim kyudanaabyi nyiktejt, jabi ka'axi øts y'ijty nmaa'kxti pøn jaty tjanchja'widip ja nwindson'ajtim. ¹⁰ Tøts øts ja Dios xjanchmi'ø'y'aty, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myøk'ajtin jade'en tø xuktuñ y'øy'ajtingøjxp. ¹¹ Ka'ats ja ndunk'ajtin pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nnigajpxy ja Dios y'øgyajpxy ja Dios y'ø'y'ayuujk midi mee tø xjanchjaw.

Ku ja oo'kpi jadigojk yujukpyøktit

¹² Pø njanigajpxpyts øøts ku ja Cristo tø yujukpyiky jadigojk, zsudso dø'øn jam muum wya'andi ku ja

oo'kpi kyajukpyiky? ¹³ Pøni ka'ats ja oo'kpi jadigojk yjukpyøkti, ka'ats ja Cristo nayide'en tø yjukpyiky jadigojk; ¹⁴ pøni ka'ats ja Cristo jadigojk tø yjukpyiky, ka'ats øøts ja ngajpxy tyuñ midi øø ndijpy Dios kyajpxy Dios y'ayuujk, jøts ni kyatumi meets ja mjanchja'win midi mjadsinaadyip. ¹⁵ Kuts idø'on ja wyinaty janch jade'en, Dios tyeestiçi ataa'ys øø nwimbidsømni, pø tøxi øø nnimy ku ja Dios Teety jadigojk tyikjukpyiky ja Cristo; pøni tyits ku ja oo'kpi jadigojk kyajukpyøkti, ka'ats ja yjanchi ku ja Dios Teety ja Cristo tø jadigojk tyikjukpyiky. ¹⁶ Pøni ka'ap ja oo'kpi jadigojk yjukpyøkti, ni ja Cristots kø'ømbaæt jadigojk tø kyajukpyiky. ¹⁷ Pøni ka'ats ja Cristo jadigojk tø yjukpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni. ¹⁸ Pøni jade'ents ja', tøts inet idø'on tyimy'oo'kti pøn jaty ja Cristo tø tjanchjawidi ku tø yjuky'atti. ¹⁹ Pøni yayi adøm njøp'ijxy'ajtyim ja Cristo ñitsoojkin jøts ja nayi yayi ndajuky'ajttint naxwiiñ, ti adøm n'ayøø, adøm ne'egi yikxon ayo'i-xyim jajtım, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tø dø'on ja Cristo tyimyjanch jadigojk yjukpyiky; ja' idø'on kø'øm midu'uk tø ttunjøpi, jøts idø'on wyinaty nayide'en yjukpyøkti ja abiky oo'kpidi. ²¹ Pø tu'ukxi ojts ja jaa'y ja o'jkin tyiktso'ondä'aky ya naxwiiñ, nayi tu'uks ja' pøn ojts tyiktso'ondä'akmi jøts ja oo'kpi jadigojk yjukpyøkt. ²² Jade'en sam niduki'iyi ja o'jkin yikpaaty Adán pyøkyøjxp, nayide'ents wyinaty niduki'iyi ja juky'ajttin xemikøjxp yikmo'odi pøn ja Cristo tjanchja'widip. ²³ Tanibiktaagits idø'on ja wyinaty ja xemikøjxpit tsinaa'yin nyikmø'øyindi. Ja Cristo jawyeen pø ja'axi jawyeen tø yjukpyiky; kuts ja Cristo mye'entnim jaanimts wyinaty yikmo'odi ja tsinaa'yin xemikøjxp pøn jaty ja tø yjanchjawiyi. ²⁴ Jats idø'on wyinaty tuki'iyi kyixy, ku ja Cristo wyinaty tyikudigøøgyixy niduki'iyi pøn jaty jaa windsøn'ajttip naxwiiñ, jøts pøn wyinaty yikutujktip, ana'amdip, pøn tmidsep'ajttip ja Dios; jøts idø'on ja Cristo wyinaty ja Dios Teety ttigidøjkigyixy tuki'iyi wine'enin ja tja'aty. ²⁵ Pø jaanimts idø'on ja Cristo wyinaty kuwani yikutuky kunim ja myidsep ttekpya'an'ajtkøxt, ku ja Dios Teety ja jade'en wyinaty tø tyamidsøkyi jøts ja myidsep ja tmimajada'akt, ²⁶ jøts ix'oojknim ja o'jkin ja Cristo t'ukmimajada'knit ku ja yjukpyøjkin tyiknaxkida'akt. ²⁷ Pø tøxi ja Dios Teety ttsøky jøts ja Cristo tuki'iyi tyikutukt. Kuts idø'on ja nøky jade'en yawa'añ, ka'ap idø'on ja Dios Teety tyagida'agiyi jøts ja Cristo ja yikutukiyit, pø ja'axi tø ttsøky jøts ja Cristo tuki'iyi tyikutukt. ²⁸ Kuts idø'on ja Cristo wyinaty tuki'iyi tø tmimajada'kixy, winets ja wyinaty ja Dios Teety kyutujk tkupøjkti, pø ja kuxi ja Dios U'ngi. Jøts idø'on jade'en ja Dios Teety myøjkutujk o madsøoyingaxø'økt pøn ja Dios U'nk tø ttamidsøky jøts ja myidsep ja niduki'iyi tmimajada'akt.

²⁹ Jam yjawi pøngapøn ja oo'kpi tkunøbatti. ¿Tigøjxpts ku jade'en m'adø'tstsi? Pø nømdipxi ku ja oo'kpi kyajukpyøktit jadigojk, ¿sudsøts ja xkunøbatidi?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njukpyøjkint? ³¹ Janch ø migu'uktøjk idø'on nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkujk'ajtpy ku meets ja nwindson'ajttim Jesucristo tø xjanchjawidi. ³² Pøni kajpxwamp øts, nø'ømp øts inet ku øts ja jaa'y jawaani xkayikpa'ookti jam Efeso. Tøts øts ja nmimajada'akti, ¿tits øts idø'on jade'en nbijky? Pøni janch tiy idø'on ku ja oo'kpi jadigojk kyajukpyøkti, jade'ents ne'egi ndu'unindit sam wya'andi: "Wants yikxon tjaa'kyimkyaa'yindi tjaa'kyim'yuuikyindi ixyam jabi o'jkindipts jabom."

³³ Nay'ejx'etidim jøts mgayikwin'øøndit. Sam ja kajpxy wya'añ: "Ja kø'øm ka'ømyigu'uk idø'on kayu'kxtip pøn tyikmattip ja myigu'uk chinaa'yindi." ³⁴ Yiktso'ondä'akti jadigojk tiy tsuj ja mdsinaa'yindi, kidi pøky x'uktunk'ajttidi, pø ka'axi xumnijawidi ja Dios. Paty øts yide'en nwa'añ jøts xtsø'ødyunjawidit ja mga'øwyinmaa'ñ.

Sa dø'on ja oo'kpi jadigojk yjukpyøktit

³⁵ Jamts inet muum ma tyiktø'ødit: "¿Sudso dø'on jadigojk ja oo'kpi yjukpyøktit? ¿Sa dø'on ja ne'kx wyinaty t'ixy?" ³⁶ ¿Xøjknat! ¿Ku me tigati x'ukni'ipy, nay ja tømt idø'on pidsømp ku ja myuxy? Kuwanixi ja kyudigøy jøts ja ujts myuxy. ³⁷ Ka'axi ja tømt pajk tyimñayide'en t'ixy sam ja ujts midi muxp, øy yja'arindømt pajki, uk yjamidi tømđi. ³⁸ Ja Diosts ttanibiktaajkip jøts ja tømt pajk myuxt pøni sa ja ttsøky, jøts pøni sa dø'on pya'at'aty ja tømt midi yiknejp. ³⁹ Tumdigachxi tuki'iyi t'ixy tigati; wenk ja jaa'y ñe'kx t'ixy jøts wenkts ja jiyujk ñe'kx t'ixy, wenk nayide'enmi midi ja kyajnk jamđi, jøts wenk ja ajkx ñe'kx. ⁴⁰ Jats ja ne'kx midit tsajpøtpyit'ajttip jøts nayjaa ja'amidi midi naxwiiñ'ajttimidi; midits idø'on tsajpøtpyit'ajttip, wenk idø'on ja chujidi, ka'ap ja nayide'en kyaxø'økti sam ja'adi midi ya tsuj naxwiiñ'ajttip. ⁴¹ Wenk yø xøøw tyii'kxy, wenkts yø po' chamami; jøts nayi wenk yø maadsa' tyøø'kxmidi, jøts tigajttip yø maadsa', wenk yø tyøø'kxti tu'uk tu'uk. ⁴² Nayide'ents idø'on jyaty ku oo'kpi jadigojk yjukpyøkti. Putsnip ja' midi ñe'kx yiknitajp, jøts midi ñe'kx jadigojk jukpyøkp ni juunits idø'on ja kya'uk'oo'knit. ⁴³ Ja' yiknitajp midi yiktatsø'ødyump, jøts yjukpyiky midi janchtaxonda'akyim xemikøjxp. Ja' yiknitajp midi' kamøk, midi kamajada'kp, jøts yjukpyøkt jadigojk midi janch møk møjaaw. ⁴⁴ Ja ñe'kx yiknitajp midi yikwin'ejxp jøts midi yiktomp yikmajtsp; jøts ja ne'kx yjukpyøkt jadigojk midi kayik'ejxp, kayiktomp, kayikmajtsp. Pøni jats ja ne'kx midi yik'ejxp jøts y'øøky tyigøy, nay jats ja ne'kx midi kayik'ejxp midi ka'oo'kp kadigøøpy.

⁴⁵ Jabi yide'enxi ja Dios kyajpxy wya'añ: "Ja'ukyikmøøxyi ja mijawyeen jaa'y ja juky'ajttin, pøn idø'on Adán'ajtt"; ka'ats ja nwindson'ajttim Jesucristo yjade'eni sam ja Adán y'ijty, tyimykjuky'ajttip ja ja'ayi myiñ. ⁴⁶ Jawyeents adøm ja ne'kx tø nyikmø'øymidi ja ynmøø'tajttindip naxwiiñ; jøtsnim wyinaty ja ne'kx nyik-

møø'yindi sam ja nwindson'ajtim ñe'kx t'ijxy ku ja yju-jkpyijky jadigojk. ⁴⁷ Naxne'eyxi ja Adán ñe'kx'ajt naxwi-i'ñit jaa'yin; tsajpjotpts ja myiñ ja nwindson'ajtim Jesu-cristo ñe'kx paty ja jawaani øy. ⁴⁸ Tum jade'ents adøm nne'kx ya naxwiiñ t'ijxyim sam ja jawyeen jaa'y ñe'kx t'ijxy, midits idø'on wyinaty yikmø'øyimp jade'ents ja t'ext sam ja nwindson'ajtim ñe'kx. ⁴⁹ Nayide'en sam adøm ya naxwiiñ tø n'agojnaxxyim ja midu'ukpi jaa'y, kuts jam tsajpjotp nayide'ents adøm nøjkx nwimbij-tyim sam ja nwindson'ajtim t'ixy.

⁵⁰ Yide'en ø migu'uk idø'on njatijy ku yø ne'kx mididi nmøøt'ajtyindip mididi xixmyøøt mididi ni'jpmøøt, kidi yø'øjip wyinaty twinguwaj'kip ja Dios ma ja amuum ja kyutujk ttanitanit ja jaa'y; mididi kataa'nip, mididi oo'kp tigøøpy, ka'ap ja pya'at'aty jøts ja xemikøjxpit ju-jky'ajtin yikmo'ot. ⁵¹ Ja'ats meets ndukmadoowampy jøts yikxon xni'awidit mididi yu'uch, mididi amaa'tsk ejtp, mididi ka' pøn nugo aja'wi tñijawi: Ka'ap adøm niduki'iyi ja o'jkin nbaajtindit; ja'ayi ku tyumdigatst ja ne'kx ku nøjkx ja nwindson'ajtim xnimi'iñim, ⁵² widsukin idø'on ja tyunit, ku ja puxuujx jadigojkyi yjaak'ukyikmadoonit. Winets idø'on ja oo'kpi yjujkyøøktit jadigojk møøt ja ñe'kx mididi xemikøjxpy myijjuky'attip; pønts wyinaty ju-jky'ajtipnim ja'ats ja ñe'kx tigatstip. ⁵³ Kuwanixi dø'on tyigatst yø ne'kx mididi adøm ya naxwiiñ nmøøt'aj-tyindip, mididi amøjip, mididi køjx, mididi anuu'kxip; jøts ja nyikmø'øyint mididi xemikøjxpy etp ja'agøjxpy ku ja kyakixy ni kya'amøji. Jøts adøm wyinaty nmajtstuujtyim ja ne'kx mididi oo'kp mididi tigøøpy, jøts ja nyikmø'øyint mididi nijuuni ka'oo'kp mididi xemikøjxpy ejtp. ⁵⁴ Kuts adøm idø'on wyinaty tø nmajtstuujtyim ja ne'kx mididi kajajkp, jøts wyinaty ja ne'kx tø nyikmø'øña'am mididi jajkp, jøts ku dø'on wyinaty ja ne'kx tø nmajtstuujtyim mididi oo'kp jøts wyinaty tø nyikmø'øyim mididi xemikøjxpy jujky'atp, jaanims idø'on ja Dios kyajpxy tyø'øt mididi jap jaabyety nøkyijxpy ejtp: "Tø ja o'jkin yikmimajada'aky. ⁵⁵ O'jkin, ¿ma dø'on ja mduka'to'jk? ¿Ma dø'on ja møk'ajtin tø xyikwĩngaxi'iky?" ⁵⁶ Ja pøky idø'on ja o'jkin xuk-ta'oo'kimp, jøts ja møjaa'gyutujk idø'on ja tyamøj'ajtpy mididi ka'uktunip. ⁵⁷ Ndamøja'wampts ja Dios Teety ku ja tø xyikmajadaajkyindi nwindson'ajtim Jesucristo pyudøjkingøjxpy.

⁵⁸ Jade'ents migu'uktøjk idø'on, møk jøts tu'ugyi ja mwĩnmaa'ñ xjaakpiktakøjtitt jøts ja nwindson'ajtim tyunk xjaakyikyø'øgyøjtitt; pø mñija'widipxi ku ka' nugo wyindigøydi ja mdunk mididi ja nwindson'ajtim mduktu-ujnidip.

Sa ja pudøjkin myukt

16 Ku xyikmuktitt ja piktā'aky mididi mdabudøkidip ja abiky kugajp ja migu'uk mididi tjanchja'widip ja Dios, yide'en xu'undit sam ø nayide'en tø ndukmadowdi pøn jaty jam Galacia etjotp namyujkidip. ² Kija' idø'on windomingi xpukondu'uttitt ja mijuu'ñ pøni wine'en tø mmajada'akti, jøts ja xpøkjø'øktitt a'ejxi, jøts wyinaty abaadi xyik'awejxnidi ku ø nnøjkxt. ³ Kuts øts jam wyinaty nniikxy winets ø wyinaty nguexy ja jaa'y jam Jerusalén pøni pøn mee mwi'ijxpy, jøts øts ja nøky

ja nmo'odit jøts ja møøt tyiknøjkxtitt ja pudøjkin. ⁴ Pøni paat'ajtiyip jøts ø nnøjkxt, øyts øts ja wyinaty xmøøt-nøjkxti.

Ku Pablo tñigajpxy ma jaty ja wyidetwa'añ

⁵ Kuts jam wyinaty nniikxy ma meets jam, jawyeen ø nnaxwa'añ jam Macedonia etjotp, jøtsnim øts jam Corinto wyinaty nja'aty. ⁶ Ni kyajaa øts jam yjawi ndaa'nit ma meets jam, jotmøñ øts jam nyiknaxy ja xuxpyoj jøts mee nayide'en wyinaty x'atskexy ma ø wyinaty nniikxy. ⁷ Ka' meets idø'on nugo pojinn'uknina'axwa'añ, nmøø-taa'niwyampy meets idø'on niyjeky pøni yikutujkpy ja Dios. ⁸ Yam øts Efeso kajpkøjxpy njaaktaa'niwya'añ kunim Espiritu Santo xøow tpaatt. ⁹ Øy øts idø'on may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajotmay'ooakt, pø nayi nwindson'ajtimxi yja' ja tyunk'ajtip sam øts. ¹¹ Paty idø'on ja tum jade'en xkupøktitt, jøts jade'en xpudøkiditt jøts øts øy tsuj yam xpaatt, pø n'awijxpyxi øts ja yam møøt ja myigu'uk pøn møøt wyidity.

¹² Tøts øts Apolos njanchjainuu'kxā'aky adøm ja nmigu'uk jøts ja jeexyip tmøøtniikxy ja migu'ukti pøn jaty meets m'ats'ejxwajnip, ka'ats ja ixyam inet myajada'akt; jaanim ja ñøjkxt ku y'awatsit.

Ku ja Pablo t'ukyajkni ja kajpxpoo'kxin

¹³ Wijyim mnabyikta'agiditt jøts ejtp møk ja mjanchja'win xyik'ettitt. Yaa'dyøjkin tuki'iyi xmidaniditt jøts jotmøk mnabyikta'agiditt. ¹⁴ Pøni ti jaty mdundip, tsojkingøjxpy pa'ayo'owingøjxpy ja xu'unditt.

¹⁵ Mñija'widip migu'uktøjk ku dø'on ja Estefanas møøt ja myigudøjk jawyeen tjanchja'widyi ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpudøkiditt ja jaa'y pøn ja janchja'win tmøøt'ajtip nayide'en. ¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkiditt, nayide'en xu'unditt ja jaa'y pøn jaty tundip pøn jaty pudøjkidip. ¹⁷ Tøts idø'on njanchtajotkujk'attitt ja Estefanas, ja Fortunato jøts ja Acaico ku ja ya tø y'atmenditt jøts ø tø x'atspaattitt, ja'ats øts ojtts ja pudøjkin xmo'oditt jøts meets jade'en myikudanaay. ¹⁸ Tøts idø'on ja xjanchyikjot'amøkpøktitt sam ja jam nayide'en myikjot'amøkpøjkidøø. Ngajxajkimp idø'on ja yjade'embi jaa'dyi.

¹⁹ Mdanigajxidip ja kajpxpoo'kxin ja janchja'wibi jaa'dyi pøn kugajp'ajttitt Asia etjotp. Mjanchkajpxpoo'kxidip ja Aquila jøts ja Priscila, jøts nayide'en niduki'iyi ja jaa'dyi mididi xuminamyujkidip ja' tyøjkjotptitt, pøn nayide'en tø tjanchjawiditt ja Dios sam meets. ²⁰ Nayide'ents mgajpxpøø'kxyidi pøn jaty yam tø tjanchjawiditt ja Dios. Nagyajpxpoo'kxiditt niduki'iyi xem yam sam ja Dios ttsøky'aty.

²¹ Pøn idø'øñ Pablo'ajtp, øts idø'øñ kø'øm njaapy
ya'at nøky jøts ndanigaxidi ya'atpi kajpxpoo'kxin.

²² Pøni ka' pøn tkupiky jøts tkatsøky ja nwind-
søn'ajtim Jesucristo, wan wyinaty kø'øm ttani'ixy. ¡Win-
gonip ja nwindson'ajtim!

²³ Mmo'ojidip ja nwindson'ajtim ja kyunuu'kxin.

²⁴ Meets niduki'iyi ndanigajxtip ja tsojkin ja pa'ay-
o'owin Cristo Jesús køjxp. Jade'en idø'øñ ja yjatt.

2 CORINTIOS

Ku ja Pablo tnijayi ja janchja'wibi pøn jam Corinto

1 Øts idø'øn Pablo'ajtp. Tø øts ja Dios Teety xamid-søky jøts ø ngudanit ja Jesucristo. Jøts nayide'en ja Timoteo midi øts møøt yā'at nøky njā'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip. ² Paaṭti kupøjkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Sā Pablo y'ayo'ombaajty

³ Tkajxajkyindi ja Dios midi tyeety'ajtpy ja nwindson'ajtim Jesucristo, jabi jade'enxi dø'øn ja tyeety'ajtin tyiknigaxi'iky ku adøm x'ayo'ijxyindi, niyuuni xka'ixmajchindi, ejtp xkajpxjot'amøjkandi Dios'ajtingøjxp. ⁴ Ja'agøjxp ja Dios xkajpxjot'amøjkandi pøni sā jaty nidu'uk nidu'uk n'ayo'ombaajtyindi jøts jade'en nni-jā'wandit sudso dø'øn ja nmigu'uk nayide'en ngajpxjot'amøjkimyandit sam ja Dios tø xpudøjkandi. ⁵ Nayide'en sam adøm kajaa ngu'ayo'ombaajta'andi ja Cristo yja', kajats ja nayide'en ja jot'amøkpøjkin xmø'øyim. ⁶ İxyamts øøts nyikjemduñ ja'agøjxp ku meets ndukmadøy ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'øy'ajtingøjxp øøts idø'øn jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaṭti. ⁷ Njantyimyjøp'ijxy'ajtpy øøts idø'øn jøts meets nayide'en ja Dios myikjotkujk'atyiidit sam øøts, øy idø'øn nayide'en mja'ayo'ombaṭti. ⁸ Meets migu'uktøjkti, jade'en øøts ndsøky jøts meets waani x'ext xnijawit sā øøts idø'øn jam ja ayo'on nyiknajxy Asia. Yikxon øøts møk ja ayo'on jam n'ijxy, niti awejxin niti jøp'ejxin øø wyinaty nga'ukmøøt'ajtni, niti majadaajkints øøts, ja o'jkin yjøp'am øøts wyinaty. ⁹ Jade'ents øøts idø'øn ojts jam nnayjāwiyi sam ja jāa'dyi pøn ja xyøøw tø yiktanimacho'owifñi jøts ja o'jkin tpaṭtit. Øyts idø'øn ja ne'egi ku jade'en yjajty, jabi jaanımxi øts ja Dios idø'øn tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en njā'gyujkiyifñi ku adøm niti kø'øm xkama'ayim. ¹⁰ Ja' øøts idø'øn x'axajtuk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwā'añim. ¹¹ Nayide'en meets idø'øn ja mdsapkaaky tyumi ja'agøjxpts adøm idø'øn ni'amuki ngajxajkindit ja Dios jøts øøts ja pudøjkin xmøy'ett.

Tigøjxp idø'øn ja Pablo ojts kyanijky Corinto

¹² Ja'agøjxp øøts n'aaw njojt yjotkujk'aty ku øøts nnijawi ku øøts o madsøø øy tsuj tø nyiknaxy ja ndsinā'yin, niti tāay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'øn øøts ja ndsinā'yin øy tø nyiknaxy. ¹³ Jøts nayide'en ja nøky midi meets tø ndanigaxi, niti tāay ja tkamøøt'aty, mibøkøxti ja'. ¹⁴ N'awijxy'ajtpy øøts ku meets ja njāa'y'ajtin xkupøjkit tuki'iyi sam ixja waani tø xkupøk'okwā'añdi, jøts jade'en nnadyajotkujk'ajtandit nixem niyam ku wyinaty myeni jadigojk ja nwindson'ajtim Jesucristo. ¹⁵ Ja'ayi ndamøj'ajtpy ku meets idø'øn tø xkupøjknī, jøts ø nwā'añ ku meets majtsk ojk n'ats'ejxwā'añ jøts jade'en n'atsyikjotkujk'attit. ¹⁶ Ja'agøjxpts ndanibik-tāajkiyifñi jøts ku øts yā nmiñ Macedonia, myijawyeen meets n'uk'ext jøts jadigojk ku nwimbejtnt. Wanik meets xpudøkit jøts øøts njā'tt jam Judea. ¹⁷ ¿Ka'ap øts idø'øn ja ndejint yikxon ndyimdyanibiktaajkiyifñi ku øts øjts jam nga'uknøjkxni? ¿Sā tø mwā'añdi, jade'en øts idø'øn xijy sam muum ja jāa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni? ¹⁸ Pø ka'axi. Wā'aṭs ja Dios tnijawi ku ka'ap øts jade'en nugo ndāay'aty. ¹⁹ Jabi ka'axi ja Dios U'nk Jesucristo tyāay'aty midi øøts ja yja' ngajpxwā'kxøø møøt Silvano jøts Timoteo, mā meets jam. Pyadunguijxy ja y'ayuu-jk ja', ²⁰ jøts ja' tuki'iyi tmidanaagyøjxp pøni ti jaty ja Dios Teety ñi'adso'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyjā'wa'am ja myøj'ajtin jøts nwā'añim janchtiigyajpxy idø'øn yø', nwindson'ajtim Jesucristo køjxp. ²¹ Nayi Dios Teetyxi adøm idø'øn xukmøøt'ejtindip ja Cristo jøts øøts ja tø xjibiky jøts øøts ja jade'en ngajpxwā'kxit ja yja'. ²² Tø nayide'en ja Espiritu Santo xmø'øyim midi ejxpajt'ajtp ku adøm ja xja'ajtyim, jøts jade'en nnija'windit ku xmøy'ukwā'añindi ja jujky'ajtin midi xemikøjxp'etp. ²³ Nija'widyaapy ja Dios ku meets nga'uknøjkxni jade'engøjxp ku meets ka' nyikjotmay'ooktøkiwya'añ ku møk nwindson'ødyit. Pøni ka'ats yjanchjade'eni, pø jats øts idø'øn ja Dios kø'øm xiidyu'unt. ²⁴ Ku meets wyinaty nninijky, ja xondaajkin ja øy'ajtin meets ndaninøjkxwampy. Ka'ap meets nda'aguwanıwya'añ ja janchja'win pø møkxi meets ja xmøøt'ajtni. **2** Jabi ja'agøjxpxi meets idø'øn tø nga'uknøjkxni ku meets nugo n'atsyikjotmay'ooktøkit. ² Ja ku meets n'atsyikjotmadyøkit, ¿pønts øts idø'øn ndajotku-

jk'atp? ¿Kidi meedsip? Yamts meets wyinaty kə'əm tə nyikjotmadyəki. ³ Patyxi meets tə nnijayi jawyeen jəts jam tuki'iyi xyik'əyidit xyikpaadidit ku əts jam wyinaty njə'aty jəts meets xaxonda'akt. Jabi jade'enxi nwa'añ ku mee mxondaqmit ku meets x'ext jəts ku əts jotkujk. ⁴ Ku meets ja'abi nəky ndanija'yiyi'ñ, janchjotmay'oo'kp əts wyinaty, ja yə'axyi ja ji'iyi əts idə'on wyinaty xmimajadaq ku meets yjawi ja jaa'y myikwin-maa'nmya'atwə'añidi jəts ə xkagupəktit. Ka' meets nayide'en nyikjotmay'ookwə'añ, ja'axi əts idə'on nanky'ejxwajnip mabaat meets idə'on ndsəky nba'ayəy, patyxi meets idə'on ngajpxwijy.

Jade'en pyaət'aty jəts yikmaa'kxukt pən tə tyundigəy

⁵ Ja jaa'yu'nk pən əts idə'on tə x'ukyikjotmadyəki ka'ap əts ja nadyu'uk tə xyik'ayəy jabi nixem niyamxi meets idə'on ndejint winaggin tə mbaajtmiyidi nay-ja'abi jotmay. Ka'ap ə nwa'añ ku nijum. ⁶ Ka'ap əts ja mək n'ukwindsə'əwyan pən idə'on tə tyundigəy. Jabi təxi meets ja nijum ne'egi kə'əm xkastigiməəñi. ⁷ Jade'en idə'on ne'egi pyaət'aty jəts meets ja xmaa'kxujknit, kajpxjot'aməkidi, ja kuts ja jotmay myimajadakniyit jəts jade'en ja chinaa'yin tyikwindigəəñi. ⁸ Paty meets ixyam ja may'ajt n'amidəy jəts jadigojk ja tsojkin ja pa'ayo'owin xmo'odit. ⁹ Tə meets ya'atpi kajpxy yə'atpi ayuujk jawyeen ndanijayi ja'agəjxp jəts ə n'ext nnijawit pəni xjanch'ukpaduujnidip əts idə'on ja ngutujk. ¹⁰ Paty xnijawidit, pəni pən meets mmee'kxpy, nayide'ents əts ja maa'kxin ja nməəmyi. Pəni tə əts idə'on tigati nmee'kxy, ja'agəjxpts əts jade'en tə nduñ ku mee n'ayo'ixy, y'ijxpy ñija'wip ja Cristo. ¹¹ Jəts jade'en o tigati tkadamə'att ja miku'windsən Satanás, jabi nnija'wampxi adəm wə'əts ku ja o tigati tamibəki tam'ejxi.

Ku ja Pablo ttajotmay'əəky ja Tito jam Troas

¹² Ku njə'jty jam Troas jam kajpjotp, nugo əts ndunk jam tyimy'ity əy mədsoo jəts əts ja Cristo yja' ngajpxwə'kxit. ¹³ Yamts əts wyinaty tə njə'uktund-soo'mi, kumi ka'ats əts əy njotkujk'aty ja'agəjxp ku əts ja Tito jam ngapaajty, adəm ja nmigu'uk, patyts əts jam əjts ndso'ongojmi jəts əts ojts nnəjxni jam Macedonia.

Ku ja Cristo məət nmajadaq'ijtyindi

¹⁴ Nməja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi məət ja Cristo, jəts ja kyajpxy jəts ja y'ayuujk ja xukajpxwə'kxyim əy magama. ¹⁵ Y'əyja'wip chujə'wip ja Dios Teety pən ja Cristo məət y'ity jəts ja yja' tkajpxwə'kxi. ¹⁶ Əy ja magama ja y'ixpəjkin wyidity jam muum tkamibəkti, o'jkin tigə'əyin ja yiktatiiduyundip. Jəts muum tjanchjawidi, ja'ats ja tyajujky'attip xemikəjxp. ¿Pənts idə'on yə'əbi tunk nugo niyəjxk tyimy'ukniyajtp? ¹⁷ Jabi ka'axi əts ja nugo ndameembyiky ku əts ja Dios kyajpxy ngajpxwə'kxi sam muum y'adə'ətsti, uk ka'baat ka'pxy tnigajpxti tum wimbet ja tnimadyə'akti. Ka'ats əts

jade'en n'adi'ich, tiy janch əts ja nnigajpxy pə təxi əts Dios kə'əm xkəxy jəts əts kyajpxy ja ngajpxwə'kxit Cristo pyudəjkingəjxp əy mədsoo jam Dios wyingujkp.

Ku ja Dios ja chojkin ja pya'ayo'owin jadigojk tyikt-so'ondaajky Jesucristo kəjxp

³ ¿Sə meets idə'on yə xja'gyuki ku əts jade'en nwa'añ? ¿Kə'əm əts idə'on xiyi nnagyajxa'ak-wə'añi sam ja muum mə ttundi pən ja ixpəjkin wenk tyajktip? ¿Ja ejxpajtin əts idə'on kuwani ndyimyəət'atp jəts meets yə n'ixpəjkin xmibəkit? ² Ka' yjade'eni, jabi meetsxi myiknigaxi'kpy pəni sə əts idə'on ja ndunkjəəjp y'əyi. Jade'en ja ñigaxi'iky ku meets ja Dios yja' tə xmibəki jəts əy ja pən t'ext tnijawit sə də'on ja mdsinaa'yin tə tyigatsti. ³ Kə'əmxixi ja Cristo jade'en tə mdanibiktaəgiyidi jəts m'ejxpajt'attit jəts əts ja ndunk jade'en wyingaxi'iky. Jabi Diosxi də'on kə'əm ja y'E-spiritu Santo tə tyaky jəts ja y'ejxpajt'att ja'agəjxpts ja' kyakudigəy. Jawaani məj ja', midi anmija'winjotp ja Dios pyiktakpy jəts ka'ap ne'egi ja jawyeembi kutujk midi Moisés kyəxjaəy tsaəəjxp.

⁴ Sa jaty əə nwa'añ tiy yə' janch yə', wə'əts əts nni-jawi jəts ku əts ja Dios Teety pyudəjkin amuum xmə'əy Cristo kəjxp. ⁵ Ka'ap əts kə'əm nnankmyajada'əgiyi, ja Dios wyingujkpxi də'on chəəñ ja mək'ajtın jəts əts ja əybi ndu'unt. ⁶ Jaa ku əts ja jexyip tə xkamə'əy ja mək'ajtın sudsəts əts idə'on jexyip nnigajpxy sə ja Dios chojkin ja pya'ayo'owin jadigojk tnanky'ijxyi sə ja naxwii'ñit jaa'y ñitso'ok'attit. Ka'ap ja tsinaa'yin yikpaaty ku nbadungəjxint tuki'iyi ja Moisés kyutujk, ja Espiritu Santoxi də'on tnanky'ejxip ja əgyajpxy ja əmyadyə'əky sudso yikpaaty ja jujky'ajtın xemikəjxp. Ja o'jkin tigə'əyin pyatpy ja anmija'win ku ja Moisés kyutujk ngabadungəjxint yam ja Espiritu Santo yja' tyumyikujky'aty.

⁷ Jade'en idə'on ja Moisés kyutujk ja myə'ajtın kyaxi'iky midi tsaəəjxp yikjaəy ku jaaju'uk agujkp yikməəy, janch təə'kxp tsaməmp idə'on ja wyeeen y'əəw. Jəts janch win'oo'ktip idə'on ja myigugəjp israelit jaa'y ku ja yjayik'ejxwə'añ. Waani də'on ja y'aju'uk məj y'atskaxi'iky, pojın ja ñaxkojmi. Səts idə'on ja janchtyiməy y'atsmiñ ja'abi kutujk midi anmija'win ja o'jkin tyukupiky'ajtpy. ⁸ Kuts ja əgyajpxy ja əmyadyə'əky ka'ap ja tmi'abaaty, pə ka'axi ja winmaa'ñ myajada'əky mabaat ja yja'aty ja myə'ajtın ja y'əy'ajtın midi ja Espiritu Santo xuk'ejximp xuknija'wimp. ⁹ Səts idə'on ja kutujk janch məj, yam ja tjayikudigəy ja anmija'win, isudsəts idə'on ja Dios y'əgyajpxy y'əmyadyə'əky jawaani kyidyimy'ukməjit midi adəm ja xagupəjkimp! ¹⁰ Jabi ka'axi ja Moisés kyutujk məət ñabyaadyi ja Dios y'əgyajpxy. ¹¹ Əyi də'on ja kutujk məj tə yjamiñ ka'ap ja Dios y'əgyajpxy ja twinaxi midi ejtp xemikəjxp.

¹² Ja'agəjxp əts ja njəp'ijxy'aty, paty əts agujk jotkujk ja Dios yja' nnigajpxiyi, ¹³ jəts ka'ap y'ukpaət'ajtniyi jəts əts ndu'unt nayide'en sam ja Moisés ttuuñ ku ja y'ijty ñawyinjuuxyiyi jəts jade'en ja myigugəjp tka'ejxtit ku ja y'aju'uk tuda'əky tyigəəñi. ¹⁴ Ja is-

raelit jaa'y ka'ap ja tja'gyukidi tigøjxp idø'n ja Dios ttanibiktaagi ja kutujk midi ja Moisés yikmøøy. Ni ixyambaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit. ¹⁵ Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit. ¹⁶ Kuuyidsik øy pøngapø'n tkupøktit ja nwindson'ajtim Jesucristo jatyits ja pyøky ja ñiwa'ad-sidit jøts ja wa'ats tuki'iyi tja'gyukigyøxtit. ¹⁷ Ja nwindson'ajtimxi tmøøt'ajtp ja jujky'ajtin jøts ja ja'gyukin, pønts ja nwindson'ajtim tjanchja'widip ka'ap ja Moisés kyutujk ja y'ukmimajada'kniiyidit, ni kya'ukjujky'ajtnidit ja pøky agujkpy. ¹⁸ Paty adø'm ja ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajtindit ja y'øy'ajtin ja myøj'ajtin, nay ja'ats nanky'ejxamp xjats adø'm jade'en njajtnant sam ja nwindson'ajtim. Yjujky'ajtingøjxp idø'n ja jade'en xpudøjka'am.

4 Paty øøts idø'n ni juuni ngadawindsuun ja ndunkjøjpx midi øøts ja Dios y'øy'ajtingøjxp tø xanibiktaagi. ² Jagam jixkø'øm øøts idø'n nbikta'aky midi amaa'tsk midi tsø'ødyuñim yiktump. Ka'ap øøts n'ijxy ngøøy jøts o pøngapø'n nwindaa'y'att. Ni ja Dios øøts ja y'ayuujk ngakajpxma'jti. Ja tyiiby'i ja yjanchpi øøts idø'n ja'ayi nnigajpxpy, jøts jade'en nipøn jaa'y kyawa'ant jam Dios wyingujkp ku øøts n'ayuujk kyatiyi. ³ Ku jaa winaa'gindi pøn tkaja'gyukidip ja nitsoojkin ayuujk midi øø ngajpxwa'kxpy, ja kyudigø'øyin idø'n ja kø'øm y'ixaawyandip. ⁴ Ku ja wyinaty kø'øm tka-janchjawidi, ja miku'windsønts idø'n ja tø yikwinajp-niyidi pøn ja'ayi ya naxwiiñ ne'egi diosja'widip, jøts jade'en tkapaattit ja kudøø'kxaagi ja kujajtaagi midi jajkpy ja øgyajpxy ja ømyadya'aky ku ja Cristo y'øy'ajtin myøj'ajtin yiknimadya'aky. Ja Cristots tnanke'ejxip ja Dios Teety pøn y'agojnax'ajtpy. ⁵ Ku øøts ngajpxwa'kxy ka'ap øøts ngø'øm ja' nnigajpxy, ja Jesucristoxi øøts ja wyindsøn'ajtin ngajpxwa'kxip, jøts øøts jade'en nyikwimbejtnit ja y'øy'ajtin midi tø tyaky, ku meets nbudøki ja' chojkingøjxp. ⁶ Jabi nay ja'abi Dios Teetyxi dø'n midi ja jaj ja tøø'kx tyiktso'ondaajk, nay ja' adø'm tø xmø'øyindi ja kujajtaagi ja kudøø'kxaagi jøts n'ejxindit nnija'windit sa dø'n ja y'øy'ajtin myøji midi ja Jesucristo ñanky'ejxip.

Janchja'wingøjxp ja tsinaa'yin nyiknajxyim

⁷ Dios wyingujkp ja chøøñ ja'abi kujaj'ajtin kudøø'kx'ajtin midi niwindem xøøw tkamøøt'ajtp ja kudigø'øyin, ja' øøts nmøøt'ajtpy njujky'ajtingøjxp. Ka'ap øøts ngø'øm møk'ajtin nyiktuñ, ja Diosxi myøk'ajtin idø'n jade'en tyiknigaxø'jkp. ⁸ Øy øøts tsep agujkp aki agujkp ja njujky'ajtin yjanaxy, niwindem xøøw øøts ja nnøø' ja nduu' kya'aduky; øy øø njamay njatajy sudso øø nyiknaxt, nbatpy øøts ja winmaa'ñ sudso tyuu'baat tyuu'wetst. ⁹ Øy øø njayikjemduñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmimajada'aky. ¹⁰ Winjaa windsojk øøts ja jaa'y ja o'jkin xjadukpaatwa'añ sam ja Jesús yjajty. Nay ja'ayi

øø kø'øm xpudøjkp jøts jade'en tyiknigaxi'iky ku ja ya xemikøjxp yjujky'aty. ¹¹ Pøn jaty øøts møøt nbaduñ ja Jesús yja', nay ja'agøjxp øøts ja o'jkin jabom jabom x'i-jxy xkøy, ja'agøjxp øøts ja xka'ixmach jøts jade'en tyiknigaxø'økt ja yjujky'ajtin øøts nnikøjxp. ¹² Øy øøts ja o'jkin xumijapaatwan'ity xumijamajada'akwan'ity, ja xemikøjxpit jujky'ajtin meets ne'egi mbaajtip m'e-jxip.

¹³ Njanchja'wip øøts nayide'en ku yide'en wya'añ ja Salmos nøky: "Paty ø nnigajpxy ku njanchjawi." ¹⁴ Nni-ja'wip øøts ku ja Dios Teety tyikjujky'ijky ja Jesús, nayide'ents adø'm ja møøt xyikjujky'ijky, jøts jam nnøjkxint niduki'iyi ja' wyingujkp. ¹⁵ Midi øø tø ngu'ay-owi ja'agøjxp øøts idø'n ja ngupiky jøts meets ja øy'ajtin xpaat, mayts ja jaa'y Cristo køjxp tpaattit ja Dios kyunuu'kxin ja Dios y'øy'ajtin jøts may nayide'en pøn ttukunuu'kxyjawidip pøn ttukunuu'kxyjawidip ja Dios ja'agøjxp ku ja tkajxa'akti.

¹⁶ Ja'agøjxp øøts idø'n ngadawindsuun. Øy øøts ja nne'kx yjaga'ukmajada'kni, mowenip kajaajip øøts ja njanchja'win jabom jabom. ¹⁷ Yø ya'it ayo'on waani yø ñaxkøyy, ka'ap yø jeky tyaa'ni; jøts yø' øy'ajtin xemikøjxp ne'egi xukpaajtip mja ja Dios. ¹⁸ Jabi ka'axi yik'ixa'ay midi ya naxwiiñ yik'ejxp, ja Dios y'øy'ajtin ne'egi yik'ixaapy midi kagaxø'kp. Ja pikta'aky midi kaxø'kp myøøt'ajtpy ja' ja kudigø'øyin. Ja øy'ajtin midi kayik'ejxp ka'ap ja y'aats ja kyojpk ja kyudigøy.

5 Nnija'windip adø'm ku ja nne'kx kyudigø'øyim mi-di kajajk sam tu'uk ja tøjky kyudigøy naxwiiñ, jap adø'm ja Dios tø xadanibiktaajkindi tu'uk ja tsi-naadyaajk tsajpøtpy. Etp ja xemikøjxp, jabi kidi naxwi-i'ñit jaa'yipxi ja tø tyik'øyi. ² Janch jade'en idø'n yjaty ku adø'm nne'kx ja yjujky'ajtin tyiknaxy ya, ka'ap adø'm n'øyja'wam, winjaa windsojk adø'm nnøjkxwa'añim mja ja tsinaadyaajk ja Dios tø xadanibiktaajka'am, ³ mja adø'm n'anmija'win yiknitanaa'yim. ⁴ Yø ne'kx midi nmijujky'ajtyindip ya naxwiiñ ka'ap yø øy ti xuk'øy-ja'wam, jøts yiktsojpk ja tsinaadyaajk midi ja Dios tø xanibiktaajkindi, yjagayikwa'añ ja o'jkin. Yø naxwii'ñit tsinaa'yin adø'm idø'n njadayiktigatswa'añimp ja jem-chinaa'yin. ⁵ Ja Dios idø'n kø'øm tø xanibiktaajkindi jøts tø xuktatøjkindi ja Espiritu Santo midi ejxpaj'ajtp ku adø'm ja nyikmø'øyindit midi ja yik'awijxpy.

⁶ Jade'ents adø'm idø'n ndajotkujky'ajtint, jøts nni-ja'windip ku ya yø nne'kx nmijujky'ajtyindinim ka'ap adø'm ja tsinaadyaajk nbaajtyindinim. Ka'anim adø'm idø'n ndyimyja'atyim mja dø'n ja nwindson'ajtim jam. ⁷ Janchja'wingøjxp adø'm idø'n nmøøt'ajtindit ja jøp'ejxin øy ja njaga'ijxyindi. ⁸ Ka'ap ja o'jkin tigø'øyin ndsø'jkandit. Jotkujk idø'n adø'm njøp'ejxindit ja o'jkin ku wyinaty xpaat'ajtyindi jøts nnøjkxindit jap mja ja nwindson'ajtim møøt n'ejtint. ⁹ Paty adø'm idø'n øy madsoo nwindso'jka'ant ja nwindson'ajtim wan ne'kxkøjxp wan anmija'wingøjxp. ¹⁰ Jabi kuwanixi ja Cristo tyiidyu'unt jøts jade'en nyikmø'øyindit midi xpaat'ajtyindip nidu'uk nidu'uk pøni sa wyinaty ja njujky'ajtin ya tø nyiknajxyindi.

Ja kajpxy ja madya'aky midi ñigajpxy sa jadigojk mөөт nnamyajyint ja Dios

¹¹ Ja'agөjpx ku өө nnijawi sa ja nwindson'ajtim yik-mөjawit yikunuu'kxyjawit y'өy'ajtingөjpx paty өөts ja jaa'y ndukja'gyukiwyanguixy ku өөts tiy janch ja kya-jpxy ja y'ayuujk nnigajpxiyi. Ñija'wip ja Dios sa өөts ja njaa'y'aty, njөp'ijpxy өөts jөts meets nayide'en xja'-gyukit. ¹² Ka'ap өө kө'өm nnay'agajpxyiyi, ja ja'-gyukinxi meets idө'өн ndukmөөt'atwampy jөts jotkuk mnayjawiyidit ku meets ngawindaayi. Jөts jade'en agujk jotkujk x'adsojimbettit ja jaa'y pөн y'anmija'win yjamөөt'ajtpy. ¹³ Pөni nugo өөts ndyimgyajpxy pөni nugo өөts ndyimy'ad'i'ich, Dios ja tu'ugyi tñija'wip; pөni өyts, pөni tiyts, pөni ka'px өө nnigajpxy ja yja', meets ja mda'өy'atp. ¹⁴ Ja Cristo chojkingөjpx pya'ay-o'owingөjpx өөts idө'өн ja ndunk ngamajstst'uty jaa ku өөts ndyimyjanchjawi ku niduki'iyi tө xku'o'jkindi jөts ka' n'uknijuky'ajtna'ant ja pөky. ¹⁵ Paty ja Cristo tө xku'o'jkindi jөts pөн jujky'ajttip ka'ap ja kө'өm t'ukөjө'өmit'ajtni ja chinaa'yin, ja Cristo ja ñijuky'ajtnidip pөн ja ojts kyujky'ajtyidi jadigojk. ¹⁶ Paty өөts jade'en nga'uk'abaxni pөni sa nidu'uk nidu'uk ja chinaa'yin tyiknaxy; Cristo paat өөts y'ijty n'abexy midi өө nga'өyja'wip ja yja', ixyam ka'ap өөts ja'abi winmaa'ñ n'ukyiktuni. ¹⁷ Jade'ents idө'өн, pөн ja Cristo mөөt y'ity, jemyjaa'y ja'; ja tigөy winmaa'ñ midi y'ijty nmөөt'ajtyindip ka'ap ja y'uktuni, tum ja yjembyi dө'өн tө nbabөjknandi. ¹⁸ Kyө'өmdunkjөөjp ja Dios Teety jade'en tyumpy Cristo көjpx jөts ja mөөt nnamyaja'ant. Jөts өөts ja ndunk tө xmө'өy ku niduki'iyi ja jaa'y ja Dios mөөt ñamyaa'ñiyit. ¹⁹ Yide'en idө'өн nbiktaajkint, ja Cristo көjpx idө'өн ja Dios Teety niduki'iyi ja naxwii'ñit jaa'y mөөt ñamyaa'wya'aniyi. Ka'ap ja pөky tmөjpiкта'aky. Jөts өөts xanipijky ya'atpi өy'ajtin. ²⁰ Paty meets xnijawit ku өөts ja Cristo xyikugajpxy'aty, sam idө'өн ja Dios Teety kө'өm jeexyip meets mminuu'kxa'agyyi. Paty өөts idө'өн yide'en n'ane'emy ku meets idө'өн ja Dios ja mdsojkin xmөө-gyөxt. ²¹ Niti pөky idө'өн ja Cristo tkamөөt'ajty xjats ja Dios Teety tymñayide'en ja ttuun sam ja mөj pөkyjaa'y yiktuñim, jөts nyikupөjkindit sam ja Dios Teety ttsөky ku ja Cristo mөөt n'ejtint.

6 Jade'ents migu'uktөjk idө'өndi, niduki'iyi niwine'en adөm ndunk'ajtyindi ja Dios yja', n'amidөөpy meets jөts kidi nugo ja Dios y'өy'ajtin xyikwindigөjyidi midi ja tө mduk'ijxyidi midi ja tө mdukni-jawiyidi. ² Jabi jade'enxi ja kөөm wya'añ ñөkyijpxy: Ku ja xөөw ja jumөjt tpaajty nmadoow өts ja mji'iyin ja myajxin; jөts ku ja yiknitso'ok'ajtin tpaajty winets me nbudөjkiyii'ñ. Ixyam idө'өн ja mxөөw ja mjumөjt tө yja'tni jөts ja myiknitso'ok'ajtin tө tpatni.

³ Өy өөts idө'өн ja ndsinaa'yin nyiknaxy jөts өөts jade'en ja ndunkjөөjp nipөн xkada'abaxt. ⁴ Jade'enxi өөts idө'өн ne'egi nyiknigaxө'өkwa'añ ku өөts ja Dios nmiduñ, tud'a'aky өөts ngupiky'aty tuki'iyi ja ayo'on;

⁵ tө өө nyiktsumy nyikwөpy; tө өөts ja jaa'y namay xamuky, mөk өөts ja ndunk nyiknaxy kunim өөts ngө'ndeky kya'ukmajada'kni; kawinaak tsuu өөts tө nga-maa'y tө nga'ity, ayuu өөts kawinaak xөөw tө nyiknaxy. ⁶ Njuky'ajtingөjpx өөts nyiknigaxi'iky ku өөts ja Dios nmiduñ. Jөts jade'en kyaxi'iky ku өөts ja Dios y'ix-pөjkin ka'pxy nnija'wiyi jөts өөts nduda'akyjaa'y'aty. Tө өөts n'өyjaa'y'aty jөts tө өөts ja Espiritu Santo yja' nyiknigaxө'kmi jөts nayide'en өөts ja tsojkin ja pa'ay-o'owin өy pөngapөн tө nmө'өy. ⁷ Ja tiy'ajtin ja janch'ajtin өөts tө nmөөt'aty, jөts ejtp өөts ja Dios ja myөk'ajtin xa'agө'duky xa'axajtuky. Ja ödyu'unin ja tiidyu'unin өөts tө nyiktuñ ku өөts ja Dios yja' tө nyikyө'өyi jөts ku өөts ja y'ayuujk nnitanaa'miyyi. ⁸ Ju-unjaty өө nyikajxa'aky jөts nay jaayi өөts nyikpagajpxy. Өy өөts jaayi n'ukyiknimadya'aky jөts nay jaayi өөts wenk n'ukyiknimadya'aknimi. Ja өөts juunjaty nyiknөjmi ku өөts nugo ndaayi jөts nay jaayi wyangojmidit kuk өөts ja y'өybi tyiiby nngajpxy. ⁹ Juunjaty өөts ngayik'e-jxkapy jөts nay jaayi өөts nyik'ejxkapi; ja өөts ja jaa'y juunjaty ja o'jkin xukpaatwa'añ, jajuky'ajtp өөts idө'өн jade'en. Yikastigimөөpy өөts, ka'ap өө n'өөky. ¹⁰ Өy өөts njamay njatajy, xondaqk өө nnayjawiyi; ayoobi jaa'y өөts, ja өy'ajtints өөts nyajkpy; өy өөts niti njagamөөdi, jade'en өө nnayjawiyi ejximdam өөts jexyip tuki'iyi ndyimyөөt'ajtkөjxn.

¹¹ Meets migu'uktөjkti, tiy'ajtingөjpx meets tө ndamigajpxy; tuki'iyi meets ja ndsojkin ja nba'ayo'owin tө ndamay'aty. ¹² Өyimik idө'өн wine'enin ngondukt nbөktukt өts ja ndsojkin өts ja nba'ayo'owin. Meets idө'өн jade'en yjawi ne'egi mdumpy. ¹³ Sam ja u'nk-teety ja myajnk tmigajpxy nayide'en meets nmi-gajpxwami ku ja mdsojkin ku ja mba'ayo'owin niwine'en xka'am'a'at'attit. Tundi nayide'en waani sam өts tө nnajstuni.

Adөm nikөjpx ja Dios yjuky'ajtyim

¹⁴ Kidi mjuky'ajtin xyiknaxti mөөt pөн tkajanch-jawidip ja Dios, jabi nijuunixi kyanamyayidit ja tiidyu'unin mөөt ja tundigө'өyin, sam ja kudөө'kx'ajtin mөөt ja kugoots'ajtin. ¹⁵ ¿Sudso dө'өн ja Cristo yja' mөөt ñamyayidit ja miku' yja'? ¿Uk sudso ja janch-jawibi jaa'y mөөt ñamyigu'ukwa'aniyt pөн midsep-wajniyip? ¹⁶ Ka'ap ja yjuky'ajtin tyiknaxti tu'ugyi ja Dios Teety mөөt ja dios midi kө'өm yiktsajstip. Ka'ap adөm njade'enindi jabi kө'өmxi Dios wyinaa'ñ yide'en:

Pөni ma ja chөөнidi jam өts ja nmөөtjuky'attit, jөts pөni midi ja ñөjkxtip ejtp өts ja njamyөөt'attit; өts ja xdios'attip, jөts өts njaa'y ja'adi.

¹⁷ Paty ja yide'en yjaakwaañ:

Nanky'abikyidi,
kidi ja kya'өybi xyiktundi;
jөts jade'en ngupөktit,

¹⁸ өts meets xteety'atp, jөts өts meets n'u'nk'atp, jade'en idө'өн wya'añ ja Dios Teety.

7 Jade'ents meets migu'uktөjk idө'өн xnijawidit ku ya'at өy'ajtin ja Dios tө tyiktañ. Ja'agөjpx adөm

idø'øn øy tsuj njujky'ajtint, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'øn ja Dios ndamiyojxint ja njujky'ajtin.

Sa ja Corinti jaa'y tyiktigatsti ja wyinmaa'n

² Jja'gyukidik øts ndsojkin nba'ayo'owin! Jabi ka'axi meets niti windigø'øyin tø xkapaatsti øøts køjxp. Nipøn øø ngawindaay'aty, nipøn øø ngana'ixy. ³ Kidi meets ya'at xja'gyuki ku meets nugo nbøkñipiky, jabi jade'enxi tø nwa'añ jawyeen ku meets ja ndsojkin ja nba'ayo'owin tø ndamiøxy, jade'en ja tpatni møøt mee ñamyayi njujky'aty jøts møøt mee ñamyayi n'ookt. ⁴ Njøp'ixy'ajtpy meets jøts amuum mee ndajotkujk'aty. Øy øøts idø'øn n'ayo'ombaaty janch jotkujk ø nnayjawi.

⁵ Ja'ayip øø nja'jty ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'añ jøts øøts ja tsø'øgi nyikmajada'akwa'añ.

⁶ Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty. ⁷ Kidi ja'ayip øø nugo ndyimyajotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mni-madya'akyiyi mjantyaxondajkip meets ja'. Jade'en øøts ja xamimadya'aky ku meets xjapaatwa'añ xja'ejxwa'añ jøts nayide'en tnigajpxmi ku meets xajotmay'øøky. Jotkujk øts idø'øn nnayjawi ku meets xja'myech.

⁸ Øy ja nøky tø mja'atsyikjotmaadyøkiyidi midi meets øjts ndaniguexy, ka' øts ja ixyam sa n'ukja'wiñi. Njanch'ayoyii'ñimts øts idø'øn ja jawyeen, ku øts n'ixy ku øts nnijawi ku meets ja nøky yikxon ja jotmay tø mdukatøkiyidi tøts idø'øn ja jade'en y'ukjajtkøjy sa n'ukjatka'am. ⁹ Jotkujk øts ixyam nnayjawi jøts kidi ja'ajip øts ndajotkujk'ajtpy ku meets ja jotmay møk'ampy tø m'atspaadyiyi, jabi ja'axi ø ndajotkujk'ajtpy ku meets ja mdsinaay'in tø xyiktigach sam idø'øn pyaat'aty. Tøxi dø'øn xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ay-onip meets ja mdupaatwajniyip. ¹⁰ Ja ayo'on midi tudā'aky yikupøjkp sam ja Dios ttsøky'aty, yiktigachp ja tsinaay'in ja' jøts jade'en yikpaaty ja yiknitso'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi. ¹¹ Øy meets ja ngajpxy tø m'atsyikjotmaadyøkiyidi, tudā'aky meets ja tø xkupiky sam ja Dios ttsøky'aty. ¡Ejxtits inet ku ja mdsinaay'in ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jatyi tø xnigajpxti ti dø'øn tø xundi; tø m'atsyikjotmaadyidi, tøts nayide'en xtsaachjawidi. Winets meets jatyi xjadyimyigajpxwa'añ jøts nayide'en xiidyunwamididi pøni pøn idø'øn tø mmi-undigøydi. Ja' meets idø'øn myiknigaxi'kpy ku meets tø mgatundigøy. ¹² Ja'agøjxp meets jade'en tø nnijayi ku meets ejtp nja'myech jøts kidi ja'agøjxp øts ja nøky tø nguexy ku øts ja'ayi ngajpxwejwa'añ pøn tø tyundigøy uk pøn tø yikmidundigøy. Pø ja'agøjpxi mee nnijayi jøts ja Dios xuknijawidit mabaat ja mba'ay-

o'owin myajada'akti ku øø xpa'ayøy. ¹³ Paty øøts jotkujk nnayjawi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpudøki jøts ja jotkujk tyiknaxt.

¹⁴ Ka'ap ø nugo tø nwindaa'yi ja Tito ku meets øy tø mjaay'aty samdam øts ja jawyeen ndamimadyaajky. Ka'ap øts ja n'ayuujk nugo tø xyiktsø'dyuñ, tiy ja tø pyidsimy. ¹⁵ Jabi mdsøjkpxi meets ja ne'egi ixyam jawaani møj ku meets ja tuki'iyi tø xpadunguixy pøni ti jam mda'ana'amiyidip, jøts ku meets ja øy tudā'aky tø xwindsø'øgi. ¹⁶ Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'-gyukiyidi.

Ku ja Pablo pudøjkin t'amidøy jøts yiktabudøkidit ja ay-oobi jaa'dyi

⁸ Ixyam meets migu'uktøjk nduknijawiwya'andi mabaat idø'øn ja Dios y'øy'ajtin tø pyudøkiyidi ja Macedoniit janchja'wibidi. ² Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakojti ja pudøjkin jade'en samdam ja møj kumeeñ jaa'dyi. ³ Tø ndyimy'ixy tø ndyimñijawi mabaat idø'øn tø tyakti ja pudøjkin øy ja niti yjaga'uktā'nxiniyidi.

⁴ Møk øøts ja tø x'amidøy, tyimdyanuu'kxaktip idø'øn jøts pyudøjkin ja yikupøktit midi yiktabudøkiwyandip ja jaa'y midi nayide'en tjanchja'widip ja Dios. ⁵ Jinaxy idø'øn ja ne'egi tø ttundi yam øts ja jade'en ngajøp'ixy'aty, jabi jawyeenxi ja Dios ñadyamiyojxiyidi jøtsnim øøts ja xpaduñ samdam idø'øn ja Dios ttanibiktaagi. ⁶ Ja'agøjxp øøts idø'øn ja Tito ndaguwani jøts pudøjkin ja jam tjaa'yikmukojt midi mee kø'øm mdsøjkingøjxp myakwampy midi ja jam tø t'ukyikmuktsøøñ. ⁷ Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjati wa'ats xnijawidi, jøts møk mee xtsøky møk mee xpa'ayøy niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

⁸ Ka' meets ya'at ndyimyaguwani, ja' øøts idø'øn nanky'ejxwajniip sa dø'øn ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsøjkin ja mba'ayo'owin tyiyi yjanchi. ⁹ Mni-ja'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsojkin møk ja pa'ayo'owin tmøøt'aty ku ja mguwanjatyiidi ja'agøjxp ku ja mdsøkyidi mba'ayøyidi, jabi jotkujkxi ja y'ijty tyiknaxy møøt ja Dios Teety. Adømgøjxp ñanky'ayodøjkiyi jøts ja øy'ajtin jade'en nbaajtin Cristo køjxp.

¹⁰ Meets m'øy'ajtingøjxp øts idø'øn yide'en nwa'añ ku meets junkti'jyip ja pudøjkin xyikmuk'okwa'añ janch pe'tpy janch yijy. ¹¹ Nayide'ents idø'øn ixyam xu'undit sam tø xyiktso'onda'akti. Tuki'iyi ja m'aaaw ja mjoøjt xpikta'aktit kunim ja xyik'abaadidit, pøni mabaat nidu'uk nidu'uk myajada'akti. ¹² Jabi ka'axi ja Dios tuki'iyi t'amidooguixy, ja'axi ja y'ijxy mabaat idø'øn nidu'uk nidu'uk chojkingøjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyøkiwya'andi; ¹⁴ jabi nixem niyamxi dø'on tuknax nmøøt'ajtindit ja pikta'aky. Exam meets xmøøt'aty midi yø ka'ejtxidip, ja'atp ja xøøw ja jumøjt jøts ku meets yø wyinaty mga'ejtximiyidi winets yø mmøømyiyidit. Jøts jade'en ñi'awich'att, ¹⁵ sam ja Dios kyajpxy wya'añ: "Pøn tyumøøt'ajtkijpxy ka'ap ja tø wyinda'anxiyi; jøts pønts waani tmøøt'ajtp, tuki'iyi ja tø ttaptakixy."

Tito jøts ja myigu'uktøjkti

¹⁶ Ja' øts Dios ndamøja'wip ku meets ja Tito nayide'en mba'ayøyi sam øts. ¹⁷ Tø ja tjanch'øyjawi ku meets ja ndanigaxwa'añ, tøyim ja jeexyip ttuñ køømdsojkingøjxp jabi mjanch'ejxwajnipxi meets ja'.

¹⁸ Ixyamts ja Tito møøt nguexy tu'uk adøm nmigu'ukti midi øy yiknimadyakp ma jaty ja janch-ja'wibi jaa'y ñamyukyidi, jade'en ja yiknijawi ku ja øy tiy tñigajpxy ja nitsojkin ayuujk pøni ma jaty ja tø wyidity. ¹⁹ Køømyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt njaakyik-mukojt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'øgit jøts jade'en meets xyiknigaxø'økt ja mdsojkin ja mba'ay-o'owin. ²⁰ Ja nabyagajpxi dø'on kayiktsojkp ku øøts ya'at pudøjkin nyikmuky. ²¹ Paty øøts niti taa'y ngayik-tuñ øy øøts yø nminaxt Dios wyingujkp jøts jaa'y wyindump.

²² Nayide'en øøts ixyam ndamigaxi jadu'uk adøm nmigu'uk midi ja Dios yja' øy tsuj pyaduuñip jøts ku meets ja nayide'en mdajotkujk'ajtmiiyi. ²³ Ku pøn jam tyiknidøøwit ti dø'on ja Tito tyumpy, jade'en x'adsojim-bettit jøts ku øts yø nmigu'ugi, øts nmøøtumbi yø', øøts idø'on ndumpy ja pudøjkin pøni pøn tsojkp ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janch-ja'wibitøjk yø tø kyexyidi jøts ku ja Cristo yø jade'en twindsø'øgidi. ²⁴ Paty ø nwa'añ ku jam mbaadiyidit yikxon xuk'ejxtit xuknijawidit sa meets ja tsojkin sa meets ja pa'ayo'owin xmøøt'aty jøts ñigaxø'økt jade'en jadits meets ndajotkujk'aty.

Ku ja Pablo tñigajpxy sudso ja pudøjkin yjaakmukt

⁹ Ka' pyaat'atyi yi ku meets ya'atpi winmaa'ñ je-exyip ndanijayi, ² jabi nnija'wiñipxi øts ku meets ja pudøjkin jaty xyakøjy. Jotkujk øts idø'on ja Macedoniit jaa'y nnimay'etti ku meets junkti'jyip ja pudøjkin xyak-wani jøts jade'en namay ttunwamididi sa me tø xunjøpi. ³ Ja'agøjxp øts ya'at migu'uktøjk ngaxti jøts mduk-ja'myatsidit ku ja pudøjkin xyik'awejxtit. Jøts øts jade'en ja n'ayuujk tyø'øt sam øts yø tø ndami-madya'akti jawyeen. ⁴ Ja kuts jotmøñ ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsøødyuñimts ja tya'ant ku wyinaty jade'en jyaty yam meets øy tø n'ukni-madya'aky. ¿Jaa kidi meets ja tsøødyu'unin jawaani møj mbaadiyit? ⁵ Yide'ents øts yjawi ne'egi ndanibik-

taagi jawyeen ya'at jaa'y m'ats'ejxidit jøts jade'en mjaakpudøjkigyoyiyidit jøts kya'pxt ja pudøjkin midi meets tø xni'adsowi. Jøts jade'en wyinaty jam mgøømdsojkin xyiknigaxø'økti jøts ka' mwa'andit ku øøts nugo ndyimyajada'aky.

⁶ Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty. ⁷ Køømdsøky'ampy idø'on ja pudøjkin xyaktit. Kidi adsep'amip ja xu'undit jabi tsojkipxi Dios ja' pøn xondaajkingøjxp tyajkp ja pyudøjkin. ⁸ Maajyip ja Dios jøts tkaxt køx kida'ak ja kunuu'kxin jøts jade'en xmøøt'at'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin. ⁹ Pø yide'enxi ja Dios kyajpxy wya'añ:

Pøn ttabajaa'ñaxp ja ayo'on, pyudøjkip ja ayooobi jaa'y ja', jøts ja y'øyjaa'y'ajtk niwindem ja kyagugøxi.

¹⁰ Abaadi ja Dios tyaky ja jujky'ajtin jøts adøm jade'en tuki'iyi nmøøt'ajtkøjxint jøts ja nmigu'uk nayide'en ja pudøjkin ndanipaajtint. ¹¹ Jøts meets nayide'en køx kida'ak xmøøt'attit ja øy'ajtin jøts øy pøngapøn xmo'odit. Ja pudøjkin midi meets xanigaxip, ja Dios ja tyamøjawidip tyagunuu'kxjawidip ku ja wyinaty yik-tanipaattit. ¹² Kidi ja'ayip adøm ja nugo nd-abudøkiwya'añindip midi ja ka'ejtxidip, jabi ja'axi nayide'en yiktump jøts ja Dios ja tkajxak'ettit.

¹³ Ja'agøjxp ja Dios ja ttamøjawidit ku meets tiy ka'pxy xmimadowdi ja Cristo y'øgyajpxy y'ømyadya'aky sam nayide'en ttamøjawidit ttagunuu'kxjawidit pøn jaty wyinaty paajtmiiyidip ja pudøjkin. ¹⁴ Jøts meets ja nay jaayi mgugajpxajkmiiyidit jabi tøxi meets ja Dios ja myøj'øy'ajtin wyinaty xyiknigaxø'økti. ¹⁵ Janch møj ja Dios ku ja møj kunuu'kxin tø xmøø'yim! ¡Ka'ap aaw ayuujk yikpaaty sudso ja nnimadyajkin!

Sa ja Pablo yikutuky ku ja nwindson'ajtim tkudani

¹⁰ Tyimgyøøm øts idø'on nnuu'kxa'aky nayide'en sam ja Cristo jeexyip køøm ttuñ. Jade'en ja ka-jpxy yø'øy kuk meets nnijayi, tyimy'ap meets ja nøky ndanigaxi, jøts ka'ap øts nayide'en nja'a'y'aty ku øts ja jaa'y møøt nnabyaadyi, ja tsøøgik øts nyikmajadakpy. ² Paty nwa'añ, ku mee wyinaty n'ats'ixy jøts ø xkayik'ambøktit ku øts ja jamyi n'ukniðø'knit pøn ja y'aaw ttakajpxtip ku øts ngøømwinmaa'ñ nyiktuñ sam øy pøn jaa'yin. Ka'ap ø pøn ndsø'øgi pøni jade'en ja ttsokti. ³ Janch tiy idø'on ku øts nbojkpitumbijaa'yi, ka'apts øts mibaat ja pøky x'ana'amt. Ja Diosxi øts ja yja' xuu'møy'ejtp. ⁴ Ja nmøk'ajtin øøts, ka'ap ja pøky agujkpy pyidsimy, Dios wyingujkp ja chøøñ midi tyikudigøøpy pøn ja Jesucristo møøt kyanamyayi. ⁵ Jade'ents idø'on, nyikudigøøpy øøts ja katiiby'i kajpxy midi nugo nankmjøjtøjkiiyip ku ja Dios ja yja' tkananky'ejxwajniyi. Jawyeen øøts ja Cristo nduknijawi sa pønjabøn wyinmay jøts ja tu'ugyi ja yja' tpaduu-jnidit pøni yikutujkpy ja jade'en. ⁶ Ndiidu'ump øøts pøn ka'pxy tkabadu'undip ya'atpi ana'amini ku meets wyinaty tø xpadunguixy jawyeen.

⁷ Ku mee x'ijxy ku ndsø'øgi ka' xnijawidi sam ndyimy-jaa'y'aty. Pønjabøn wya'andi ku ja Cristo yja'atyidi, nayide'en idø'øn tnijawidit ku øøts ja Cristo xja'ajtmí. ⁸ Wan meets jam winaagin mwa'añ ku øts ja nwind-søn'ajtim kyutujk nugo ndyimdyamajada'aky, niti ngapøkyjawi jabi kø'ømxi ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øyin n'ixajyi jade'engøjxp. ⁹ Kidi xja'gyukidi ku meets yø nøky nugo nda'ad-sø'øgiwya'añ. ¹⁰ Jade'en ja kajpxy yø'øy ku tyimy'ap ja n'ayuuik nguexy jøts ja jaayi kø'øm nga'uknitanaañi, ka'abik øts øy tsuj ja madyajkin nmøødi. ¹¹ Pøn idø'øn yide'en ja ayuuik tyikyø'opy nayide'en idø'øn ja tni-jawidit ku øøts nayide'en ndyimyjaa'y'att meets win-dump sam øøts n'ayuuik nguexy jagam.

¹² Ka'ap øø nnay'a'ejxiyi jøts øø kø'øm nnay'a-gajpxiyit sam jam muum winaagin ttundi. Ja kaja'-gyukin ja yikmajadajktip ku ja nixem niyam kø'øm yjanch'uknay'agajpxyidi. ¹³ Nijuuni øøts ja kutujk ngayiktuñ midí øø ngamøøt'ajtpy. Ja Dios øøts idø'øn xuknija'wip mabaat idø'øn ja tunkjøøjp yja'aty, jøts nay ja' øøts tø xuu'mø'øy kø'øm ku meets jam tø n'atsni-ja'aty Corinto. ¹⁴ Ku øø nwa'añ ku øøts ja kutujk nmøøt'aty jøts meets n'ana'amt, ka'ap øøts ngø'øm ja' nyiktuñ, pø jade'en ja jeexyip yjaty kuk øøts jam jawy-eeen jeexyip tø nga'ats'øch. Jabi meetsxi jawyeeen ndanija't ja øgyajpxy ja ømyadya'aky sa ja Cristo y'øy'ajtin xukpaajtin. ¹⁵ Ka'ap øø ndsøky jøts øøts nugo nnadya'agajpxit ja wenk jaa'y tyunk ja kajpxwejin midí tø myikmo'odi. N'awixy'ajtpy øøts ku meets ja mjanchja'win winjaa windsojk myøjit myayit mabaat idø'øn pyaat'aty jøts mabaat øøts nayide'en nma-jada'aky ku øøts jam ndu'unt ma meets jam. ¹⁶ Xjats øøts jade'en ngajpxwa'kxt ja nitsoojkin ayuuik abiky'et abikyajp meets mjixkø'øm, jøts nijuuni øøts nganadya'agajpxit ja wenk jaa'y y'ixpøjkin.

¹⁷ Pøni jaa pøn ñay'agajpxwa'añ kø'øm, ka'ap jade'en pyaat'atyiyi, ja Dios idø'øn ja y'øy'ajtin ja ne'egi ja'ayi y'agajpxip. ¹⁸ Ka'ap y'øbyidsimy ja jaa'y pøn kø'øm nay'agajpxiyip, ja'ats ne'egi øbyidsømp pøn ja nwindson'ajtim t'øyja'wip jøts ja t'agajpxy.

Pablo jøts pøn ñadyiyi nañikajpxidip Jesús kyudanaabyi

11 Meets migu'uktøjkti, wan meets mwa'ant ku nugo mo'tpin nmadya'aky, ja'gyuki meets waani wan øts ngajpxy t'ukyiknaxy midí n'am njotp nmøøt'a-ajtpy. ² Øy mee n'ama'at'aty ja Dios øts idø'øn jade'en kø'øm xyik'adøtsp; jabi tøxi ja Cristo yja' tu'ugyi nduk-pabøjkidi jøts ku meets ja ndawinguwawiywa'añ. Wa'ats meets jam nyiknøjkwa'añ, sam pøn ja pøky tkidyimy'ijxy'ajtipnim. ³ Jade'en sam ja Eva ja tsaa'ñ wyindaayiyøø, wan meets yjawi nayide'en myikwin-daay'atwa'añ jøts mwinmaa'ñ tyigatstit jøts jade'en mga'uknadyamiyojxniiyidit ja Cristo. ⁴ Jam pøn ja Cristo y'ixpøjkin wenk tngajpxip, ka'ap nayide'en sam øøts nnigajpxy; jøts meets ja Espiritu Santo yja' nayide'en wenk xnija'wiyi, tigach meets ja yiknitsokpi ayuuik xni-

jawidi, ka'ap nayide'en sam øø nnigajpxy. ⁵ Pøn jade'en myikwinmaa'nmya'jtidiip ka'ap øts ja mabaat xyik'amutskidi øy ja nugo ñadyiyi yjanañikajpxyidi ja Jesús myøjkudanaabyi. ⁶ Øy øts n'aaaw n'ayuuik øy tsuj ngamøøt'aty, ka'ap øts nwinmaa'ñ ñayide'eni. Tø øøts yø nyiknigaxø'kni ku meets o tigati tø ndabudøki.

⁷ ¿Tø øts idø'øn ndundigøy ndejint ku meets jadi'iñi tø ndukmadøy ja nitsoojkin ayuuik ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin? ⁸ Wenkpi janchja'wibitøjk øts ja myeeñ tø ngupøjkidi ku meets janch ndukni-jawiwya'añ ja øy'ajtin. ⁹ Jøts ku øts jam n'uknajxy ma meets jam, ka'ap øts jam ojts pøn nyik'ayøy pøni ti jaty ø xka'ejtxip; jabi ja nmigu'ukxi øts ojts xujnidi ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyik-naxy. ¹⁰ Nayide'en sam øts ja Cristo tyi'ajtin njanch-ja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi. ¹¹ ¿Jadits øts n'ayuuik jade'en nyikwa'añ? ¿Ja'agøjxp idø'øn nde-jint ku meets nga'uktsojki? Wa'ats ja Dios tnijawi mabaat øts ndsojkin yja'aty meets køjxp.

¹² Jade'eñim øts yø ndunk nyikyø'øy'ett jøts ja kyamøj'attit pøn ñadyiyi nañikajpxidip ku ja nayide'en tyumidi sam øøts. ¹³ Yø'øbi jaa'dyi nugo yø tyaa'y'atti ku ja Cristo tkudani. ¹⁴ Ka'ap yø kumaap nja'wa'ant, jabi kø'ømbaatxi ja miku'windsøn Satanás ñanky'ijxyiyi ejximdam ja Dios y'ankilis kunuu'kxy. ¹⁵ Paty nayide'en yø tyumbi ñanky'ejxmiyi samdam ja øybi tumbi jaa'y. Ja china'yin ja yiktatidyu'undip jade'en sam ja pyaat'atyidi.

Sa ja Pablo y'ayo'ombaaty ku ja Jesús tkudani

¹⁶ Ixyam mee nnimaagyojmi jøts kidi nugo mwin-maydi jøts ku nmøøty. Pøni jade'ents xja'gyukidi, wants øts jade'en tmadya'aky jøts øts nadyiyi namyikajxibim nnayjawiit. ¹⁷ Kidi mee mwa'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'øn, ku njanch'uknay'agajpxiyi. ¹⁸ Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajxmiyi. ¹⁹ Jabi møj ja'-gyukixi meets mjaa'y'aty, patyts meets sa xkatijp pøn mo'tpa'an madyakp. ²⁰ Ja' mee ne'egi m'øyja'wip pøn jiyujkin myiktuujnidip, pøn mwindaay'ajtidip, pøn mnijuu'yniyidip, pøn mdekpya'an'ajtidip. Mgupiky'ajtip ja' øy sagasa myiktunidit. ²¹ ¿Øy øts ixyam nnabyøkyjawi ku øts jade'en tø ngajaa'y'aty kudam meets yø' ne'egi jade'en x'øyjawi!

Pøni jaa pøn ap tyimñayjawi, xmaapy øts ja', øy øts nayide'en njaa'y'att. ²² ¿Ja hebreo ayuuik nadya'a-gajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajtip ja Abraham ja'? Nayide'en øts ja n'apteety'amøj'ajtmí.

²³ ¿Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøøt'aty jøts ø nnay'agajpxit kø'øm. Jawaani

møk øts ndunk ne'egi tø nyikniḡaxi'iky yam yja' ja ka' ne'egi ñigaxø'økti. Tø øts ngu'ayo'ombaaḡi ja ndunkjøp, ne'egi ka'ap ja'adi. Ne'egi jawaani may ojk øts idø'øn ja tø nyiktagudsumi, jøts kawinaak ojk øts ja o'jkin tø n'ixy jaayi wingon xwindani. ²⁴ Magoxk ojk øts ja ayo'on tø ngupiky midi øts nmigugajp israelit jaa'y tø xmø'øy sam ja kyutujk wyā'andi ku ee'pxmajk taxujk ojk nyikwøpy. ²⁵ Tigøøk ojk ø tø nyikipwyøpy, jøts tu'uk ojk tø nyiktsaaḡa'ach. Tigøøk ojk øts ja nbarki tø myejy'okida'aky. Tu'uk ja xøøw tu'uk ja koots nyiknajxy jam mejyujk'am, ja kipy pyidaḡi, ja puu' pyidaḡi øts iij xjaakyiknøøwinganamp. ²⁶ Jagambaat øts kawinaak ojk tø nwidity jøts jam muum ja møj nøgom xyikjø't-wa'āñ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjotp samdam abak etjotp uk jam mejyjotp. Nayide'en øts ja xka'ødyumidi pøn ñadyijy Jesucristo janchja'wibidi nañikajpxidip. ²⁷ Tø nduñ mabaat øts ja ngø' ja ndeky myajada'aky, øy øts ay-o'on ja xadukpaaty; kawinaak ojk ø ngamaa'y nga'ity; ayuu adøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

²⁸ Øy øts idø'øn jade'en ya'atpi ayo'on njapaaty uk midi jatys njayiknaxy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtim. ²⁹ Pøni jaa pøn ja yjanchja'win kamøj, janch pamaa'yin ø nnayjawi. Pøni jaa pøn wenkpi winmaa'ñ tpanøjknidip, møk øts ja n'ayooji, møk øts ja ngudsø'ødyuni jøts øts ja nugo njantya'am-biky. ³⁰ Pøni janchpaat'ajtipts idø'øn ja nay'agajpxi ja ngamøk'ajtipts ø ne'egi nadya'agajpxip. ³¹ Ja Dios Teety midi ja nwindson'ajtim Jesucristo teety'ajtpy mi-di paat'ajtiyp xemikøjx yikmøjawit yikunuu'kxyjawit, wa'ats ja tnijawi ku øts ejtp ja tyi'byi ja yjanchpi nnigajpxy. ³² Jøts ku øts nnajxy jam Damasco kajpjotp, jam dø'øn tu'uk ja windsøn midi tmidump ja yjadu'ukpi møj windsøn Aretas, ja Damaskit windsønts idø'øn ojts t'ane'emy ja tyumbitøj jøts ja tyimyik'adujkøxtit ja tu-u' mā jaty ja kajp yiknidøki jøts øts ja xmatstt jøts ø ndyimyiktsu'umt. ³³ Ti mats ja Dios xuk'ixmajtsint, jabi jamxi nguejky, mā ja møj pøch jam, midi ja kajp nawidejtip. Øts nmigu'uk xkatstidyøø mutsk ventani agø'øm kachjøtpy. Jade'en øts idø'øn ja xkapøktøø.

Sa ja nwindson'ajtim tnan'ky'ijxyi ja yja' Pablo kyu-maa'yjotpy

12 Nnija'wip øts ku niwine'en kyajami ku nnay'a-gajpxa'ant kø'øm. Meets ukja'gyuki, kuwani øts idø'øn nnigajpxt sudso nwindson'ajtim ja yja' tø tnan'ky'ijxyi ku ø kø'øm nnay'ijxyi kumaa'yjotpy. ² Ndyimy'ijxy'ajtpy tam øts tu'uk ja jaa'y midi tjanchja'wip ja nwindson'ajtim Jesucristo midik myakmajkts jumøjtjip ojts yikwaanijkxy jap tsajpjotpy. Pø sudso idø'øn ja yikwaanijkxy, pø møøt ñe'kx uk nugo y'anmi-jā'wints idø'øn ja nøjxpx Dios tu'ugyi tyimy'uknija'wip. Ja'ayi ø nnija'wip ⁴ ku ojts yikwaanijkxy jap tsajpjotpy mā ojts tmadøy ja kajpxy ja madya'aky midi ka' pøn

nugo ñiyiktukmadøy. ⁵ Ti kanadyamiguexyim idø'øn ja yjawi ku øts jade'en sam ja jaa'y, ka'ats øts nnamyikexyiyi pø wanims øts ja ngamøk'ajtin nnadyamikexyiyi. ⁶ Øyimts øts kø'øm njanchjanañi-gajpxwa'āñiyi, pø ka'axi ja ñugo kajpxyi, pø tiy'ajtinxi øts wyinaty nnigajpxpy; ka'ats øts jade'en nduñ jøts ki-di pøn nugo wyinmay jøts ku øts ngamaabyi jøts ku øts ka' njade'eni sam pøn yamts øts idø'øn ja jade'en ngatuñ sam ja wyinmaydi.

⁷ Kawinmaa'ñixi dø'øn ja chujj midi øts ja nwindson'ajtim xuk'eix ngumaa'yjotpy; jøts øts ja nganadyamikaxiyit, winets njā'wigyejky adsu'jky nikøjxpx yjajkejky samdam ja kujp xkuu'mint. Ja miku'windsøn Satanás ja tyunkjøp jade'en ñanky'e-jxip. ⁸ Tigøøk ojk øts ja nwindson'ajtim ojts njanch'amidøy jøts tyiknaxt ja jajin ja tøø'yin; ⁹ jøts øts ja nwindson'ajtim yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyp; jabi jade'enxi øts nmøk'ajtin ne'egi ñigaxi'iky ku nbudøki pøn ja kyø'øm møk'ajtin ka'ejtxip." Jade'en ja wyā'āñ. Patyxi øts ja ngamøk'ajtin ndajotkujk'aty, jøts jade'en ja Cristo yja' kyaxø'økt. ¹⁰ N'øyja'wip øts ja kamajadajkin, n'øyja'wip øts ku nyikjemnøjmi nyiktenøjmi uk ku tigati xka'ejtxi, uk ku øts Cristo køjxpx nyikmi'ambiky ngu'ayo'ombaaḡi. Ku nnayjawi nmøk'ajtin kya'ity jats idø'øn nwindson'ajtim ja myøk'ajtin tyik'awa'āñ jøts øts ja xuk'ajot'aty.

Ku ja Pablo tpamay tpadajy ja Corintiit janchja'wibidi

¹¹ Janch mo'tpin ø tø nmadya'aky ku kø'øm tø nnay'agajpxyiyi, kø'øm meets tø xyikjaty jabi meetsxik idø'øn jeexyip øy tø xnimadya'aky jøts øts jade'en je-exyip kø'øm tø nganay'agajpxyiyi. ζTyimyabaat ja nde-jint yja'atti ja wyejin ja kyajin pøn ñadyijy myøjku-danaabyi'ajtpy ja nwindson'ajtim? Øy øts idø'øn mabaat nguidyimyjaty ka'ap øts ja mibaat xwinaxtit. ¹² Ku øts ja ndunk tø nyikyø'øy mā meets jam ejtp øts nnanky'ijxyiyi ku øts idø'øn ndyimgyudanaabyi'aty ja nwindson'ajtim. Ejxpajtingøjxpx milagrikøjxpx øts idø'øn ja n'ødyunk tø x'ejxidi tø xnija'wiyidi. ¹³ Pøni mwandipts ku meets ka' tuknax myik'ødyuñ sa øts ja jadu'ukpi n'ødyundi mā jaty ø nwidity mā jaty ø nbaat-ti n'ejxti ja jadu'ukpi janchja'wibidi, janch idø'øn mwā'andi. Xmøøyimsik meets jam ja kaaky ja māa-dajjk kuk øts jam n'ats'øjch. ¡Maa'kxti, kidi xka'øy-jawidi ku øts yide'en nwa'āñ!

¹⁴ Ixyam nnay'a'ejxyi nnay'abaadiyi ja' ku meets myidigøøk ojk n'ats'ejxwa'āñ. Ka'ap meets jam nugo n'atsyik'adujkiwya'āñ. Jabi ka'axi meets ja mbikta'aky n'ixaajyi, meetsxi dø'øn ja m'øy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meeñ ja jingaap midi ja y'u'nk ñidsina'adyip jøts ka'ap ja y'u'nk ne'egi ja tyeety ja yujky'ajtin tjommay'attit. ¹⁵ Xondaajkin ø nbaatp ku mee ndamiyoxkøxt ja n'aaw ja njoojt mjanchja'wingøjxpx; øy meets yjawi xjagatsøky sam-dam meets ndsøky.

¹⁶ Øy winaaḡin tjaja'gyukidi ku meets jam nugo ngayik'adujkti, jade'en ja wyā'andi ku mee nugo tø

nwin'ññ. ¹⁷ ¿Tø meets ndejint ndawindaay'aty ja nmigu'uk pøn jaty meets jam tø ndaniguexy? ¹⁸ Kø'øm øts ja Tito n'ane'emy jøts m'ats'ejxidit jøts øts ndami-gajxiyññ jadu'uk adøm nmigu'uk. ¿Tits, mwin-daay'ajtidit ja Tito? ¿Ti ka' x'ejxti ku øøts tu'ugyi nwin-maa'ñ nyikyø'øy jøts tum jade'en øøts n'øyjaa'y'aty?

¹⁹ Wan meets jade'en mwinmay ku øø nugo nnagyubøkiyi. Ka'ap yjade'eni. Waa'ts ja Dios tñijawi ku øøts Cristo køjxp ja ndunk tø nyikyø'øy, jøts meets jade'en ja mjanchja'win myøjit. ²⁰ Ku øts jam wyinaty n'ats'øch jade'en ø njøpjawit ku meets yjawi øy nga-paatt samdam øts ja ndsojkin njadyimyjamoøt'aty. Jøts mee nayide'en xka'øyja'wyimit ja njaa'y'ajtin samdam meets xjadyimyjatsøky'aty, ku meets xka'øyjawit ja kajpxwejin midit wyinaty nyajkpy. Jabi jade'enxi nnajts-jawi ku meets wyinaty mga'uknamyaa'niyidi nixem niyam, jøts xyikmøjtøjkiññidi ja windii'ñ'ajtk, ja aki, ja tami'ama'at'ajtk, ja nabyagajpxi, sam nayide'en ja namyikajxan jøts nixem niyam mga'uknamyi-mado'oniyidi. ²¹ Wan øts ja Dios yjawi nmidsø'ødyu'unt ku meets jade'en mjaaj'y'ajtni. Wan meets ngujiyit nguyaa'xit ku meets wyinaty ne'egi tø xpadøjkiññi ja mga'øchinaa'yin midit ixyambaat mgamajtstu'ut-wandip. Tum ja axøø'kpi tum ja yigaappi m'amp mjotp mmimajadajkidip.

Xjats ja nøky y'abaadi jøts ja kajpxwejin ja kajpx-poo'kxin y'ukyikyajkni

13 Ixyam mee myidigøøk ojk n'ats'ejxwaa'ñ, jøts ku øts ja tundigø'øyin jam nyiktiidyøkit pøni pøn jam nugo tyimdyunk'ajtnidip ja øøkyunk, tsokip ja a'e-jxnajxpi namajtsk uk nidigøøk pøn ja waa'ts tni-madyakøxtip sa y'ejxi tyiyi. ² Ku myimajtsk ojk n'at-s'øjch n'ana'amdi øts ja' pøn jam yjawi wyinaty øøky agujkpy tyimchinaañidip. Xyamts nwa'añ ku nnøjkxt jadigojk ku nayide'en nbatkojmidit nay ja' pøn ø tø n'ana'amdi, niwine'en øts ja ayo'ejxin ngamoøt'att. Pøni jamidits pøn ja chinaa'yin tyik'ejtnidip øøky agujkpy nayide'en ja pyaat'atyidi jøts tiidyu'unin tyagida'agidit. ³ Jade'ents meets idø'øn xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma

meets jam. ⁴ Ja kyamøk'ajtin kyu'o'jki kruskøjxp, xemikøjxpts ixyam yujky'aty Dios Teety myøk'ajtingøjxp. Nayide'en adøm idø'øn ja kajot-møk'ajtin njagyejpyim sam ja yjajty. Ku ja xemikøjxp nmøøtjuyky'ajtin ja nwindson'ajtim jade'ents ja Dios Teety tyaky ja møk'ajtin midit meets ndabudøjkip.

⁵ Yikxon meets kø'øm nabyawinmayi, ¿mjanch-padundip idø'øn ja mjanchja'windi? ¿Ja ka' xja'myatsti ku ja Cristo xmøøt'atti? Uk nugo meets idø'øn mnañikajpxyiyi Cristo janchja'wibi. ⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni. ⁷ N'amidøøpy øøts ja Dios jøts meets øy mjaaj'y'att. Kidi ja'agøjxpi jøts øøts jade'en ja n'ana'amin myøjtøkit. Ja m'øy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy. ⁸ Ka'ap øøts ja møk'ajtin nmøøt'aty jøts øøts nwindson'ajtim ja tyiy'ajtin ngajpxwe'jtit, ja' øøts ndunkjøøjp'ajtpy jøts ja yiknigajpxt tiy ka'pxy. ⁹ Ndax-onda'akp øøts ja møk'ajtin xmøøt'att øy øts ja ngutujk njagayiktuñ. Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyit yikxon tyuda'akt. ¹⁰ Namga'anim ø nd-søøñ ku meets ya'at nøky ndanigaxi jøts ku meets wyi-naty n'ats'ixy ka'ap xjawidit møk ja tiidyu'unin midit ø tø xaguwani ja nwindson'ajtim. Ja'agøjxp øts ja kutujk tø xmøø'øy jøts meets ja mjanchja'win myøjit jøts kidi ja'agøjxpi øts ja nmøødi jøts meets ja kudigø'øyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixa'adi ja øy'ajtin ja tuda'aky'ajtin, nanjyotkujk'atidit nixem niyam, yikxon mnamyigu'ukwa'anidit yikxon mnamyayidit, jøts jotkujk x'ejxtit. Winets meets ja Dios xemikøjxp mmøøt'etidit midit tyajkp ja jotkujk'ajtin midit tyajkp ja tsojkin ja pa'ayo'owin. ¹² Nagyajpxpoo'kxidit nixem niyam sadam ja Dios ttsøk'aty. ¹³ Niduki'iyi ja janchja'wibidi midit øøts ixyam møøt, nayide'en ja tkaxmidi ja kyajpxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nimā mgamajt-stu'udidit. Tiigyajpxy idø'øn, jade'en idø'øn yjatt.

GÁLATAS

Ku ja Pablo tnijayi pøn tjanchja'widip ja nwind-søn'ajtim Jesucristo yja' jam Galacia

1 Øts idø'øn Pablo'ajtp, nwindson'ajtim ngu-danaapy, nipøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwind-søn'ajtim kø'øm tø yikjujkpyikyiyi jap oo'kpi y'agujkpy. ² Ixyamts øts møøt niduki'iyi ja nmigu'uk janch-ja'wibitøjkti, meets ndanijayi ya'at nøky mā jaty xpad-umidi ja nwindson'ajtim yja' jam Galacia etjotp. ³ Paat meets ja øy'ajtin ja kunuu'kxin midi ja Dios Teety ya-jkpy møøt ja nwindson'ajtim Jesucristo, ⁴ pøn nagyiyajkiyøø jøts adøm nbøky ja xku'o'jkandi jøts kidi ja axøøkpi tsinaa'yin mibaat xmimadaajkyindi midi yik-patp ya naxwiiñ, tøxi ja Dios Teety jade'en kø'øm ttanibiktaagi. ⁵ iTu'ugyi ja Dios myøj'ajtin ndamiguy'e-jxint xemikøjxp! Jade'ents idø'øn ja yjatt.

Ka'ap ja jadu'uk abiky midi tnigajpxp ja yiknitsoojkin

⁶ Tyimñigyumaap ø nnayjawiya ku meets pojñ xmajt-stutkojmi ja Dios, pøn meets kø'øm tø mwaamifiñdi tø mwaadsøyidi ku ja Cristo xpa'ayonaxyindi, jøts meets ja janchpi nitsoojkin xijy xpabiky, ja wenkpidam ja'. ⁷ Ka'ap idø'øn ja wenkpi nitsoojkin ya jadu'uk y'ity. Yide'en idø'øn yjaty, jaa dø'øn jaa'y pøn meets nugo mjanchjaa'midip, ja Cristoxi dø'øn ja fiitsoojkin yjayikti-gatswandip. ⁸ Tøxi meets tu'ugyi ndukmadøy ja janch-ja'win, kuts wyinaty pøn nidu'ugin tyiktigatswa'añ midi øøts jawyeen tø n'uknigajpxy, møøts idø'øn ja Dios tya'ambøkit, jøts møj ayo'on tyukpaadit wan tjapøni ku ttu'undit jade'en, o njadyimyja'øtsi uk yjadyim-dioskugajpxy'ajtpi, ku wyinaty ja wenkpi janchja'win tpiikta'akwamidi sam muum ixyam yjawi ttunwa'andi. ⁹ Ixyam meets ndukja'myatskojmidi: Pøni jaa pøn ja wenkpi ixpøjkin mdawindaayiwajnidip, paat'ajtiyip ja'ñigida'agiyit ja Dios myøj'ayo'on. ¹⁰ Ti øts idø'øn jade'en xijy xyikwamp ku øts idø'øn jade'en nwa'añ. ¿Ja' øts idø'øn xijy ndsøjkpy jøts øts ja jaa'y kuwani xtyimgyupøkt jøts øts ja kuwani xty-imdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyip ja'ayi nugo nda'ødyøki ya naxwiiñit jaa'y wyingujky, ka'ats øts ja Cristo jeexyip x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tyøjkiyññ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nit-so'ok'ajtin midi ø nnigajpxy, ka'ap jaa'y yø twinmaa'ñi. ¹² Kø'øm øts idø'øn ja Jesucristo yø tø xuknijawi. Kidi mee mwa'añ ku øts yø øy pøngapøn jaa'y tø xuk'ix-piky. ¹³ Tø meets idø'øn ja kajpxy ja madya'aky xnijawidi sa øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sa øts idø'øn y'ijty awa'an'ampy njemduñ ndeduñ pøn ja Dios tjanch-ja'widip jøts ø nyikudigøøwya'andi. ¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiyaaktøjk ni tu'uk pøn jade'en kyama-jada'aky sam øts. Jabi ja'ats øts idø'øn y'ijty n'amip njootpip ja møjaa'dyøjk chinaa'yin. ¹⁵ Tigajts øts ndsi-naa'yin. Ka'anim øts wyinaty ya naxwiiñ ngaxi'iky ku øts ja Dios wyinajty tø xwi'ejxni xwigoni, pya'ay-o'owingøjxp øts idø'øn tø xwaadsøy. Ku ja xøøw ja jumøjt tpaajty sam ttanibiktaajkiyññ, ¹⁶ xjats øts idø'øn xuk'ixy xuknijawiyññ ja y'U'nk, jøts ngajpxyøøyt ja nitsoojkin madya'aky mā pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nipøn øts idø'øn nga'ats'ixy nga'ats'amidøy, ¹⁷ ni nganijky øts jam Jerusalén mā jam pøn ja kudanaa'yin jawyeen tpadøjkidyøø. Tiy øts idø'øn ne'egi ndyimñøjkxkøjy jam Arabia etjotp, jamts ø nwindbijty jøts ø nja'jty jam Damasco. ¹⁸ Kyidigøøk jumøjtnim ø nniikxy jam Jerusalén; winets øts ja Pedro ojts nminabyaadyiyi jade'en'ampyts øts ja n'ixy'aty, makmojkx xøøw øts ja jam nmøøtsinaay. ¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajt, ja nwindson'ajtim y'uch myigu'uk. ²⁰ Y'ixxy ñija'wip ja Dios ku ya'at tyiyi yjanchi midi meets ndanija'ayip. Ka'ap ø nugo ndaabyaaty. ²¹ Kuts idø'øm jade'en y'uknaxjy, jamts ø ndsøø'ñ jøts ø nniikxy jam Siria etjotp jøts jam Cilicia nayide'en. ²² Ka'ap øts y'ijty x'ixyidi adøm nmigu'uktøjkti midi tjanchja'wimiyidip ja Cristo jam Judeit etjotp. ²³ Ja'ayi dø'øn ja y'ijty tmadowdi ja kajpxy, ku ñømidi: "Ja' pøn y'ijty tkamaa'kxp ja janchja'wibitøjkti ja Cristo yjaa'y, ja' ixyam kø'øm tnigajpxnøp øy tsuj ja Dios kyajpxy ja Dios madya'aky yam ja y'ijty t'ukyikudigøøwya'añ." ²⁴ Tyamigunuu'kxyja'widip idø'øn ja Dios ja' ku øts ja ndsinaa'yin tø nyiktigach.

Ku ja Jesús kyudanaabyi tkupøkti ja Pablo jøts ja nayide'en tyu'unt

2 Kyimakmajkts jumøjt øts jadigojk nnijkxy jam Jerusalén møøt ja Bernabé, jøts ø nayide'en nbawāy ja Tito. ² Paty øts jam nnijkxy ku øts ja Dios xuk'ijxy jøts øts jam nnøjkxy. Jøts øts jam møøt amaa'tsk ngajpxy nmadya'aky pøn idø'on jam tnigubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sã øts idø'on ja nwind-søn'ajtim y'ixpøjkin nnanky'ijxyi pøn tkanija'widip pøn ka'israelit jaa'dyi. Njöpja'wip øts ja' ku øts ja jotmøñ xkagupøktit paty øts ja jade'en nnigajpxy jøts øts ja ndunk nugo kyanaxt midi øts jam wyinaty ndumpy. ³ Xpudøjkidits øts ja'. Niti nisa ja Tito kyayiktuuñ, ka'ap ja ejxpajt ñe'kxkøjpx yikpiktaajky sam ja israelit jaa'y ttsøonidi. ⁴ Ka'ap øts ya'at jeexyip ngajpxpaaty sa ja Tito yjajty kuk idø'on kyanøjkxti ja ejxpi ja kowbi jøts tmadya'akwidettit mabaat adøm idø'on nga'uk-padu'unindi ja møjaa'byi kutujk midi ja Jesucristo tø xukniwāajchim ku møøt n'ijtyim. Ja' idø'on ja chojktip jøts adøm nbaduujna'andit ja myajaa'byi kyutujk sam ja israelit jaa'dyi. ⁵ Nijuuni øøts ja ngayikmøjtøki jøts ka' meets xwinma'aty ku ja'ayi ejxpajtingøjpx yikpiky ja yiknitsoojkin. Jaa ku øø ndsøky jøts meets tiy xmøøt'ajt'ettitnim ja winmaa'ñ sa ja yiknitsoojkin nbaajtyim.

⁶ Niti nisa øts ja xkanimaadyi pøn jam tnigubajk'ajttip ja kudanaabyitøjkti pøni sã øts ndunkjøøjp nyikyø'øy; øy ja yjamøjwindsønidi tuknax øts ja møøt nnay-jā'wyidi, jabi tum jade'enxi adømdi Dios wyingujkp. ⁷ Ka'ap øts ja wenk ana'amín ja x'ukmøøñidi, jabi yjā'-gyukidixi ja' ku øts ja Dios kø'øm tø xanipiky jøts øts ja nitsoojkin ayuujk ngajpxyø'ty mã pøn kya'israelit-jaa'yidi, sam ja Pedro yiktanipøjkmi nayide'en jøts nay ja'abi ayuujk tkajpxyø'ty jam israelit jaa'yjotp. ⁸ Nayide'en øts ja Dios myøk'ajtin kudanaabyi tø xpik-tajkmi jøts øts ngajpxwā'kxit ja y'ayuujk pøn ka'israelit jaa'dyi sam ja Pedro tø yikpiktajkmi kudanaabyi jam israelit jaa'yjotp.

⁹ Patyxi dø'on ja Jacobo, ja Pedro jøts ja Juan pøn tnigubajk'ajttip ja kudanaabyitøjkti tjā'gyukidi ku øts ja Dios tø xmø'øy ja øy'ajtin jøts ja yja' tnanky'ejxit. Ojts øøts n'ukyikøpatni møøt ja Bernabé, jade'en'ampy ja jade'en ttundi jøts ku øøts ja xmigu'ukwā'añ jøts ku ja t'øyjāwidi jøts øøts ndunk øy nyiknaxt jam ka'israelit jaa'yjotp, yam ja nayide'en ja tyunk tyikyø'myidi jam israelit jaa'yjotp. ¹⁰ Ja'ayi øøts idø'on x'amidowdi ku øøts nximija'myajts'ett ja israelit ayoobitøjkti. Yā'ats øts idø'on ne'egi nbadun'ijtpy, ka'ap øts yø'øbi win-maa'ñ n'ixmach.

Ku ja Pablo twindsø'øy ja Pedro jam Antioquia

¹¹ Ku øts jam møøt nnabyaajti ja Pedro jam Antioquít kajpjotp, jam øts ojts ndawindsø'øy midi jam wyinaty tyumpy, ku ja ka'ap y'øgyaxi'iky. ¹² Ku ja møøt øy ty-imy'ukaagyøjy pøn ka'israelit jaa'y jøts ja jaayi tmajt-

stutkojmi, ja'ayi ku winaa'gin ja israelitøjk yjā'atti pøn wyinaty tø tkexy ja ja'abi jaa'y midi tpadundipnim ja møjaa'byi kutujk ja møjaa'byi tsinaa'yin sam ja y'ijty nayide'en tpadumi. ¹³ Nayide'en ttumidi sam ja Pedro pøn jaty jam wyinaty ka'israelit jaa'dyi, nayide'en idø'on ja Bernabé paa't ttumi. ¹⁴ Kuts øts idø'on ja n'ijxy jade'en ku tkabadundi sam ja øgyajpxy ømyadya'aky ttanibiktaagi, yide'en øts idø'on ja Pedro nnimaay jøts niduki'iyi tmadoomidøø ja janch-jā'wibitøjkti: "¿Tigøjpx mets ya'at jaa'y xukpadunwā'añ ja israelit jaa'y chinaa'yin? Pø tøts mets ja kø'øm x'ix-matsni jekyip o mets jam mjadyimyjugugajpi."

Janchjā'wingøjpx ñitso'okti ja israelit jaa'y sam o pøn jaa'dyi

¹⁵ Israelit jaa'y adømdi ja' ku jade'en tø ngue'exyindi, ka'ap adøm ja pøky nayide'en ndyimyikmajadaajkyindi sam ja' pøn ka'israelit jaa'dyi. ¹⁶ Tøts nnija'windi ku ka'ap adøm ja Dios xkupøjkindit ja' wyingujkp ku ja'ayi nbadu'undit ja Moisés kyutujk. Ja Jesucristoxi dø'on ja yja' njanchjā'wimp patyxi dø'on adøm ja Dios Teety tø xkupijkyindi, kidi ja'agøjpx ku ja Moisés kyutujk nbadu-ujñidi. Jabi nipønxi kyayikupøkt Dios wyingujkp ku ja Moisés kyutujk ja'ayi tpaduujnit.

¹⁷ Ku dø'on ja Dios tø x'ukupijkyindi Cristo køjpx, jøts adøm ja Moisés kyutujk tø n'awimbejtigyojmandi, ¿ja Cristo adøm idø'on kø'øm xyiktuu'tigøø'yimp? ¿Ka' yjade'eni! ¹⁸ Ku øts ndungojmit midi tø n'uk'ixmach, ngø'ømbøky øts ja'. ¹⁹ Ka'ap øts ja Moisés kyutujk n'ukyiktuni ja'agøjpx ku øts ja Dios y'øy'ajtin jade'en'ampy ngapaaty; tø njā'gyuki jøts ku ja Dios yja' yikpaaty ku njanchjā'want ja Cristo. ²⁰ Ka'ap øts nugo n'uksinaañi, tø øts ja Cristo xku'oogi kruskøjpx; ja' øts idø'on ndu'ump midi ja Cristo y'øyjā'wip jaa ku øts ja chinaa'yin ndajuky'ajti. Janchjā'wingøjpx øts ya'at ju-jky'ajtin nyiknaxy yā naxwiñ ku ja Dios U'nk tø xjanchøky xjanchpa'ayøy jøts nayide'en tø xku'oogi. ²¹ Ka'ap øts ja Cristo y'o'jkin nugo nyiknaxwā'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawā'añ ja Cristo y'o'jkin, ka'ap ja jeexyip mã tyuñ.

Midi nyikmajadaajkimp: ja Moisés kyutujk uk ja nwind-søn'ajtim yjanchjā'win

3 ¿Meets gálatas jaa'dyi! ¿Tiku tø mwinmaa'n-myā'atti? ¿Jadits ku xka'ukpadunidi ja y'øybi ja tyiibi, pøn tø myikwinmaa'ndyigøyidi? Jabi tøxi meets ka'pxy ndukmadooguixy jøts tø xjā'gyukidi ku ja Jesu-cristo tø xku'o'jkindi kruskøjpx. ² Uk'adsojimbetti meets idø'on ya'at: ¿Sudso'ampy meets idø'on ja Dios Teety ja y'Espíritu Santo tø mmø'øyidi, ku ja Moisés kyutujk xpaduujnidi, uk ku ja tø xmibøjkti ja yiknitsokpi ayuujk midi øøts tø nnigajpxy? ³ ¿Tiku xkaja'gyukidi? ¿Sã tø mwā'andi, jade'en idø'on xijy jawaani mjanch-jā'win myøjidit ku xpadunwā'andi ja Moisés kyutujk? ⁴ ¿Ti nugo meets jadi'iñi xyiknaxwā'añ ja m'ayo'ondi ku myikjemdundi myiktedundi ku ja mjanchjā'win x'ukyik-

tso'ondajktø? ;Ka'ap jade'en pyaat'aty, myiktunkpaty meets ja ndijy ku kawine'en tø m'ayowdi! ⁵ Kuts ja Dios Teety ja y'Espíritu Santo tø mmø'øydi jøts ja x'e-jxyidi ja myøk'ajtín ku ja tñanky'ijxyiyi ja ijxyimbi ka'i-jxyimbi, tigtøjxpts ja jade'en ttuñ? ;Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjxpxi ja ttuñ ku tø xjanchjawiði sã øøts tø nnigajpxy.

⁶ Ejxpajtingøjxp idø'on ja n'apteety'amøj Abraham ku ja tjanchja'wiyii'ñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni ti ødyunk ja tyuun.

⁷ Paty meets idø'on xjã'gyukidit jøts ku ja Abraham ñamyayi ja' t'apø t'oki pøn ja janchja'win nayid'en tmøøt'ajttip sãm ja ojts tmibiky ja Dios. ⁸ Windi'ixyip idø'on ja Dios ttukmadowni ja Abraham sã yikjaadyaãñ jap nøkyijxy jøts ku yide'en wyaãñ: "Tuki'iyi ja nãajx ja kajp ja kunuu'kxy'ajtin tpaattit ku øts xjanchjawiðiðit sã mets tø xunjøpi." Paty ja Dios jade'en wya'ãñ ku ja janchja'wingøjxp tkupøkt pøn ka'israelit jaa'dyi.

⁹ Jade'ents idø'on pøn ja Cristo tjanchja'widip, nayide'en ja kunuu'kxin ja tpaatti sãm ja Abraham ja kunuu'kxin yikmøøy ku ja Dios ja tjanchja'wiyii'ñ.

¹⁰ Pøn tyimyjabadunwãndip ja Moisés kyutujk jøts ja jade'en ñitso'oktit, tø Dios ja ttanibiktaajkiñi jøts ja yik'ayo'onmo'odit. Jabi yide'enxi dø'on ja Dios kyutujk wya'ãñ jap nøkyjøtpy: "Pøni pøn tuki'iyi tkabadungøjxp ya'at kutujk midi yap tø yikjaadyaãñ, pãajtidip ja møj ay-o'on ja' midi øts tø ndanibiktaagi." ¹¹ Ja'gyukits idø'on tyañ ku ja Dios ka'ap tkupiky pøn wyinaty ja'ayi tø tpaduñ ja Moisés kyutujk, jabi yide'enxi ja Dios ñøky wya'ãñ: "Pønts ja Dios wyinaty kyupijky janchja'wingøjxp, jujky'ajttipts ja' xemikøjxp." ¹² Ka'ap ja Moisés kyutujk yiknitsø'øky janchja'wingøjxp, yide'enxi ja wya'ãñ: "Pøni pøn tuki'iyi tpadungøjxp ya'at kutujk, ja'ayi nitso'ok'ajtp."

¹³ Tøts ja Cristo xukniwajchim ja ayo'on sãm ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møj pøkyumbi yiktijy jøts jade'en kø'ømdsøky tpatwa'jkii'ñ ja møj ayo'on midi adøm xjapaat'ajttindip, jabi yide'enxi ja Dios ñøky wya'ãñ: "Pøn jam yikudipy kipkyøjxp, møj pøkyumbi ja'." ¹⁴ Paty idø'on ja Jesucristo y'ø'jky kruskøjxp jøts ja kunuu'kxin tpaattit pøn ka'israelit jaa'dyi nayide'en sãm ja Abraham ja Dios ojts ñii'mxyiyi; jøts jade'en adøm niduknãx nãajttindit janchja'wingøjxp ja Espíritu Santo midi ja Dios Teety tø tni'adsowi.

Ka'ap ja Moisés kyutujk tyik'amutski ja may'ajtin midi ja Dios ñi'adso'owi

¹⁵ Meets migu'uktøjk, ku dø'on n'ukpiktaajkint ku tigati n'ukajpx'ø'yint n'ukajpxpaajttint, kuts ja yik-jaadyaãñ, kuwãni dø'on ja yikpadu'unt, sã tø wyinguki ka'ap ja pøn tyiktigtatst. ¹⁶ Kuts ja Dios Teety ja may'ajtin tmøøwya'ãñ ja Abraham, nayide'en ja tmøøwyaami jadu'uk ja jaa'y midi ja y'apip y'okip pøni wine'en ja tø ñajtska'axyini. Sãm ja Dios ñøky wya'ãñ: "Tu'ukpi jaa'y ja', ka'ap ja ñamayidi." Ja'ats idø'on Cristo'ajtp. ¹⁷ Yide'en øts idø'on ja ja'gyukin nyak-wa'ãñ: Ja may'ajtin midi ja Dios ja Abraham ojts

tyami'awãniyi, ka'ap ja mibaat niwine'enin tyiktigtajch ja Moisés kyutujk midi meen ix'oojk maktaxk magø'pxy ja ee'pxmajk jumøjtnim. ¹⁸ Kuts ja Dios ja myay'ajtin jeexyip kuwãni xukpadunwa'ãñin ja Moisés kyutujk, tti may'ajtin idø'on ja jade'en? Yide'en'ampyts idø'on ja y'øyi ku ja Dios ja jadi'iñi ttamay'atwa'ãñ ja Abraham.

¹⁹ ;Tigtøjxpts idø'on ja Moisés kyutujk nyikmø'øyim? Paty idø'on ja ix'oojknim yikpiktaajky tø wyinaty tni'ad-so'owiñi ja may'ajt jøts ja jaa'y niduki'iyi tñijawidit midi idø'on pøky'ajtp. Jaayi tyuñ kunim yja'aty ja Abraham y'apu'nk pøn nayide'en ja may'ajtin yik-tami'awa'ãniyi'ñ. Ku ja Dios ja kyutujk tyajky, ja ankiilistøjk ja tyamigaxiyii'ñ jøts ja Moisés ja ttagidøkidit, jøts ja ttuk'ext ttuknijawit ja jaa'y. ²⁰ Ku ja Dios ja may'ajtin tmøøwya'ãñ ja Abraham, ka'ap ja ankiilistøjk ni ja kugajpxtyøjk ja tkayiktuñ, kø'ømyi ja nadyu'ugyi ttami'awa'ãniyi'ñ.

Tigtøjxp ja Moisés kyutujk yikpiktaajky

²¹ ;Sats idø'on ya'at nja'gyukant? ;Ka'ap idø'on ja Moisés kyutujk møøt ñamyayi ja Dios myay'ajtin? Ka'ap idø'on yjade'eni, jaa ku ja Dios ja kutujk jeexyip tø tyaky nitsoojkin møøt, ja'ayits ja jaa'y jeexyip yik-tagupøjktip, ja'ayi jeexyip yikpadump pøni sã ja tyikutuky. ²² Jabi jade'enxi ja Dios ñøky wya'ãñ ku adøm nijum pøkñiwa'ãñ n'ejtnandi. Kuts ja Jesucristo njanchja'wint, jade'en idø'on ja'ayi ja nitso'ok'ajtin nãajttint midi ja Dios tø tni'adsowi.

²³ Tum ja Moisés adøm ja kyutujk wyinaty tø xniwa'ã-nandi ku kyamiñim ja Cristo, pø ka'animxi ja Dios Teety wyinaty xukja'gyukam ja Cristo yjanchja'win. ²⁴ Ja'abi kutujk adøm y'ijty xuu'wa'ãnindip xuu'wejt-snindip kunim ja Cristo myiiñ, kuts ja njanchja'wa'ant jade'ents ja Dios Teety xkupøjkidit. ²⁵ Kuts ja Cristo myiiñ, ka'ap adøm ja kutujk x'uk'ana'amnindi.

²⁶ Jabi ixyamxi adøm ja Dios x'u'nk'ajtnindi ku ja Jesucristo njanchja'windi. ²⁷ Ku Cristo køjxp nnøbejtyindi nayide'en adøm ja ndsinaa'yin nyiknãjxyindi sãm ja tø tjøptuni. ²⁸ Ka'ap y'ukpaat'ajtniyi adøm nnayjiwejt-sandit nnayjigajxandit o pøn y'israelitjaa'yidi kya'israelitjaa'yidi, tumbidi yikmidumbidi, sãm ja tø'øxyøjk-midi yaa'dyøjkmidi; tu'ukpi jaa'y adømniði ku ja Jesucristo nmøøt'ajtnandi. ²⁹ Kuts adøm ja jade'en nmøøt'ajtnant, xjats idø'on tyimbyaat'atyiyi ndeety'ap'ajtnant ja Abraham jøts xpaat'ajttindip adøm ja Dios myay'ajtin midi ja ñi'adso'wiyii'ñ.

4 Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myut-sku'nk, kuts ja tyimy'ukmutskinim ka'anin ja pyaat'aty tpoøkt ja maay øy ja tuki'iyi tjaja'ajtkixy. ² Jabi kuwãnixi dø'on tjamimado'ot ja y'ejx'etpidi kunim ja yjumøjt tpaatt jøts t'axajit ja tyeety ja myaay.

³ Nayide'en adøm idø'on y'ijty njajtyindi ku ja Cristo kyamiñim. Tum ja møjjaa'yichinaa'yin y'ijty nyikma-jadaajkyindip øy ja nitso'ok'ajtin tjagamøødi. ⁴ Kuts ja xøøw ja jumøjt yja'jty, kyajx ja Dios Teety ja y'U'nk tø'øxyøjk ñikøjxp jøts jade'en kye'jxy israelit jaa'yin,

pyadungøjx nayide'en tuki'iyi ja'abi jaa'dyi ja chi-naa'yin møøt ja kyutujk. ⁵ Paty ja jade'en myiii jøts ja wa'ats'ajtin xmø'øyindit pøn y'ijty tpadundip ja Moisés kyutujk, jøts jade'en Dios Teety x'u'nk'ajtindit.

⁶ Yide'en idø'on ja tnanky'ijxyi ku adøm ja x'u'nk'ajtna'am ku ja tkexy ja Espiritu Santo adøm n'anmi-ja'wingøjxp; jøts møk ja winmaa'ñ nmøøt'ajtindit ku janch ja Dios Teety ndeety'ajtyindi. ⁷ Ja Dios Teety adøm idø'on xtyimy'u'nk'ajtindip, ka'ap adøm nugo midumbidi. Paty adøm idø'on xtyimbyaat'ajtyindi ja maay midi ja Dios Teety tøn'adsowi, jøts midi ja Cristo xmø'øyindip.

Ku ja Pablo tpamay tpadajy ja janchja'wibitøjkti

⁸ Ka'ap meets y'ijtyip ja Dios Teety x'ijxyi, tum ja awa-nax agojnax meets y'ijty windsø'jkidip winja'widip, midi ka'ap ja Dios'ajtin tmøøt'atti. ⁹ Tø meets ja Dios Teety xpatni, uk yide'en'ampyts idø'on ne'egi ngajpxint, tø meets idø'on ja Dios Teety mbaajtniyi, zsudso meets idø'on xkupøjkojmi ja wenk tsinaa'yin midi niti møk'ajtin niti nitsoojkin kyayajkpy, nayide'en sam ja mgø'øm ja'adi midi tø xuk'ixmatstij? ¹⁰ Jøts ixyam xjanch'ukjøp'ejxti ku ja Dios m'øyjawi'yidit ku x'amaay'attinim ja xøøw ja po', ja xøøw ja jumøjt. ¹¹ A'øy'ampy øts yjawi njøptsø'øgi ku øts ndunkjøøjp meets køjxp tø wyindigøy.

¹² Migu'uktøjkti, tun ja may'ajt jøts xu'undit sam øts idø'on tø njøptuni ku øts ja israelit jaa'y chinaa'yin tø n'ixmajtsni. Kupøjkik øts n'ayuujk, ka'axi meets nijuuni xmidsepwa'añ. ¹³ Øy meets xkupijky mijawyeen ku øts ja yiknitsokpi madya'aky nnigajpxy øy øts wyinaty njabama'ayø. ¹⁴ Wan øts nba'am meets mja'axiigyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tnaajtskaxi, uk sam ja Cristo yjawi kø'øm tyimyja'aty ma meets jam. ¹⁵ zTiku mga'ukjotkujk'ajtnidi? Tyimyøj meets ja mba'ayo'owin xnanky'ejxøø ku nbamaa'ychinaay. Patyts ø nwa'añ, wanik meets yjawi mgø'ømween xtyimyju'jity jødsik øts ja xamay'ajttøø, jøts øts jade'en ndso'økt. ¹⁶ zXmidsepwändip meets ixyam ku øts ja'ayi tø nnigajpxy ja tyiiby yjanchpi?

¹⁷ Ja winaaqin ja israelit jaa'y pøn taagyøjxp yik'ix-pøjktip. Ja'ayi dø'on ja yjanch'awejxtip jøts meets ja xmibøkt jøts x'ixmatstij ja m'øwyinmaa'ñ midi meets tø ndukmadøy, jøts jade'en ja abiktyuu' xpadøjkiñidit. ¹⁸ Ka'ap ja sa y'ejxi ku meets ja møøt mnamyayiyidit, ja'ayi dø'on tsojkip jøts yikxon ja y'øwyinmaa'ñ y'øy'ix-pøjkin tnigajpxtit, ejtp jade'en ttu'undit, ka'ap ja'ayi nugu ku meets jam møøt. ¹⁹ Meets u'nk meets unajk, møk meets jadigojk xjanchyikmay xjanchyiktajy. Jaayim øts yø jade'en njawit kunim ka'pxy ja Cristo xpadungøxtit samdam ja ttsøky'aty. ²⁰ jOk meets jam møøt jeexyip ixyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'uk-patni pø sudso meets njanchñijayit!

Ja Agar jøts ja Sara ñikøjxp ja ejxpajtin yikajpxpidsimy

²¹ Meetsti, pøn ja Moisés kyutujk tpadunwajnidip, ni-gajpx meets sa dø'on wya'añ ja'abi kutujk. ²² Pø nøm-pxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midi nitøøky'ejtnip, jøts jadu'uk ja kyø'øm nidø'øxy yja'. ²³ Ku ja nitøøky tø'øxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidø'øxy ja y'u'nk tpaajty kidi nu-gojip ja jade'en yjaty pø ja Diosxi y'ayuujk jade'en ka'pxp sam ja wyinajty tø tni'adsowi ku ja tø'øxy y'u'nkpaatt møjaa'gyijxñim. ²⁴ Ejxpajtin øts idø'on ya'at nbikta'aky. Ja namajtskpi tø'øxy wa' idø'on ja kyudanaadyip majtskpi ky ja pudøjkin sa ja Dios tø ttanibiktaagi. Midukpiky, ja Agar idø'on jade'en sa ja Moisés kyutujk, ja' midi yikmøøy jam Sinai kojpkøjxp. Pøn ya'atpi kutujk ja'ayi tpadundip ka'ap ja ñitso'øktit. ²⁵ Kyudanaapy ja Agar nayide'en ja Jerusalén kajp midi ixyam ñajx'ajttip ja israelit jaa'dyi ma dø'on wya'andi ku ja nitso'ok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'øxy midi nitøøky'ejtnidip. Yikmajadaktip idø'on ja' ja'abi kutujk. ²⁶ Ma ja tsajpjot-pit Jerusalén jam ka'ap ja Moisés kyutujk jam tyuñ, jamts adøm idø'on xpaat'ajtyindi. ²⁷ Jabi ja'axi dø'on ja Dios kyajpxy tyijpy ku yide'en jap nøkyijpxy wya'añ:

Mets tø'øxyøjk nøy,

mbaat'ajtyip mxonda'akt ja'agøjxp ku xpaatwa'añ ja m'u'nk.

Jotkujk mnayjawiyt o mets nijuuni xjagapaaty xjaga'i-jxñim m'u'nk.

Øy ja mniyaa'y tø waani mja'atmajtstu'udyi, wimbetp ja jadigojk jøts ja m'u'nk may xpaatt, yam ja jadu'ukpi tø'øxyøjk nika'ap jade'endi.

²⁸ Migu'uktøjkti, ni'adsowigøjxp adøm ja Dios x'u'nk'ajtyindi nayide'en sam ja Dios ja Isaac tni'ad-so'wiyi'ñ midi ja Sara y'u'nk'ajtpy. ²⁹ Jade'en sam Is-mael, ja nitøøky tø'øxy y'u'nk, tmidsepwan'ijty ja Isaac, midi ja Sara myajnk'ajtpy, nayide'eñim ixyam ku adøm xmidsep'atwan'ijtyindi ja jaa'y pøn ja Dios yja' tka-janchja'widip, yam adøm ja Espiritu Santo ja myøk'ajtin xyikjuyk'ajtyim. ³⁰ Yide'en idø'on ja Dios ñøky wya'añ: "Jigax ja nitøøky tø'øxy møøt ja y'u'nk, jabi ka'axi pyaat'atyi nay ja'abi maay midi ja Sara myajnk paat'ajtyip." ³¹ Jade'ents migu'uktøjkt idø'øndi, ka'ap adøm idø'on ñamyayi x'u'nk'ajtyindi ja nitøøky tø'øxy, ja Abraham idø'on ndejint ja ñidø'øxy ndaak'ajtyindip, ja'agøjxp ku ja Dios tu'ugyi yikjanchjawi.

Mimøk'atti pøn mnitso'ok'ajtin mduk'ixmatswajniyidip

5 Tø adøm ja Cristo xukmajtstuujtyindi ja Moisés kyutujk, ka'ap adøm ja xukja'ajtnandi. Ejx'ettits ja nitsoojkin midi ja Cristo tø xamidsøjkyin.

² Madowdi yikxon. Pøni mdamøk'atwändip ja m'ejxpajt midi ne'kxkøjxp, ja Cristo meets idø'on ja ñitso'ok'ajtin mgayikmøjtøjkiyidip. ³ Ixyam meets ndukja'myech jadigojk ku ja'abi jaa'y pøn ja ejxpajt

tkupøjpk ñe'kxkøjxp, kuwani dø'øn ja Moisés kyutujk tyimbyadungøjxit. Kuts jade'en tkatu'unt, ja kudigø'øyin idø'øn ja pya'atp. ⁴ Jam meets winaagin winmay ku ja Dios ja xagupøjkint ku yikpadu'unt ja Moisés kyutujk, ja Cristo meets idø'øn ñamyayi abiky mbiktaknip jøts ja Dios Teety chojkin ja pya'ayo'owin x'ixmajtsidi. ⁵ Jabi adømx i nmøøt'ajtyindip ja jøp'ejxin ku ja Dios Teety xkupøjkindit jade'engøjxp ku ja Espiritu Santo xpudøjkindit jøts ku njanchja'windit ja nwindson'ajtim Jesucristo. ⁶ Kuts ja nwindson'ajtim tu'ugyi nmøøt'ejtindit, wan ja ejxpajt tyikmøøt'aty tkayikmøøt'aty ne'kxkøjxp, niti ja kya'ukwanit. Kuxi ja Cristo njanchja'want ja'axi tump, jøts ja'agøjxpxi adøm nmigu'uk tum ja øybi ndamidsøjkyim.

⁷ Øy meets tøm'uktso'onda'aky jawyeen. ¿Pønts idø'øn tøm myikwinmaa'nmya'adyidi ku xka'ukpadunidi ja tyiibi ja yjanchpi midi ja Cristo yja'ajtp? ⁸ Jabi ka'axi ja Dios Teety jade'en mduñidi midi tøm mmø'øyidi ja nitso'ok'ajtin Cristo køjxp. ⁹ Pø yiknija'wipxi ku tu'ukpi jaa'y ne'egi namay tyikwinmaa'ndyigøy ja myigu'uk. ¹⁰ Dios køjxp øts ja jøp'ejxin nmøøt'aty ku meets jadigojk x'awimbettit midi jawyeen tøm nduk'ixpøkti; pøn meets idø'øn myikwinmaa'ndyigøwajnidip, ja idø'øn ne'egi møk ayo'onba'atp øyi yjadyimyjapøni.

¹¹ Kuts meets jeexyip ndaguwani ku ja ejxpajt ne'kxkøjxp ja'ayi tu'ugyi tyuñ ka'ap øts ja israelit jaa'y jeexyip xmidsepw'a'andi xmi'ekyidi. Niti nisa jeexyip kyawa'andi ku øts ja jeexyip n'agajpxmukixy ku ja Cristo tøm xku'o'jkandi kruskøjxp, jøts ku nayide'en tyumidi ja israelit jaa'y y'ixpøjkindi. Tu'ugyi øts ja'ayi nnigajpxy ja Cristo yja'. ¹² Pønts meets ya'at tsinaa'yin kuwani mdukupøkwajnidip, paat'ajtyip jøts ja ne'egi kø'øm ñankyudigø'oyiñidit.

¹³ Migu'uktøjkti, tøm Dios mwi'ijxyiyidi jøts ka' kuwani x'ukpadunidi ja Moisés kyutujk jøts jade'en ja awa'at-s'ajtin xpaattit. Ka'ap yø'øbi awa'ats'ajtin xyikwa'andit ku adøm o tigati ndyimdyu'unandit; ja' ne'egi xyikwa'andit jøts nixem niyam mnachokiyidit sam nayide'en mnabyudøkiyidit. ¹⁴ Ku ya'atpi tu'uk kutujk nbadu'unint, tuki'iyi dø'øn ja ndejint ja Dios kyutujk yikpadunguixy, midi yide'en wamp: "Tsok ja mmigu'uk samdam meets kø'øm mnachøkyi." ¹⁵ Kuts meets mnachepwa'añidi mnachep'ijxyidi, jnay'ejx'etidim, kidi meets kø'øm mnankwyinmaa'ndyigøyidi jøts mjanchja'win jade'en xkayikwindigø'odyit!

**Ja ka'ødyu'unin midi ya' naxwiñ yiktanaxp jøts ja øchi-
naa'yin midi ja Espiritu Santo yajkpy**

¹⁶ Ya'at meets idø'øn ndukmadøøpy: jøts ja mdsinaa'yin xyiknaxtit sam ja Espiritu Santo mdamid-søkyidi, jøts jade'en ka' xyikmøj'attit ja ka'øybi midi ya'it tsinaa'yin y'amidøøpy. ¹⁷ Ya'atpi ka'øybi midi ngø'øm dsojkingøjxp nbadunwa'añidip, ka'ap ja Espiritu Santo møøt ñamyayiyi. Tum majada'akwandip ja jøts ka' xuktunwa'añim pøni midi adøm kø'øm njat-søky'ajtyimp. ¹⁸ Pøni janch ja Espiritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip midi ja ne'kx ja kojpk y'amidøøpy. Ya'atpi pøky y'agujkpy yide'en ja yjujky'ajtin tyiknaxti: øy ja pøn yaa'dyøjk tøm øxyøjk møøt ñamyøøt'atyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip, ²⁰ ja awanax ja agojnax wyind-sø'jkidip wyinja'widip, ja miku' tyunk ja kyamimaa'dip kyami'ejttip. O pøngapøn myi'ekyidi, ja'ayi tyajotku-jk'ajttip ku ja myigu'uk tyikjø'ødi tyikya'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jotkujk'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinygøjxp abiky ñabyikta'agiyidit. ²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajada'aktip. Tum yø'øbi axøø'kpjotpy yigaappijotpy idø'øn ja chinaa'yin tyiknaxti. Ixyam meets ndukja'myech jadigojk, pøni pøn ja ya'atpi tsinaa'yin ne'egi tpadump niwindem xøøw ja tkapaattit ja Dios kyutujk ma ja yjaa'y ttanitanit.

²² Ku ja Espiritu Santo ndsinaa'yin xuu'mø'øyint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtant, nja'gyujkandit nduda'aky'ajtant, n'amigu'ukjaa'y'ajtant, n'øyjaa'y'ajtant, jøts ja windaay'ajtk ngayiktu'unindit, ²³ nmiyujy'ajtindip ja nmigu'uktøjkti jøts ka'ap ja ngø'øm ja' nyikmajadaajkindit. Nima niwindem, niti kutujk adøm xkadatiidyu'unint yø'øbi øyjaa'y'ajtk. ²⁴ Pøn ja Cristo ja'ajtyidip, tøm dø'øn ja ñamyayi tkrustsumgøjxnidi tuki'iyi ja ka'øyjaa'y'ajtin midi yikmøøt'ajtp. ²⁵ Pø tøm dam adøm ja Espiritu Santo ja jemchinaa'yin xjanch-mø'øyidi, ¿tits ku adøm idø'øn ja ngamibøjkindit pøni ma ja xuu'waa'wa'añidit?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejsint ja tami'ama'at'ajtk.

Nixem niyam nabyudøkiyidi

6 Meets migu'uktøjkti, pøn ja Espiritu Santo yja'tmøøt'ajtkøxyidip, ku xnijawidit ku nidu'uk ja mmigu'uk ja pøky tøm myimajada'agiyi, pa'ay-o'owingøjxp meets idø'øn ja xpudøkidit jaty, jøts jade'en t'awimbettit ja øybi tsinaa'yin jadigojk. Mdabajaa'ñaxtip ku meets nayide'en jotmøñ wyinaty ja pøky mmimajada'akniyidi. ² Nabyudøkiyidi nixem niyam jøts ni'amuki jade'en xmimajada'aktit ja ka'øybi, jabi jade'enxi dø'øn wyinaty xpadundi sam ja Cristo ja kyutujk tnigajpxy.

³ Pøni jaaxi pøn jaa'y midi tyimñamyøja'wiyip, nugo ja kø'øm ñawyindaay'aty. ⁴ Nidu'uk nidu'uk adøm idø'øn kø'øm nnija'wandit ku ja ndsinaa'yin nyiknaxtyindi øy; kuts øy ñayjawiit kø'øm idø'øn ja chinaa'yin ja ñadya'ajawiyit, ka'ap ja myigu'uk yja'ttatøjkiyit. ⁵ Kija' adøm idø'øn ndsinaa'yin ngajpx niwaa'jtsin Dios wyingujkpy.

⁶ Tabudøkidi ja mbikta'aky pøn ja øgyajpxy ømyadya'aky ñanky'ejxyip.

⁷ Kidi kò'òm mnawyindaay'atyidi, jabi ka'axi ja Dios jadi'iñi yiktañ pòn ja nugo taguyatwajnip. Ku tigati n'ukneejpint, nay ja'ayi dò'òn n'ejxmukojmamp nbøk-mukojmamp ku ja xòow ja jumøjt wyinaty tpatni.

⁸ Nayide'ents idò'òn ja tsinaa'yin: ku pøngapøn ja'abi tsinaa'yin nugo tpaduñ midi ja ñe'kx ja kyojpk ja'ayi y'amidøopy, ja o'jkin tigò'øyin idò'òn ja wyinaty pyøk-mujknip kyonmujknip ku ja tiidyu'unin mye'ent kyida'akt. Pønts jade'en tpadump sam ja Espíritu Santo ñadyamidsøkyiyi, nay ja'ayi dò'òn kò'òm mo'ojiyidip ja jujky'ajtin xemikøjxp. ⁹ Ka'ap adøm idò'òn ja xwindsejpidit ku ja øybi tsinaa'yin nnanky'ejxindit, ku jade'en ndu'unindit xjats idò'òn nyikmø'øyindit ja kawinmaabyi kunuu'kxin. ¹⁰ Paty meets idò'òn xun'ett, jøts pøngapøn xpudøkidit winjaa windsojk pøni juuni pyaät'aty. Ja'abi jaa'y idò'òn ne'egi mguidyimyja'dyigø'dyidip midi adøm nmigu'uk'ajtyindip tu'ukpi janchja'wingøjxp.

Ku ja Pablo kyajpx'abajtiñi xjats y'ukajpxwejni y'ukajpxpoo'kxni

¹¹ Kò'òm meets ixyam yikxon ndyimñijayi sam idò'òn pyaät'aty jøts yikxon xja'gyukidit. Ejxti mabaat øts yø nja'ay myøji. ¹² Yø'øbi jaa'y pøn meets mdaguwa'aniyidip ja ejxpajtin ne'kxkøjxp, ja'agøjxp ja ttundi jøts ja øy yik'ejxtit yiknimadya'aktit jøts ka'ap

jade'en pøn chep'ejxyidit chepjawiyidit ku jeexyip ja Cristo yja' ja'ayi tnanky'ixpøjkiyidi ku tø xku'o'jkandi kruskøjxp. ¹³ Øy ja ejxpajtin ne'kxkøjxp tjamøøddi, ka'ats idò'òn ka'pxy kò'òm tpadundi midi ja Moisés kyutujk ñigajpxpy. Kuwani meets ja mdukupøkwə'añiyi ja ejxpajtin ne'kxkøjxp, jøts ja jade'en ja'ayi ñadya'agajpxiyidit ñadya'øyjawiyidit ku meets ja yja' tø xpadøjkiniyidi. ¹⁴ Jøts øts ka'ap ø niti nnadyamikexyiyi, ja'ayi øts tu'ugyi nmøk'ajtin'ajtpy ku ja nwindson'ajtim Jesucristo tø xku'oogi kruskøjxp. Paty øts ja yigaappi naxwii'ñit tsinaa'yin nga'ukmøkpiktakni, nika'ap øts ja nayide'en xukmimajadañi. ¹⁵ Jaa kuxi adøm ja Cristo Jesús møøt nnamyaajyindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjxp; ja' idò'òn ne'egi tump pøni tø ja axøøkpø n'ixmajchindi jøts ja ndsinaa'yin tø nyiktigajchindi.

¹⁶ Wan ja tpaatti tkupøkti ja øy'ajtin kunuu'kx'ajtin pøn ya'at winmaa'ñ tpadundip, jøts møøt ja israelit jaa'dyi pøn idò'òn ja Dios tyimyja'ajtyidip.

¹⁷ Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

¹⁸ Meets migu'uktøjkti, jade'en ø nwa'añ jøts xpaattit xemikøjxp ja Dios kyunuu'kxin. Tiigajpxy idò'òn, jade'en idò'òn ja yjatt.

EFESIOS

Ku ja Pablo tnijayi pøn tjanchja'widip ja nwind-søn'ajtim Jesucristo yja' jam Efeso

1 Øts Pablo'ajtpi, Dios ø kø'øm chojkingøjxp tø xpikta'aky Jesucristo kyudanaabyi jøts ø jade'en xyikugajpxy'aty. Yā'at nøky ja' øts yø ndanija'ayidip ja Efesiit jaā'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo. ² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaajtimp ku Cristo nmøøt'eitin

³ Ngajxajkindip ja Dios midi tyety'ajtpy ja nwind-søn'ajtim Jesucristo, jabi tøts ja kunuu'kxin xmø'øyim ku ja Cristo nmøøt'ijtyim. Ja' y'øy'ajtin tø xanigajx-a'andi mā ja chøøni. ⁴ Namga'anim naxwii'ñit cho'on-dā'aky jøts ja Dios Teety kø'øm xwi'ijxyindi xwigø'øñindi Cristo køjxp ku ja xku'ayo'ombajta'andi, jøts jade'en adøm wā'ats nwingunøjksa'ant ja' wyingu-jkp niti pøky niti kadyeey. ⁵ Windi'ixyip idø'on kø'øm ja Dios Teety ttanibiktaajkiñi jøts ja x'u'nkupøjtkint Jesucristo køjxp. ⁶ Paty ejtp ngajxajkindip ja Dios sā tø tnanky'ijxyi ja myøj kunuu'kxin, ku ja y'U'nk tø tnajtskaxi midi kawinmaañi chøjkpy. ⁷ Ku xtsojknajxyim adøm ja Dios, paty adøm tø xyiknitsøøjkyim ku ja y'U'nk Jesús wyidsuun wyidajxy, jøts y'o'jkingøjxp xpo-jkpi mee'kxyim. ⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin, ⁹ jøts jade'en tø tnanky'ijxyi ja yu'uchwinmaa'ñi midi adøm ja kø'øm tø xanibiktaajkim sā dø'on ja ttunwā'añ. ¹⁰ Jātp idø'on jade'en sā dø'on ja wyinmaa'ñi tø ttanibiktaaggi, kuts ja xøøw kuts ja jumøjt tpaatt, winets ja Dios Teety tuki'iyi ttagidøjkigyøxt ja nwindson'ajtim Jesucristo ti jaty ejtp øy mādsoo, yjanaxwiiñi uk yjatsajpjtøtpyi, jøts ja amuum kø'øm tnigubajk'att.

¹¹ Kuts adøm idø'on ja Cristo nmøøt'ajtyim, windi'ixyip adøm ja xwi'ejna'andi xwigo'onandi ja Dios Teety jøts jade'en xmø'øyindit midi xamidsojkip. Tuki'iyi dø'on ja ttuñ sā ja chojkin tø ttanibiktaaggi. ¹² Tø dø'on ja ttuñ jade'en jøts øøts idø'on ja Dios ndakajxā'akt ja y'øy'ajtin ja myøj'ajtin, jabi øøtsts idø'on jawyeen tø njanchjawi ja Cristo. ¹³ Meets nayide'en, ku xmadowdi ja Dios tyiy'ajtin midi tni-gajpxp ja yiknitsoojkin, jøts ku xjanchja'widøø ja Cristo, jade'en idø'on ja Dios Teety mdamiguy'ejxidøø ja y'E-spiritu Santo, jøts ja myiktami'ejxkapidit jøts ku meets ja Dios mja'atyidi. Jade'ents idø'on ja y'ayuujk tyikniwāajch sam ja jawyeen tø tnigajpxy. ¹⁴ Nay ja Es-

piritu Santo midi meets m'ejxpajtin'ajtpy, ja' myikta'e-jxkaptip ku ja Dios ja myaay tyikwā'kxt. Jade'en ja Dios ttu'unt ku wyinaty tø tyiknitsoojkøjxni midi tø tniwan-guixy. Jade'ents ja Dios yikwindsø'øgit yikwinjawit myøj'ajtingøjxp y'øy'ajtingøjxp.

Ku ja Pablo t'amidøøyp tøktsøøyp ja Dios jøts ja wejin ja ja'gyukin yikmo'odit pøn ja Dios tpadundip

¹⁵ Tø nnijawi ku meets møk ja nwindson'ajtim Jesús x'ajot'aty, ku mee nayide'en øy tsuj ja tsojkin xmø'øy pøn jaty ja Dios ja'ajtiyidip. ¹⁶ Ejtp øts ja Dios ndamø-jawi ndagunuu'kxyjawi ku ja mgunuu'kxyidi, ka' mee nja'dyigøyp, ejtp meets nni'amidowin nnibøktsowin ku ø ndsapkajpxy. ¹⁷ N'amidøøyp øts ja kunuu'kxy Dios Teety midi tyety'ajtpy ja nwindson'ajtim Jesucristo jøts ja mmo'oijyidit ja wejin ja kajin midi yikxon mduk-ja'gyukiyidip sā ja y'ejxi tyiyi. ¹⁸ N'amidøøyp øts nayide'en ja Dios jøts mgujajyidit mgudø'kxyidit, jøts jade'en xnijawidit ti dø'on m'awejxtip midi tø myiktaniwāadsowidi, ku janch kawinmaañi ja māay mi-di ja Dios tyagumaawyampy pøn ja yja'ajtpy, ¹⁹ jøts nayide'en ø n'amidøyp ja Dios jøts xnijawidit ku niti kya'adaniyi kya'adsø'øgiyi ku kawinmaañi ja Dios myøk'ajtin midi adøm ja xabudøjka'amp ku adøm ja njanchja'wa'andit, ²⁰ nay ja'abi møk'ajtin idø'on midi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajtnāā jøts ja Dios Teety y'aga'ngyøjø'øm ja kutujktaajk myøøjyi. ²¹ Jawani møj idø'on ja Cristo yikpiktaajky, nipøn windsøn nipøn yikutujkpi tkami'aguijpxy'aty yā naxwiiñ jøts tsajpjtøp, ixyam jøts xemikøjxp nipøn ja tkamibaat'att. ²² Tuki'iyi dø'on midi ja Dios tø tyikøyp, ja Cristo dø'on tni-tanaagyøjxp, ja' idø'on tnigubajk'ajtp niduki'iyi pøn jaty ja Dios tjanchja'widip. ²³ Jade'en sā tu'uk ja jaā'y ñine'kx kyaka'pxyi pøni ka'ap ja kyubajk ja te, nayide'en idø'on ja janchja'wibitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myøk'ajtin myø'øyidi pø ja'axi tuki'iyi tyik'e-jtp tyiknajxp ja nāajx ja tsajp.

Tø ja Dios xyiknitsøøjkyim chojkingøjxp

2 Tø meets m'anmija'win y'ats'ookti ku mdsøønidit pøky'agujkpy, jøts tø yjujkyøjkti ja m'anmija'win jadigojk Cristo køjxp. ² Ku meets y'ijty xpadundi ja ka'øwynmaa'ñi midi tpadundip pøn ja Dios tka'ijxyidip, ku ja miku'windsøn yja' xpabøjkidi midi tkajxp ja tyumbitøjk jøts ja t'atskajpxjot'amøjkidit pøn ja Dios tk-abadundip. ³ Nayide'en øø tø njāā'y'aty samdam

meets. Tum ja' øøts y'ijty ndumpy ja axøøk ja kya'øybi midi ja ne'kx y'amidøøpy, jøts tum ja' midi yigaap pid-sømp winmaa'ñjøtpy. Paty øøts idø'on xjapaat'aty jøts øøts ja møj ayo'on nyikmo'ot nayide'en sam o pøn pojkitumbi. ⁴ Janch møj ja Dios pya'ayo'owin ⁵ ku tø tyikjujkyiky adøm ja n'anmija'win Cristo køjxp, øy adøm ja axøøkpi ja yigaappi tø yjayik'o'jkniyi ja n'anmija'win. Jade'ents idø'on niduki'iyi adøm tø nnitsoojk-nandi ku ja Dios y'øy'ajtin myøji. ⁶ Ku ja Dios tø tyikjujkyiky ja Jesucristo, nayide'en adøm idø'on ja ñamyayi møøt njujukpyikyim. Nayide'en idø'on ja tpaaty ndejint ku ja tsajpjøtpy pyatøjkiñi møøt adøm ja nniikxyim jøts ja jap møøt n'ejtint. ⁷ Paty yø Dios Teety jade'en ttuun jøts t'ejxtit tñijawidit pøni ti pøni pøn wyinaty memp kidakp, jøts jade'en tñanky'ejxit mabaat ja chojkin mabaat ja y'øy'ajtin tø xmø'øyim Cristo køjxp. ⁸ Jabi ja Dios chojkingøjxpxi meets tø mnitsø'øky ku xyiktundi ja mjanchja'win. Ka' meets kø'øm xmøøt'aty ja ñankñitso'ok'ajti, ja Dios ja tyajkp. ⁹ Ka'ap ja n'øchi-ñaay'in xyiknitso'ok'ajtit midi adøm kø'øm njatu'uñindip, paty ja nganadyamikajxandit. ¹⁰ Tø ja Dios Teety xanibiktaajkim Jesucristo køjxp jøts ja øchi-ñaay'in ndu'unint sayim ja wyinmaa'ñ ja tmøøt'aty.

Ja øy'ajtin midi ja Dios Teety tø xmø'øyim Cristo køjxp

¹¹ Jā'myatsti sã meets y'ijty mjatti mgubatti ku meets ja israelit jaa'y xkamigu'uk'attinim, kø'ømyixi ja y'ijty ñadyamøjawiidi ja Dios y'ejxpajtin midi pyiktaktip ñe'kxkøjxp. Paty meets wenk myiknimadya'aky wenk myikniwinmayi ja agøjxp ku xkamøøt'atti ja'abi ejxpajtin. ¹² Agooststupy aduktyupy meets ojts mdsøøni, ni xkanijawidi pøni pøn pøni ti ja tø tñimiñ midi tyejtíp Cristo. Aduky meets ja mduu', ts'kxy meets ja mduu' mā y'ukyknijawit ja øgyajpxy ja ømyadya'aky pøni sadam ja Dios t'ødyunwa'añ ja naxwii'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xka-jagyapti yā naxwiiñ. ¹³ Ixyamts meets ja Jesucristo mja'ajtniyidi y'o'jkingøjxp, o meets jagam jixkø'øm ja mdsinaay'in tø xyiknaxy. ¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'on tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy. ¹⁵ Kuts ja y'o'jky jam kruskøjxp, jade'ents idø'on tyikudigøjyi ja Moisés kyutujk midi kuwani yikpadump y'ijty, midi tyamøk'ajttip ja israelit jaa'yiyi. Jøts jade'en ja jadu'uk tsinaay'in tyiktso'ondaajky, jøts jade'en tyiknamyujki ja israelit jaa'y møøt pøn ka'israelitjaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiiñ jøts ja øgyajpxy ømyadya'aky tñigajpxy sã dø'on ja øy'ajtin nbaajint midi meets y'ijty mganija'wipnim, jøts midi øøts tø ngaja'gyuki, øy øøts ja tø nja'ixy, øy øøts ja tø njamøøt'aty. ¹⁸ Jabi Cristits adøm xuu'mø'øyindip sudso ja Dios Teety nbaajtindit ni'amuki wan t'israelit-jaa'yidi wan tka'israelitjaa'yidi, jøts tu'ugyi adøm idø'on ja Espiritu Santo myøk'ajtin nyiktu'uñimp.

¹⁹ Migugajp ja'winnyidip meets ixyam niduki'iyi ja Dios janchja'wibidi, ka'ap ukjade'eni sam y'ijty. Ja Dios meets idø'on mja'ajtniyidip møøt ja'adi pøn jaty ja y'u'nkja'wip. ²⁰ Jade'en idø'on tpaaty ja Dios kyajp sam tu'uk ja møj tøjki midi møj tsaa tø yiktapojtsøøñ; jøts jade'en ja Cristo sam ja møj tsaa midi yiktapojtsø'omp, jøts ja kyudanaabyitøjk møøt ja kyu'aaw jade'endi sam ja mutsk tsaa unajkindi. ²¹ Adøm idø'on tsap-tøjk'ajtindip ndejint pøn tjanchja'widip ja Dios. Kuts ja jaa'y pøn tka'ijxyidip ja Dios jøts ja tjanchja'wiñidi, jade'ents adøm ja ndsaptøjk myøjandi midi ndejint tø yikpojtsøøñ Cristo køjxp. ²² Nayide'en meets idø'on ja Dios mja'ajtniyidi jøts tø mduktatøjkmidi ja y'E-spiritu Santo.

Ku ja Pablo tñigugajpxy'aty ja øgyajpxy ja øy'ayuujk jøts ttukmadøy pøn ka'israelit jaa'dyi

3 Ixyam ø puxøjkjøtpy ndsøøni ja agøjxp ku meets tø ndukmadøy ja Jesucristo ja yja' ku meets nayide'en mbaat'aty xpaatt ja' y'øy'ajtin. ² Pø mni-ja'wiñip meets ku øts ja Dios y'øy'ajtingøjxp tø xpik-ta'aky jøts øts ja yja' nniigajpxit jøts meets ja øchi-ñaay'in xyiknaxnit. ³ Sam meets jap nøkyjøtpy jawy-eeen tø nduk'ixy tø nduknijawi ku øts ja Dios tø xukmadøy ja yu'uch winmaa'ñ, ku meets nayide'en xpaatt ja' y'øy'ajtin sam israelit jaa'y ja tø tpaatti. ⁴ Ku ja nøky xkajpxtit, jap meets idø'on x'ext xñijawit ku øts ja Dios yu'uch winmaa'ñ nniija'wiyi midi ja Cristo yja' tni-gajpxip. ⁵ Nijuuni ja'abi winmaa'ñ tø yiknigajpxy tø yiknijawi, ixyamnim idø'on ja Dios jade'en tø ttuk'ixy ja kyudanaabyitøjkti ja kyugajpxtyøjkti ku ja Espiritu Santo tø y'agajpxiniyidi. Ja'abi jaa'y ja'adi, pøn ja Dios tø ñadyamiyojxniyidi. ⁶ Yā'at idø'on yu'uch wyin-maa'ñ'ajtp midi ja Dios myøøt'ajtpy: ku dø'on jade'en tjanchjawidit ja øgyajpxy ja ømyadya'aky midi xyiknit-so'ok'ajtindip, winets jade'en ni'amuki tpaattit ja Dios myaa'y ja israelit jaa'dyi sam nayide'en pøn ka'israelit jaa'dyi. Jøts jade'en ñamyayidit jøts tøkøtit ja' midi Dios tø tni'adsowi Jesucristo køjxp.

⁷ Ka'ap øts xjapaat'aty ku øts ja øy'ajtin tø nyikmø'øy jøts øts ja øgyajpxy ja ømyadya'aky tu'ugyi ndu'unt, jabi jade'ents idø'on ja Dios ja myøk'ajtin tø xamid-søky. ⁸ Meets niduki'iyi pøn ja Dios ja'ajtidip, øts idø'on nayja'wiyip tyimyutsk, jøts øts jade'en ja Dios tø xanipiky jøts ndukmado'odit pøn ka'israelit jaa'dyi sã ja myøji ja Cristo y'øy'ajtin. ⁹ Tø øts ja Dios jade'en xanipiky jøts øts ja naxwii'ñit jaa'y nduk'ext ndukni-jawit sã dø'on ja yu'uch winmaa'ñ windi'ixyip tø ttanibiktaajkiñi, jaayip ku ja naxwii'ñit tyiktso'ondaajky. ¹⁰ Paty idø'on ja jade'en yjajty, jøts ja yiktuk'ext yik-tuknijawidit ja ankilistøjkti jøts nayide'en pøn jaty møj'ajttip jap tsajpjøtpy mabaat idø'on ja Dios ñi-jawi'ajtin yja'aty. Jade'en ja tñanky'ijxyi ku ja tøkkmuky tkonmuky ja øybi ka'øybi jaa'y, tu'ugyi tñankñamyuky janchja'wingøjxp. ¹¹ Jade'en ja tø ttuñ sã ja windi'ixyip tø ttanibiktaajkiñi ku ja nwindson'ajtim Jesucristo jade'en ja chinaay'in tñanky'ijxyi tñankñijawiyi. ¹² Ku adøm ja nwindson'ajtim Jesucristo njanchja'wim, agujk

jotkujk adøm nwingunøjkxiñant ja Dios Teety, niti tsø'øgi niti jøpjaw'i ja', ja'ayi nmøk'ajtim ja njanch-jā'win. ¹³ Paty meets nnøjmi jøts ka'ap mjotmay'ooktit ku øts yap puxøjkjøtpy n'ayøy meets køjxp. Jotkujk meets idø'øn ne'egi mnayjawiyidit, jabi jade'ents idø'øn ja Dios yja' yikmijaty.

Ja Cristo chojkin

¹⁴ Ku nja'myatskixy midi ja Dios tø ttuñ, jats øts jade'en ja Dios Teety y'øy'ajtin ngunuu'kxyjā'wiyi pøn tyety'ajtpy ja nwindson'ajtim Jesucristo, ¹⁵ jøts pøn tyajkp ja wyinmaa'ñ ja yjujky'ajtin jap tsajpjøtpy sam naxwiiñ. ¹⁶ N'amidøøpy øts ja Dios Teety ja myøk'ajtin midi myøøt'ajtpy kawinmaa'ñi jøts ttamigaxit ja Espiritu Santo, jøts jade'en myikjotmøk'atiyidit.

¹⁷ N'amidøøpy øts jøts jam m'anmija'wingøjxp y'ettit xemikøjxp ja Cristo jade'en ku janchjā'win xmøøt'atti, jøts jade'en ja tsojkin møk xmøøt'attit midi ja Dios mdamiyoxtip, ¹⁸ jøts jade'en xjā'gyukidit møøt pøn tpabøjktip ja nwindson'ajtim Jesucristo mabaat idø'øn myøji ja chojkin midi kawinmaa'ñi. ¹⁹ Ni'amido'ojip meets jits x'ejxtit xnijawidit ja'abi tsojkin jøts jade'en tuki'iyi mdatøjkigyøjxiyidit ja Dios, øy ja ka' tyimyikni-jawigyixy mabaat idø'øn ja myøji.

²⁰ Ixyamts idø'øn pyaāt'atyī jøts adøm ja Dios ndagunuu'kxyjā'wa'ant ndamøjā'wa'ant ja'agøjxp ku møj ja myøk'ajtin midi tø xjamø'øyim. Ka'ap adøm ja nwinmaa'ñ myajadaajkyim, ni ka'baat ja yikjā'gyuki mabaat idø'øn ja myøk'ajtin myajada'aky midi adøm xyik-tu'unimp. ²¹ iWan twindsø'jka'andi twinjā'wa'andi ja Dios Teety xemikøjxp ni'amuki pøn jaty ja janchjā'wiyip Cristo køjxp! Jade'en idø'øn ja yjatt.

Tu'ugyi adøm nnayjā'wiyindi Espiritu Santo køjxp

4 Ja nwindson'ajtimgøjxp øts tø nyiktsumy, paty meets n'amidøy nbøktsøy jøts øy yikxon mjaā'y'attit sam idø'øn pyaāt'atyī ttu'undit pøn ja Dios tø wyi'ijxyidi wyigøñidi, mā meets idø'øn nayide'en tø myikpiktakmidit. ² Tudā'aky'atti, møøt'atti ja maa'kxujkin; nachokidi nixem niyam, kidi xa'ambøkti ku ti ku sā mjatti. ³ Tu'ugyi m'ettit, ja Espiritu Santo mbudøkiyidip jøts jade'en xemikøjxp y'ett ja jotkujk'ajtin. ⁴ Tu'ukpi jāā'y adøm pøn tpadundip ja Dios, tu'ugyi ja Espiritu Santo jøts tu'ugyi nayide'en ja awejxin nmøøt'ajtyim midi ja Dios tø tni'adsowi. ⁵ Tu'ugyi adøm ja nwindson'ajtim, jøts tu'ugyi ja njanchjā'win, jøts ja nnøbajtin, ⁶ tu'uk ja Dios midi tnideety'ajtp niduki'iyi tuknax. Ja' tñigubajk'ajtp niduki'iyi, adømgøjxp ja tñanky'ijxyi midi ja tyunwampy, jøts møøt ja y'ity pøn jaty ja yja'ajtpy.

⁷ Kija' adøm idø'øn tø nyiktanibiktaajkindi ja ndunkjøjpp, sam ja Cristo kø'øm tta'ejxi, jade'en ja tø tyaky. ⁸ Paty ja Dios jade'en ja kyajpxy wyaāñ ku ja nwindson'ajtim wyimbijty jadigojk tsajpjøtpy ku tyik'awa'atspidsømgijxy pøn ja miku' wyinajty tø myimajadaajkniyidi jøts tmo'ot ja myøk'ajtin ja naxwii'ñit jāā'y.

⁹ zTits idø'øn jade'en tyijpy ku dø'øn ñiimy ku wyim-bijty jadigojk jap tsajpjøtpy? Ja' idø'øn ku yā myiñ naxwiiñ jøts jade'en ja amutsk'ajtin tpaajty. ¹⁰ Nay ja' idø'øn patøjkiñi tsajpjøtpy midi yā atsmeen naxwiiñ, jøts jade'en yikpiktaajkni møjwindsøn jøts o mā jade'en tyiknigaxø'økt ja myøk'ajtin. ¹¹ Jøts jade'en nidu'uk nidu'uk tmøøy kija' ja jāā'y tyunkjøjpp, jam pøn kudanaabyitøjkti, jam pøn kugajpxtyøjkmidi, pøn ja øgyajpxy ømyadyā'aky tyikyø'omyidip tyiknaxmidip, jøts jam pøn kajpxwejmidi yik'ixpøjkmidi. ¹² Jade'en ja yjāā'y ja ojts tuu'mø'øy sudso ja tyunkjøjpp ja tpadu'undit, jøts jade'en myiwenit ja yjanchjā'win pøn jaty Cristo yja'ajtpy, ¹³ jøts kunim adøm ja yikxon ni'amuki ni'aga'pxi nnija'wa'andit ja Dios U'nk janchjā'wingøjxp. Winetnimts ja nwinmaa'ñ myøktaajkindit jøtsnim idø'øn iiy nayide'en ndu'unint sam ja Cristo.

¹⁴ Ka'ap adøm ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadøy, øy ja yjanchi kyajanchi myøjpiktakpy ja'. ¹⁵ Ku adøm idø'øn ja Cristo n'aduunaxkøjxint, jaanimts idø'øn nmøøt'ajtin ja tsojkin jøts jade'en nduk'ejxna'ant nduknija'wa'ant ja nmigu'uk ja tyi'ajtin, jabi Cristits adøm xñigubajtimp. ¹⁶ Ku ja tñigubajk'aty, sā dø'øn øy ñijky ñaxy. Pøni sats adøm nidu'uk nidu'uk tø nyik-mø'øyim ja ndunkjøjpp, jade'en adøm ja xpuðøjka'amp jøts øy møk y'ettit ja yjanchjā'win, jøts myøjidit myayidit ja wyinmaa'ndyi, tyatøjkiniyidit ja tsojkin.

Ja jemchinaā'yin midi ja Cristo tø xmø'øyim

¹⁷ Yā'ats øts idø'øn nnigajpxpy nwindson'ajtimgøjxp: jøts ka'ap jade'en m'uktsinaañidit sam ja chøønidit pøn tka'ejx'ajttip ja Dios, midi tmøjpktaajktip ja katumbi winmaa'ñ, ¹⁸ jøts agoostujpy abe'etstujpy ja yjā'gyuki tmøøt'atti. Ka'ap ja tmøøt'atti ja jujky'ajtin midi ja Dios yajkpy, ku ja kø'øm ka' ttsokti ku ja kø'øm ka' tni-jāwiywya'andi. ¹⁹ Tø ja chø'ødyu'un'ajtin ja tyiktigøøñidi jøts jam tø ñagyyajkniyidi mā jam ja y'axøøkpi yigaap-pi yiktuñ. ²⁰ Ka' meets jade'en ja Cristo yja' tø mduk'i-jxyiyidi tø mduknijawiyidi, ²¹ pøni tødam meets idø'øn ja xjanchpatmadoji ja yja' ku dø'øn ja jade'en ka' wya'āñ, ku dø'øn tø myiktukmadowdi ja tyi'ajtin. ²² Majtstutnidi tuki'iyi pøni sā y'ijty ja mdsinaā'yin xyik-naxti, ku xpadundi ja y'øybi kya'øybi midi pidsømp winmaa'ñjøtpy, midi mnadyawindaay'ajtidip kø'øm. ²³ Myikjemyiñidip meets idø'øn ja m'āaw ja mjoojt sam ja mwinmaa'yindi nayide'en, ²⁴ jøts jade'en xpøjknidit ja jemchinaā'yin sam ja Dios kø'øm tø mdamidsokyidi. Jade'ents ja øchinaā'yin ñigaxi'iky ku øy ku tsuj ja mdsinaā'yin xyiknaxtit, niti pøky niti kadyeey.

²⁵ Paty meets ka' m'uktaay'ajtnit; ku mmigu'uk xmi-gajpxt tyi janch idø'øn ja møøt mmadyā'akt, jabi tu'ugyits adøm idø'øn ja janchjā'win nbaduu'ñim.

²⁶ Pøni m'ambøjktip, kidi mñankyøkyetyidi; ka'ap ja m'aki xyikta'ānidit. ²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajstutni jøts ne'egi tyundøjkiñit, jøts jade'en ja ødyunk ttu'unt jøts jade'en tpudøkit pøn ayoop.

²⁹ Ka'ap axøøkpí kajpxy axøøkpí madya'aky xyik-tu'undit, ja øybi madya'aky ne'egi xyiktu'undit jøts jade'en ja mmigu'uk xmo'odit ja tigajtsin jøts ja kunuu'kxy'ajtin. ³⁰ Kidi meets xyikjotmay'øøky ja Dios ja y'Espiritu Santo, ja'ats meets idø'øn m'ejxpajtin'ajtpy jøts jade'en ja Dios m'ejxkapidit ku meets ja mja'atyí, ixyam sam wyinaty ku mmøøgyøjxniyidit tuki'iyi ja nitso'ok'ajtin.

³¹ Majstutnidi tuki'iyi ja m'aki, kidi mjotma'atti, ja pøjpi tsä'pxpi madya'aky jagam ja yiktanidi sam tuki'iyi ja' midi ka'øy nayide'en. ³² Yikxon meets idø'øn ne'egi m'øy'att, mnabya'ayowidip meets, jøts nayide'en mnamyaa'kxukiyyidit jade'en sam meets ja Dios Teety tø mmee'kxyiyidi Cristo køjxp.

Sä dø'øn ja chinaa'yin ja tyiknaxtit pøn ja Dios u'nk'ajtiyidip

5 Kawinmaani meets idø'øn ja Dios Teety md-søkyidi paty meets idø'øn ja xpadu'unt sam ja mutsk unaj'jk tpadundi ja tyeety. ² Nan'ky'ejxidi ja md-sojkin nayide'en sam ja Cristo xtsøjkyindi jøts ku ja xku'ayo'owim adøm nbøkyøjxp. Jade'ents ja Dios t'øy-jä'wiyii'n kø'øm ku ja jade'en ttuun.

³ Ixmatskøjxti tuki'iyi ja kya'øybi. Kidi ø pøngapøn møøt mnamyøøt'atyidi, kidi xniwängøjxwa'andi tuki'iyi ja jujky'ajtin midi yä naxwii'n najxp, jabi ja Diosxi meets ja'ayi mja'ajtniyidip. ⁴ Kidi ja axøøkpí ja yiktsø'ødyumbi madya'aky xmøøt'atti, jabi ka'axi jade'embi pyaat'atyiyi. Ja Dios meets idø'øn ne'egi ja y'øy'ajtin mnimadyajkidip. ⁵ Tøts meets xnijawi ku o pøn yaa'dyøjk o pøn tøøxyøjk ñamyøøt'ajtkøjyidi, ok pønts ja axøøkpí yigaappi tyumpy, ok pønts ne'egi ttsojpk midi ja naxwii'ñit yajkpy, ka'apts ja mibaat pyaat'atyí tpaatt ja Dios kyutujk mä ja Cristo ttanitanit ja yjaa'y. Jabi wenkpi diosxi dø'øn ndejint y'ajot'ajtnip pøn ja naxwii'ñit øy'ajtin ttajotmay'oo'kp. ⁶ Kidi xyikmajada'akti ja win'øømbidi pøn wandip ku yø'øbi win-maa'ñ y'øyi jøts xpadu'undit, pø møkts ja Dios ja tyikastigipaat pøn ja kabaduujnip. ⁷ Ixmatskøjxti tuki'iyi yø'øbi jaa'y.

⁸ Jabi jaj agujkpyts meets mdsinaani kuts ja nwind-søn'ajtim møøt m'etti. Ka'ap jade'en ja mdsinaa'yin x'ukyiknaxnidi sam y'ijtyin. Ku ja nwind-søn'ajtim jade'en ja kuno'jkin xmø'øyim, jade'ents idø'øn nnanky'ejxint nnankñija'wa'ant ja øybi tsinaa'yin, sam idø'øn ndejint ja øy'ajtin ja tiy'ajtin jøts midi paat'ajtip ndu'unim. Yikyø'ødyi dø'øn jade'en ja mdunk. ¹⁰ Tun meets ja may'ajt jøts x'ejxtit xnijawidit midi'ibi dø'øn ja Dios chøjkpy. ¹¹ Kidi xundi ja' midi katump, ja' yø ttundip pøn agootstujpy tsinaadyip; ne'egi pudøki meets idø'øn ja' jøts xukpaattit ja kuxiijndya'aky'ajtin. ¹² Janch tsø'ødyu'unin idø'øn ja ñaxy ku adøm nni-madyajkindit sä dø'øn ja chinaa'yin amaa'tsk tyiknaxti. ¹³ Øy idø'øn ja nayide'en tpaaty ku adøm ndukja'-gyukandit mabaat idø'øn ja chinaa'yin ja kya'øyidi, wan wyinaty jade'en ja Dios o pøn tpabøjkní. ¹⁴ Paty idø'øn ja wijkyajpxy wyä'añ.

Wejnidi kajnidi meets;

kidi agootstujpy abe'etstujpy m'uktsinaañidi, ja Cristits ja kuno'jkin kudøø'kxin tyakp.

¹⁵ Patyts meets idø'øn øy x'ejxtit sä dø'øn ja mdsi-naa'yin xyiknaxtit. Kidi jade'en mdsøonidi sam pøn kube'ets kumon, wijy kejy xyiknaxtit. ¹⁶ Wijy kejy mnabyikta'agiyidit jøts tum ja øybi ttundi, jabi ja ka'øy-bixi yjawi ixyam nankmyøjtøkiwyajniyip. ¹⁷ Kidi mgawinmaa'mbyaatti, ixa'adi nijawidi pøni ti dø'øn ja nwind-søn'ajtim tø mdamidsøkyidi. ¹⁸ Kidi mnadyamiyøxyidi ja nøø ja pa'ak ja amu'ukyjaa'y'ajtin midi ja windigø'øyin tyajkp, yikmøj'atti yikmajada'akti, nadyamiyøjxidi ne'egi ja Espiritu Santo. ¹⁹ Ja nwind-søn'ajtim idø'øn ne'egi mnimadya'aktip, ku ja Salmos xkajpxtit jøts ja y'øøjik xawin'ø'ødit. Tu'ugyi ja m'aaaw ja mjoojt xpikta'aktit. ²⁰ Nwind-søn'ajtim Jesucristo køjxp xamøja'wikyunaxtit ja Dios Teety ku ja kunuu'kxin tyaky køx kida'ak.

Sä dø'øn chøonidit ja teety ja taak ja u'nk ja unaj'jk pøn ja Cristo tpadundip

²¹ Jade'ents ja Dios xawindsø'øgidit ku nixem niyam mnagyupøkidit.

²² Ja tøøxyøjkti pøn amajtskti ja ñiyaa'y pyadu'undip, nayide'en idø'øn sam ja nwind-søn'ajtim tpadu'undit.

²³ Ja yaa'dyøjk tnigubajk'ajtp ja ñidø'øxy, nayide'en sam ja Cristo tnigubajk'aty ja yjaa'y, pøn nayide'en yiknitsøjkpy. ²⁴ Jade'en sam ja Cristo kyupiky'atyiyi ja yjaa'y, nayide'ents idø'øn ja amajtsk tøøxyøjkti ja ñiyaa'y tkupiky'ajtmidit tuki'iyi.

²⁵ Ja amajtsk yaa'dyøjkti, choktip ja ñidø'øxy ja nayide'en sam ja Cristo tø ttsøky ja yjaa'y ku ttamiyøxy ja yjujky'ajtin. ²⁶ Paty ja jade'en ttuun jøts tjibijky tjigøøñ ja yjaa'y niti pøky niti kadyeey, tyikwatsni jade'en nøbajtingøjxp ku ja øgyajpxy ømyadya'aky yikpaduñ yikjanchjawi, ²⁷ jøts jade'en møøt y'ett jøts jade'en tnanky'ejxit tsuj wa'ats, ni tu'uk kya'øybi tyik-wingaxø'økt. ²⁸ Jade'ents idø'øn ja yaa'dyøjk ttsoktit ja ñidø'øxy sam t'ejx'etti ja kyø'ømne'kx ja kyø'ømgøjpk. Pøn idø'øn ja ñidø'øxy ttsojpk kø'øm idø'øn ja ñadyamidsøkyi. ²⁹ Pø ka'axi pøn ja ñe'kx tmidsep'aty, y'ejx'ijtpy ja' jøts yjujky'ett chuxk'ett; tyimñayide'en idø'øn ja Cristo ttunmi møøt ja yjaa'y, ³⁰ jabi ñe'kx'ajtpyxi dø'øn ja ndejint ja yjaa'y mä adøm nayide'en tø nyikpiktaajkyindi mä dø'øn ndejint adøm nbajk'ajtyindi nxixy'ajtyindi. ³¹ Sam jap nøkyijxpy wyä'añ: "Myajt-stu'utp ja yaa'dyøjk ja tyeety ja tyaak jøts jade'en ja ñidø'øxy møøt y'ett ejximdam tu'ukpi jaa'y." ³² Nni-ja'wip øts ku yä'atpi madya'aky janchtyimchep, ja' idø'øn yø wyä'añ jøts yikja'gyukit waani sä dø'øn adøm ja Cristo møøt tu'ugyi njaa'y'ajtyim.

³³ Nayide'ents idø'øn tnigajpxmi ku nidu'uk nidu'uk ja yaa'dyøjk ttsoktit ja ñidø'øxy sam kø'øm ñabya'ayøyidi, jøts nayide'en ja tøøxyøjk tka-jpxkyupøktit ja ñiyaa'y.

6 U'nk unaj'jkti, ja' meets idø'øn mdunkjøøjp'ajtpy ku ja mdeety xpadu'undit. Jade'en xyiknigaxø'øk-tit ku meets ja Dios xjanchjawi, jade'en idø'øn pyaat'atyí. ² Ja myidu'ukpi ka'amä'ayin midi myøøt'ajt-

py ja awejxin, ya'at idø'on ja': "Windsø'øgi ja mdeety jøts ja mdaak, ³ jøts jade'en øy jotkujk xyiknaxt jøts yo'ont ja mdsinaa'yin ya naxwiiñ."

⁴ Meets u'nkteetyi, kidi o tigati m'u'nk xa'ojti, ots ja jade'en mmidsepwa'anidit jøts ka'ap m'ukyika-jpxkyupøjknidit. Ja'gyuki køjpx meets idø'on ja ne'egi møøt mgajpxt mmadya'akt jøts jade'en xuk'ejxtit xuknijawidit ja nwindson'ajtim ja tyiy'ajtin.

⁵ Tumbitøjkti, mimadowdi ja mwindsøndi ya naxwiiñ. Windsø'øgidi, padundi tuki'iyi midi ñi'ane'empy sam idø'on pyaat'atyi nmidu'unint ja Cristo.

⁶ Tungøjxti ejtp midi y'ane'empy, ka'ap jaayi yijy mnabyikta'agidit ku ja m'ixyidi jøts jade'en ñadyijyi myikajxa'aktit. Jade'ents idø'on ne'egi xu'undit sam ndejint ja Cristo yikmiduñ, jøts tuki'iyi ja m'aa'w ja mjoojt xpikta'aktit, jøts jade'en ja Dios yja' xpaduu-ñidit midi kø'øm tø ttanibiktaagi. ⁷ Kidi mdunk xuiñ a'aka jot'aka, ja nwindson'ajtim idø'on ne'egi mdawindsø'øgip jøts ka' x'ixa'at ja jaa'y kyajxajkin.

⁸ Pø tøts xnijawidi ku adøm nidu'uk nidu'uk xku-maa'yin ja nwindson'ajtim pøni sa adøm ya øy tø ndu'uñim, wan pøn awa'atstum ka'awa'atstum tø tyik-naxy.

⁹ Meets yiktumbitøjkti, yikxon meets ja mdumbi ana'am, kidi xwinwopti xjøjwopti. Ja'myats meets ku meets ja nwindson'ajtim nayide'en xmidunmi midi tsajpjøtpy tsinaapy, jøts ka'ap ja' twi'ixy twigøñ, tuknax adømdi ja' wyingujkp, wan tumbi tkatumbi.

Ja nigubojkin midi myøøt'ajttip pøn ja Cristo tjanch-ja'widip

¹⁰ Ixyam migu'uktøjkti, yikmøkidi ja møk'ajtin midi tø mdatøkiyidi ku ja nwindson'ajtim xmøøt'atti. ¹¹ A'ejxidi abaadidi ja mnigubojkin midi ja Dios yajkpy, jøts jade'en møk xwindanidit ja miku' jøts ka' xyikma-jada'aktit ja tyaa'yajtin. ¹² Ka'axi adøm nmøøtseptuñim ja jaa'y, ja'ats adøm møøt ja tsep nyiknajxyim pøn kayik'ejpx kayiktomp, midi yiktseptump, ku ja tnigubajk'aty tuki'iyi ja kya'øbyi ya naxwiiñ pøn ja Dios yja' tkatsojkip. ¹³ Paty meets x'ejxmukt xkonmukt tuki'iyi ja nigubojkin midi ja Dios yajkpy, jøts jade'en xmimajada'aktit wyinaty ku ja miku' ja kya'ø'yajtin møk tyikmiñ. Kuts ja jade'en xu'undit, møk mda'andit. ¹⁴ Møk mnabyikta'agidit, ja' møk'atti ja tiy'ajtin

nayide'en ndejint sam ku nnachujma'ant, møk ndu'unint. Ja øchinaa'yin ja tiichinaa'yin midi mee mdumpy, ja' mnadyagubokiyidip sam ja tseptumbi yiknitsø'øgyi ja pujx midi kyachwiiñ. ¹⁵ Nay'a'ejxyidi nay'abaadiyidi jøts xkajpxyø'ødyit ja øgyajpxy ja ømyadya'aky midi ja ø'yajtin yajkpy, tyimñayide'en ndejint xu'undit sam ja soldadi ja kyø'øk ttawa'agi jøts jade'en t'a'ejxi ja tsep. ¹⁶ Yø janchja'wints idø'on ne'egi mmøøt'attip jøts ka' sa mjattit o ti o sa mjatuñidi ja miku'. Jade'en idø'on ndejint mnigubokiyidit sam tu'uk ja møj pujx tkayiknaxy ja tsujxjøjpx ja tsujxpa' ku ja soldadi ja pujx ñadyagubøkyi. ¹⁷ Janchjawidi ja yiknit-so'ok'ajtin jøts jade'en ja m'anmija'win niti nisa kyajat-tit, jade'en n'ukpiktaajkint sam tu'uk ja soldadi pyu-jxkujup y'adaniyi. Tamøk'atti ja øgyajpxy ja ømyadya'aky midi ja Espiritu Santo mmøøjyidip jøts jade'en xniguboktit ja tiy'ajtin ja ø'yajtin sam ndejint ja soldadi ja y'espadi ja chinaa'yin yiknitsø'øgyi. ¹⁸ Dios'a-jot'ajtingøjpx meets ya'at xungøxt, jøts ja Dios x'amido'odit xpøktso'odit tum ja y'øbyi midi ja Espiritu Santo kypijjky. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jaty ja Dios yja'ajtpy. ¹⁹ Ni'amido'owidik øts nibøktso'owidik øts nayide'en jøts ja Dios xmo'ot ja win-maa'ñ jøts øts agujk jotkujk nnigajpxt ja ñitso'ok'ajtin midi y'ijty ja Dios kyananky'ejxipniim. ²⁰ Tø øts ja Dios xnajtskaxi kugajpxy'ajtpi, ja'agøjpx ø tø nyiktsumy. Amidowdi ja Dios jøts øts tuki'iyi nyiktungøxt ja møk'ajtin sa dø'on pyaat'atyi ku øts yø'øbi winmaa'ñ nnanky'ejxyit nnankñijawiyit.

Ja kajpxpoo'kxin midi tyagugøjxiñip

²¹ Yø Tíquico, yø' idø'on mduknija'wigyøxyidip pøni ti pøni sa øts idø'on yam nduñ. Adøm nmigu'uk yø' pøn øts yam møk ja pudøjkin xmøøpy jøts jade'en ja nwindson'ajtim Jesucristo yja' nyikmøjit nyikaja'it. ²² Paty meets ndanigaxi, jøts mdukmadowiyidit sa øøts idø'on yam jøts øøts jade'en xajotkujk'att.

²³ Paat meets migu'uktøjkti ja tuda'aky'ajtin, ja tsojkin møøt ja janchja'win midi ja Dios Teety ñajtskajxip ñajts'ejxip møøt ja nwindson'ajtim Jesucristo. ²⁴ Jøts Dios Teety ja kunuu'kxidip pøn ja chojkin tø ttamiyoxti ja nwindson'ajtim Jesucristo xemikøjpx. Tigyajpxy idø'on, jade'en idø'on yjatt.

FILIPENSES

Ku ja Pablo jap puxøjkjøtpy tnijayi pøn tjanchja'widip ja nwindson'ajtim Jesucristo yja' jam Filipos kajpxkøjxp

1 Pablo jøts ja Timoteo, øøts nwindson'ajtim Jesucristo nwindson'ajtpy. İxyamts meets ja nøky tu'uk ndanijayi niwine'en ja Dios Teety mja'atyidi jam Filipos kajpjotp, møøt ja windsøndøjkti jøts ja møjaa'dyøjkti, niduki'iyi wine'en møøt m'etti ja Jesucristo. ² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Ku ja Pablo tni'amidowi tniøbøksowi ja janchja'wibitøjkti

³ Ejtp øts ja Dios Teety ndukmøjawi øy mee winaak ojk nja'myech. ⁴ Ku øts Dios n'ajot'aty amumjoojt øts ja Dios n'amidøy nbøksøy jøts ja mbudøkiyidi; ⁵ pø tu'ugyixi adøm ja winmaa'n İxyambaat nyikyø'øyindi midi ja Dios yja'ajip, nayide'en sa ja xpadøjkyi'okwandøø. ⁶ Øts wamp jøts ku ja Dios Teety tyikmiweni tyikaja'i y'adø'tst ja myøk'ajtin midi ja tø mdukupadso'onda'aggyidi, kunim mye'ent jadigojk ja nwindson'ajtim Jesucristo. ⁷ Øwyinmaapy øts idø'on ja'agøjxp ku njanchokti jøts ku nay ja Dios kyunuu'kxin x'adsinaajyidi. Nitanibyim øts ja yja' jøts wə'ambyim øts jøts ku ja tyiyi yjanchi, øy øts ja tø njadyimyjagupuxøjktøki uk øy øts wyinaty ja kudunkøjk ja windsøndøjk njadyimyjawinguwə'agidi. ⁸ Pø Diosxi tnija'wip wine'en mee njanchøky nayide'en sa nwindson'ajtim Jesús xtsøjkyim. ⁹ Jade'en øts idø'on n'amidøy nbøksøy ja Dios jøts ku øy tsuj mnamyayidi ku ja tyiiby xwinma'adyit, jøts ku ja ja'gyukin xjagyaptit øy juuni. ¹⁰ Ku jade'en xnijawidit jøts xpadu'undit midi øy midi tsuj, jade'ents xjagyaptit m'anmija'win øy wə'ats jøts niti pøky mgapaadiyidi ku mye'ent ja Cristo. ¹¹ Øy wə'ats wyimbidsø'mdit ja mdunk midi ja nwindson'ajtim mdamidundip, jøts ja yjade'embid idø'on ja Dios wyind-sø'jkinja'wip ja yjade'embid idø'on ja myøja'wip.

Ja Cristo øts xjagyajp amuum jøts ja' øts amuum xyikjuyk'ajtp øy yjuuni'att

¹² Migu'uktøjk, nimadowdi meets, øy øts idø'on yjawi njemjaty ndejaty, ne'egi nabyudøki ja yjawi tø t'ukpatni, jinaxy ø ne'egi ngajpxwə'kxi ja Dios kyajpxy ja y'ayuujk. ¹³ Tyumnija'widip ja tøj'adinaabyi ja'adi, jøts nayide'en øy pøn, ku øts ja' nyiktagudsumi ku øts ja nwindson'ajtim yja' nyikø'øyi. ¹⁴ Jøts ku jade'en tø t'ejxti tnijawidi adøm ja nmigu'uk pøn yə'ajttip jøts ku øts

yajp tsumy n'ity, ne'egi jinaxy ja tø yjotmøkta'akti jøts ja jade'en tkajpxwə'kxidi ja Dios kyajpxy ja y'ayuujk.

¹⁵ Jats yə pøn øy'ajtin tsuj'ajtingøjxp tkajpxwə'kxtip ja Cristo yja', jats nayide'en pøn winaagin nugo tsep-køjxp ta'ajkingøjxp ttundip, ¹⁶ jøts ja kyø'øm ja' tyikmøjtøkidi, jøts ja ja'ayi nugo xjaaktsepniøkwa'andi ku øts yəp puxøjkjøtpy; ¹⁷ pønts ttundip y'øwyin-maa'ngyøjxp, ja'agøjxp ja jade'en ttundi ku øts ja xpa'ayowdi, pø nija'widipxi jøts ku ø nyam'aty, ku øts møk ja Dios yja' nyikyø'øyi. ¹⁸ Jøts ztiku øts nugo ndyima'aty ndyimdajit? Wan pøn tyikyø'øy y'øwyin-maa'ngyøjxp uk kya'øwyinmaa'ngyøjxp, pø nugo tum ja Cristo yja' tkajpxwə'jxidi; yø' ø ndajotkujk'ajtpy.

Jøts jaaktyimxyonda'akp øts yikxon, ¹⁹ pø nnija'wipxi øts ku øts yə'at ayo'on tuki'iyi nmimadəkøxt, ja'agøjxp ku meets ja Dios x'ajot'aty jøts meets xni'amidowi xniøbøksowi jøts ku øts nayide'en xpudøki ja Espiritu Santo. ²⁰ Ja'ats ø njøp'ijxy jøts øts ja ka' ndat-sø'ødyu'unt, tu'uk amumjoojt øts ja ngajpxit ja yja'. İxyam idø'on pyaat'aty yjaaktyimniigaxø'økt yikxon ja Cristo myøk'ajtin midi ø nyiktumpy, njajuyk'aty øts uk nja'øøky njadigøy øts, ka' øts ja nwandijy. ²¹ Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit. ²² Pøni jaakjuyk'ajtpøts øts yə, nay'øy'ajtpøts ja nayide'en, jøts øts ja Dios yja' njaaktyikyø'øyt, jade'ents ø ka'ap nni-jawi pø midi'ibi. ²³ Tum jade'en tum øy, midi'ibi øts ngupøkp ngagupøkp: ne'egi jadyimya'ats'ookwamp øts, jøts øts ja Cristo xemikøjxp nmøøt'ejtnit, ne'egi jadyimya'øy'ajtp ja jade'en; ²⁴ jadu'ukts ja winmaa'n-myi, ne'egi jinaxy yjawi chøkyi jøts meets ka'ap jade'eñi nmajtstu'utt, jaakjuyk'ajtp øts. ²⁵ Patyts ø nwa'añ jøts ku mee njaakmøøtja'ajt jøts njaakpudøkidit jøts xajotkujk'attit ku tu'ugyi janchja'wingøjxp xyikmiwenidit xyikajajidit ja Dios yja'. ²⁶ Jade'ents meets njaakminabyaadit ja nwindson'ajtim Jesucristo kyunuu'kxingøjxp amuum.

²⁷ Yø' mjadyimy'ejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjama jagam, ja' ø ndsøjkpy jøts øts ejtp nnijawit jøts ku meets ni'amuki mnabyudøkiyidi, tu'ugyi ja mwinmaa'n xyik'etti, xem yam ni'ijtyi xniwinmayidi janchja'wingøjxp sa y'øyit sa tyuda'akt ja Dios y'øyajpxy ja y'øy'ayuujk. ²⁸ Ni xkat-sø'øgidit pøn ja mdamidsep'ajtidip. Wə'ats yiknijawidi jøts ku ja windigøy yjattit; jøts meets, ja nitso'ok'ajtin mee mbaatp midi ja Dios yajkpy. ²⁹ N'øyja'windip ku nwindson'ajtim njanchja'windi, jøts nayide'en ku ngu'ayo'ombaajtindi. ³⁰ Nay ja' ayo'on mbaattip midi ø

tø nbaaty. Tu'ugyi yø tum jade'en n'adsinaa'yindi jøts mnija'widipts sã øts icyam n'ayo'ombat'adi'ich.

Ku Cristo yik'ayowim yjaty jøts ku tyik'awa'añ ja myøk'ajtin sam ka'ap pøn

2 Jøts pøni myikjotmøktaajkidip ja Cristo, pøni mdajotkujk'ajtidip ja y'ayo'ejxin, pøni jap ja Es-piritu Santo xmøødiyidi, pøni mnija'widip sã ja chojkin sã ja pya'ayo'owin, 2 yikxondaktik øts ku yikxon md-søøniði mdanidi, tu'ugyi tum jade'en mnamyayidi ni'a-muki jøts tu'ugyi mwinmaydi. 3 Kidi ti xundi mgø'ømwinmaa'ngyøjxp uk xyiktundi ja namyikaxi; yø' øy, ku tudã'aky jøts møj'ejxti ja mmigu'uk. 4 Kidi ja ngø'ømja'ajip nugo ndyimyikmøjtøjka'am, pø ja'axi tsojkip sudso ja nmigu'uk nbudøjka'am.

5 Yikyø'ødyi ja winmaa'ñ nayide'en sã ja nwind-søn'ajtim Jesucristo. 6 Øy ja wyinaty amuum ja Dios'ajtin tjajagyepy, ka'ap ja wya'añ jøts ja kuwani ty-imñayide'en tmi'abaaty ja Dios Teety. 7 Ojts ja kø'øm tjibiky midi ja wyinaty amuum yja'ajtpy jøts ja jade'en ñabyikta'agyi sã øy pøn tumbi ku ja ya ñaxwiin'ajty. 8 Jøts ku ja jade'en jaa'yin myiif, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja o'jkin yjayikmøøy jam kruskøjxp. 9 Ja'agøjxp ja Dios Teety ja ojts myøjawiyi jøts ja yik-møjtøjkiyøø, ka'ap pøn myi'abaadyi øy yjapøni, 10 ku pøn myadobaadit ja nwindson'ajtim øy madsoo, nagyuxendyakøxidip ja ni'ijtyi, 11 jøts ja niduki'iyi t'e-jkaptit jøts ja wya'andit jøts ku ja' wyindsøni ja Jesu-cristo, tum Dios y'ø'ajtingøjxp.

Sam ja jaj sam ja tøø'kxpi jade'en ja jaa'dyi pøn ja Dios ja'ajtidip

12 Migu'uktøjkti, nayide'en ndsøky jinaxy xmi-mado'odit øy øts yam jagam, sam ø xmimadowdi ejtp ku meets jam y'ijty møøt ndsøøni. Windsø'øgi ja Dios, tudã'aky mnabyikta'agidit, jotmay'atti sudso ja nitsoo-jkin xpaattit. 13 Ku ja tsojkin xjagyapti jøts mdun-wa'andi, ja Dios jade'en myikwinmaa'ajyidip, jøts nay ja' mbudøkiyidip ku ja xundi jade'en sã ja Dios mdamid-søkyidi øy tsuj.

14 Ejtni xoni tuki'iyi xu'undit, kidi amikajpxy xpøkti, 15 jøts ka'ap pøn mbøky'ejxidit, ja' myik'awa'andip jøts ku Dios m'u'nk'atyidi, øy wa'ats mja'y'attit ma ja ka'øy jaa'dyi ma ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy ma koots, 16 jade'en'ampy ku ja Dios ja kyajpxy ja y'ayuujk xyikyø'øyidit. Jøts ku ja Cristo mye'ent jadigojk, møk mee ndaxondã'akt ku ø nnijawit ku ø ka' nugo tø ñiyikyø'øyi ja Dios yja', ka' ø nugo ja ndunk ñiwindigøy. 17 Øy øts yø pøn xjaduku'oogi, ja' ñamyayi ka'pxp ja windsø'jkin midi ja Dios y'ity mmøødyip ku ja xjanch-jawidi. Xondakp øts jade'en, niduki'iyi nxondaa'ajkindit. 18 Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

19 Pøni wamp ja nwindson'ajtim Jesús, ngaxp øts tso-jk ja Timoteo jøts ja m'ats'ejxidit jøts ø njotkujk'att ku ja tmime'ent ja kajpxy ja ayuujk sã meets jam. 20 Pø ka'axi jadu'uk pøn nayide'en wyinmay sam ø nwin-mayin, sam mee njotmay'atyin jøts ja øy'ajtin xpaattit; 21 tum kø'øm winmaa'ñxi pøngapøn yiktundip jøts ka'ap ja nwindson'ajtim Jesucristo yja' t'uktunk'ajt-niyidi. 22 Tøts xnijawidi sã Timoteo øy tyuñ, sã øts ja møøt ja Dios kyajpxy ja y'ayuujk ngajpxwa'kxyi, jade'en øts ja xpudøki sam ja jaa'y ja y'u'nk pyudøkiyi. 23 Jade'ents ø nwinmay pøni sã øts yø nja' y'ukwin'øyi ngaxpts øts ja' jøts m'ats'ejxidit; 24 n'ajot'ajtpy øts Dios jøts meets kø'øm tsojk n'ats'ext.

25 Paat'ajtipts yjawi nayide'en ndanigaxit ja Epafrodi-to, ja nmigu'uk, pøn øts amuum møøt nduñ, pøn meets ojts xaniguexy jøts øts ja xpudøkit ku ti jaty y'ity kya'ity. 26 Mjanch'ejxwajnidip ja' niwine'en mjam'atti, jøts mjanchjotmay'atyidi ja'agøjxp ku tø xnijawidi jøts ku y'ity pyikyiyi. 27 Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øøts ja tø xpudøki jøts ø nayide'en kyajinaxt ja njotmay, ti øts yam ndaxømpy. 28 Ja'agøjxp meets ja ndyimdyani-gaxwa'añ jøts xaxondã'aktit ku jadigojk xpaattit x'ejx-tit jøts øts jade'en ka' nugo ndyimyjotmay'ookt. 29 Tax-onda'akti ku ja jam yja'att. Jade'en pyaat'aty tu'ugyi ja Dios xjagyepxindi pøn jaty nayide'en tpadundip sam ja Epafrodito, minamyayidi yikxon; 30 jawaani tø kya'øøky ku tmiduñ ja Cristo. Tø tmiwanjaty yik'ay-owim ku øts ja pudøjkin xmø'øy, jøts meets ja ñamyayi mgudaniyi øy mee mgaya'aty.

Ja tsinaa'yin midi tiy janch

3 Migu'uktøjk, tajotkujk'ajtidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nnijawi jøts ku meets yø xyiktu'unt. 2 Øyim mnay'ejx'etidit, jam ja jaa'y pøn ja wenk winmaa'ñ tyikyø'ødyip, pøn ttundip ja ka'øybi, ja' pøn tta'ødyøkiwyandip ja Dios ku ja ttsuki ñe'kx jøts ja ejx-pajt jade'en ñabyiktaajkxyidi. 3 Jade'en ne'egi tpaaty, adøm idø'øn nmøøt'ajtyindip ja ejxpajt ja'agøjxp ku adøm ja yja' tu'ugyi nyikmøjtøjka'andi, jøts ku ja Cristo Jesús ndaxondaa'ajkyindi, jøts ka'ap nmi'agijxyindi nmijotkijxyindi ja'ayi midi kaxø'kp iiy ja'ayi nikijxy. 4 Wa'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawi ja'abi tsinaa'yin; 5 ku ngue'jxy kyiduktujk xøøw øts ojts ja ejxpajt nyik-tu'unxi, israelit jaa'yxi øts; ja Benjamin øts ndeety'amøjip, jøts hebreit etjotp ø ngue'exy, jøts nay jam øts ndeety ndaak choondi. Fariseotøjk øts y'ijty møøt nnamyayi, nay ja Moisés øts y'ijty nbaduujnip ja kyutujk; 6 møk øts ja nnitani, jantyimdyøøp øts ja njawi, jøts øts ja jaa'y nbawidetti ndagumatsiwy'andi pøn jaty ja Cristo tjanchja'widip. Ka' øts y'ijty pøn ja ku-tujk xawindsø'øy sã ja tyikutuky, nadyijyi tñigajpxy

midi'ibi øy midi'ibi tøøp. ⁷ Midi'its øts y'ijty jade'en nmøja'wip, jade'en øts yø ðxyam nja'wiñi jøts ku ka' ma tyuñ, ja'agøjxp ku øts ja nwindson'ajtim Jesucristo tø nnija'wiyi ja pya'ayo'owin. ⁸ Jøts pøni ti øts ja njaak'øy-ja'wip, tum kudigøøpy øts njawi, ma t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tø n'ixmajtskixy, aayin pista'agin ja tuki'iyi ñjøkxkøjxni, ja'ayi øts tu'ugyi njøp'ijxpy ja Cristo ⁹ jøts øts ja møøt n'ett, kaja'agøjxp ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tø xkupiky. Ja'ats ja Dios kyupijky pøn ja janchja'wiyip. ¹⁰ Ja' ø ndsøjkpy jøts øts yikxon ndyimñi-jawit sa ja nwindson'ajtim tyiy'ajtin jøts øts ja myøk'ajtin ja xmo'ot midi ja yjagyeypy ku ja ojts tmimajada'aky ja o'jkin ku yujukpyiky xemikøjxp, nja'ayø ø nayide'en, uk njadyimya'tøøky ø nayide'en sa ja y'ø'jky, ¹¹ jøts øts jade'en njøp'ext ja jujukpyøjkin nayide'en sam ja yujukpyiky.

Ja' njotmay'ajtim sudso nbaajtant ja øy'ajtin

¹² Ka' nwa'añ jøts ku øts jade'en tuki'iyi ngøø'ømit'ajtni, uk ka' nwa'añ jøts ku øts tyimwya'at-sni tyimy'øyni; tu'ugyits øts ja nbanøjkx'adi'ich, jøts njøp'ijxpy øts ja nbaat midi øts ja nwindson'ajtim Jesucristo tø xaniwaadsowi patki'jyi. ¹³ Ka' øts migu'uk nwa'añ, jøts ku øts ja jade'en tø ndyimbyatkixy tuki'iyi; nja'dyigøøgyijxpy øts ðxyam sa jaty ø tø njaty ngubety ti jaty tø tyuñ, ja' ø ndumpy jøts øts ja njotmay'aty mi-di mempnim kidakpnim, ¹⁴ jøts nja'jtint ma pyaat'aty ma yjòpkixy jøts ja Dios ja y'øy'ajtin xukpaajtant jap tsajpjøtpy midi ja xaniwaadsoo'wa'amp, jøts adøm ja nyikmø'øyint ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paat'ajtip jøts jade'en tu'ugyi nwinmaa'yindit. Pøni sats pøn wyinmay, jam pøn ja wenk winmaa'ñ tpaaty, nay ja Diosts ja tuknijawiyip midi tøøp. ¹⁶ Tu'ugyits yø win-maa'ñ nbøjkindit, jøts yø' idø'on nyiktu'unindip amuum sam adøm yø tø nnija'wa'ant.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip midi mee tø nda'ane'emy. ¹⁸ Jaa may pøn ja nwindson'ajtim Jesucristo yja' tkamø-jawidip jøts ja wyinmaa'ñ ja' yiktundip jøts jade'en chøøni. Tø meets yø kawinaak ojk ndukmadø, ðxyats øts jadigojk yik'ayowim nnigajpxkojmi. ¹⁹ Ka'ap ja wyindø'ødit, windigøy ja nøjx yjatti. Ja kyø'ømwin-maa'ñ sa kø'øm ttsokti, ja' yikmøjtøjkidip, ja' ñamyayi dios'ajttip. Ne'egi jinaxy ja ñadyamikexyidi midi'ibik idø'on ja yjawi tyatsø'dyu'undip, ja' nugo yjotmay'ajtip sa jaty ti jaty ya ñaxwiñ. ²⁰ Ja' adøm amuum xkøø'ømit'ajtindip jap tsajpjøtpy, jøts ja' adøm njøp'ijxyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp. ²¹ Ja' adøm xyik-wimbejtindip xyiktigajtsindip jøts nayide'en njajtant sam ja kø'øm amuum ja kunuu'kxy'ajtin tmøødi, jøts nay ja myøk'ajtin ja jade'en yik'awampy ku jade'en xu'unin, pø ja'axi tuki'iyi tñitanaagyøjxp øy ti.

Xondakunaxti ku Dios xjagyeypyindi

⁴ Njantyimya'ats'ejxwändip mee migu'uktøjk, mee ndajotkujk'ajtpy, meets jam Dios wyingujkp ndamajada'akp, jøts tu'ugyi jaaktyimya'ajot'atti ja Dios.

² Ngajpxñigajxidip øts ja Evodia jøts ja Sintique jøts ø møk nnøjmi, wan tnayja'gyukyidi tkajpx'øyidi ti ka'ø'xyidip jøts tu'ugyi ja Dios yja' tyikyø'øyidit, pø tum ja'axi køø'ømit'ajtidip. ³ Mets migu'uk, pudøki yø Evodia møøt ja Sintique, ja' øts ojts ngajpxwa'kxi ja Dios kyajpxy ja y'ayuujk møøt ja Clemente jøts møøt jadu'ukti pøn jaty øts ojts xmøøtundi. Wa'ats ja Dios ja ñijawiyidi pøn jaty ti jaty ja xyøøwdi.

⁴ Ejtp ja Dios yja' xaxondaajkidit. iNjaaktyimñigajpxpy øts yikxon jøts mxonda'aktit! ⁵ Wan øy pøn mnijawiyidi jøts ku mee tuda'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøktso'odip ti mga'e-jtxidip, jøts tukmøjawidi tukunuu'kxyjawidi ku wyinaty myikmo'odi midi m'amidoodip. ⁷ Jøts ja mmo'ojdit ja y'øy'ajtin ja tuda'aky'ajtin midi ka'ap ti tmi'abaaty sa adøm njaniwinmaa'yam; ja'ats tyikjotkujk'atp ja mwin-maa'ndyi jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip midi øy

⁸ Yø', migu'uktøjk, mjotmay'attip midi tiy midi janch, midi xpaat'ajtindip, midi øy pidsømp, midi wa'ats, midi tsøkyim, midi øy agajpxy pidsømp o madsoo. Tum ja y'øybi mwinma'adyip midi øñigajpxni øñimadyakni.

⁹ Yiktundi midi tø nduk'ixpøkti, sa jaty tø n'ana'amdi, jade'en xu'undit sa øts ojts nwa'añ jøts sa øts ojts kø'øm x'ejxti ku øts ja ojts nduñ: tundits jade'en, winets ja Dios nijuuni mga'ixmatsidit, ejtp ja yjotku-jk'ajtin ja mmøøgyunaxiyidit.

Ku ja filipensit jaa'y tmay'atti ja Pablo

¹⁰ Xyikxondakp øts ja Dios jøts ku meets jadigojk xja'myech. Kidi jade'enip ø ndiij jøts ku meets tø xtyimya'dyigøøñi, ja ku ka' ñibidsømi juuni mee xpudøkit. ¹¹ Ni ka'ap ø nwa'añ jøts ku øts yam sa ndyimyjaty. Tø øts yø n'ejxandigøøñi. Yø'øyi ø ndajotkujk'ajtpy midi nmøøt'ajtpy. ¹² Wa'ats ø nnijawi sa yik'ayowim nyiknajxint, jøts nayide'en sa ngumeeñ'ajtant. Tø øts yø nyikyuyj jøts øts øy midi ngawingudsø'øgit, øy ø ngay øy ø ngakay, uk øy ti y'ity kya'ity. ¹³ Øy ø midi nwinguwa'agi, ja nwindson'ajtim Jesucristo nmøk'ajtpy, ja' ø xkuwamp. ¹⁴ Øy'ajtpy ku meets ja n'ayo'on nayide'en mnadyapaadyidi jøts øts jade'en xpudøkidi.

¹⁵ Mnayinija'widipts wine'en jam Filipo kajpxkøjx mgugajp'atti, ku øts ja Dios kyajpxy ja y'ayuujk ojts ngajpxwa'kx'okwajni, ku øts ojts nnijkxy jam Macedonia kajpkøjxp, pø meeçixi ojts xaniguexy ja pudøjkin midi ja Dios mdamiyojxtip ja'agøjxp ku ja wyinaty ja myøk'ajtin tø xpaajtyidi. ¹⁶ Jøts ku øts jam wyinaty Tesalónica kajpkøjxp, nayi meetsxi ojts xaniguexy ja

meeñ majtsk ojk, jøts øts ja nyiktu'unt ti jaty ø ka'e-jtxip. ¹⁷ Kayø'øjip ø nugo njotmay'ajtpy jøts øts ja nugo n'axajit øy ti; ja' ø ndsøjkpy jøts meets yjaaknipatt ja mja' jam Dios wyingujkp. ¹⁸ Tits ø kayikmøøpy, ne'egi o ti tø nyikmø'øpy. Tyimchaachjam yø kajaa midi yø Epafrodito tø xamigaxidi. Jøts jade'en ja Dios yø tjawi kunuu'kxy, sa ja poom pya'akxuuky, ja windsø'jkin yø ñamyayi yikmøøpy. ¹⁹ Ja Dios pøn xjagyajpindip, ja' mmo'ojidip, ja' tyikwimbetp tyiktigatsp pøni ti mga'e-jtxidip. Ja nwindson'ajtim Jesucristo møøt ja Dios Teety, ja' tjagyajptip ja kunuu'kxin ja jotkujk'ajtin midi nijuuni niwindem kagudigøøpy. ²⁰ ;Xemikøjx Dios Teety møj janch ja kunuu'kxin tjagyepy! Jade'en idø'øn ja yjatt.

Ku kyajpx'abaadiwya'añ jøts ja kajpxpoo'kxin t'ukyajkni

²¹ Nguejxpy øts ja kajpxpoo'kxin nwindson'ajtim Jesucristo køjxp jøts xukmado'odit niduki'iyi pøn jaty ja Dios jagyajpidip. Ñayi kyajxmidip ja kajpxpoo'kxin ja'adi pøn jaty øts yam nmøøtti. ²² Niduki'iyi pøn ja Dios ja'ajtidip ya, jøts ja'adi pøn namyajydip ma ja romanit windsøn ja tyøjk, nayi mdanigajxidip ja kajpxpoo'kxin ja'adi.

²³ Ja nwindson'ajtim Jesucristo mgunuu'kxidip niduki'iyi. Tiigyajpxy idø'øn, jade'en idø'øn ja yjatt.

COLOSENSES

Ku ja Pablo tnijayi pøn tjanchja'widip ja nwind-søn'ajtim Jesucristo yja' jam Colosas kajpkøjxp

1 Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo ² ya'at nøky nja'ay jøts øø ndanijayi pøn jam Colosas kajpjotp ja'ajtidip ja Dios, pøn jaty jam tjanchja'widip ja Cristo, ja yiknit-sokpi. Wants ja Dios Teety ttuñ ja may'ajt jøts ja myo'o-jidit ja kunuu'kxin jøts ja myo'ojidit ja tuda'aky'ajtin.

Sa ja Pablo tni'amidowi tnibøktsowi pøn jaty ja Dios tjanchja'widip jøts ja ttukmadøy ja Dios

³ Ejtp øøts ja Dios ndukmøjawi ndukunuu'kxyjawi mi-di nwindson'ajtim Jesucristo tyeedyip ku øøts ja' n'a-jot'aty meets køjxp. ⁴ Tøts øø nnimadøy jøts ku meets ja nwindson'ajtim Jesús møk xjanchjawi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip, ⁵ ja'agøjxp ku tu'ugyi xjøp'ejxti midi myikmo'owandip midi jap pøkj'i'ky ejtp jap tsajpjøtpy. Tøts xnijawidi tigøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknit-sokp. ⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjtak'adøtsp yø icyam, jøts tum øy wyimbidsimy øy madsøo wine'en ja naxwi-i'ñit, nayide'en yjaty sam tø mjatti kuyip xmadoo'ok-wandøø ja Dios chojkin ja pya'ayo'owin, jøts tø xni-jawidi jøts ku yø tyiyi jøts ku yø yjanchi. ⁷ Yø'øxi øøts ja nmigu'uk Epafraas ojts mduk'ixpikyidi pøn øøts amuum nmøøtumpy jøts yjanchpaduujnjp ja nwindson'ajtim yja' ja', jøts ja' meets idø'on jam tø mbudøkiyi. ⁸ Nay ja' øø tø xukmadøy sa meets ja tsojkin xjagyepy midi ja Espiritu Santo mmøøjyidip.

⁹ Patyts ku øøts ja jade'en ja'ayi nnimadøøy, wine-tyipts øøts ja Dios niyuuni ngamimøñ meets køjxp, ejtp øøts ja n'amidøy jøts ja Dios yikxon mduknijawiyidit ja winmaa'ñ sa ja ttsøky, jøts ja mmo'ojidit wine'en ja wi-yy'ajtin kejy'ajtin, jøts nayide'en sa xnimadojidit ja Dios yja'. ¹⁰ Jade'ents øøts ja n'amidøy nbøktsoy jøts yikxon mjaa'y'attit sam idø'on pyaat'aty ttu'undit pøn ja Dios ja'ajtidip, jøts tum ja' mdu'undip midi ja Dios tyajotku-jk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios.

¹¹ N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmidanidit øy midi ay-o'on, jøts xyiktuda'aktit ja mwinmaa'ndyi midi ne'egi mdajotkukidip, ¹² jøts ja Dios Teety xukmøjawidit

xukunuu'kxyjawidit jøts ku ja tø xanibiktaajka'am ku adøm xpaat'ajtyim jøts adøm ja xmø'øyim ma ja kyunuu'kxin, midi ja yikmøødyip pøn jaty ja Dios ja'ajtidip. ¹³ Pø ja'axi tø xukniwaajchim ma amuum myajada'aky ja wimbeets'ajtin ja kugoots'ajtin yja', jøts ja tø xyiktøjka'am ma ja Dios U'nk ja kutujk ttanitan ja yjaa'y, ¹⁴ pøn ojts tyaky ja nitso'ok'ajtin jade'en'ampy ku tø xku'o'jkandi jøts adøm ja xpojkipimee'kxyindi.

Ku ja Cristo ojts xku'o'jkandi adøm nbøky, jade'en'ampyts ja Dios Teety jadigojk xmijotjimbijtyindi

¹⁵ Ka'ap ja Dios Teety yik'ixy yiknijawi, jade'en'ampyts ojts ñanky'ijxyi ku ja y'U'nk tyikmiñ, pøn tu'uk møj, ka' pøn jade'en. ¹⁶ Ja' Dios Teety tyukyik'øyiyi'ñ tuki'iyi ti jaty ejtp tsajpjøtpy, ti jaty ejtp naxwiñ, midi kaxø'jpk midi kagaxø'jpk. Jøts ja tyik'øyi sa ja ankilistøjk ñagyutujkmø'oyidi, ja'ats ja tyik'øyiyi'ñ jøts ja' ja tja'ajtp. ¹⁷ Jaayim ja yiknitsokpi wyinatyni, ja Cristo, jøtsnim øy ti kyaxi'ikñim, jøts ja' tuki'iyi tkøjø'ømit'ajtp ti jaty ja'ajtp. ¹⁸ Ja' tniugubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujkyjky, jødsyim ja jøp'am ejtp tyimy'ity. ¹⁹ Ja Dios Teetyts ja kø'øm tyikjajt jøts ja tyikdiosjaty ja nwindson'ajtim Jesucristo amuum, ²⁰ jøts nay ja' nayide'en tyikjajt nwindson'ajtim Jesucristo køjxp jøts ñamyi'øy'atidit tuki'iyi midi ejtp tuktsajp'agida'aky, jøts yjotkujk'attit wan tjapønidi midi ja'ajttip naxwiñ, jøts midi jap nayide'en tsajpjøtpy. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

²¹ Ja mga'øwyinmaa'ñ ja mga'ødyunk ja' meets y'ijty myik'ejtidip jagam iøkø'øm, jøts m'am mjotp xmijot-ma'atti ja Dios; ja Diosts tø myikjotkukiyidi jøts ja tø xmijotjimbetti, ²² ja'agøjxp ku ja nwindson'ajtim y'ø'jky jøts ja wemp ijxy tyimy'ats'ayo'ombaaajty ñikøjxp kyubajkp. Jade'en'ampyts ja jade'en ttuñ jøts meets ja Dios Teety xwingunøjkxit ku tø mbøkwyatsnidi, niwine'en mga'ukyikpøky'ejxnidit. ²³ Jade'engøjxpts chøkyi jøts tu'ugyi amumjoojt xyikyø'odyit ja mjanch-ja'win tyi'ajtingøjxp. Kidi meets ja xkajøp'ejxni sa tø xnijawidi midi yiknitsokp. Yø'øbi kajpxy yø'øbi ayuujk yikajpxwa'kxp øy sudso ya naxwiñ. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpuðokit pøn jaty ja Dios tjanchja'widip

²⁴ Jotkujk øts nnayjawiwi øy mee njagu'ayowi. Nay jade'en ø ñamyayi ja ayo'on nbaaty sa ja nwind-søn'ajtim Jesucristo ku ja tku'ayo'owiyiñ pøn jaty ja janchja'wiwip. ²⁵ Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuwjk, ²⁶ jøts mee ndukmado'ot midi pøn tkanija'wipnim midi y'ity yu'uch'ejtp, ma windi'ixyip ja jade'en pøn tkanijawi. Ixyamts ja Dios ttuknijawiywa'añ ja jaa'y pøn jaty ja paduujniyip ja yja'. ²⁷ Ja'ats ja Dios ja tukni-jawiwiyajnidip ti øy'ajtin idø'on ja yjade'embijyagyepy jøts ja yikmo'odit pøn ka'israelit jaa'dyi. Jøts ja' idø'on y'ity kayiknija'wip jøts ku ja Cristo ja' mee mjagyajpyp, jøts ja' tyajkp ja jøp'ixy'ajtin jøts ku nøjk xpaajtid ja Dios y'øy'ajtin ja Dios chuj'ajtin.

²⁸ Ja Cristo øøts ja yja' nnigajpxip, jøts øøts niduki'iyi øy pøn ngajpxwiy jøts øø nyik'ixpiky øy pøn, jøts yikxon tnmado'odit, jøts jade'en nidu'uk nidu'uk tnijawidit yikxon ku tmøøt'etti ja Cristo. ²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwan-jaty, ja'ats nyiktumpy ja Cristo myøk'ajtin midi øts ja xmøøpy.

2 Ja' ø ndsøjkpy jøts meets xnijawit sa mee ngamijotkuki ku øts ja Dios n'amidøy ja pudøjkin meets køjpx jøts nayide'en pøn jaty tsinaadyip jam Laodicea, nmijotigøøpy øts nayide'en ja nmigu'uk pøn ø xka'ixy'ajttipnim. ² Ja'ats ø ndsøjkpy jøts xjagyaptit ja tsojkin amumjoojt nixem niyam midi ja Dios yja'ajip midi øy midi tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn ttuknijawi; ³ ja'ats idø'on tmøøt'ajtp ja øy'ajtin ja tsuj'ajtin, ja wejin ja kajin. ⁴ Jade'engøjxp meets ya'at ndukmadøy jøts kidi pøn mwindaay'atyidi pøn tum jaayi tkajpxtip. ⁵ Øy ø kø'øm nguidyimy-jam'aty, jamts øts ja nwinmaa'ñ nyik'ity, jøts ndaxondakpy øts ku ø nnijawi ku øy yikxon xundi jøts nayide'en ku tu'ugyi xjanchjawidi ja Cristo.

⁶ Paty ja'ayi xu'undit midi tsojkip, sa myiktani'ejxidi myiktaguwanidi ku xjanchja'wiw'okwandøø ja nwind-søn'ajtim Jesucristo, ja'ats idø'on tu'ugyi mdu'undip jøts ja jade'en møøt m'ettit. ⁷ Ja' amuum mnadyagidøkiyidip jøts ja' idø'on mmøk'ajtin'attip. Ja'axi mjanchjawidip sa ojts myiktani'ejxidi myiktaguwanidi jøts jade'en ejtp ja Dios xukmøjawidit xukunuu'kxyjawidit sam ja tø xnijawidit ku ja ixpøjkin myikmøødyi.

Ja øchinaa'yin midi yikpatp Cristo køjpx

⁸ Øyim mnay'ejx'etidit; kidim ja xmibøkti ja jaa'y pøn mdawin'øønwajnidip ja ixpøjkin, midi wenk winmaa'ñ tyikyø'ødyip uk midi tyiktundip ja tum ja taay; ja' ja yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmøjtøjkiyidi ja Cristo yja'.

⁹ Pø ja Cristoxi kø'øm amuum tmøøt'ajtkøjpx ja Dios'ajtin, ¹⁰ jøts kumi mmøøt'ijtpy meets ja', tits mee mjaaka'ejtxip. Ja' tuki'iyi tjagyajp jøts ka'ap ja pøn my'abaadyiyi, wan ja ma tyimyjatsoondi, wan tjamiku'ku'pyi uk wan tjanayjapi tsajpjøtpy. ¹¹ Ku meets ja jade'en xmøøt'ity ja Cristo, tø meets ja ñamyayi mbiktaajkxiyi ja ejxa'anin kyunuu'kxingøjpx, ka'apts ja nayide'en tø mbiktaajkxiyidi sam ja israelit jaa'y ñadyuñidi. Ja' mee m'ejxa'anin'ajtpy ku xpaatti ja nitso'ok'ajtin jøts ja mbøky mniwa'achidi midi yiktump ku ya naxwiiñ njaa'y'ajtyindi. ¹² Ku ja nøbajtin xpaatti, jade'en meets idø'on ñamyayi ja Cristo møøt m'ø'jky, jøts nayide'en ñamyayi mjujukpyøjkti, ja'agøjpx ku tø xjanchjawidi ja Dios, pø ja'axi ja myøk'ajtin majadaajk ku ja Cristo yjukpyijky. ¹³ Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, midi yikpatp nwind-søn'ajtim Jesucristo køjpx; xjats ixyam ja Dios tø mmø'øyidi ja jukky'ajtin jøts mee ñamyayi møøt mjukjy'aty ja nwind-søn'ajtim Jesucristo, ja' mee mmaa'kxip tuki'iyi ja mbøky. ¹⁴ Tøts ja Dios tjibiky ja kutujk jøts ka' y'uktunit midi y'ijty myiktanigutujk'ajtip, midi y'ijty xjanch'adsejpinidip jøts ja xuktaja'jtyindi ja nbøky jøts adøm ja yiktagubejtyindi. Jade'en'ampy ja Dios ja tyikudigøøy ku ja nwind-søn'ajtim kyruspejty. ¹⁵ Ja'ats ja tyamimajadaajk ja miku' jøts ja tø tyik'amutskiyi ja myøk'ajtin jøts ja jade'en ttuk'ixy ttuknijawi ja naxwii'ñit jaa'y.

Jotmay'atti ja Dios yja'

¹⁶ Jade'en'ampyts ka' pøn xmøjpiakta'aktit ku pøn mdabayø'øwya'andit ja mгааajyk ja m'uujkikti, uk ku ja xøøw xkabadundi midi winsamaan jøts midi wimbo' yiktump. ¹⁷ Ja' yø y'ity wya'añ jøts yø tniagajpxy midi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tø myiñ, ja' idø'on tu'ugyi yikjanchja'wiñip. ¹⁸ Kidits ja jaa'y mdukmajtstu'udyidi ja nwind-søn'ajtim pøn ñadyiyi janch tud'a'aky nabyiktaajkidip, jøts wya'andi ku ja ankilis ne'egi yikwindsø'øgit. Ja' ñigajpxtip ñimadyaktip midi nijuuni kya'ejxtipnim kyamadoodipnim, jøts jade'en øy ñadyamøjpiakta'agyidi ja kyø'ømwinmaa'ñ. ¹⁹ Ka'ap ja tmøøt'etti ja Cristo, pøn møj pøn jøp'am, pøn yikmø-jawip, jøts pøn amuum yikjanchja'wip ku ja yja' ja yiknijawi jøts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kø'øm tø ttanibiktaagi.

²⁰ Pøni janch idø'on ku ja Cristo namyayi møøt tø mjantyimy'ookti, ztigøjxpts ku jade'en mdsinay'adø'øtsti sam ja'ajindi, pøn ja Dios yja' tkabaduujnidip? Ja' yikmajadaktip jøts ñadyanigutujk'atyidi ja kyø'øm'ana'amin, ²¹ ku yide'en ñay'ane'emyidi: "Kidi yø' xji'kxy, uk kidi yø yjade'embijxi'kxy, kidi yø xøñ." ²² Yø yjade'embijxi'kxy, tum ja' yø ñi'ane'empy midi waani ejtp jøts ja ñajxn jade'en sam o ti pikta'aky midi tø tyuñ jøts ja ka' ti y'ukwani, jade'ents ja jaa'y ja kyutujk jade'en ja y'ixpøjkin. ²³ Øy idø'on ja yjawi njantyiy-ja'wa'ant, jabi øxyi ja yik'ayowim yikpadu'unt tsø'øgi

køjxp. Nitits ja kyawa'añ, kaja'ajjpxi xpudøjka'am jøts nbøky xniwaajtsint.

3 Jøts kumi tø mee ñamyayi mjujkyiky nayide'en ku ja nwindson'ajtim Jesucristo yjujkyiky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tø myø'øyi ja møk'ajtin. ² Ja' ejtp mwinmaa'ñ'attip midi ja Dios yja'ajip jøts ka'ap ja xyikmøjtøkidit midi ja ñaxwiiñ. ³ Jade'ents ngajpxin ku ja Cristo y'ø'jky jøts mee ñamyayi nayide'en tø m'øøky, ka' x'uktatøjkiñidit ja ka'øybi midi ja ñaxwiiñ. Ja nwindson'ajtim mee mgøjø'ømit'ajtniyidit jøts mee mjujky'aty xemikøjxp ma ja Dios, ⁴ jøts ku ja Cristo kyaxø'økt nayide'ents meets ja wyinaty møøt mgaxi'iky jøts meets nayide'en ja y'øy'ajtin ja xyon- daajkin xpaajtiyidit.

Ja øchinaa'yin jøts ja ka'øchinaa'yin

⁵ Paty x'ixmatsttit tuki'iyi ja ka'øybi: ka' pøn amajtsk- jaa'y tmøøt'att ja wenk yaa'dyøjk uk ja wenk tø'øxyøjk, ka'ap ja axøøk winmaa'ñ xyiktu'undit, jøts nayide'en ka' ti x'ama'at'attit. Jade'en yø tuki'iyi tpaaty ku yø xu'undit ejximdam jeexyip xwindsø'øgidit ja awanax ja agojnax. ⁶ Yø'øgøjxp ja Dios tkexy ja ayo'on jøts ja ttuk- tagida'aky ja yjade'embijaa'y pøn ja kamimadojyiy; ⁷ jøts ku y'ity ka'anim xjanchja'wiyidi ja Dios yja', tuki'iyi meets yø y'ity nayide'en xuñ. ⁸ Ixyamts, ixmajt- skøjxnidi yø ka'øybi, yø ambøjkin, yø axøøk winmaa'ñ, yø ka'ødyu'unin, yø nawyngajpxnaxi jøts yø ka'øy'ayu- ujk. ⁹ Kidi mnawyindaay'atyidi, pø tøxi x'ixmatsti sa y'ij- ty mjaa'y'atti, ti jaty y'ijty mdundip. ¹⁰ Tøts ja Dios myiktigachidi jøts ja yjembyi tø xpadøkidi, pøni sa meets ja yja' xjanchja'wiyi, nayide'ents meets ja myikti- gachi kunim yikxon xtyimñijawidit sa ja Dios. ¹¹ Jøts ka' chøkyi wan pøn tgriegitjaa'yi uk t'israelitjaa'yi, wan ja t'ejxa'aninmøødidit uk tka'ejxa'anmøødidit, wan ja abiky ma tsoondit uk wan ja tja'ajidi pøn ja Dios tkani- ja'widipnim. Yjaja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesu- cristo ja' yja', jøts myøøt'ijtpy ja øy pøn.

¹² Mdsojkip meets ja Dios, ja'agøjxp meets ja tø mwi'ijxyi jøts ja tø mja'bikyidi. Tsøønidits yikxon. Yik- tundi ja øy'ajtin amuum, ja ayo'ejxin, ja jotwa'añ'ajtin, ja windsø'jkin, ja wijy'ajtin jøts ja tuda'aky'ajtin.

¹³ Namyidudā'aky'atidi xem yam jøts namyaa'kxukidi ku pøn ti ttuñ jøts ja myigu'uk tøkø'ixy. Nayide'en xu'undit sam ja nwindson'ajtim Jesucristo mbo- jkpimee'kxyidi. ¹⁴ Ka'apts ti jade'en sam ja tsojkin sam ja pa'ayo'owin, ja'ats idø'øn myiktu'undip, pø ja'axi amuum tsojkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi. ¹⁵ Ja Diosts ja yjotku- jk'ajtin, ja Diosts ja xyondaajkin mwinmaa'nmyo'ojidit, pø ja'agøjpxi ja Dios tø mdukpabikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjawidits tukunuu'kxyjawidits ja Dios.

¹⁶ Jøts ja'gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'ñ'attit. Nadyuk'ix- pøkidi jøts nagyajpxjot'amøjkiyidi nixem niyam, ja we-

jin ja kajin myiktu'undip. Øøjidi ja Salmos, jøts øøjidi ja kunuu'kxyajpxy jøts jade'en xukmøjawidit xukunuu'kxyjawidit ja Dios. ¹⁷ Ku ti xunwa'andi uk xkajpxwa'andi, ja nwindson'ajtim Jesús myøk'ajtin myik'awajnidit, jøts jade'en'ampy ja xukmøjawidit xukunuu'kxyjawidit ja Dios Teety, ja' myøk'ajtingøjxp.

Sa yjaa'y'attit pøn tjanchja'widip ja Cristo o madsoo

¹⁸ Jøts ja tø'øxyøjk pøn amajtskti, mimadowdi ja mniyaa'y, jade'en pyaat'atyidi pøn tjanchja'widip ja nwindson'ajtim. ¹⁹ Jøts nayide'en ja yaa'dyøjkmidi pøn amajtskti, yikxon xjagyaptit ja mnidø'øxy. Kidi møøt at- sep a'aki mdsøønidit. ²⁰ Jøts u'nk unā'jkmidi, mimad- owdi ejtp ja mdeety ja mdaak, jade'en ja Dios ttsøky. ²¹ Jøts u'nkteety u'nktaak nayide'enmidi, ka' nugo xyik'ambøktit ja m'unā'jk jøts kidi t'ayojidi. ²² Jøts pøn midundip, mimadowdi ja jaa'y pøn mwindson'ajtip, jøts kidi jaayi nugo nadyijyi myujy'atti ku ja m'ijxyidi jøts ja jade'en nugo m'øyjawiyyidit. Mdu'undipxi dø'øn sam pyaat'atyidi Dios wyindsø'jkingøjxp. ²³ Yikxon xu'undit ku ti xunwa'andi, ja Dios meets ja mdami- dumpy jøts kidi ja jaa'yip øy ja' mjayiktuñidi. ²⁴ Tøts xni- jawidi jøts ku ja nwindson'ajtim mmo'ojidit ja øy'ajtin jøts meets ja mdukpaaadit ja kyunuu'kxin. Kumi Cristo meets ja yja' mdu'unxip, nay ja' meets ja kø'øm mmo'ojip. ²⁵ Pønts ja kya'øybi ttump, nayide'ents ja ka'øy'ajtin ja tikmo'odit. Ka'ap ja Dios ja t'ixy wan ja tjapønidit, tuknax ja tum jade'en ttu'unt pøni sa tø yjaa'y'atti.

4 Jøts meets windsøn pøn ja tunk tmøøt'ajttip, øy yikxon mjaa'y'attit jøts jade'en xyiktu'undit ja mdumbi sam pyaat'atyidi. Ja'myatsti jøts ku ja nwind- søn'ajtim jap tsajpjøtpy midi mee mwindson'ajtmip. ² Kidi mjotmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit. ³ Amidowdi pøkt- sowdi jøts øøts ja nwindson'ajtim ja nnøø' ja nduu' xyik'awajtsit, jøts øøts ja ngajpxwa'kxit ja y'øgyajpxy ja y'ømyadya'aky, jøts nayide'en yiknigajpxt wa'ats ja Dios Teety wyinmaa'ñ, sudso ja nitso'ok'ajtin yikpaaty Jesucristo køjxp, ja'axi øts yam mgudsumchinaa'yip, pø ja'axi ngajpxwa'kxpy. ⁴ Ajot'attits Dios jøts øts ja kyajpxy ja y'ayuujk øy pøn nduknija'wiyit sam idø'øn pyaat'atyidi ndu'unt.

⁵ Øy yikxon mjaa'y'attit, migu'ukwa'andi pøn ja Dios yja' tkanija'wip jøts ttukmadowdi, kidi ja xøøw ja jumøjt nugo xyikwindigøydi. ⁶ Øy tsuj ja mmadya'aky xyikpidsø'ømdit, jøts mjattip nayide'en ja adsojimbejt sa nidu'uk nidu'uk øy pøn x'adso'odit.

Ku kyajpx'abaadiwya'añ jøts ja kajpxpoo'kxin t'ukyajkni

⁷ Ja nmigu'uk Tíquico meets jam mdukmadowip sa øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity. ⁸ Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sa øøts yam. ⁹ Ja Onésimo ja jam møøt ñijky, adøm ja nmigu'uk pøn amumjoojt

tpaduujnip ja Dios yja'. Meets yø' mjaä'y. Yø'øts meets ja mdamimadya'agip ti yam tuujnip jajtíp.

¹⁰ Jøts øts ja nmigu'uk Aristarco pøn øts yam nmøøt-sumchinaapy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit.

¹¹ Nayi mgajpxpoo'kxidip ja Jesús pøn nayide'en yiktejp Justo. Yø'øyi dø'øn israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchtajotkujk'ajttip. ¹² Nayi mdanigajxidip ja kajpxpoo'kxin ja Epafras pøn ja nwindson'ajtim tmidump, nay meets ja mjaä'y. Ejtp ja mni'amidowiyidi mni:bøktsowiyidi ku Dios ja t'ajot'aty jøts tu'ugyi øy yikxon xpanøjkxtit ja Dios, uk amuum mnadyamiyoxidit jøts ja xu'undit sa ja ttsøky. ¹³ Kumi wä'äts ø n'ixy nnijawi sa ja Epafras mdajotigøpyidi, jøts nayi tyajotigøpy ja nayide'en pøn

tsinaadyip jam Laodicea kajpkøjxp jøts jam Hierápolis kajpkøjxp. ¹⁴ Nayi mgajpxpoo'kxidip ja Lucas, pøn tsøyip jøts nayide'en ja Demas.

¹⁵ Kajpxpoo'kxtits adøm ja nmigu'uktøjkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp. ¹⁶ Ku yø nøky x'uk'ejxkøxtit winets ja xanigaxtit jøts wan t'e-jxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip. ¹⁷ Jøts nøjmidi ja Arquipo jøts ku ka'pxy tpadu'unt sa ja nwindson'ajtim tø tyunkmø'øyi.

¹⁸ Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja yjatt.

1 TESALONICENSES

Ku ja Pablo tñijayi pøn ja nwindson'ajtim tjanch-
ja'widip

1 Pablo ø nxøow, jøts øø yam nguejpxy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxidip jøts ja jotkujk'ajtim mmo'ojidit møøt ja nwindson'ajtim Jesucristo.

Ku ja Tesalónikit jaaj'y tyiktaañ ja ejxpajt sa ja Dios yik-
janchjawi

2 Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee njä'myech. **3** Ku mee ngajpxpaaty ku øøts ja Dios n'ajot'aty ka'ap øøts ja njä'dyigøy ja m'øy'ajtimdi, sa ja tsojkin ja pa'ayo'owin xmøøt'atti, jøts sa ja ajot'ajtim møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo. **4** Meets migu'uktøjkt, pøn jaty ja Dios janchja'widip, Dios mee mdsojkip jøts nay ja' tø mw'i'ijxyidi jøts mee mnitso'ok'att.

5 Jade'en'ampy øøts nñijawi ku øøts jam ojts ja Dios y'øgyajpxy ja y'ømyadya'aky ngajpxwa'kxyi mā meets jam, kidi øødsip ja ojts jade'en nugo ngajpxy, pø jamxi ja Espíritu Santo ja myøk'ajtim ja tmøødyi jøts ja jade'en wä'ats yikñijawit jøts ku ja'abi kajpxy jøts ku ja'abi ayuujk tyiyi yjanchi. Wä'atsxi xñijawidi jøts ku øøts ja nduun, kidi øødsip ja kø'øm nadyamiduuñip pø ja'agøjpxxi øøts ja nduñ jøts meets ja xyiktu'unt.

6 Ja Espíritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwan-jati. Xjats meets nayide'en xuñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi.

7 Xjats jade'en tø mbidsømdi jøts ejxpajt mwä'andi jøts ja mni'ejxu'udyidi niduki'iyi pøn jaty ja Dios tjanch-ja'widip, pøn jam tsinaadyip Macedoniit jøts jam Acayit etjotp. **8** Jade'ents idø'on ja Dios y'øgyajpxy ja y'ømyadya'aky tø xyikwä'kxyidi, jøts kidi jamyip meets ja jade'en nugo tø xuñ Macedonia uk jam Acaya, yikni-ja'wip yø o mādsøo jøts ku meets ja Dios amuum xjanchjawi. Ti sa øø njaakwä'ant, ti øø njaakni'kyajpxp.

9 Ja'axi ja kø'øm tmadyaktip jøts ku øøts jam ojts n'øch mā meets jam jøts y'øjja'widip ja' sa meets jam ojts xkupiky, jøts øy ja yikxon tñimadya'akti sa mee xmajt-stuujty ja'abi winmää'ñ midi ja Dios kyaja'ajip, jøts ku ja Dios tu'ugyi tø xpabøjkpina'axwä'akti pøn xemikøjxp

ejtp, pøn tu'ugyi Dios'ajtp. **10** Jøts ñayiñimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpøtpy ja Dios U'nk, pøn ja Dios Teety tyikniwääjts ja o'jkin jøts ja tyikjujkyjky. Ja'ats adøm idø'on xuknitso'ok'ajtimdi ja' ayo'on midi memmp midi wingomp.

Sa ja Pablo kyajpxwa'kxy jam Tesalónica

2 Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøow nugo wyindigøøy. **2** Øy øøts jam wyinaty Filipit kajpkøjxp tø nyikjemduñ, mnija'widipts ja wä'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknäjxyi amumjoojt midi xyiknit-so'ok'ajtimdi, jøts meets ja tø myiktukmadøy yam idø'on ja tsep yjanchjatuñi. **3** Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk win-mää'ñip øø njagyeypy ku øøts jam jade'en ojts ngajpxy jøts nika' myikwin'øøndi. **4** Pø tiy'ajtimxi yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxä'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjää'y'aty. **5** Jøts mnija'widipts ku øø ka' nugo ngajpxy sa jaty ojts myiknøjmididi jøts nigidi taayip øø n'ixaapy sudso øøts ja meeñ nbøkt. Ja Dios yø tñi-ja'wip jøts ja' yø t'ejxp. **6** Niwindii øø ngawä'añ jøts øøts ja jaaj'y xwindsø'øgit, wan meedsi uk øy tyimy-japøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk møk'ampy tø ndanipiky, pø ja'axi øø nbad-umpy. **7** Ka'ap øøts jade'en tø n'adi'ich; øy yikxon mee tø nmiyujy'aty sam ja u'nktaak tyikyeeky tyiktsø'øky uk t'ejx'ity ja y'u'nk ja y'una'jk. **8** Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkpaaat meets jeexyip ja'agøjxp ku ndsokti ja'agøjxp ku nba'ayowdi. **9** Mee migu'uktøjk, wä'ats inet xjä'myatsti sa øøts y'ijty nduñ nbiky, sa øøts nnyamiwinmää'mbyaadyi jøts øø nbaaty ja nidsi-naajyik. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'øy'ayuujk.

10 Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njää'y'aty jøts øøts jade'en ka' ti pøky xaja'aty øy øø pøn xjapøky'ejxwä'añ. **11** Jøts mnayi mnija'widip nayide'en

sā nidu'uk jaty tō myik'ayo'ejxti ku myikajpxjot'amōjkidi, jade'en sam ja jāa'y ja tyeety yjagyepyyi. ¹² Tōxi myiktukmadowdi jōts ku ōy yikxon mjāa'y'attit sam pyaāt'atyī pōn ja Dios ja'ajtidip, pō ja'axi kō'ōm wamp jōts meets ja mdaniwāadsowiyi ja kyutujktaajk mā ja amuum xyiktuujnidit ja myōk'ajtin, ja y'ōy'ajtin jōts ja xyondaajkin.

¹³ Ja'agōjxpts ōōts idō'on ja Dios ja ndukmōjawi ndukunuu'kxyjawi ku meets ja kyajpxy ku meets ja y'ayuuujk ja ojts xmadojyi midi mee ndukmadoow. Ojts ja xjanchkupōkti jade'en jōts ku ja Dios ja tja'aji, kidi nugo jāa'y'ipxi ja' yja'. Jōts janch tiy janchts idō'on ja', jōts ku ja Dios ja tkajpxyi jōts ku ja Dios ja t'ayuuiki, jōts ja mbudōkiyidi pōn jaty ja tjanchjā'widip. ¹⁴ Mee migu'ukti, ku tō xku'ayo'ombāadidi ja Dios, kawine'en ja mmigugajp tō mdagubetyidi, nayide'en tō mjatti sam ja jāa'dyi pōn ja Dios tjanchjā'widip pōn ja nwindson'ajtim Jesucristo tjanchjā'widip pōn tsinaadyip jam Judea, pō nayide'enxi ja tō yjatti, nayide'en ja myi'israelit jāa'y ja kyamee'kxyidi. ¹⁵ Yō'ōbi israelit jāa'yts idō'on tyik'oo'ktōō ja nwindson'ajtim Jesús. Nayide'en ttungojmīdi sam ja tō tyik'oōkti ja kyō'ōm migu'uk pōn jaty ja Dios kyugajpx'ajtpy, jōts ōōts ja tō xpawōpy. Niwine'en ja Dios ja tkayikjotkujk'atti jade'en, jōts yjanchtumwenk'ejxtip ja jāa'y ōy pōn, ¹⁶ jōts ku ōōts ja Dios yja' njadukmadoowa'ānmiyi pōn ka'israelit jāa'dyi jōts ja nītso'oktit, ka'ats ōōts ja jade'en xuktunwami. Xjats jade'en ja pyōky nugo tyikmiweni'adō'ōtsti. Ixyānims inet ja Dios ja mōk ayo'on tō tyuktagida'agidi.

Ku ja Pablo ōy tjapaatwā'āñ jadigojk ja Tesalōnikit jāa'y

¹⁷ Mee migu'uktōjk, ku ojts nnewya'kxyindi jōts waani nājxy ja et ja xōōw, njā'myajts'ijtpyim meets ōy mee njaga'ijxy jōts ōōts njanchja'atsnōjkxwā'āñ kawinaak ojk jōts mee n'ats'ext. ¹⁸ Ojts ōōts njadyimyja'ukt-sōōñ; ōts meets jam kō'ōm kawinaak ojk tō njadyim'y'ats'ejxwā'āñ, jatyī jatyits ōōts ja miku' xyiktuu'duky jōts ōōts jam nganijky. ¹⁹ Jōts tigōjxp ōō nxon-dā'āky, ti ōōts idō'on ndaxondakpy, ti ōōts idō'on njōp'ijxpy, ti ōōts idō'on ndajotkujk'ajtpy, pō meetsxi dō'on ndajotkujk'ajtpy ku mye'ent ja nwindson'ajtim Jesucristo. ²⁰ Meetsxi dō'on ndajotkujk'ajtpy ku ōō n-xonda'āky.

3 Jade'en'ampy ōō tō nwinmay jōts ōō ndā'ant yam Atenas kajpkōjxp ku ōō ka' n'ukmajadāknī, kumi ka' ōō n'ukmidanaañi jadine'en ja jotmay, ² paty ōō tō nguexy tu'uk ja nmigu'uk pōn jam tō m'ats'ijxyidi. Timoteo ōōts nguexy, ja'axi ja Dios tmidump jōts ejtp ōōts ja tō nmōōtuñ ku ōōts ja nwindson'ajtim Jesucristo y'ōgyajpxy ja y'ōy'ayuuujk tō ngajpxwā'kxyi midi ja nitso'ok'ajtin tyajkp, ja'ats mdukmadowidip jōts ja mgajpxjot'amōjkijyidit jōts ja m'ajot'ajtin tu'ugyi xyik'ettit, ³ jōts jade'en ka' pōn t'ixmatst ōy idō'on ja tsep jade'en y'ity. Wā'atsxi kō'ōm xnijawidi jōts ku jade'en ja ayo'on nbaajitindit. ⁴ Jōts ku ōō nay jam wyinaty mōōt meets, ojtsxi ōō nnigajpxy jōts mee ndukmadōy jōts ku n'amjajitindit ndsaachjajitindit; tōts xni-

jawidi jōts ku jade'en tō yjanchjaty. ⁵ Paty ōts, kumi ka' ōts jadine'en n'ukjotkujk'ajtni, ja'agōjxp mee tō ndaniguexy ja jāa'y jōts ja tyiktō'ōt sā ja mjanchjā'win xyik'etti, ja'ats ō ndsō'jkp uk wan meets ja miku' tō mduktuñidi ja yja' jōts jeexyip ja Dios kyajpxy jade'en nugo nīwyindigōy sā meets ja ojts njadukmadōy.

⁶ Tōts ja Timoteo wyimbity jam Tesalōnica jōts ja yam tō tmijā'aty ja kajpxy ja ayuuujk midi yikjotkujk'atym jōts ku meets ja janchjā'win mōj xjagyepy jōts xyiktuujnidi xem yam ja Dios chojkin. Yide'ents ja yam wyā'āñ jōts ku meets ejtp xjā'myech, jōts ku nayide'en ja tsojkin xjagyajpti jōts ōō xjapaatwā'āñ nayide'en sam mee nja'ejxwami. ⁷ Niyjot'amōkōjpk ōō migu'uk yjawi, ku ōō nnimadōy jōts ku tu'ugyi ja Dios xjanchjāwidi, yam ōōts idō'on yjawi yide'en tsep'agujkpy njaty. ⁸ Ku ōōts jade'en nnimadōy jōts ku ja Dios tu'ugyi amumjoojt mōōt m'etti, jade'en ōō nnayjāwiyi tyimxyajimbejtp ōōts yjawi. ⁹ Ku meets jade'en xuñ, ōy ōōts ja Dios mōj njanchtamōjawi ku meets jade'en xpadundi ku jade'en xwindsō'ōgidi ja Dios. ¹⁰ Xjats ōōts yide'en xinaxy tsunaxy ja Dios n'amidōy jōts mee ndyimy'ats'ext, kō'ōm ndyimy'atspaattit, jōts ka'pxy myiktukmado'odit ti jaty mjaaka'ejtxidip jōts ja mjanchjā'win tu'ugyi t'ettit.

¹¹ Ja' ōō ndsōjky jōts ōōts ja Dios Teety, jōts ōōts ja nwindson'ajtim Jesucristo xpudōkit jōts ōōts jam nnōjkt jōts jam m'atsyik'ejxtit. ¹² Nay ja Diosts myikmōjtā'agiyidip ja mwinmāa'ñ jōts ja tsojkin mōj xjagyaptit nixem niyām, jōts xminamyayidit ōy pōn mōōt nayide'en sam mee myiktsoktin sam meets ja tsojkin ndamijagyapi. ¹³ Nay ja Dios Teety mmo'ojidip ja myōk'ajtin jōts xmidanidit ku sā mjattit, jade'ents ja mja'bikyidi jōts mgapōky'ijxyidi ku ja nwindson'ajtim Jesús jadigojk mye'ent mōōt niduki'iyi pōn jaty ja Dios ja'ajtidip.

Sā ja Dios xajotkujk'ajtint

4 Ixyāmts ōō migu'uk nnigajpxy jōts mee myiktukmadowdi ja nwindson'ajtim Jesús y'ana'amingōjxp: jōts ku jade'en xun'ettit sā ōōts ojts nyik'ixpiky jōts ku mdsōōnidit mdanidit jade'en sā ja Dios ttajotkujk'aty. Tun'ettits meets ja jade'en.

² Mnijā'widipxi ja ana'amīn midi myikmōōdyi, midi ōō tō nnigajxpy ku jade'en tyikutuky ja nwindson'ajtim Jesús. ³ Ja' Dios chōjkpy jōts ja tu'ugyi xnadyamiyoxidit; jōts kidi nugo mnamyōōt'atyidi pōni ka'adam ja xniyāa'yidi pōni ka'adam ja xnidō'ōxyidi, ⁴ ku pōn y'amajtskiwya'āñ, ka'ap ja patki'iyi nīpōn tō'ōxyōjk tkamōōt'att. Ja' ōy wā'ats pidsōmp jōts ja jade'en kō'ōm nāwyindsō'ōgiyi. ⁵ Jōts kidi nugo mbōkti ku mnachuj'ijxyidi ja'ayi sam ja jāa'y y'adi'ichin pōn ja Dios tkanija'wip. ⁶ Kidi pōn ja myigu'uk nīdō'ōxy twin'ōō'nidi, mōk nwindson'ajtim mdagubatidit, pō tōxi ōō nnigajpxy. ⁷ Ja'ats adōm ja Dios tō xanibik-tāajka'am jōts adōm ōy tsuj njāa'y'ajitindit. Ka'ap ja jade'en wyā'āñ ja Dios jōts ja kya'ōybi ndu'unint. ⁸ Jade'ents idō'on, pōni pōn yō'ōbi ixpōjkin tkamōjpk-tākp kidi myigu'ugip ja jade'en wyinaty tyumpy, ja Dios

idø'øn ja wyinaty jade'en kyamimadøøpy, pøn adøm ja y'Espíritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰ Ejtp meets ja mmigu'uk jade'en xmi-namyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi. ¹¹ Øy jotkujk idø'øn mdsøonidit mdanidit, ja mdunk ja mbøjk ja' idø'øn mjotmay'attip pø jade'enxi øø nx-umiwa'añ, ¹² jøts ja abikpyi jaa'y mwindsø'øgiyidit jøts kidi ti mga'ijtxyidi.

Sa ja nwindson'ajtim jadigøjk mye'ent

¹³ Mee migu'utøjk, ka'ap øø ndsøky jøts jadi'iñi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajtin tjagyapti, pøn tkanija'widip ja Dios. ¹⁴ Pøni nmibijkyimts adøm ja Jesús ku ja tø y'øøky jøts ku ja tø yjujkyiky jadigøjk, sudsots adøm ja ngamibøjkim jøts ku ja Jesús jadigøjk wyimbett ku ja Dios Teety ja møøt tyikujkpyøkt ja añmi'oo'kpi pøn jaty ja wyinaty tø y'atsjanchjawiyidi.

¹⁵ Paty idø'øn myiktukmadowdi nwindson'ajtim y'ix-pøjkingøjxp, jøts ku adøm, pøn jaty wyinaty jujky'ajtip-nim ku ja nwindson'ajtim mye'ent, kidi adømi tyimy-jawyenigyojindip jøts nika'anim ja' pøn tø y'ookti. ¹⁶ Pø kø'ømnimxi ja nwindson'ajtim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pujxuujx ja tyiktu'unt midi ja Dios yja'ajtpy. Winetnimts ja yjujkyøktit jawyeen pøn tø t'atsjanchjawidi ja Cristo, pøn tø y'ookti tyigøydi; ¹⁷ jøtsnism adøm pøn jujky tændipnim jaanimts adøm ja møøt nnøjxindit yootsjøtpy ma ja nwindson'ajtim nmbynabyajtidit jam tsajpwemp. Jøts ja nwindson'ajtim jade'en xemikøjxp nmøøtjujky'ajtidit. ¹⁸ Paty mjadyimnagajpxjot'amøjkiyidit xem yam, yø'øbi kajpxy yø'øbi ayuujk myiktu'undip.

5 Migu'uktøjk, ka' chøkyi jøts ø njä'at ti xøøw ti jumøjt mye'ent ja nwindson'ajtim. ² Wa'atsxi meets ja xnijawi jøts ku ja nwindson'ajtim yja'att jot-møñ tu'ukpi xøøw, yam ja wyinaty ka'ap pøn tjøp'ixy. Jotmøñ ja mye'ent sam ja maa'tspi koots y'atsmiñ. ³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøñ tyaja'atpatidi jøts ja ayo'on my-o'ojidit møk, jade'en tyaja'adidit sam ja tø'øxyøjk y'u'nkpiyin pøn ja y'u'nk tnikøjxp'ajtp jøts niwine'en ja chookin ja tkapaattit. ⁴ Jøts meets migu'uktøjk, ka' meets mwimbeeds mgugoodsi. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech. ⁵ Pø Diosxi mjagyajpidip jøts adøm wimbeets kugoots nga'ijtyindi. ⁶ Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'øn ja' wijy kejy. ⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxp, nay ja' ja yikmajadakpy. ⁸ Jøts kujaji kudøø'kxi adøm,

patyts adøm ejtp wijy kejy n'ejtindit. Kuwani njanch-ja'windit amumjoojt ja Dios yja' jøts nnachojka'andit nnamyaja'andit. Jade'en idø'øn nnadyagubojka'andit ja Dios yja' ejxim ja soldadi ñadyagubøkya'an ja pyujx jøts ja nisa kyajaty. Jøts njøp'ejxindip adøm ja nit-so'ok'ajtin, jade'en idø'øn ja ñamyayi tpaaty sam ja soldadi pyujxkujup midi ja kyubajk ja adanaajyiyip. ⁹ Pø kidi ja'ajpxi adøm ja Dios tø xanibiktaajka'am jøts adøm n'ayo'ombajtidit, pø ja'axi ja chøjkpy jøts adøm ja øy'ajtin nitso'ok'ajtin nbaajtidit nwindson'ajtim Jesucristo køjxp. ¹⁰ Adømxix ja nwindson'ajtim Jesucristo tø xku'o'jkindi jøts adøm ja møøt nju-jky'ajtidit. Nbaajtimpixi ja' xemikøjxp øy njadyimyjaju-jky'ajtyindinim uk øy wyinaty tø njadyimya'o'jknandi. ¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwijy pøn tø tjanchjawidi ja Dios

¹² Migu'uktøjkti, ndukmadoodip ixyam jøts waani xwindsø'ogidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtim yja'. ¹³ Øy tsux xaxonda'aktit ku jade'en tyundi, yiktundi ja tuda'aky'ajtin, yikxon namyiyu-yy'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktedundi, pudøkidit pøn waani jot'amutsk'ajtpnim jøts tuda'aky mjaay'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øybi ne'egi ejtp mdu'undip. Øy xwindsø'ogidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit. ¹⁷ Ajot'at'etti ja Dios Teety. ¹⁸ Pøni ti jaty tuujnip, tukmøjawidi tukunuu'xxyjawi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtim Jesucristo.

¹⁹ Kidi ja Espíritu Santo xyiktuu'dujkidi ja myø'ajtin midi meets ja mdunwa'anxiyip mjujky'ajtingøjxp.

²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky. ²¹ Yikxon tuki'iyi x'uk'ejxtit, jøts midi øy, ja'ats mbaajtidip. ²² Ixmajtskøxti ja kya'øybi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaay'ajtindi kunim ja nwindson'ajtim Jesucristo wyinaty myiñ. ²⁴ Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajpxpoo'kxni ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidik øøts ngajpxpoo'kxin jøts ja mmigu'uk-tøjk xkajpxpoo'kxtit sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchja'widip.

²⁸ Mgunuu'kxidip ja nwindson'ajtim Jesucristo. Jade'en idøøn ja yjatt.

2 TESALONICENSES

Ku ja Pablo tnijayi pøn ja nwindson'ajtim tjanchja'widip

1 Pablo ø nxøow, jadu'uk txøow'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjxp, pøn ja Dios Teety møøt y'etti jøts møøt ja nwindson'ajtim Jesucristo. ² Paatti kupøkti ja Dios Teety y'ø'y'ajtin ja Dios Teety kyunuu'kxin midi ja yajkpy møøt ja nwindson'ajtim Jesucristo.

Tyidyu'ump ja Dios Teety pøn tø kya'øyjaa'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawi ndukunuu'kxyjawi meets køjxp sam idø'on pyaat'aty jøts øøts jade'en ndu'unt. Møjyi y'adøjtsidipxi ja mjanchja'windi jøts nayide'en ja tsojkin midi ja Dios mmøøjyidip jøts ja mmigu'uk xtsøktit xpa'ayo'odit. ⁴ Xondakp øøts, xjats øøts jade'en nnimadya'aky ma jaty ja Dios tjagyepy ja yjaa'y, jøts meets jade'en myiknimadya'akti ku tuda'aky mjaay'atti jøts ku ja mjanchja'win xyikmajada'akti øy m'amjatti mdsaaachjatti uk ja ayo'on xpaati. ⁵ Jade'ents yø yikja'gyuki jøts ku ja Dios ka' nugo tya'oo'kpety ku tyidyuñ, m'ejxip meets ja' jøts ku mee mbaat'aty jøts meets ja myiktøkiyidit ma ja kyutujk ja ttanitani ja yjaa'y, pø ja'axi dø'on ixja mgu'ayo'owidip.

⁶ Paat'ajtidipts ja' ku ja Dios yik'ayøyidi pøn mga'ødyuujnidip, ⁷ jøts ja myikpoo'kxidit tuknax møøt øøts, ja'abi xøow ku ja nwindson'ajtim Jesús wyinaty myiñ, ku tsajpjøtpty tmigida'akt ja myøk'ajtin møøt y'ankilistøjk. ⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky. ⁹ Xemikøjxp ja nøjkk tyimgyudigøydi, jade'en ja yiktiidyu'undit jøts ja jagam yikpikta'akti ma nwindson'ajtim ja kya'ejxidit, ma ja tkapaajtidit ja y'ø'y'ajtin ja myøk'ajtin ku ja mye'ent. ¹⁰ Ku dø'on ja nwindson'ajtim mye'ent ja'abi xøow jøts ja wyindsø'øgyiit pøn jaty ja yja'ajtpy jøts ja kyaxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø nnigajpxy ku ja tø myiktukmadowdi.

¹¹ Ja'agøjxpts meets idø'on ejtp nni'amidowi nnibøkt-sowi, jøts øø n'amidøy jøts øø nbøktsøy ja Dios jøts ja m'ø'y'ejxidit, pø tøxi ja kø'øm m'a'ejxyidi; jøts nayi n'amidøopy øøts jøts nayi nbøktsøopy øøts jøts ja Dios ja myøk'ajtin tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip. ¹² Ku jade'en xyiknaxti

ku jade'en mjujky'atti, jade'en idø'on ñamyayi ja nwindson'ajtim Jesucristo xwindsø'øgidit, amuumts ja Dios Teety, amuumts ja nwindson'ajtim Jesucristo ja y'ø'y'ajtin mdakaxa'agidit.

Ja' pøn møj pøkyump

2 Mee migu'uktøjk, ku dø'on ja nwindson'ajtim Jesucristo myenwa'ant ku ja nminabyaajta'andit, ja'ats øts yam nnigajpxwampy, ² jøts kidi nugo mwinmaamyä'atti, ni xkatsø'øgidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'amä'ayin, uk myiktanigaxti ja nøky, ñadyijyi jade'en tpikta'akti jøts ku øøts ja nguexy, ñadyijyi wyä'andi jøts ku tø yja'aty ja et ja xøow ku ja nwindson'ajtim myiñ. ³ Niwine'ents ja yjade'embi taay xkamibøktit. Kuts idø'on ja et ja xøow wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'on kyaxø'økt ja yikpøkyumbi pøn ja xemikøxpit kudigø'øyin tø yiktanibiktaajkiñi. ⁴ Ja' idø'on ja Dios tmidsep'ajtp, ja' ja tka'øyja'wip tuki'iyi midi jaty ja Dios yja'ajtpy, uk midi jaty paat'ajtip jøts ja yikwindsø'øgit. Ja'atp paat ja jap tsaptøjkjøtpty midi ja Dios yja'ajip jøts ja jap y'ixa'akt sami Diosin. Ja' kø'øm nadyejip jøts ku ja Diosi.

⁵ Ku njam'ajty ma meets jam, zkidi ja xja'myatsti ku øts yø ojts nnigajpxy? ⁶ Jøts wa'ats meets ja xnijawi tigøjxp ja yjaakta'ani, jøts ja ka' tsojk kyaxi'iky ku ja et ja xøow ka'anim tpaat'aty. ⁷ Jaanits ja' midi ja ka'ødyumbi yja'ajtpy kuuyi ja ja'ayi yjiwa'akt midi ja tyik'amøjkip. ⁸ Jøts ja jaty kyaxø'økt, ja nwindson'ajtim Jesús ja tyik'ookp, ja'ayi ja tpixujt. Jøts ku ja mye'ent amuum kudøø'kx møøt, ja'ayits ja tyuktagudigø'øpy. ⁹ Ja' midi idø'on ja'atp, ja miku' ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tñankyja'ejxit ja y'ijxyimbi kya'ijxyimbi. ¹⁰ Jøts ja tum ja ka'øybi ja tyiktu'unt jøts ja jade'en twindaay'att pøn nøjkk windigøødyip, tøxi tkawa'andi ja tyiiby ja yjanchpi midi yiknitsokp. ¹¹ Xjats ja Dios ja nayide'en tyikjaty, wan jade'en tyikwindaay'atti ja'agøjxp ku tø tyundigøydi jøts ja tjanchjawidi jade'en ku yikwindaaayidi, ¹² jøts jade'en niduki'iyi yiktabayø'ødyit ja pyøky, tøxi ktatijjawidi tkajanchjawidi midi tiy midi janch. Ja' ne'egi chojktip tyumjaka'øybi.

Tø ja Dios ttanibiktaagi jøts ñitso'ok'attit ja Tesalónikit jaa'y

¹³ Meets køjxp øøts ja Dios ejtp ndukmøjawi ndukunuu'kxyjawi, mee migu'uktøjkti wine'en ja nwindson'ajtim mdsøky'atyidi. Patki'iyipxi ja Dios tø mdanibiktaagiyidi jøts mnitso'ok'attit, ja'agøjxp ja Espiritu Santo wa'ats myik'ijtyidi jøts ku nayide'en tø xjanchjawidi ja tyiibi ja yjanchpi. ¹⁴ Jade'en'ampy ja Dios tø mjotøkiyidi ku øø tø nnigajpxy ja øgyajpxy ja ømyadya'aky midi yiknitsokp, jøts jade'en xpaattit ja kunuu'kxin midi yja'ajtpy ja nwindson'ajtim Jesucristo.

¹⁵ Jade'ents migu'uktøjkt idø'on, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amín midi øø tø nyaky ku øøts jam kø'øm n'at-s'øjch, jøts nayide'en midi nøkyøjxp tø myiktanigaxti.

¹⁶ Ja nwindson'ajtim møøt ja Dios Teety, ja' y'øy'ajtingøjxp tø xtsøjkyindi. Tø ja nayide'en xmø'øyindi ja kajpxjot'amøki midi xemikøjxp, jøts ja yikxon njøp'ejxin. ¹⁷ Wants ja nayide'en tyikmøjki ja m'aaw ja mjoottit jøts tu'ugyi xwindanidit jøts jade'en xnigajpxtit uk xu'undit tum ja y'øybi.

Amidowdi pøktsowdi ja Dios jøts øøts ja kyajpxy nyikyø'øyiyit

3 Migu'uktøjkti, ja' øts yam njaaknigajpxwampy jøts øø xni'amidowit xnibøktsowit wan ja jaa'y tso-jk tñimadowdi ja nwindson'ajtim y'øgyajpxy ja y'ømyadya'aky pøn jaty tsinaadyip øy madsøo, jøts tsojkingøjxp tkupøktit nayide'en sam meets ja tø xkupøkti. ² Jøts nayide'en x'amido'odit ku Dios x'a-jot'attit jøts øø x'ixmatst ja ka'øyjaa'dyi ja kawindiy'ajtpidi, jabi ka'axi niduki'iyi ja jaa'y ja janchja'win tmøødidi sam adøm. ³ Øyts ja nwindson'ajtim, ja' mee tu'ugyi mdukm'i'ettit ja winmaa'ñ jøts ja m'ejx'etidit jøts ja miku' mgamimajada'agidit. ⁴ N'ajot'ajtpy øøts ja nwindson'ajtim jøts ku xundi jade'en jøts xun'adø'øtstit sa jaty mee n'ane'emy. ⁵ Wan ja nwindson'ajtim nagyø'øm mbudøkiyidi jøts xjaaknijawidit sa ja Dios xtsøjkyindi jøts nayide'en xjagyaptit ja jotmøk'ajtin ja tudā'aky'ajtin sam ja Cristo.

Paat'ajtiyip tu'ugyi nnadyamiyojxa'ant ja ndunkjøøjp

⁶ Mee migu'uktøjkti, ja nwindson'ajtim Jesucristo køjxp øøts yam n'ane'emy jøts xmajtstu'uttit ja mmigu'uk pøn katunwandip uk pøn tkabadunwandip chinaa'yingøjxp ja ixpøjkin midi tø myiktukmadowdi, midi øø tø nnigajpxy. ⁷ Mnija'widipxi sa mjujky'attit sa mdsøønidit mdanidit jøts xpadu'undit nayide'en sa øø nduñ; ka'axi øø juuni ngatuñ ku øøts jam ndsøøni ma meets jam. ⁸ Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti. ⁹ Øy øøts idø'on ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjkp øøts, jøts jade'en myiktuk'ejxti sa xu'undit. ¹⁰ Ku øøts jam ndsi-naay ku myikmøøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty. ¹¹ Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajtix, niti tkatundi. Ja'ayi tyuñ'ajttit sudso niti tkatu'undit, ne'egi ja myigu'uk tyikwinmaamya'atti. ¹² Yø'øbi jaa'yts øøts idø'on nni'ane'emy ja nwindson'ajtim Jesucristo kyutujkøjx-pit jøts wan ttajotkujk'atti ja tyunk jøts jade'en tpaattit midi tyajuky'attit.

¹³ Migu'ukti, kidi juuni x'ixmatsti ja ødyu'unin. ¹⁴ Ku jam pøn tkamøjpkta'akwa'ant midi øø nnigajpxy ya'at nøkyjotpy, øyim x'ejxtit pøn jade'en adøtsp jøts kidi xunk'atti, wan iiy wine'enin tsø'ødyunjawidi. ¹⁵ Kidi xmidsepøkti, jade'en x'ana'amdit sam pyaat'aty jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶ Jøts ja nwindson'ajtim tyakp ja øy'ajtin, ja' ejtp mgunuu'kxidip øy madsøo, øy tigati yjatuñ, ja nwindson'ajtim ni'ijtyi mjagyapidip.

¹⁷ Øts ngøjø'øm meets ya'at kajpxpoo'kxin ixyam ndanijayi. Jøts øts nxøøw nayide'en nbikta'aky sa øts ejtp nduñ ku øts ja nøky nguexy. Pablo. ¹⁸ Ja nwindson'ajtim Jesucristo niduki'iyi mmo'ojidip ja kunuu'kxin. Jade'en idø'on ja yjatt.

1 TIMOTEO

Ku ja Pablo ojts tñijayi ja Timoteo

1 Øts idø'øn Pablo'ajtp. Øts ja Jesucristo ngu-danaapy sam øts tø xpikta'aky ja Dios Teety mididi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmo'øyindit. ² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin mididi ka' tyiyi yjanchi

³ Tan meets jam Efeso kajpjtøp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaa'y mididi jam winaa'gindi jøts kidi ja tñanky'ixpikyidi ja winmaa'ñ mididi ka' tyiyi yjanchi ⁴ jøts nayide'en kidi nugo tyikmøjtøkidi ja kwenti ja madya'aky mididi nisudso'ampy katidøjkip. Nugo amyøñ tsaachyøñ tñimadya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatiidøki. Niwine'en adøm ja xkabudøjka'andi jøts adøm nbaduujnin ja Dios yja' mididi adøm ja tø xanipijkyim mididi tø nyikmø'øyindi janchja'wingøjpx.

⁵ Jøts ja'agøjpx ya'at myikta'ane'emy jøts nixem niyam ja tsojkin xjagyaptit mididi ja Dios yja'ajip, mididi yiktump øy'ajtingøjpx øwyinmaa'ngyøjpx ku ja nadyamiyoxi ñaxy amuum janchja'wingøjpx. ⁶ Tøts yø winaa'gin tmajstutnidi jøts nugo ñanktyuut'igøyidi ku tpaabøkti ja winmaa'ñ mididi nisudso katidøjkip, nugo nadøki tñikyajpxy'atti. ⁷ Ja' chojktip jøts kyajpxwejpi'at-tit sa ja Moisés kyutujk wy'a'añ, ni tkaja'gyukidits ja wyinmaa'ñ kø'øm sa jaty wy'a'andi, ni ja y'ixpøjkinbaat tkanijawidi mididi nadyijyi ñigajpxtip amimøjnija'wibim tij janch.

⁸ Nnijawindip adøm jøts ku ja'abi kutujk y'øyi ku jade'en tyunkpaaty sam tø yiktani'biktaagi. ⁹ Jøts yikni-jawit nayide'en jøts ku nimaj ja kutujk kyayiktani'bik-taagi ja øyja'y mididi katundigøødyip; pø ja'axi ja kutujk wy'a'añ ku ja tø kyøjy jøts ja tyu'unt maj ja jaa'y pøn tum nay'adsep tja'widip, pøn kamadoodip. Jaa ja tyuñ maj ja ka'øyjaa'dyi, maj ja møjpøkyjaa'dyi; pøn tkawind-sø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaa'k ja tyik'ooktit tyiktigø'ødyit. Jats idø'øn ja kutujk tyunkpaaty jøts ja tpayø'øy ¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti

myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tñiwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojkr, ¹¹ ja øy'ixpøjkin mididi tñigajpxp ja øgyajpxy ja ømyadya'aky, ja Dios yja' mididi yiknitsokp, mididi øts yam tø nyiktani'piky.

Tyamøja'wip ja Pablo ja Dios ku ja pya'ayoyiyi

¹² Ndukmoja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøkt'a'aky jøts øts ya'at ndunkjøjpx ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt. ¹³ Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'añ ngawindiy'ajtingøjpx jøts øts ja y'ijty nyik'amjaty nyikt-saachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy. ¹⁴ Paty øts ja nwindson'ajtim møj ndukmojawi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

¹⁵ Tiy'ajtin yø' jøts niduki'iyi njanchja'wa'ant: ku ja nwindson'ajtim myiñ ya'axwiiñ jøts ja tyiknitso'ok'ajty ja pøjkipitumbi jaa'y. Møj tundigøøbyi øts y'ijty, nika' pøn jade'en. ¹⁶ Jade'engøjpx øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkipimee'kxy. Jade'en ø ndunjøpi sudso yikpaatt ja jujky'ajtin mididi xemikøjpx ku ja yik-pabiky yikjanchjawi. ¹⁷ Paty nayide'en nwindso'jka'ant, nmøja'wa'ant n'øyja'wa'ant ja Dios Teety mididi nwindson'ajtyindip xemikøjpx, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp, pøn tñi-ja'widyaapy. Jade'en idø'øn ja y'ejxi tyiyi.

¹⁸ Mets u'nk Timoteo, mets ya'at ndanipijky jøts yikxon xpadu'undit ja Dios yja' samdam mmi-madyajkidi ja Dios kyugajpxtyi. Mjanchjawip ja nwindson'ajtim amumjoojt jøts øy ja mwinaa'ñ xyik'ett. ¹⁹ Jaa winaa'gin jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuut'igøy-di ²⁰ sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayik-windsøy.

Ku Pablo ttukmadøøy ja Timoteo sudso tkugajpxa'akt o pøngapøn jaa'y

2 Ixya meets jawyeen ndukmadøøy jøts ndanipøkti jøts møk xukunuu'kxyjāwidit ja Dios jøts x'ami-do'odit xpøktso'odit jøts tpudøkit ja naxwii'ñit jaa'y. ² Kuwāndaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxindit ku amumjoojt nwindso'jka'ant nwinjā'wa'ant. ³ Ku jade'en nbadu'unint jade'ents t'øy-jāwi ttsujāwi ja Dios midi xyiknitso'ok'ajtimp, ⁴ Jabi jade'enxi ja ttsøky jøts niduki'iyi nnitso'ok'ajtindit jøts nnija'wa'andit ja tyiiby ja yjanchpi. ⁵ Tu'ugyi jaa ja Dios Teety, jøts nayi tu'ugyi ja' midi xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy. ⁶ Ojts ja nwindson'ajtim Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yikni-jawinim ku ja xøøw ja jumøjt tø tpaatynim sja ja yjajty kyubejty. ⁷ Ja'agøjxp øts tø nyikpikta'aky kugajpxy'ajtpi ku'aa'w'ajtpi jøts øts ja janchjā'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'on nwa'añ, ka' nugo ndabyaaty, pø ja Cristoxi øts amuum njanchjā'wip.

⁸ Paty ø nwa'añ, jøts o mā pøn tjā'myatstīt ja Dios, ka'ap ja tsep, ka'ap ja aka y'øyi. Tu'ugyi amuum nbik-taajkin ja njanchjā'win. ⁹ Jøts ja tø'øxyøjk, tu-da'aky'ajtin øyjaa'y'ajtin yiktundip. Ka'ap ja ja'abi wet tpiakta'aktit midi namyikaxi kaxø'kp midi ja myigu'uk nugo tyukta'amutskidip. Kidi namyikajxingøjxp ja wyaay tyik'øyidi tyikpaadidi. ¹⁰ Jade'en ne'egi tpudøkidit ja myigu'uktøjk ku ja øy'ajtin tyiktu'undit sam ja'adi pøn ja Dios tø ñadyamiyøxyidi. ¹¹ Ku ja Dios yja' yikajpxwa'kxy, amøñi ja tø'øxyøjk tpatmado'odit, tuki'iyi ja yujy'ajtin tpiakta'aktit. ¹² Ka'ap mibaat ja tø'øxyøjk tkajpxwā'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit. ¹³ Jabi jawyeenxi ja Dios tyikaxi'jky ja Adán jøtsnim ja Eva. ¹⁴ Jøts ja Adán ka'ap ja yikwin'ñi. Ja tø'øxyøjk ja' ne'egi yikwin'øø'n, jøts ku yikwin'ñi jade'ents ja pøky tpaajty. ¹⁵ Jade'en'ampy ja tø'øxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchjā'win tpadu'undit, ku tjagyaptit ja tsojkin jøts ja wa'ats'ajtin, jøts møøt ñadyabudøkiyidit ja ja'gyukin.

Sa yjaa'y'attit pøn ana'amp tsaptøjkjotp

3 Janch tiy'ajtin yø': janch øy yø'øbi tunk pøn tniwindsøn'ajtwamp ja Dios yja'. ² Paty nayide'en øy tsuj yjaa'y'attit jøts ka' nugo o sja yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'ogit twinjāwit pøn nimejnip nija'jtip jam tyøjkjotp; jøts øy tsuj nayide'en yik'ixpøkt; ³ ka'ap y'øyi jøts y'amu'u'kyjaa'y'att jøts ka'ap tsep t'ix-a'at. Ka'ap ja myigu'uk nugo twin'øønt jøts ja meeñ jade'en tpaatt. Ja' tsojkip jøts ja pa'ayo'owin ttu'unt

jøts ka'ap ja meeñ nugo pøkpaat tjawit. ⁴ Øy tsuj y'u'nkteety'att sam pyaat'aty jøts tuki'iyi t'ext yjøn-jotp, jøts ja y'u'nk øy tsuj wyindsø'øgiyit; ⁵ ku jade'en pøn tkatu'unt yjøn-jotp tyøjkjotp sam u'nkteety'ajtin, zšudsots ja t'ana'amt pøn ja Dios tjanchjā'widip? ⁶ Ka' pyaat'aty ana'ambi tyøkit pøn tjemyabøjkp ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on. ⁷ Nayide'en chøkyi jøts ttunjøpit ja øy'ajtin ja tuda'aky'ajtin jøts jade'en wyindsø'øgiyit pøn ja Dios yja' tkabaduujnip-nim, jøts ka'ap ja jade'en pøky tyaja'adiyit jøts nayide'en ka'ap ja miku' nugo wyin'øøniyit.

Sa yjaa'y'attit ja møjaa'dyøjk pøn tundip tsaptøjkjotp pøn tpudøjkp ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyjaa'y'att jøts kø'øm ñawyindsø'øgiyit. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meeñ nugo pøkpaat tjawidit. ⁹ Øy tsøky wa'ats tñijawidit sja ja Dios yikjanchjāwi midi y'ijty kayikni'jā'wip, jøts ja wyin-maa'ñ øy tsuj wa'ats tmøøt'attit. ¹⁰ Ja' tsojkip jøts yik'ext yiknijawit pøni ka' ti tundigø'øyin tmøøt'atti, møjaa'y'attitp ja' jøts tkuma'adyit ja ayoobitøjk. ¹¹ Nayide'en ja ñidø'øxy tyuda'aky'ajtmidit y'øy-jaa'y'ajtmidit. Ka' nugo yjemgajpxtit pyagajpxtit. Ja' tyu'undip midi tiy'ajtin. ¹² Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'unā'jk jam yjøn-jotp tyøjkjotp. ¹³ Ja møjaa'dyøjk pøn øy tsuj tundip sja ja tø yiktanipøkti, jinaxy ja myøjtøkidi jinaxy ja yikwindsø'ogidi jøts ja nayide'en ka' tsep t'uk-ja'wiñidi tñigajpxtit sudso yikjanchjāwi ja nwindson'ajtim Jesucristo.

Sa Dios ja wyinmaa'ñ tñanky'ijxyiyi midi y'ijty kayikni-ja'wipnim

¹⁴ Tsojk ø nnøjkxt jøts me n'ats'ext; ixyamts mets yā'at nøky ndanijayi. ¹⁵ Ku øts jotmøñ nda'anigyojt, jøts xnijawit sja njaa'y'ajtindit møøt ja nmigu'uk pøn tø tjanchjā'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tñigubojktip ja tyiiby ja yjanchpi. ¹⁶ Janch tiy'ajtin yø', ku janch møj ja Dios wyinmaa'ñ midi y'ijty kayikni'jā'wip. Ixyamts yik'ixy yiknijawit jabi jade'enxi jap jaabyety y'ity ku:

Jaa'yin ja nwindson'ajtim Jesús ñanky'ejxyiyi yā naxwi-iñ;

jøts ja Espiritu Santo tñigajpxy ku ja' tiy'ajtin tmøøt'aty

jøts nayide'en ja ankilistøjk y'ejxøø ñija'wiyøø.

Tø yikajpxwa'kxy ja Jesús y'ixpøjkin o magajp,

jøts jade'en tpadundi ja naxwii'ñit jaa'y

jøts ja chajpajtnaa mā ja Dios Teety jap.

Jade'en ja nøky wya'añ.

Sa winaagin tmajtstu'uttit ja Dios'ajot'ajtk

4 Tiy'ajtin ja Espiritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ

jøts kyøxt ja naxwii'ñit. Jøts ja tpadu'undit ja ixpøjkin midi ka' tyiyi yjanchi, midi ja miku' yja'ajtpy. ²Ja'abi jaa'y ja tmado'odip pøn taay'ajttip pøn ja pyøky tka-ja'widip øy ja tjanijawidi ku møj tø tyundigøydi. ³Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja kø'øm tø tjabiktā'aky; pø tøxi ja Dios ja ttanibiktāagi jøts ja nyik-tunkpaajttindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiiby i yjanchpi yjøø'kxtipts ja', wan Dios ja ttamøjajawidi ttagunuu'kxy-jawidi. ⁴Midi ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyik-tunkpaajttint, ⁵ku ja jade'en ndu'unint kunuu'kxyts ja wyimbejtñi ja pikta'aky sam ja kyajpxy wya'añ.

Sā ja Jesucristo øy tsuj yikmiduñ

⁶Ku ya'at øy xuk'ixpøkt ja migu'uktøjk, øy idø'øn ja Jesucristo wyinaty xmiduñ, jøts m'ajot'atp ja', myik-tunkpaatp ja' ja ixpøjkin sudso n'ajot'ajtim ja Dios midi ixyambaat mgamajstutpy. ⁷Ka' xmøjpikta'akt ja ka-jpxy ja ayuujk midi ka' tyuñ. Amumjoojt ja Dios yja' xpaduujnit; ⁸øy nugo njanay'eix'ejtint jøts møk mø-jaaw nyiknaxint, ja Dios yja' ne'egi møj ku nbaduuj-na'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajttint xemikøjxp. ⁹Janch yø' tiy yø', paa't'ajttip jøts yø niduki'iyi nbadu'unint. ¹⁰Ja'agøjxp møk ndu'unint øy njagu'ayo'ombaaajttindi øy njayikjemdu'uñindi nyiktedu'uñindi. Ka' ti ngumaa'yindit, jabi tøxi ja Dios xmø'øyiindi ja jøp'eixin jøts niduki'iyi tyiknitso'okt pøn jaty pabøjkiyip.

¹¹Yø'øbi winmaa'ñ idø'øn mni'ana'amp jøts nayide'en xnanky'ixpøkit. ¹²Øy tsuj jawyeen xunjøpit sam pya'at'atyin tpadu'undit pøn ja Dios tjanchja'widip jøts jade'en myikupøkt øy mja'unaj'kinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win. ¹³Ku øts jam udy'agyi nja'att, kajpx ja nøky jam mā mnamyukyidi sā ja Dios kyajpxy wya'añ. Yikxon xuk-winjawit ja migu'uktøjk jøts ja yjotmøktā'aktit, yikxon waani xyik'ixpøkt. ¹⁴Yiktuñ ja møk'ajtin ja wijy'ajtin midi ja Dios tø mmø'øyi, Dios waa'n ku ja møjaa'dyøjk ojts mgønixajyi.

¹⁵Tu'ugyi xu'unt yø'øbi winmaa'ñ jøts jade'en t'ejxtit tñijawidit sā tø xyikmiweni xyikaja'aji ja mja'gyukin jøts ja mjanchja'win. ¹⁶Øyim mnay'eix'ettit kø'øm midi mwinnmaa'ñ'ajtpy, midi mduk'ixpijky, midi mdukni-ja'wip ja migu'uktøjk, tu'ugyi xyik'ettit midi mdumpy. Ku jade'en xu'unt mbaatppts ja øy'ajtin jade'en, nayide'en ja'adi pøn tmadoodip ja ixpøjkin.

Sā ja Timoteo møøt y'ett pøn ja Dios tjanchja'widip

5 Ka' xwindso'ot, ka'ap o sā xnøjmit ja møjaa'dyøjk; ne'egi tudā'aky xkajpxwejt sam ja mdeedyin; nayide'en ja unaj'ktøjk øy tsuj xjawit sam ja mgø'ømigugin. ²Nayide'en ja møjaa'dyø'øxy xwin-jawit xwindsø'øgit sam ja mdaagin, jøts nayide'en ja

kiixyuna'jkti sam ja mgø'øm'uchin, jade'en ja mdu-da'aky'ajtin xyiktu'unt.

³Pudøki ja ku'økytø'øxy pøn ti kadyimy'ejtixp. ⁴Pøni jamts ja ku'økytø'øxy møøt y'u'nk y'unaj'jk møøt y'ap y'ok, jade'en ja unaj'jk pya'at'atyidi jøts ja tpudøkidit ja tyeety tyaak jøts ja tyikwimbejtñiyidit ku ja tø y'lijxyidi, yø' Dios y'øyja'wip, jade'en Dios ttsøky. ⁵Ja ku'økytø'øxy pøn nadyu'uk tø tyañ, pøn nipøn ka'ejtpt, ejtpts ja Dios ja t'ajot'aty jøts ja pyudøkiyit, ka'ap ja Dios ja tja'dyigøy jøpy ux. ⁶Jamts nayide'en ja ku'økytø'øxy pøn ja Dios tka'ajot'ajtp. Tyumpy ja' pøni ti ja tyun-wampy, øøky ja ñabyiktaajkniyi. ⁷Tukmadow yikxon, wan tñijawi jøts ka' pøn øy sā ñøø'mxiiyt. ⁸Jamts wi-naagin tkajotmay'aty ja myigu'uktøjk, abiky tpiakta'aky ja yjøøn ja tyøjk jøts ja t'ixmajtsni ja Dios'ajot'ajtk. Ty-imwyenks ja ne'egi pyidsimy, ka'ap jade'en pøn ja janchja'win tkajagyajptinim.

⁹Yø ku'økytø'øxy yiklisti'atp midi tugi'pxy jumøjt pøni tøts ja tu'ugyi ñiyaa'y tø t'atmøøt'aty, paa't'ajttiyip ja mibaat yikpudøkit. ¹⁰Mibaat ja yikpudøkit ja'agøjxp ku tø y'øyjaa'y'aty, pøni tø y'u'nk y'unaj'jk yikxon tyikyeeeky tyiktsø'øky, pøni tø øy tsuj t'adsøy ja jaa'y pøn tøjka'ayø'ødyip, pøni tø yikxon twinjawi twindsø'øgi ja myigu'uk pøn tø tkupøjknidi ja Dios, pøni tø tpudøki pøn amjajttip tsaachjajttip, uk pøni tø ttuñ jadu'uk øy ti may'ajttip øy ti pudøjkin.

¹¹Ka' mibaat yikjaabyatt ja ku'økytø'øxy pøn un-aj'knim; ja'agøjxp ku jotmøñ y'amajtskit, jade'en'ampyts ja Cristo yja' ka'pxy tka'ukpadu'uniiyt, ¹²jøts yikpøky'ixy ku tø tmajstutni ja' midi tø t'uk-padøki. ¹³Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midi jagapaat'ajttiyip. ¹⁴Paty y'øyi jøts y'a-majtskit pøn ku'økytø'øxy unaj'knim, jøts ja y'u'nk t'ext tjagyapt sam pya'at'aty jønjøtpy tøjktøtpy n'eixint njagyajptint, jøts ka' nugo ja jaa'y pyagajpxiiyt. ¹⁵Jamts winnaagin pøn ja Dios yja' tø tmajstuuji, ja miku' yja' tø tpanøjkxiyi. ¹⁶Pøni pøn ja Dios yja' tø tkupøjkidi jøts pøni jam ja myigu'uk ku'økytø'øxy, mibaat ja kø'øm tpudøkidit pøni ti ja ka'ejtixp, jøts ja ka' pyudøkiyidit ja møjaa'dyøjk midi tundip jap tsaptøjkjøtpy. Jade'en'ampyts nayide'en yikpudøkit ja ku'økytø'øxy pøn ja myigu'uktøjk kadyimy'ejtittip.

¹⁷Ja møjaa'dyøjk midi tñigutujk'ajttip ja janch-ja'wibidi jøts nwindso'jka'ant nwinja'wa'ant. Jamts ja' midi xuk'eiximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant. ¹⁸Jabi jade'enxi jap jaabyety y'ity: "Kidi ja mdsakaa ajeñ xyik'okti ku ja xyiktunwa'andit." Jøts nayide'en: "Ku jaa'y nyiktu'unint kuwani myijuu'ñ ja ttsøky." Jade'en ja nøky wya'añ midi ixa tø xnijawidi.

¹⁹Ka' xmøjpikta'akt ku yikni'øønit ja møjaa'dyøjk pøni ka'ap ja a'eixnaxpi te majtskin uk tigøøgin. ²⁰Pøni tundigøy'adøtstip ja møjaa'dyøjk, mibaats ja jam yik-tamigajpxt mā ñamyukyidi ja janchja'wibidi jøts jade'en tjøptsø'øgidit tjøpjawidit ku tyundigøydi. ²¹Ku ya'at jade'en ndanipiky wā'ats Dios Teety tmadøy, wā'ats ja nwindson'ajtim Jesucristo tmadøy møøt ja

ankilistøjkti, jøts øy yikxon idø'øn xpadu'unt yø ana'amín, ka' pøn nugo xukta'oo'kpatt. Pøni pøn tundigøødyip tuknax ja xpayø'øty. ²² Ka' nugo ajawí xpikta'aktit ja møjaa'dyøjk midí tnigutujk'atp ja janchja'wibídi, jawyeen yik'ext yiknijawit pøni sá yjaa'y'aty, kuts kya'øyjaa'y'aty jøts ja pyøky tpaqaatt ja janchja'wibídi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøjk'ejtpxi xijy mjoajt, vino m'uukp waani.

²⁴ Pøn tundigøødyip midí yiknija'wip wa'ats, ja'ats yikpayø'øpy, midí'its kayiknija'wip jaanimts ja yiknijawit ku ja payø'øyin xøøw y'ett. ²⁵ Nayide'en ku ja øybi ndu'unint; øy ja jatyi yjagayiknijawi, kuwani yiknijawi udyaa'gyi. Ka'ap ja jadi'iñi tyañ.

6 Yø tumbitøjk øy tuda'aky yjaa'y'attit jøts twindsø'øgidit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin. ² Nayide'ents ja tumbitøjk pøni jam ja wyindsøn midí nayide'en tpadump ja Dios yja', ne'egi møjts ja twindsø'øgidit, pø pyadumpxi nayide'en. Jade'ents ja ne'egi tpuðkídit sam ja tsojkin tjagyapti. Me Timoteo, tukmadow kajpxwa'kx yø'øbi ana'amín midí nnigajpxpy.

Sá ja Dios yja' nbaduujna'ant jøts agujk jotkujk n'ejtint

³ Pøni jam pøn tkajpxwa'kxy ja wenk ixpøjkin midí ka' tminabyaadyi ja nwindson'ajtim Jesucristo yja', midí tkawindsø'jkíp ja Dios, ⁴ nugo ja ñamyikexyi, ka'ap ja tnijawi pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwyaa'ñidi. ⁵ Nugo ja y'awa'an'ajtk tyiktunidi ku tka'uknija'wiñidi ja tyiibyí. Nugo win'øø'ningøjxp nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminamyayi. ⁶ Jade'en'ampy adøm ja jotkujk'ajtin nmøøt'ajtyim ku ja Dios yja' nbaduujña'am øy meeñ o ti ngamøøt'ajtyim. ⁷ Ka' ti pøn tmimiñ ku ngaxi'jkyimp ya naxwiiñ, nayide'ents ku nwindigøø'ña'ant, ka'ats ti n'uk'ejxna'ant; ⁸ pøni nbaajtyimp ja ngaajyk ja n'uujkík jøts ja nwet ja nnaamy, ndajotkujk'ajtimpts idø'øn ja'. ⁹ Jamts pøn ja kumeeñ'ajtin ttsojpk. Tyumpy, o ti ttu'unt, jøts ja jade'en o sá nugo tpaatt ja meeñ, kø'ømts ja jade'en ñankyuu'tigøyidi, ka' tja'gyukidi pøni ti tyundip. Kø'øm ayo'on ja jade'en ñankyukpaadyidi, jade'ents ja nugo ñankwyindigøyidi. ¹⁰ Ne'egi nugo xyik-

tundigøø'yint xyikajpxigøø'yint ku ja kumeeñ'ajtin ndsojkin; jamts pøn winaa'gin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyit.

Sá ja Timoteo yikxon tnigubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujnip. Yikyø'øpy mets ja mdsi-naa'yin øy tsuj, ja m'ajot'ajtin jøts ja mjanchja'win. Jøts xminamyayit øy pøn ja mmigu'uktøjk, jøts ja tuda'aky'ajtin yujy'ajtin xyiktu'unt. ¹² Nitani møk yø janchja'win; kidi xmajtstu'uty midí ja Dios tø mdamid-søkyiyi midí xemikøjxp ejtp, jabi øy tsuxi tø xukmadø ja mayjaa'y sá ja janchja'win xjagyepy. ¹³ Ja Dios Teety midí xyikjujky'ajtindip, ñija'wipts ja', sam ixyam n'ane'emy, nayide'ents ja nwindson'ajtim Jesucristo ttukmadøø ja tiy'ajtin ja Poncio Pilato. ¹⁴ Paty yikxon xpadu'unt jade'en, midí tø myiktanipiky, ka' xyikti-gatst, jøts ka' pøn mbøky'ejxiyit. Jade'en xu'unt kunim ja nwindson'ajtim Jesucristo mye'ent. ¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya naxwiiñ. Tu'ugyi Dios Teety myøji midí ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en. ¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni ma' ka' pøn mibaat pyaadyi y'ijxyi. Yikwindsø'jkíp yikwinja'wip ku ja myø'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin. ¹⁸ Nøjmi ja kumeeñ'jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip. ¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpiкта'ak midí tø myiktanipiky. Kidi xmøjpiкта'aky ja ka'øy ayuujk midí ja Dios yja' tkaminabyaajtip, midí ñadyijyi yiktejp ku ja tyiy'ajtin.

²¹ Tø winaa'gin tyuu'tigøydi pøn yø jade'embí winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'øn jade'en.

2 TIMOTEO

Ku ja Pablo ojts tnijayi ja Timoteo

1 Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tø xamidsøky jøts øts ja yja' ndukmado'ot ja naxwii'ñit jaa'y sa nbaajitint ja øy'ajtin xemikøjxp ku ja Jesucristo møøt n'ejtint. ² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Sa ja Timoteo tyiknigaxø'økt ja Cristo ja yja'

³ Ndamøja'wip øts ja Dios ku me nni'amidoo'wi y'ity jøpy ux. Ja' øts idø'on ja yja' nbadumpy samdam ja t'øyjawi sam nayide'en ja møjaa'dyøjk y'ijty ttundi. ⁴ Nja'myejchp øts sa myaajxy ku nnawya'kxyim. Wamp øts o me ma njanch'ejxpaatt jøts njotkujk'att. ⁵ Nja'myejchp øts nayide'en sam ja Dios Teety xjanch-jawi. Jabi jawyeenxi ja mdigamøj jøts ja mdaak nayide'en tyiktundøø ja yjanchja'win. ⁶ Paty mets ixyam ndukja'myech jøts øy tsuj xyik-miwenit ja mdunkjøøjp midi ja Dios tø mdanipiky ku mets ojts ngønixajy. ⁷ Ka'ap ja Dios Espiritu Santo tø tpiakta'aky jøts øy ti ngudsø'jka'ant. Nayi Espiritu Santo ja myøk'ajtin xmø'øyimp jøts amumjoojt ndu'unint jøts ja tsojkin jøts ja øyja'gyukin nmøøt'ajtit. ⁸ Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupøk o myikjemduñ myikteduñ myikjemnøjmi myik-tenøjmi ku tka'øyjawidi ja Dios kyajpxy midi xyiknit-so'ok'ajtim. Jade'en xmidanit sam ja Dios ja myøk'ajtin tyaky. ⁹ Jade'en ja Dios ttsøky jøts ja xyiknit-so'ok'ajtit jøts nayide'en amumjoojt nnadyamiyo-jxint. Kidi ja'agøjxpi adøm ja xtsøjkyim ku adøm n'øy-jaa'y'ajtyim nga'øyjaa'y'ajtyim. Ma windiixyip adøm ja Dios jade'en xamidsøjkyim, ka'anim wyinaty ja naxwi-i'ñit cho'onda'aky. Ja nwindson'ajtim Jesús køjxp adøm ja nitso'ok'ajtin nbaajitint ku møøt n'ejtint. ¹⁰ Tø ja Dios Teety tnankyja'ijxyi sa ja pa'ayo'owin tjagyepy adømgøjxp ku ja nwindson'ajtim Jesucristo xaniguesjyim. Sa ja y'ø'jky jøts yjujkyijky, nayide'ents adøm nbaajitint sam ja tø tnajstuni. Jade'ents Cristo køjxp ja o'jkin xka'ukmimajadaajkna'ant jøts xemikøjxp ja jujky'ajtin nbaajitint ku ja y'ayuujk tnitanaay sam ja wyinaty tø ttanibiktaagi. ¹¹ Dios ø tø xpikta'aky jøts øts ya'at ja kyajpxy ja y'ayuujk ngajpxwa'kxi jøts øts yø ngudanit, jøts ø

nduk'ixpøkt pøn ka'israelit jaa'dyi. ¹² Paty øts ixyam øy ti ngu'ayo'ombaaði. Ka'ap ø ti ndsø'ødyunjawit, pø Diosxi øts ja yja' nbaduujnip. Wamp øts jøts øts ja Dios xpøkjø'knit kunim ja tiidyyu'unin xøøw mye'ent.

¹³ Mets Timoteo, sam ø tø nnajstuni, tu'ugyi ja øy ix-pøjkin jade'en xyikyø'øty, ja Dios yja'. Jade'ents ja Dios xjanchjawit jøts ja mmigu'uktøjk xpa'ayo'ot xmi-namyayit nayide'en sam ja nwindson'ajtim Jesucristo xamidsøjkyim ku møøt n'ijtyim. ¹⁴ Ja Espiritu Santo midi adøm nmøøt'ajtyindip, ja' pyudøjkingøjxp xpadun'ett ja Dios yja' midi tø mdanipikyiyi.

¹⁵ Tøxi me xnijawi sam øts ja Asiit jaa'y xmajstuttøø, ja Figelo møøt ja Hermógenes paat. ¹⁶ Diosts ja kunuu'kxiyip ja Onesiforo møøt ja myigu'uktøjki ku øts ja kawinaak ojk xnimiñ jøts ø xpudøki. Ka'ap ja tsø'ødyu'unin tjagyepy øy ø njatsumy'ity. ¹⁷ Ne'egi øts ja x'ixaay ya Roma ku øts ja ma xka'ijxy kunim øts ja xpaajty. ¹⁸ Wan ja Dios ja pya'ayo'ajtin tmø'øy ku ja tiidyyu'unin xøøw tpaatt. Wa'atsxi me xnijawi sa ojts xpudøjka'am jam Efeso kajjotp.

Sa Timoteo møk tmidanit ja ayo'on Jesucristo køjxp

2 Mets u'nk Timoteo, jotmøkpøk, yiktun ja møk'ajtin midi ja nwindson'ajtim Jesús yajkpy. ² Ja ixpøjkin midi m'ijxpy midi mnija'wip sam øts ja may-jaa'y nyik'ixpiky, ja'ats nayide'en mdanipøk pøn øy tsuj jaa'y'ajtp, midi øy tsuj yik'ixpøjkp nayide'en.

³ Møk xmidanit ja ayo'on midi mbatpy ku ja nwindson'ajtim Jesucristo yja' xpaduujni. Møk nabyikta'agi jade'en sam pøn yikexy tseptumbi. ⁴ Ka'axi mibaat ja tseptumbi pyaat'aty jøts nugo ajawi o ti ttatøkit. Tu'ugyi ja yja' tyikyø'ødyit sa ja wyindsøn ja y'ane'emyidi. ⁵ Nayide'en ja kuyajtpi, tu'ugyi ja yja' ja ttu'undit sa ja tø yik'ana'amdi, winets ja tøkkit ja ñiguyaty.

⁶ Nayide'ents ja kamdumbi nayja' paat'ajtyip kø'øm tøkjø'økt ja pyikta'aky. ⁷ Pawinmaajyk øts yø n'ayuu-jk, nayi nwindson'ajtimts mbudøkiyip jøts xja'gyukit.

⁸ Ja'myats ja nwindson'ajtim Jesucristo sa ojts yju-jkpyiky jap oo'kpi jutjøtpy midi ja rey David y'ap'ajtpy. Yø' øts ja yja' ngajpxwa'kxiyip sa ja øy'ajtin xukpaajtit. ⁹ Yø' kajpxwa'kxingøjxp øts øy nyikmi'ekyi, møkts øts yø nwindani, jade'ents ø nyik'ixy ejxim tu'uk ja møj tundigøøbya'an; øy øts njayiktsumy ka'ap ja Dios kya-jpxy jaayi tyañ. ¹⁰ Ja'agøjxp øts yø ayo'on møk nwindani jøts ñitso'ok'attit pøn ja Dios tø wyi'ijxyi jøts tpaattit ja øy'ajtin midi xemikøjxp xmø'øyimp ja nwindson'ajtim Jesús.

¹¹ Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njujky'ajntint;

¹² Pøni ngu'ayo'ombaa'ajta'am ja yja', xmø'øyimpts ja' ja y'ø'y'ajntin ma ttanitanani ja yjaa'y.

Pøni ka' ja ngupijkyim, nayide'ents ja xkagupøjkint.

¹³ Pøni ngamøk'ajntingøjxp adøm ja njanchja'win kya-majadaajkyim, jade'eñim ja Dios tyikyø'ø'y ja yujy'ajntin jøts ja pudøjkin ja xmø'øyim,

ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

Yikyø'øpy jade'en ja Timoteo sa tø yiktanipiky

¹⁴ Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxjimbetti kyajpx'adøjt, kidi nugo tkajpxyøndi midi ka' tyuñ; ñanktyuu'tigøjyidip yø jade'en. ¹⁵ Amumjoojt nabyik-ta'agi sa ja Dios yja' xpaduujnit jøts øy tsuj yø mdunk pyidsø'ømt Dios wyingujkp. Ka' ti nugo xtsø'ødyun-jawit ku ja tiy janch xkajpxwø'kxi ja Dios tyiy'ajntin. ¹⁶ Kidi xpbiky yø'øbi ayuujk pøn jam nugo o sa kajpxtip. Pøn jade'en ttundip, ja kya'ø'yjaa'y'ajntin idø'øn ja yik-miwenidip. ¹⁷ Pøn jade'en nugo kajpxtip, jade'ents ja kya'ø'y'ixpøjkin ja myøjidi myayidi jøts ja windigø'øyin nugo tyiknaxkidø'akti. Jade'en y'adø'øtsti ja Himeneo jøts ja Fileto, ¹⁸ ku kø'øm tø ñanktyuu'tigøyidi jøts ja wyā'andi ku ka' y'uk'ejntit ja jujkpyøjkin ku ja o'jkin nbaajntint yā naxwiñ. Jade'ents ja myigu'uk winaagin tø ttukmajtstu'utti ja yjanchja'win. ¹⁹ Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wa'ats ja Dios Teety ja t'ixy tñijawi pøn padu'unxip ja yja'"; jøts nayide'en wyā'añ: "Wan tmajt-stutnidi ja ka'ø'byi, pøn ja Cristo yja'ajtpy."

²⁰ Jade'en n'ukpiktaajjkint ku jaa'y xnime'enint xni-ja'jtint njønjojp ndøjkojp, jøts nduktajøø'kxa'ant ja' midi øy midi tsuj midi tsobatp; jøts ja' midi ka' chobaaty, ja'ats o pøn tyiktu'ump. ²¹ Nayide'ents idø'øn adømdi, ku øy tsuj nnay'ejx'ejtindit jøts nja' nayide'en chobaajntint Dios wyingujkp; jade'en'ampyts idø'øn ja xyiktu'unint jøts nmigu'uktøjk nbudøjka'ant.

²² Majtstu'ut yø unā'jk winmaa'ñ midi ka' tyuñ. Tu'ugyi xyikyø'øty ja tiy'ajntin jøts ja mjanchja'win, jøts xmi-namyayit ja mmigu'uktøjk øy tsuj pøn tu'ugyi t'a-jot'ajtp ja Dios. ²³ Nnimaapyts mets jøts ka' xpadøkit yø'øbi ayuujk midi katump. Mnija'wip ku jade'en ja tsep nugo yikpaaty. ²⁴ Pøn tpaduujnip ja Dios yja' ka'ap ja nugo ajawi o ti ttatøkit ma ja tsep, ma jaa'y o ti ttundi. Ja' ja tyu'ump øy'ajntin tuda'aky'ajntin øy pøn møøt. Ja y'ixpøjkin ja tyuk'exp tyuknijawip sam ja tuda'aky'ajntin nayide'en tmøøt'att. ²⁵ Jade'ents ja øy tsuj tkajpxuda'akt pøn ja wenk winmaa'ñ tmøøt'ajntip midi ka' tyiyi, wan ja Dios pyudøkiyi jøts tyigatstip ja wyin-maa'ñ jøts tpadu'undit ja tyiiby yjanchpi. ²⁶ Wan tmajt-stu'utti ja miku' yja' ku ja nugo tø wyin'iiñidi jøts ja nugo tø tyuktuñi pøni sa ja tsoky.

Sa jaa'y wyinatyi ku ja tiidyu'unin xøøw tpaatwan

3 Me Timoteo, nayide'en xnijawit ku wyingoni ja xøøw ja jumøjt jøts nwindson'ajntim mye'ent, janch tsep ja xøøw ja jumøjt ñaxt. ² Øy sa pøn y'adø'øtstip. Kyø'øm winmaa'ñ ja nugo yikmøjtøkiwya'andip, meeñ ja nugo may choktip, namyikaxi winmaa'ñ ja nugo yik-tu'undip. Tpatit tñaxtit ja Dios, ka'ap ja tyeety ja tyak twindsø'øgidit, niti ja tkamøj'ejxtit tkamøjawidit jøts ni tkawindsø'øgidit ja Dios yja'. ³ Ka'ap ja ti tsojkin, ka'ap ja ti øy'ajntin tmøøt'attit. Pagajpxk ja' yø tyunk'attip, ka'ap ja maa'kxujkin tjagyapit, tyunwandip o ti ttun-wa'andit, nugo øy pøn tmidsep'atwa'andi øy wyinatyi pøn tuda'akyjaa'y'aty. ⁴ Kyø'yakp ja kyø'øm migu'uk, adø'øtsp o sa y'adø'øtst. Kyø'øm ja' y'ixa'ap, ka'ap ja Dios yja' ne'egi t'ixaajyit. ⁵ Ejxingøjxp nadyijyi ja Dios yja' tpaduujnidit pø sa ja y'am yjotp, ka'ap ja tmøjpk-taajkit ja ñitso'ok'ajntin.

Me Timoteo, ka'ap yø jade'embø jaa'y xunk'att. ⁶ Adøstip o sa y'adø'øtsti, tøj k tøjkidip jøts ja tø'øxyøjk twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tø'øxyøjk, jaa'y'ajtp ja' o sa yjaa'y'aty. Kyupijky ja nugo, ⁷ ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajntin. ⁸ Nayide'en sam ja Moisés y'ijty kyayikpaduñ ja yja' sa ja yjawa'añ ku ja kyamibøjkøø ja ximaabyi Janes møøt ja Jambres, nayide'ents yø jade'embø jaa'y tkamibøjk-midi ja Dios yja'. Tum wenk ja wyinmaa'ñ yikyø'ødyi, ka'ap ja Dios jade'en kyupikyidi. ⁹ Ka' nugo ajawi mya-jada'aktit ja yja', kuwani yiknijawi ku ja myo'tpi win-maa'ñ nugo tyikmøjtøkiwya'andi. Nayide'ents yjajt-midøø ja namajtskpi midi twindsøow ja møjaa'y Moisés.

Midi ja Pablo yjaak'uktanipøknip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaay'aty sam ø njaa'y'atyi, tu'ugyi ja mwinmaa'ñ xyikyø'øy, ja øy'ajntin tuda'aky'ajntin jøts ja janchja'win. Nayide'en mjaty ¹¹ sam njajty sam ngubej-tyin. Mnija'wip pøni sa njajty jam kajpjojp midi yiktejp Antioquia jøts nayide'en jam Iconio møøt ja Listra ku øts ja Dios yja' ngajpxwø'kxi. Jamts øts ja jaa'y xjem-duñ xeduñ, jøts øts nwindson'ajntim nja'myejch xjats ø møj xpudøjkiy'ñ. ¹² Janch tiy'ajntin yø', yikjemdu'undip yiktedu'undip pøn ja Cristo yja' nadyamiyoxwajniyip; ¹³ jøts ja' pøn ja myigu'uk nugo twin'øø'ndip kø'øm ja ñanktyuu'tigøyidi, nisudso'ampy ja kya'ø'yidi ja yja'adi ku nugo jade'en ñawyin'iiñidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki, ¹⁵ ku yø mutskyi xni-ja'wiyii'ñ yø Dios kyajpxy, midi xyikujajtaajjkimp, midi xyiknitso'ok'ajntim ku njanchja'wa'ant ja nwindson'ajntim Jesucristo. ¹⁶ Tu'ugyi ja Dios kyajpxy ja y'ayu-ujk jade'en y'ity, sa ja tø yikwinmaa'nmyø'øy pøn tø tjaadyañ. Nay yø' xuknija'wamp ja tyiiby ja yjanchpi. Ku ndundigø'øyint ngajpxigø'øyint nay yø'øts xukni-

ja'wimp ku yø pyøkyi. Xmø'øyimpts yø' ja ixpøjkin sã ja øy'ajtin ja tudã'aky'ajtin njagyajpint, ¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4 Mets ixyam ndanipikpy Dios Teety wyingujkp jøts nayide'en nwindson'ajtim Jesucristo wyingujkp midi nanky'ejxiyip ja møj windsøn'ajtin pøn tiidyu'ump ja jujkpyi jøts ja øøkyi, ² jøts xkajpxwã'kxiyit ja yja'; tu'ugyi jade'en pojyi'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukjã'gyukit. Jade'ents tudã'aky xuk'ext xuknijawit ja ixpøjkin. ³ Pyããtp ja xøøw ja jumøjt ku ja jaã'y tkawã'andit yø'øbi ixpøjkin; pyikta'ãktip ja' kyø'øm yik'ixpøjkpidi pøni sã ja ttsoktit pøni sã ja tmad-owa'andit. ⁴ Yø tyiiby yjanchpi ka'ap yø ttsoktit, ja' yø ne'egi choktip ja kwenti ja madyã'aky midi kayikjã'gyukip. ⁵ Me Timoteo, tu'ugyi møk xyik'ett yø mwin-mãã'ñ, møk nabyikta'agi øy ja ayo'on yja'ity, nadyamiyoxi amumjoojt ja kajpxwã'kxin sã ja nitso'ok'ajtin nbaãjtint, tu'ugyi jade'en xyikyø'øty yø mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaãtt. ⁷ Møk ø tø nwindani ja Dios yja' jøts øts jade'en nyikjøpkøjxni ja ndunk ja nwinmãã'ñ. Tø øts ja njanchjã'win jade'en nmi'ity. ⁸ Ja øy'ajtin øts xjøp'ejxp jøts øts ja nbaãtt, ja'agøjxp ku øts ja Dios tø xkupiky. Jaanimts øts ja nyikmo'ot ku ja tiidyu'unin ka'pxy xukpaãjtint. Ni kidi øtsip ja nadyu'uk yikmo'op, niduki'iyi ja tpaãttit pøn tjøp'ejx'ajttip jøts ja nwindson'ajtim mye'ent.

Ku ja Pablo ttukmadø y ja Timoteo sã tyu'unt

⁹ Tun wan ja may'ajt jøts tsojk mme'ent jøts ø x'ext; ¹⁰ pø tøxi øts ja Demas xmajtstu'uty, kyø'øm winmãã'ñ ja yiktunwampy, jøts tø ñijkxy jam Tesalónikit kajpjotp. Jam øts ja Cresente tø nguexy Galaciit y'etjotp, jøts ja

Tito tø ñijkxy jam Dalmacia y'etjotp. ¹¹ Ja Lucas øts ixyam møøt njaak'ity. İxa' jam ja Marcos jøts møøt mme'ent, jøts øts ja xpudøkit. ¹² Nayide'ents ja Tíquico tø nguexy jam Efeso kajpjotp. ¹³ Ku mme'ent, xyikme-jnip øts ja nnixox midi jam nyiktaan Carpo tyøjkjotp jam Troas; xjã'myajtsip øts ja nlibri jøts øts ja nnøky xjadyimyikmejniit midi nyiktumpy.

¹⁴ Tø øts xmidundigø y møj ja Alejandro midi ka'tsp; Dios wyingujkpts ja tkubatt pøni ti tø ttuñ. ¹⁵ Øyim mnay'ejx'etit møøt ja', jot'ambøjkp ja' ku ja Dios ja yja' yikajpxwã'kxi.

¹⁶ Ku øts myijawyeen nwinguwa'jkiyii'ñ ja windsønøjk ja kudunktøjk, nipøn ø xkabudøjkii'ñ; xmajtstutkøjxnidi øts ja' niduki'iyi. Øts wamp jøts ja Dios ja kyadabayø'yidit. ¹⁷ Ja nwindson'ajtim øts xpudøjkii'ñ jøts øts ja møk'ajtin xmøøy, jøts øts nyikyø'ø y ja kajpxwã'kxin sã ja nitso'ok'ajtin nbaãjtint, jøts øts ndukmadøøy niduki'iyi pøn ka'israelit jaã'dyi. Jade'ents øts ojts ja nwindson'ajtim xuu'mø'ø y mã jaty øts n'ayo'ombãaty. ¹⁸ Xyiknitso'ok'ajtip øts ja nayide'en ja n'anmija'win jøts øts ngapaãtt ja ka'øybi jøts ø xpøkjø'økt jap tsajpjøtpy mã ja y'ity. ¡Kunuu'kxy'ejtpim ja Dios xemikøjxp! Jade'en idø'on ja y'ejxi tyiyi.

Ku ja Pablo kyajpxpøø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesíforo ja myigu'uktøjk. ²⁰ Tø øts ja Erasto nyiktañ jam Corinto, tø ja Trófimo pyã'ambety jam Mileto kajpjotp, paty øts jam tø nyiktañ. ²¹ Tsojk mme'ent ka'anin ja xuxpyo j tpaãty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchjã'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'on ja yjatt.

TITO

Yide'en yiknijayi ja Tito

1 Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tnijawidit ja tyiy'ajtin sa ja Dios øy tsuj yikpaduñ, ² jøts jade'en t'awejxtit ja jujky'ajtin midi xemikøjxp etp. Yä'atpi tsi-naa'yin ja Dios kø'øm tø tni'adsowi namga'anim wyinaty ja naxwii'ñit cho'onda'aky. Niwindem xøøw ja Dios Teety kyawindaay'aty, midi tø ttanibiktaagi, pyadumpy ja'. ³ Ku ja xøøw ja jumøjt tø tpatni sam ja kø'øm tø ttanibiktaagi xjats ja kyajpxy tñanky'ejxit jøts øts idø'on ngajpxwa'kxt midi øts ja Dios Teety yiknitsokpi tø xanipiky. ⁴ Ixyamts me Tito nnijayi. Ndyimy'u'nk-ja'wip mets, ja'agøjxp ku tu'ugyi janchja'win ndamujkim, jade'en øts ja tsojkin nmøøt'aty jøts xpaatt ja kunuu'kxy'ajtin ja pudøjkin jøts ja øy'ajtin midi ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøøjp midi ja Tito pyatwa'jkijy'ñ jam Creta

⁵ Ku mets jam nyiktaañ Creta, ja'agøjxp øts ja jade'en nduñ jøts mets xyika'pxt xyik'abaadit ja tunkjøøjp midi øts jam wyinaty tø nyikts'o'nda'aky. Jade'en ø nwä'añ ku mets tu'uk tu'uk xpikta'akt pøn tñimø-jaa'y'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip. ⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'unaj'jk nay ja'abi janchja'win pyadundip, jøts øy tsuj ja chinaa'yin tyiknaxmidi. Myimadoodip ja tyeety, niti windsø'øyin ja jade'en tkapaattit. ⁷ Pøn idø'on jade'en tnigubajk'ajtip, pø ja Diosxi yja' ja y'ejx'ejtidip, paty idø'on pyaat'aty kuwani øy ja chinaa'yin tyiknaxtit. Ka'ap idø'on ja kyujuun'ajtin ja tyikmajada'aktit. Ka'ap win-jaa windsojk y'akidit; ni ja amu'uky'ajtin ni ja tsep'ix-aaky ja tkatunk'attit, jøts ka'ap ja meeñ nugo tjaa'x-mukwa'andit. ⁸ Jabi yide'enxi dø'on ne'egi ja chinaa'yin tyiknaxtit, yikja'ada'aktip o pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'on ja myøøt'attip jøts tum ja' tyu'undip midi øy paat'ajtiyip. Pyadungøxtip idø'on ja', midi ja Dios y'øyja'wip jøts ka'ap ja kyø'øm ja' tyikmajada'aktit. ⁹ Ja'ayi dø'on ja tu'ugyi tyimyjanchjawidip ja tiy'ajtin midi tø nduk'ixpøkti, jøts jade'en ja myigu'uk ttakajpxjot'amøkidit ja'abi tiihyi'ixpøjkin, nayide'en ttukja'gyukidit pøn wyinaty t'agajpxukp ja'abi'ixpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øøndi.

¹¹ Ja'abi jaa'dyi, amøñi pyaat'aty nyikta'anint, jøts ka'ap ja ka'øybi'ixpøjkin ttuktawinmaa'ndyigø'ødyit tu'ukpi jøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjxp ti jaty tunip jatip, ja' yide'en waan: "Yide'en ja Creta jaa'y yjujky'atti: o tyimdyayidi, janch awa'andi, nuux'ajtin ja yikmajada'aktip jøts ja yji'kxy nugo ja tta'aa'wiwya'andi." ¹³ Janch idø'on ja wyaañ; paty meets idø'on møk xamigajpxtip ja chinaa'yin jøts jade'en tyikmøkidit ja yjanchja'win pøn ja nwindson'ajtim yja' tø tpadøjkiñidi. ¹⁴ Jøts ka'ap jade'en nugo tmibøktit ja madya'aky midi yik'ø'yidip yikpaajtidip ja israelit jaa'dyi, ni tkamøjpi'aktajkidit ja y'ana'amindi pøn jagam jixkø'øm tyiktandip ja Dios tyiy'ajtin.

¹⁵ Pønts ja Dios yja' ja'ayi tpaduujnip, tyum'øy'ejxtip ja' midi ja Dios kø'øm tø tyik'øyi, jamts ja'amidi pøn wamidip ku ja yikpøkyety; paty ja jade'en tteiti ku ja pøky ja ja'ayi twinmaa'ñ'atti jøts tum yikpøkyajtpi t'e-jxti; jabi agoostujpxyi ja wyinmaa'ñ ja y'etti jøts jade'en tka'ejxkapti midi øy uk midi'its ka'øy. ¹⁶ Jade'en idø'on ja chaachwa'andi kuk idø'on ja Dios ja t'ijxyidi, pø sudso dø'on ja Dios ja t'ijxyidi; jabi wenkts ja chinaa'yin ja tyiknaxti, ja kyawindiy'ajtin ja yikmajada'aktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

Ja tiihyi'ixpøjkin

2 Pøni midi mets Tito mnigajpxpy, ja tiihyi'ixpøjkin idø'on ja møøt ñabyaadit. ² Tuknijawi ja møjaa'dyøjktit jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'on yiktu'undip idø'on ja wyijy'ajtin; møk tyik'ettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin. ³ Jøts ja møjaa'dyø'øxy nayide'en yjaa'y'ajtmidit sam pyaat'aty pøn ja Dios tpadundip. Ka'ap ja jigajpxk pagajpxk ja ttunk'attit, ni ja mu'ugyi ja ku'uxyi tkayikmajada'aktit. Øybi tsinaa'yin idø'on ja ne'egi ñanky'ejxidip, ⁴ jøts jade'en ttuk'ejxtit ttuknijawidit ja tø'øxyøjk pøn nam amajtskidipnim sa ja ñiyaa'y sa ja y'u'nk y'unaj'jk ja møøt øy yikxon chøønidit tyanidit. ⁵ Myøøt'attip idø'on ja ja'gyukin ja'adi. Tum ja wa'atspi tum ja øybi tsinaa'yin idø'on ja pyadu'undip. Ja yjøøn ja tyøjk idø'on ja'

kyamijotkukidip, pøn jam tso'ondip ja'ttip myidu-
da'aky'attip idø'on ja'. Pøni ti y'ane'empy ja ñiyaa'dyi,
pyadu'undip idø'on ja'. Jade'en idø'on ya'at
tpadungøxtit jøts ja Dios y'ogyajpxy ja y'omyadya'aky
kyayikjigajpxt kyayikpagajpxt.

⁶ Taguwani mets Tito ku ja wajtyøjkti ja ja'gyukin
tmøøt'attit, ⁷ jøts idø'on ja kø'øm jawyeen mjøptunip
pøni sa dø'on ja øchinaa'yin tpadu'undit. Ku dø'on ja
wyinaty xkajpxwejwa'añ, yikxon idø'on ja xnigajpxt,
niti nixi'iky niti taxi'iky xkajawit. ⁸ Tiy ka'pxy idø'on ja
ixpøjkin xnanky'ejxit jøts ka' nipøn jade'en m'a-
gajpxukiyit. Jøts kø'øm ttatsø'ødyu'unt ja jaa'y pøn
wyinaty nugo mjigajpxiyip mbagajpxiyip jabi ja'-
gyukidipxi ja kø'øm ku meets ja tiy'ajtin xnigajpxy.

⁹ Kajpxwej ja tumbitøjkti jøts tpadungøxtit ja wyind-
søndi; yikxon idø'on ja yjaa'y'attit jøts ka' twindso'odit
ja wyindsøn. ¹⁰ Ka'ap idø'on ja tma'jtsit ja pyikta'aky
pøn ja yiktuujnir. Yiknigaxø'økp idø'on ja y'øy-
jaa'y'ajtin jøts o pøn jaa'y jade'en ttsujawit ja tsinaa'yin
midi ja Dios yiknitsokpi yajkpy.

¹¹ Jabi tøxi ja Dios ja øy'ajtin tnanky'ijxyi midi tyiknit-
so'okwamp tuki'iyi ja naxwii'ñit jaa'y; ¹² ja'agøjpxts ja
Dios ja y'øy'ajtin tnanky'ijxyi jøts xuknija'wint jøts n'ix-
majtsint midi ja Dios tkaminamyajjyip sam nayide'en
midi n'am njotp xmimajada'akwa'andip, jøts ja tsi-
naa'yin ya nyiknaxjint ja'gyuki køjpx, samdam
nayide'en øy tiy ja Dios ttsøky'aty jøts ja tu'ugyi nwind-
sø'jkant nwinja'want. ¹³ Nayide'en idø'on ja xukni-
ja'wim sa dø'on n'aweixint jotkujk ja øy'ajtin, midi ja
Dios kø'øm tøn'adsowi, ku ja mye'ent kyida'akt
aju'ukjotp, ja Jesucristo yiknitsokpi pøn ndios'ajtyindip.
¹⁴ Nagyøyajkiyi ja', jøts adømgøjpx ja xku'o'jkindi jøts
jade'en axøø'kpi yigaappi agujkpy nga'ejtndit, jøts
jade'en nbaajtint tu'ugyi ja wa'ats'ajtin jøts ja'ayi
nnadyamiyojxandit, jøts tum ja øybi n'amindip njot-
pindip.

¹⁵ Ya'at mets Tito idø'on mnanky'ixpøkiyip,
mgajpxjot'amøkip idø'on, jøts nayide'en møk ja
mgutujk xamigajpxt pøn tkamimadowandip ja'abi ix-
pøjkin. Kidi mets ja jaa'y kø'øm myik'amutskiniyi.

Sa dø'on ja chinaa'yin tyiknaxtit pøn ja nwindson'ajtim tjanchja'widip

3 Tukja'myatsti ku tkajpxkyupøktit ja windsøndøjkti
samdam nayide'en ja kudunktøjk tmimado'odit,
jøts tpadu'undit tuki'iyi ja ødyunk midi wyinaty tøn yik-
taguwani. ² Nipøn idø'on ja wenk tkanimadya'aktit,
nika' idø'on ja tsep ja t'ixa'adit. Ja øy'ajtin idø'on ja
ja'ayi yikmajada'aktip, ja tuda'aky'ajtin idø'on nixem
nyyam ja myigu'uk tyamay'attip.

³ Jabi nayide'enxi adøm y'ijty ngakajpxkyupijkyim jøts
ja Dios yja' ngamimadooja'am jøts jade'en nwidijtyim
kubets kugoots. Tum ja axøø'kpi yigaappi y'ijty nyik-

majadaajkyindip midi n'amindip njotpa'andip; jap
adøm y'ijty ja nxøøw ja njumøjt nyiknaxjyindi ma
wyindsøn'aty ja ka'øy'ajtk møøt ja windi'ñ'ajtk, øy y'ij-
ty pøngapøn møøt ndyimñamyi'ambijkyindi, sam
adøm idø'on kø'øm y'ijty ndyimjotkidaajkyim. ⁴ Kuts
adøm ja Dios ja yiknitsokpi tnanky'ejxøø ja y'øy'ajtin,
sa ttsøky'aty ja naxwii'ñit jaa'y, ⁵ jade'en adøm idø'on
ja xyiknitsøjkyim, kaja'agøjpxip ja ttuun ku adøm ja
øchinaa'yin wyinaty tøn nmøøt'ajtyim, jabi pa'ay-
o'oningøjpxxi dø'on ja ojts xyiknitsøjkyim,
xukyikniwaajchim ja nbøky jade'en jøts ja jemchi-
naa'yin ja Espiritu Santo xukpaajtyim. ⁶ Ja yiknitsokpi
køjpx ja nwindson'ajtim Jesucristo køjpx ja Dios Teety
tøn xmø'øyim kawine'en ja Espiritu Santo jøts ja
xpudøjka'am, ⁷ jøts ja Dios Teety y'øy'ajtingøjpx
xkupøjkindit jøts nyikmø'øyindit ja juky'ajtin midi
xemikøjpx etp midi adøm n'aweix'ajtyindip.

⁸ Tyimdyiy idø'on ya'at, paty øts idø'on ndsøk'aty jøts
mets winjaa windsojk xkajpxt ya'atpi ixpøjkin jøts
jade'en pøn ja Dios tjanchja'widip tunkjøjpx'attit tum
ja y'øybi tyiiby. Tyum'ødyunguixpy ya'atpi ixpøjkin, øy
yø pøngapøn t'ødyuñ. ⁹ Kidi nyikmøjtøki nugo ja ku-
goots madya'aky midi niti kyawa'añ, jøts ka'ap ja ap-
madya'aky ja møjaa'y ayuujk nugo xunk'att, ni xka-
datøkit pøn ja Moisés kyutujk nugo ttamadya'akpyat-
tip. Nimaj ja tiy'ajtin ja' tkamøøt'atti.

¹⁰ Pøni jam pøn tnankñawya'kxwa'añidi ja Jesucristo
yjanchja'wibitøjkti, tawindsø'øy tuk'ojkin uk majtsk'o-
jkin, kuts wyinaty mgamimadøyi, jagam ja x'ixwejtsnit;
¹¹ jabi jade'enxi mets xnijawit ku ja'abi jaa'y tøn ja chi-
naa'yin ja ka'øybi myimajadajkniyi jøts kø'øm ja pyøky
ja ñi'øøniyi.

Ku ja Pablo ttanipiky ja kyø'øm jotmay ja Tito

¹² Ku me wyinaty ndanigaxi ja Artemas uk ja Tíquico,
tun ja may'ajtin jøts øts waani wyinaty x'ats'ixy jam
Nicópolis, jabi jamxi øts tøn danibiktaagi nyiknaxwa'añ
ja et ja xøøw kunim ja møk xux ñaxt. ¹³ Tabudøki øy
tigati ja nitanaabyi midi yiktejp Zenas jøts nayide'en ja
Apolos, mo' ja pudøjkin jøts yjaakwidettit kunim ja
tyunk tyik'abaadidit nugo ku ti kya'ijtxyidi. ¹⁴ Nøjmi ja
nmigu'uktøjkti pøn jamdi mets møøt jøts
mbudøkiyidit, jøts jade'en tnijawidit sa ja øchinaa'yin
wyingaxø'økt ku tpuðøkidit ja myigu'uk pøn ti ka'e-
jtxip.

Ku ja Pablo kyajpxpøø'kxy jøts ja kunuu'kxin t'ukyajkni

¹⁵ Pøn jaty øts ixyam møøt, mdanigajxidip ja kajpx-
poo'kxin ja'. Tukja'myats niduki'iyi ja nmigu'uktøjkti
pøn jaty tu'ugyi ja janchja'win tmøøt'ajtmidip ku øøts
ixyam ja kajpxpoo'kxin nguexy. Paat meets ja Dios
kyunuu'kxin niduki'iyi. Jade'en idø'on ja yjatt.

FILEMÓN

Yide'en ja Pablo tñijayi ja Filemón

1 Øts idø'on Pablo'ajtp. Øts yam tsumy ku nwind-søn'ajtim yja' nbaduujni. Ixyam mee nnijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ. ³ Paatti meets niduki'iyi ja Dios Teety jøts ja nwind-søn'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

⁴ Ku øts ja Dios n'ajot'aty nxumikajxajkpy øts ja Dios ku me nja'myech, ⁵ ja'agøjxp ku tø nnijawi ku mets nayide'en xtsojki ja nwind-søn'ajtim Jesús yja', jøts pøn jaty ja janchja'wiyip. ⁶ N'amidøøpy øts ja Dios jøts tjä'-gyukiyidit yikxon ja y'øy'ajtin midi nbaajtyindip ku njanchja'wa'andi ja nwind-søn'ajtim. Wa'nts tum jade'en ttundi, pøni sa tø xukmadøy pøn jaty tø tpabøkti. ⁷ Janch jotkujk øts ixyam ku nmadøy ku xpa'ayøy ja mmigu'uk jøts xkajpxjot'amøki, jøts jade'en xyikjotkujk'aty.

Ku Pablo t'amidøy ja may'ajtin jøts yikupøkt jadigojk ja Onésimo

⁸ Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwä'añ ⁹ ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaa'ñip øts ixyam jøts tsumyim n'ity nwind-søn'ajtimgøjxp, ¹⁰ paty mets n'amidøy ja may'ajtin jøts xkupøkt jadigojk ja Onésimo midi øts yam tø ndukja'-gyuki ja Dios yja'.

¹¹ Ku ojs jawyeen nmøøtsinaay yø Onésimo, ka'ap øy y'ijty ti t'ødyuñ. N'ajot'ajtna'amp ixyam ¹² paty

ndaniguexy jadigojk jøts xkupøkt, ¿kidits øts jeexyip xkupiky? ¹³ Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip kø'øm xpudøki. ¹⁴ Ixyamts mets ja ndaniguexy ja'agøjxp ku ka'ap mibaat ja mgutujk njinajxit, jabi yide'enxi njawa'añ pøni xunwajnip meets ja may'ajtin, ka'ap ja xu'unt ana'amingøjxp, mgø'ømdsojkingøjxp idø'on ja xu'unt. ¹⁵ Pø ja'agøjxp idø'on ja ojs chøøñ jøts ja mniwimbetiyit jadigojk xemikøjxp, ¹⁶ jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaa'y x'ext, jade'en x'ext sam adømin, tøxi tpabiky ja nwind-søn'ajtim yja'.

¹⁷ Paty ø nwa'añ, pøni xmigu'ukja'wip øts, kupøk ejxim øts jeexyip xkupiky. ¹⁸ Pøni tø mmidundigøyi, uk japs mmiyojji, øts ja ngubajtkøjxp. ¹⁹ Kø'øm øts ixyam nwa'añ jøts ngubajtkøxt ja yoj, paty ø kø'øm ndyimyja'ay; ka' yjawi njadukja'myajtswa'añ ku me tø mnañito'jkniyi. Kidim xjanchja'wiñi, taxi'iky yø'. ²⁰ Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwind-søn'ajtim.

²¹ Nnajtsja'wip øts ku xpadungøxt sa jaty øts ixyam nwa'añ. ²² Jøts nayide'en x'awejtip øts; jotmøñ mee nninijky sa jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajpxpoo'kxin ja Epafra, pøn øts ixyam møøt ndsumchøøni nwind-søn'ajtimgøjxp. ²⁴ Nayi kyajtip ja kajpxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwind-søn'ajtim Jesucristo kyunuu'kxin ja y'øy'ajtin. Jade'en idø'on ja yjatt.

HEBREOS

Dios U'nk køjxp adøm ja Dios Teety xmiğajpxyim

1 Janch tigach idø'on ja Dios Teety y'ijty ñanky'i-jxyiyi, ku dø'on ja kyugajpxy ttuknijawiwya'añ pøni ti jaty idø'on ja tyukmadowampy ja møjaa'dyøjkti. ² İxyamnim idø'on ja kyø'øm U'nk kugajpxy tø tkexy. Y'U'nk køjxp idø'on ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kidā'ak midi ja wyinaty tø tyik'øyi. ³ Ja Dios U'nk idø'on tñanky'ejxip ja Dios Teety ja myøj'ajtin, jøts nayi ja' ja tñanky'ejxip sã dø'on ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøjøm jam tsajpjotp, ku adøm ja yã jawyeen tø x'ukyikpojkiwajaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxp ku ja Dios U'nk tø tmidañ jawaani møj ja kutujk. ⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'on n'U'nk'ajtpy;
øts mets ja jujky'ajtin ti nmø'øy,
ni ja Dios Teety tkanimaamyi tu'uk ja y'ankilis:
Øts me n'u'nk'atp,
jøts øts me xeety'atp.

⁶ Yide'ents tø wyami ku ja myøjtu'umts U'nk tø xaniguejxyim yã naxwiiñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tñimadyajkmi, yide'en ja Dios Teety wya'añ:

Øy øts ja n'ankilis o sã nnanky'ejxyit,
nayide'en sãm ja pojn, uk sãm ja jøøn yowin.

⁸ Kuts ja y'U'nk tñimadya'aky yide'ents ja tñimaamyi:
Xemikøjxp me Dios U'nk mgutujk y'ity;
tiy mets mgutujk ja mdiidu'unin y'ity.

⁹ Mdsøky'ajtpy mets ja tyiiby jøts ka' x'ejxwa'añ ja ka'øbyi;

paty ja mDios Teety jawaani øy ja jotkujk'ajtin tø mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkiguixy tuki'iyi ku yø naxwii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxp me mdañ. Nayide'en yø yjattit sãm wet pyachi;

¹² jøts mets ja xpøkjø'økt ane'eky ade'kxy, jøts jadigo-jk xyikjemyit xyik'øyt.

Mets idø'on xemikøjxp jade'eñim m'ejtp, nijuuni xøøw mets mdsinaa'yin kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Yã yikutuk n'aga'ngyøji'y,

kunimts mets mmidsep nduktekpya'an'att.

¹⁴ Dios Teety idø'on myidundip niduki'iyi ja ankilis, nayi Dios Teetyts kajxidip jøts tpudøkidit pøn jaty ja nit-so'ok'ajtin tkupøkwandip.

Ka'ap ja nitso'ok'ajtin ngamøjpktaajkin

2 Ja'agøjxp idø'on nyikmøja'am nyikøjxpa'am pøni sã tø nmadø'øyim jøts kidi ja nwinmaa'ñ nyikti-gajchim, tu'ugyi ja nyikyø'øyim. ² Tø dø'on ja ayuujk yjanchwindiy midi ja ankilis ja israelit jaa'y tyukmad-owdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sãm idø'on pyaat'atyiyi. ³ Pøni jade'endam ja yjajttøø, ¿sudsots adøm idø'on ndejnt nga'ayo'ombaaajitindit pøni ka'ap adøm ja møj nit-so'ok'ajtin nmøjpktaajkyim? Jabi jawyeenxi ja nwind-søn'ajtim kø'øm tø tnigajpxy, pønts ja tpatmadoojidøø, tøts ja ayuujk ja jawyeen tiibyøkti jøts ja tø ttsøonidi, jitsnim øøts ja tø xukmadøy. ⁴ Tøts ja Dios Teety nayide'en kø'øm tyaky ja ejxpajt ku dø'on ja y'ayuujk ja wyindiy, ku ijxyimbi ka'ijxyimbi tyiknaxkidā'aky, nayide'en ja Dios Espiritu Santo tø xmø'øyim ja møk'ajtin sãm ja kija' tø xamidsøjkyim.

Nayide'en ja Jesucristo yjaa'yjajty sãm ja myigu'uk naxwii'ñit jaa'y

⁵ Ja tsinaa'yin ja jujky'ajtin midi memp ja'tp Cristo køjxp, midi øts ixyam nnigajpxy, ka'ap ja ankilistøjk ja mibaat tniwindsøn'attit. ⁶ Jabi yide'enxi ja David ja Dios Teety t'ajot'aty jøts ja tø tjaadyañ:

¿Tyimbyøn idø'on yø jaa'y'ajtp ku yø niwine'en xka-ja'dyigøy?

¿Ti tyimbyøn idø'on yø naxwii'ñit jaa'y midi oo'kp tigøøpy ku yø xmiotigøy?

⁷ Tø yø waani x'atsyik'amutski jøts tø x'atsmøjpk-ta'aky ja m'ankilis,

ixyamts ne'egi jawaani møj tø xmø'øy ja møj'ajtin jøts ja øy'ajtin,

⁸ jøts tuktsajp'agida'aky tyikutujkøxt.

Ku dø'on ja Dios tuki'iyi tø ttagidøjkiguixy ja jaa'y, niti dø'on ja tø tkayiktañ midi ja jaa'y kya'ana'amp. Ots ja yjade'eni, ka'anims adøm n'ijxyim ku tuki'iyi myi-madooguixy. ⁹ N'ijxyindipts adøm ja Jesús pøn ja Dios

Teety waani tō t'atsiyik'amutski, ni ja ankilis tō tka'at-smibaat'aty. Tōts ixyam tmōōgyojmi ja mōj'ajtin jōts ja windsō'jkin jawaani mōj, ja'agōjxp ku ja o'jkin ja tō tkupiky, ku ja Dios Teety ja jade'en tō tyamidsōkyiyi jōts adōm ja xku'o'jka'ant.

¹⁰ Dios Teety kōjxp tuki'iyi y'ijty, jōts tum ja' idō'ōn paa't'ajtiyip; ja'ats ja Dios Teety chōjkpy jōts nayide'en ja y'u'nk ja myaay tpaattit ja ōy'ajtin. Paty idō'ōn ja Dios Teety tō ttamidsōky ja nwindson'ajtim Jesucristo jōts ja y'ayo'owin jōts ja y'o'jkin jade'en ttuktaba-jā'ñaxy, sā dō'ōn ja naxwii'ñit jāa'y y'ejxidi tyiyidi, jits jade'en jawaani ōy kukjā'gyukant sudso ja nitsoojkin nbaajitint. ¹¹ Jabi nay ja'axi ja tyeety'ajttip pōn jaty tō pyojkpiwā'atsti, jōts nay ja'ats ja tyeety'ajtmip pōn yikpojkpiwā'tsp. Paty ja Dios U'nk tkadatsō'odyuñ ku adōm ja xmiga'axa'am, ¹² sām jap wya'añ nōkyjōtpy:

Mets Dios Teety idō'ōn nni-madyā'akp ku ōts ja nmi-ga'ax nmi-gajpxt,

jōts tu'ugyi ōō wyinaty n'iy mets kōjxp.

¹³ Jōts nayide'en jap jaabyety wyami:

N'awejax'etp ōts ja Dios Teety.

Jōts abiky ñōmgojmi:

Ixyam ō mōōt n'u'nk n'unā'jk, midi ōts ja Dios Teety tō xmō'ōy.

¹⁴ Jade'en sām ja naxwii'ñit jāa'y ja jujky'ajtin tmōōt'ajttōō, ja'agōjxp idō'ōn ja nwindson'ajtim Jesucristo yjāa'yjajty jōts jade'en ja o'jkin tkupōkt, jōts jade'en tmimajadā'aky ja miku' midi ja o'jkin tniwindson'ajtp. ¹⁵ Jade'en ja nitso'ok'ajtin xuktajotkujk'ajttint jōts jade'eñi dō'ōn ja o'jkin nga'uktsō'jkiñant. ¹⁶ Wā'ats yikjā'gyuki ku ja nwindson'ajtim ja' tkanimiñ jōts ja ankilis tpudōkit, jabi tum naxwii'ñit jāa'xyi ja ja'ayi ñimimpy, pōn teety'amōjkojkp'ajttip ja Abraham.

¹⁷ Ja'agōjxpts ja nayide'en yjāa'yjajty sām ja myigu'uk naxwii'ñit jāa'y, jōts jade'en t'ayo'ext sām nayide'en ja Dios Teety tpadun'ett, ku ja kyō'ōm o'jkin ja ttayikpojkpiwā'ach ja naxwii'ñit jāa'y. Ja'agōjxp idō'ōn ja amuum ndeety'ajtyindi. ¹⁸ Tō dō'ōn ja jawyeen ttanaxy ja ayo'on, ja winmaa'ñ, jōts nayide'en yikxon tō yikwin-māa'ñ'ixy, paty idō'ōn myayi ja pudōjkin pōn jaty nayide'en ya jajtip kubajtip.

Jawaani mōj ja Jesús, ka'ap ja Moisés

3 Kunuu'kxy mee migu'uktōjkti, meetspi dō'ōn mbaat'ajtiyip jōts yikxon x'ejxtit ja Cristo Jesús, pōn tō nyiktaniguexyindi jōts pōn ndeety'ajtyindip, ja'agōjxp ku meets idō'ōn ja Dios Teety tō mwi'lijxyidi jōts ja mja'atiyidi. ² Ejtp ja Jesús tiy ja Dios Teety tmi-madōy pōni ti ja tō tyaguwanīyi, sām ja Moisés nayide'en tu'ugyi tmiduūñ ja Dios Teety mā ja janch-jā'wibi jamdi. ³ Jawaani mōjts ja Jesús ja wyindsō'jkin pyaadyi jōts nika' jade'en ja Moisés, nayide'en idō'ōn ja tpaaty, sā jawaani mōj yikwindsō'ōgi ja tōjkojpi jōts nika'ap ja tōjk jade'en. ⁴ Ots idō'ōn ja jāa'y may yjadōjkojti, tum ja Dios Teety tuki'iyi tō tñanibiktaagi wine'en ijty tuktsajp'agidā'aky. ⁵ Janch ōy idō'ōn ja Moisés yjatuuñ, ku ja janchjā'wibitōjk ttukmadōōy ja Dios kyajpxy y'ayuujk, pōni ti dō'ōn ja wyinaty tyun-

wampy ja Dios. ⁶ Tu'ugyits adim ja Cristo xpawin-māa'yim wine'en adōm njanchjā'wa'am, ja'agōjxp ku ja tkōjō'ōmit'ajtkixy, pō Diosxi ja' ja y'u'nk. Ja' tsojkip jōts mōk ja winmaa'ñ nbiktaajkint, jits jotkujk n'awe-jxint ja ōy'ajtin midi memp midi jā'tp.

Ja janchjā'wibi pyoo'kxinxōōwdi Dios wyingujkp

⁷ Paty yide'en ja Dios Espiritu Santo wya'añ, sām jap jaabyety y'ity nōkyijxpy:

Pōni mmadōōpy meets ja Dios Teety kyajpxy ixyam, ⁸ kidi jade'en mgujuun'attit sām ja jāa'y ttundi jam abak etjotp, ku tkagupōjkti ja Dios, jōts ja yujy'ajtin nugo ttaguayajtdi.

⁹ Jam ōts idō'ōn ja m'apteety m'aptaak xwinmaa'n-myōk'ejxti,

ōyi ja tja'ejxti tjanija'widi ja ijxyimbi ka'ijxyimbi wix-ijxy jumōjt midi jaty ōts jam njatungunajxpy.

¹⁰ Paty ōts idō'ōn n'at-smi'ambōjkti,

winets ō nwaāñ: "Ejtp mee mjadigōy m'anmi-

ja'wingōjxp,

jōts ka' xtsojkti jōts ōts ja nduu' xpaduujnitidit."

¹¹ Ja' ōts idō'ōn ja ndami'ambōjkti, jōts ō nwanāajky ku kyatōkidit mā ōts ja n'uktamidsojkti.

¹² Migu'uktōjkti, nay'ejax'etidim tu'uk jadu'uk, jōts xkamajstuttit ja Dios ja yikjuky'ajtpi, jōts ja' ejtp xjanchjawidit. ¹³ Nay jāakjamnim ja xōōw ja jumōjt, nagyajpxjot'amōjkiyidi xem yam jabom jabom, jōts ja pōky mgawin'ōōnidit, jōts ja Dios ejtp xmimado'odit. ¹⁴ Pōni tu'ugyi nyikyō'ōyim ja janchjā'win pōni sā ja tō nyiktso'ondāajkyim, kuwani ja Cristo mōōt nbaajtin ja ōy'ajtin.

¹⁵ Paty xjā'myatstit ku ja ayuujk wya'añ:

Pōni mmadōōpy meets ja Dios Teety kyajpxy ixyam, ka'ap nayide'en mgujuun'attit sām ja ttundōō pōn ja Dios Teety tkamimadoodōō.

¹⁶ ¿Pōnts idō'ōn ja Dios kyajpxy tjamadoodōō jōts ja tka'ukpadunidōō? Ja' dō'ōn jade'en adōtsti pōn ja Moisés yik'awā'atspidsōōm jam Egipto etjotp. ¹⁷ ¿Pōnts idō'ōn ja Dios myijotmā'jt wixijxy jumōjt? Ja'ats idō'ōn jade'en jajttōō pōn jaty pōkyundi, jōts ja jamiy abak etjotp y'oo'ktōō. ¹⁸ ¿Pōnts idō'ōn ja Dios tyamiwan-dāajki ku ja kyatōkidit mā dō'ōn ja Dios wyinaty tō y'uktamidsōkyidi? Ja' dō'ōn ja'adi pōn tkamimadowdi ja Dios. ¹⁹ Ixyats adōm n'ijxyim, ja'agōjxp ja ōy'ajtin ja tkapaattōō ku ja Dios ja tkamibōjktōō.

4 Ka'anim ja tpaaty jōts adōm ja Dios Teety nmōōt-nōjxna'ant poo'kxpi, paty idō'ōn tsō'ōgi jawi nd-sinaa'yinditnim ja ku wyinaty pōn nidu'ugin kyanaxy.

² Nayide'en adōm tō nyiktukmadō'ōyim ja nitsoojkin ayuujk, sām ja mōjāa'dyōjk yjayiktukmadowdi; ka'apts ja ti ōy'ajtin tpaattit ja kuxi ja tkamibōjktōō ōy ja tjamadoodōō. ³ Adōmts idō'ōn ja Dios Teety mōōt nbaajitint ja poo'kxin ku adōm ja tō nmibijkyim, jabi yide'enxi ja Dios kō'ōm tō wya'añ:

Ja'agōjxp ōts idō'ōn ja nmi'ambōjkti ku ōts ja xkamibōjktōō,

jōts ōts ndyimñimy ku nijuuni xōōw xkamōōtpoo'kx-tit.

Jade'en idø'øn ja Dios wyā'añ, øy ja wyinaty ja tyunk tø tjayik'abajtyini ku ja wyinaty tuki'iyi tø tyikojkixy, jøts t'agajpxujky jøts ja tpaattit ja poo'kxin pøn mimadoolijp; ⁴ pø japxi nayide'en jaabyety y'ity ti dø'øn ja Dios Teety tyuun kyiwixujk xøøw:

Poo'kx ja Dios kyiwixujk xøøw ku ja tyunk tyik'abajtyii'ñ.

⁵ Jøts nayide'en jap jaabyetyimi:

Ka'ap øts ja xmøøtpoo'kxtit pøn xkamibøjktip.

⁶ Ka'anim ja jaa'y ñiga'pxidi jøts tpaattit ja poo'kxaajk, øy ja tø tjamadowdi ja nitsoojkin ayuujk, ka'ap ja poo'kxaajk ja tø tpaatti ku ja tø kyamadowdi; ⁷ paty ja Dios Teety jadu'uk ja xøøw ja et tø tñigajpxy midi adøm ixyam n'ijxyindip ndsināa'yindip, jabi Davidxi dø'øn ja Dios kyajpxy yiktumpy ku ja wyā'añ sã jap jaabyety y'ity nøkyijxy:

Pøni mmadøøpy meets ja Dios kyajpxy ja y'ayuujk, kidi xkamibøkti.

⁸ Ku ja Josué jeexyip ja israelit jaa'y ja poo'kxin ti tmøøñi, ka'ap ja Dios Teety jeexyip jadu'uk ja xøøw ja et tñigajpxy mã ja poo'kxin yikyakt. ⁹ Patyts idø'øn y'awejx'ityiyi ja kunuu'kxy poo'kxin, niduki'iyi pøn ja Dios tjanchja'widip. ¹⁰ Pøn ja Dios Teety møøt pyøø'kxy, nayi tø ja wyinaty yã naxwiiñ tyikixy ja y'ødyu'unin. Jotkujk idø'øn ja pyoo'kxnit sã ja Dios pyøø'kxy ku tyik'abajtyii'ñ ja tyunk tuktsajp'agida'aky.

¹¹ Kuwanits nmijotigø'øyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxi ja Dios Teety y'ayuujk y'ity, jøts jawaani wenk yiktsaachi myøk'ajtingøjxp, niti tsujx ad-sow jøpi jade'en kyayiktsaachi, ja kuxi tyimya'aty an-mija'winjotp jøts jade'en tñanky'ijxyiyi pøni ti yiktun-wamp uk yikwinmaa'ñ'ajtp. ¹³ Niti dø'øn ja Dios tkayu'uchjawi, tyumnija'wigyijxy ja' tuki'iyi jøts ja' idø'øn wyinaty nwinguwa'jka'amp jøts ndsināa'yin ndagidøjkant.

Ja Jesucristo idø'øn tu'uk møjteetywindsøn

¹⁴ Ja Jesús midi dø'øn Dios U'nk'ajtip, ja' adøm idø'øn njawanimøjteety'ajtyindip, ja'ats idø'øn ja Dios Teety tø twinguwa'agi, paty adøm idø'øn ja nDiosja'myajtsin møk nyik'ejtint. ¹⁵ Xja'gyuka'amp adøm ja Jesús midi dø'øn møjteety'ajtp, ja'agøjxp ku ja tñijawi sã adøm ndsināa'yim yã. Pø tøxi ja nayide'en ja ka'øwyinmaa'ñ yjayikmø'øy jøts ja tø tkgapiky, jøts jade'en ja pøky tø tkatuñ. ¹⁶ Tja'myejchims ja Dios, jøts wan tñinijxyim jotkujk jøts n'amido'owint pya'ayo'owingøjxp ja pudøjkin mã ngamajadaajkyim.

⁵ Wi'ijxy idø'øn jam israel kajpkøjxp, tu'uk jadu'uk ja teety, jøts tø yikpikta'aky jaa'gyudanaabyi, jøts ja jiyujk'øøky ja Dios ttawindsø'øgidit ttawinjawidit jøts idø'øn ja jaa'y pyøky ñiwa'adsiyit jøts ja Dios tmaa'kxt.

² Kumi nayide'en yø teetyti pyojkpitumbijaa'yidi, paty yø tja'gyukidi pøn jaty tsuj kadsinaadyip jøts pøn jaty tundigøødyip; ³ ja'agøjxpts idø'øn ja wyindsø'jkin tpik-ta'akti ku ja nayide'en pyojkpitumbijaa'y'ajtti, jøts ku ja jaa'y tkudanidi.

⁴ Nipøn ja kø'øm kyananktyeetypidsimyi; ja Dios Teety idø'øn ja møøjyip, jøts nay ja' idø'øn tkunuu'kxp tkuwamp sã yiktuñ ja Aarøn pøn myidu'ukpi møj-teety'ajti ja israelit jaa'y. ⁵ Nayide'en yjajty ja Cristo; ka'ap ja kø'øm ñankmyøjteetypidsojmi, ja Dios Teety ja møøjyi ku dø'øn ja ñimaajyi:

Mets idø'øn n'U'nk'ajtpy;

øts mets ja jujky'ajtin yã tø nmø'øy.

⁶ Jøts ku nayide'en ja Dios Teety wyāamaa:

Mets idø'øn xemikøjxp møjteety'atp, jøts jade'en mdu'unt sã ja Melquisedec ttuñ.

⁷ Møk ja Cristo ja Dios Teety twingajpxajky tminuu'kx-ajky ku yã chinaay naxwiiñ, jøts twinjiy twinyaaajxy ja Dios Teety, midi tmøøt'ajtp ja kutujk jøts ja o'jkin tka-paatt tka'ext, jøts ja Dios Teety myadooji ku ja tu'ugyi yixxon t'ajot'aty. ⁸ Kuwan dø'øn ja Cristo ja ayo'on tkupøjki sã adøm, øy ja yjaDios U'ngi, kuwan ja tø tñanky'ijxyi ja mado'owin; ⁹ kuts ja jade'en tja'-gyukiyi'ñ ja naxwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mi-madojiyip, ¹⁰ ja'agøjxp ku møjteetywindsøn ja Dios Teety wyinaty tø pyiktaajknii sã ja Melquisedec y'ijty teety'aty.

Yik'ejtip ja janchja'win ku ja jotmøñ yikmajtstutnit

¹¹ Kajaanim ja kyayiknigajpxy yã'atpi ayuujk ja'agøjxp ku meets yjawi xkaja'gyukiwyā'añ, jade'en'ampyts inet idø'øn ja yjawi ngajatt sudso ndukmado'odit. ¹² Meet-spik idø'øn jeexyip mdukyikyujnidip ja mmigu'uktøjkt-i, kawinaak xøøw ja m'ixpøjkin xjayikyø'øñidi jøts ni jade'enbaat xkaja'gyukidinim ja ixpøjkin midi ka' mabaat chepi. Ne'egi jade'en meets yjawi mwimbejni sã ja mutsku'nk ja'ayi ja che'tsknøø tkupiky, jøts ka'ap ja kaaky ja tojx ja ttsøky. ¹³ Maxu'ngin idø'øn ndejint wyinmay pøn tkaja'gyukipnim sudso n'øchi-nāa'yint, kuts ja nduk'ixpøkwa'anin midi niwyaani tsep ka'ap ja tkupiky, nayide'en idø'øn ja' sã ja maxu'nk ja'ayi tkupiky ja che'tsknøø jøts ka'ap ja wenkpi jii'kxy. ¹⁴ Pønts tjajtnip t'ixa'at ja øybi uk ja kya'øybi, ja'ats ja Dios y'ixpøjkin tñijawiwyaangøjxp øy ja wine'en yjatsepi jøts yikja'gyukit.

⁶ Jade'en nyiktaa'nint pøni ti jaty jawyeen tø nyik-tukmadø'øyim, ku ja Cristo tø njanchja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtint ngajpx'adøjint sudso nmajtstuujtint ja ka'øy chi-nāa'yin, midi ja o'jkin tukpatp, jøts sudso ja Dios njanchja'windit, ² jøts pøni ti dø'øn nøbajtin'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjujkyøktit jadigojk, jøts sudso ja tiidyu'unin y'ett.

³ Paty adøm nja'uknijawigyojint pøni ti jaty yiktuk-mado'owimp, pøni jade'en ja Dios xamidsøjkyim.

⁴ Ku pøn jaa'y tuk'ojkyi tø ttajotkujktøki ja Dios y'ix-pøjkin, ku ja Espiritu Santo tø yikwiyyidi yikejyidi ⁵ jøts ja Dios kyajpxy nekim tø t'ukupøkti, jøts nayide'en tø tyatøkiyidi ja Dios chojkin ja myøk'ajtin midi ixyam jøts midi xemikøjxp ejtp. ⁶ Pøni tø ja tja'dyigøydi ja Dios jøts ja kyø'øm ka'øchinaa'yin ja tø t'awimbetidi jadigo-

jk, nisudso ja kya'ukjotimbejtndit ku ja Dios U'nk ja kyiruspajtin jade'en nugo ttaguyajitidi, jits ja nugo o magama ttaxe'ekti. ⁷ Jade'ents ja yjatti sam ja naajx ku tyu'uy, y'uktichp n00, kuts ja piktā'aky jam yikxon y'ity j0ts ja tyikjotkujk'aty p0n jaty t0 ņe'epti. Dios id0'on ja kunuu'kxip ja naajx. ⁸ Kuts ja piktā'aky ja tkayik'ity, ku nugo ujts j0ts kujp tyik'ity, tits ja wyā'ant, ka'ap ja y'0yi. Mi'amb0jkipts ja Dios ja' j0tsnim ja yiknitsā'att. Jade'en id0'on ndejint ja naxwii'ñit jaa'dyi.

Ja awejx'ajtin midi jotkujk xyik'ejtimp

⁹ Ots 0 migu'ukt0jk jade'en njakajpxy, njanchja'wipts 0ts, ku meets ja Dios t0 mgunuu'kxyiyi, ku t0 myikmo'odi ja nitso'ok'ajtin. ¹⁰ P0 janch tiyxi ja Dios jits ka'ap ja mdajaa'dyig0yidit p0ni ti jaty meets ja t0 xuujni, j0ts ku ja t0 xuk'ejxti wine'enin ja xtsojkti, ku ja mmigu'uk midi nayide'en tjanchja'widip ja Jesús t0 xpud0kidi, midi meets ixyam mjaaktun'adichpñim. ¹¹ Ja'ats 00 nds0jkpy, j0ts meets jade'en mdsinaa'yin xyiky0'0dyit jotkujk j0ts tsuj, kunim ja 0y'ajtin xpaattit midi m'awejxtip. ¹² Ka'ap 00 nds0ky j0ts mee mnuux'oockt, ja' 00 nds0jkpy j0ts ja jaa'y xpa'ejxtit p0n jaty ja 0y'ajtin tpaattip y'awejx'ajting0jxp ku ja Dios tjanchjawidi.

¹³ Jade'en ja m0jaa'y Abraham yjajty ku ja Dios tyamini'adso'owiyi ja 0y'ajtin. Ky0'0m jujky'ajtin ja Dios tyakajpx, ja'ag0jxp ku wyinaty n0p0n jawaani m0j kya'ity; ¹⁴ xjats yide'en ja Abraham yiknimaay: "Ngunuu'kxp mets, j0ts ja m'u'nk m'ap nyiknamayit." ¹⁵ Tudā'aky ja Abraham ja t'awejx'ijty midi id0'on ja Dios ņigajpx, j0ts ja Dios ja my00jyi midi wyinaty t0 tyamids0kyi. ¹⁶ Ku jaa'y tigati ttam0jt0kiwya'andi tta-jancht0kiwya'andi, ja' ja y'agajpxtip p0n jawaani m0j, j0ts ja nisā kya'ukyiknimaāñidit. ¹⁷ Paty id0'on ja Dios ojts ja kyajpxy tyimyiktañ, j0ts ja yikjanchjawit ja y'ayuujk, j0ts ku ja tuki'iyi tpadu'unt p0ni ti jaty ja wyinaty t0 ttamids0ky ja jaa'y. ¹⁸ Majtsk id0'on ja winmaa'ñ mi-di ja Dios my00t'ajtpy j0ts ka'ap ja taay'ajting0jxp ttuñ; tu'uk ja wyādaajkin midi ad0m id0'on xamidsojkimp, j0ts tu'uk ja kyajpxy y'ayuujk midi ja awejx'ajtin xm0'0yimp ku ja wyādaajkin ja tpadu'unt. Jade'ents ad0m ja Dios xyikjotkujk'ajtyim, j0ts n'awijxyimpts ad0m p0ni ti d0'on xm0'0yimp. ¹⁹ Ya'at awejxin ad0m id0'on ja n'amija'win tu'ugyi xyik'ejtindip, sam ja kudii'byajt tu'ugyi tyik'ity ja piktā'aky, midi'its ad0m id0'on nadyagumajtsa'amp j0ts ad0m ja Dios nbaajtint. ²⁰ Jam id0'on ja m0k y'ity tsajpjotp mā ja Cristo jawyeen t0 ty0ki j0ts ja tuu' tyik'awa'atst, j0ts id0'on ja jade'en xemik0jxp t0 tyañ m0jteetywinds0n sam ja Melquisedec.

Nayide'en ja Jesús tyeety'aty sam ja Melquisedec

7 Salemit winds0n id0'on y'ijty ja Melquisedec j0ts ja tsajpjotp Dios tnideety'ajtmi. Kuts id0'on ja Abraham wyinaty ja myidsep t0 tmimajada'aky ixats id0'on ja Melquisedec ojts y'atspaats0yi j0ts kyunuu'kxi. ² J0ts ja Abraham tm00y tukpiky ja

majkpikpyi piktā'aky p0ni ti jaty id0'on ja wyinaty t0 t'atspiky. "Ka'pxy tiidyumbi winds0n" id0'on ja Melquisedec y'ayuujkpidsimy; kuts ja tniwinds0n'aty ja Salem kajp midi tyijpy "jotkujk'ajtin", ixyats ja Melquisedec wyimbids0mni "ja winds0n p0n kyajp ttamidsojpk ja 0y'ajtin j0ts ja jotkujk'ajtin." ³ Ka'ats id0'on ja tyeety tyaak ja p0n, ni myigu'uk; ku d0'on ja ņanky'ejxpaajti, ni kyayiknigajpxmi ja kya'axin j0ts ja y'o'jkin; paty id0'on ja Dios U'ngin t'ixy, ja teety midi xemik0jxp teety'ajtp.

⁴ Janch m0jts id0'on ja Melquisedec wyimbidsimy, ku d0'on ja Abraham, midi ad0m ndeety'am0jkojpk'ajtyindip, ja tm00y tukpiky ja myajkpikpyi piktā'aky midi ja wyinaty t0 t'atsp0jksi ja myidsep. ⁵ Jade'en ja Moisés kyutujk yjawa'añ j0ts ja teety p0n yiktso'ondaajkidi ja Leví j0ts t'amido'odit ja jaa'y tukpiky ja myajkpikpyi piktā'aky, 0y ja tjamigu'ugidi, uk tu'ugyi tjakojk'atti ja Abraham. ⁶ 0ts ja Melquisedec jade'en yjagateety'aty sam ja'adi p0n yiktso'ondaajkidi ja Leví, y'amidoow ja nayide'en tukpiky ja myajkpikpyi piktā'aky ja Abraham p0n wyinaty ja Dios t0 tyamiwanda'agiyi ja 0y'ajtin. J0ts ja Melquisedec tkunuu'kxy ja Leví, y'amidoow ja sa kyawa'añ, ku ja yjawanim0ji p0n kunuu'kxp, j0ts ka'ap ja' p0n yikunuu'kxp. ⁸ Tum oo'ktipts ja jaa'y p0n ya naxwiiñ tukpiky ja myajkpikpyi piktā'aky yikm00dyip, ka'afts ja Dios kyajpxy jade'en tnigajpxy ku ja Melquisedec t0 y'oo'kni, n0mp ja wyā'añ ku ja yjujky'atynim. ⁹ Nayide'en id0'on n'ukwa'ānint, 0y id0'on ja teetyt0jk p0n ja Leví ņigubajk'ajtpy ixyam tjayikmukti tukpiky ja myajkpikpyi piktā'aky, kuwani d0'on ndejint k0'0m tjagubajtmidi ja yjade'embu nay winet ku ja Abraham tm00y ja yja' ja Melquisedec. ¹⁰ Ja'ag0jxp id0'on ja ndejint ja ttuñ ku ja tm0jnig0jpk'aty ja Leví p0n wyinaty kaka'xpnim naxwiiñ, ku ja Abraham ja Melquisedec pyaats0ji.

¹¹ Ja Levíit teety id0'on midi ja Aarón yiktso'ondaajkidi, ja' id0'on tm00dyi ja kutujk ja Israel kajp. Kudsik id0'on jeexyip ya'atpi teety ttukpaatt00 ja Dios p0n jaty ja kyutujk paduujnidip, ka'ats jeexyip ch0jkyi j0ts ja teety jadu'uk kyax0'0kt midi tkawinds0n'ajttip ja Aarón, j0ts nayide'en tyeety'attit sam ja Melquisedec. ¹² Kuwani d0'on tyigach ja kutujk ku ja teety tyigatsti; ¹³ ni tu'uknimts ja teety kyabidsimy abikyajpk0jxp, sami ja nwindson'ajtim Jesucristo midi d0'on jade'en yiknigajpxp jap n0kyijxpy. ¹⁴ Yiknija'wipxi ja' ku ja nwindson'ajtim Jesucristo tatskojpk'aty ja Judá, j0ts ka'ap ja Moisés tyikutujky ku teety jam Judá etjotp pyids0'0mdit.

¹⁵ Jawaani 0yts ja ne'egi wyingaxi'iky, ku yiknijawi j0ts ku ja Jesús ja jemdyeety'ajtin ņanky'ejxiyi, nayide'en sam ja Melquisedec. ¹⁶ Ky0'0m m0k'ajting0jxp ja Jesucristo tpaajty ja teety'ajtin, ja ku tm00t'aty ja jujky'ajtin xemik0jxp; j0ts ka'ap ja pyidsimy jam jaa'y agujkp, p0n jaty id0'on paat'ajtiyip ja teety'ajtin, sam ja kutujk ja'ayi ttanibiktaagi. ¹⁷ P0 yide'enxi ja Dios Teety ja ņigajpxy:

Mets id0'on xemik0jxp mdeety'atp, j0ts jade'en mdu'unt sam ja Melquisedec ttuñ.

¹⁸ Paty ja Moisés yjawyeen'ana'amin tō kyudigōy, ku ja mōk'ajtin tkayaky sudso yikpadu'unt; ¹⁹ jōts niwine'enin ja ka'ōchināa'yin tō tyiktigach. Ixyamts nmōōt'ajtyindi tu'uk ja jōp'ijxy'ajtin midi ōy midi mōj jōts midi ja Dios xukpaajtimp.

²⁰ Diosts idō'on kō'om ja y'aaw y'ayuujk tō tyaky jōts idō'on ja nwindson'ajtim Jesucristo xemikōjxp ty-eety'att. ²¹ Ja abikpyi teety, ka'ap ja jade'en tō yik-tamidsokti sam idō'on ja nwindson'ajtim Jesucristo tō yiktamidsōky, sam jap jaabyety nōkyijxy wyā'añ:

Pōni tō ja Dios wyā'añ ka'ap ja y'aaw y'ayuujk ja tyiktigatst, ku ñimy:

“Mets idō'on xemikōjxp mdeety'ajtp, jōts jade'en mdu'unt sam ja Melquisedec ttuñ.”

²² Paty idō'on ja Jesús jawaani tō myōjtōki, ku ja jawaani ōy ja tyeety'ajtin midi tyajkp ja nitsoojkin.

²³ Yam janch namay ja jadu'ukpi teety, jōts tum jōpwetsti y'etti ku y'ookti, wenkpits ja tyunk tmidandip;

²⁴ ka'ats ja Jesús jade'en, niijuuni xōōw ja kya'ōōky, paty ja tyeety'ajtin ja nipōn tkadukmidañ. ²⁵ Ja'agōjxpts idō'on ja jade'en xemikōjxp tyik'awa'atpidsimy pōn jaty ja Dios t'ixaadyip, ku ja xemikōjxp yjujky'aty jōts ku adōm ejtp xni'amido'owa'am.

²⁶ Yā'atpi teety'ajtpi adōm idō'on jeky tō n'awijxyim; ja nwindson'ajtim Jesucristo ja' idō'on ōyjaā'y pōn tkamōōt'ajtp ja ka'ōwyinmā'ñ, ni ja pōky, pōn ja pōjkpitumbi jaa'y tō kyadapaadyi ja ka'ōchināa'yin ōy ja tō tjamōōtsōōni, jōts pōn ja Dios Teety mōōt yikutuky.

²⁷ Tō dō'on ja tu'ugyi ja Dios wyindsō'ok'ajtin tyikā'pxi, ku ja ayo'on kō'om tō tkupiky. Ka'ap ja jade'en tō ttuñ sam ja jadu'ukpi teetyti, pōn jabom ja Dios twindsō'ok'ajtidip jōts ja kyō'ombōky yikmaa'kxtit, jōtsnim ix'oojk ja jaa'y nayide'en tkugajpxti jōts ja pyōky ja wyā'atstt. ²⁸ Tum naxwii'ñit jaa'y ja Moisés y'ana'amin yikteety'ajtpy, pōn nayide'en ja pōky ōy myimajadā'agiyidit; tōts yō'ōbi ana'amin kyugōxi jōts ja Dios Teety ja y'aaw y'ayuujk tō tyaky jōts ja y'U'nk, ja nwindson'ajtim Jesucristo, tō tpikta'aky ōy tyeety'ajtpi pōn xemikōjxp ja wyā'ats'ajtin mōōt y'ity.

Ja Jesús xkugajpxindip Dios Teety wyingujkp

8 ¿Midi'ibits idō'on tsojkip yikxon ja'gyuki? Ja' idō'on ku adōm ja mōjteetywindsōn nmōōt'ajtyim jōts ja jam tō y'ixa'aky Dios Teety y'aga'ngyōjōm yikutujkpi, ² jōts ja jam tyeety'aty tsaptōjkjotp midi ja Dios Teety kō'om tō tkōjy, ka'ap ja jaa'y ja tō ttukyikōjy. ³ Windsō'ok'ajtin, tamay'ajtin, ja' idō'on ja teety tyundip, paty idō'on nayide'en ja nwindson'ajtim Jesucristo kuwani pyāat'aty jōts ja windsō'ok'ajtin tmo'ot ja Dios Teety. ⁴ Ku ja nay yā jeexyip chōōni naxwiiñ, ka'ap ja yjeexyip tyeety'aty, pō jaaxi teety yā pōn jade'en ttundip sami ja Moisés wyā'añ. ⁵ Nugo agoj-naxts ja abikpyi teetyti myidundip, tum ja' y'agojnax midi jam tsajpjotp. Ja'agōjxp ja jade'en yikniāwī ku ja Moisés ja Dios ñimāajyi, ku dō'on ja wyinaty tu'uk ja tsaptōjk tyik'ōyiwya'añ, ku yide'en yikniāāy: “Yikxonim x'ext, jōts nayide'en pyidsō'ōmt sam tō nduk'ixy kojpkōjxp.” ⁶ Ja ōy'ajtin, ja tiy'ajtints adōm ja nmōj-

teetywindsōn myidumpy, ja'agōjxp ku ja tkugajpxy tkudani ja ōy'ajtin, midi adōm ja Dios Teety kō'om tō xamidsōjkyim.

⁷ Kuk idō'on jeexyip nisā kya'ejxi ja jawyeen kutujk midi ja Moisés ja Dios tukajpxnājxōō, ka'ats jeexyip jadu'uk chōkyi sam ja Cristo yja' tō tnanky'ijxyi. ⁸ Ja kuxi ja Dios tkaka'pxyjawi ja jawyeen kutujk sam ja kō'om wyā'añ jap nōkyijxy:

Yide'en ja Dios Teety wyā'añ: Me'emp ja xōōw ja jumōjt

ku ōts ja Israelit jaa'y jōts ja Judajit jaa'y nmo'odit jadu'uk ja kutujk pōni kyupōjktip.

⁹ Ka'ap ja jade'en t'ext sam ja' midi tō njatumi mōōt ja myigugajp, midi jekyip tsinaadyōō,

ku ōts ja nwaapidsōmdi Egipto y'etjotp; kumi ka'ap ja tpadundi, paty ōts ja nmajstuttōō.

¹⁰ Yide'en yjāakwā'añ ja Dios Teety, yide'ents idō'on ja y'ett, midi ōts idō'on ndunwajnip ja Israelit kajp:

Ndukja'gyukip ōts ja ōgyutujk ja'adi, jōts ōts ja y'anmija'wingōjxp nbiktaajkidit.

Ja'ats ōts idō'on niDios'attip, jōts ōts ja ngajp'attit.

¹¹ Ka' dō'on pōn wyinaty ja myigu'uk niti tkadukyikyujti pōni ti dō'on ja tyu'ump;

ja'agōjxp ku ōts ja wyinaty ja mōj ja mutsk tō ndukni-jawidi jōts ōts ja niduki'iyi x'ejxkaptit.

¹² Nmaa'kxidip ōts ja' ja kya'ōchināa'yin, jōts niijuuni ōts ja pyōky ja nga'ukja'myajtsniyidit.

¹³ Ku dō'on ja Dios Teety ja jemy ayuujk ja jemy winmāa'ñ tnigajpxy, mijāa'yinip idō'on ja myijawyeembī kutujk; kuts ja tō myijāa'yini, pojn ja kyudigōōñit.

Ja naxwii'ñit tsaptōjk jōts ja tsajpjotpit tsaptōjk

9 Jamts idō'on y'ijty tmōōt'aty ja jawyeen kutujk sudso yikwindsō'ogit ja Dios jam tsaptōjkjotp midi yā naxwiiñ. ² Yide'en idō'on y'ōyiyi'ñ ja tsaptōjk yā naxwiiñ, midi dō'on jawyeen yikpātp ku ndōjka'ant, ja' idō'on xyōōw'ajtpy Kunuu'kxy Et, japts idō'on y'etti ja seri adōō'yin, jōts ja pōjkpajt mā ja kunuu'kxy chapkaaky y'etti. ³ Japts myimajtsk adiidyuky jixki'py tyāñ, ja amaāgyunuu'kxy et; ⁴ mā jap tu'uk ja altajr midi tum amuum oori mā kyōxōōy ja poom, jōts tu'uk ja mutskaaxi midi oori nimōch mā ja kutujk jap y'ity. Japts mutskaaxijōtpy tu'uk ja tu'jtsu'nk midi tmōōt'ajtp ja manā midi dō'on yjōō'kxtōō ja israelit jaa'y jam abak etjotp. Nayi jap idō'on kaaxijōtpy y'ijty ja Aarōn ja tyajk midi ojts jadigojk xyimumy, jōts ja tsāā mā jap kyōx-jā'ayō ja kutujk ja ñi'ayuujk. ⁵ Jamts kaaxi ñikōjxp y'etti ja ankilistōjk ja y'agojnax, midi tyikniāgaxō'ktip jōts ku ja Dios jam, jōts ja kyajnk ja ttanīmu'uxti mā ja pōky y'ijty yikmee'kxy. Wants yā'at ja'ayi t'ukniā'wam.

⁶ Kuts idō'on ja jade'en tō ttanībiktaāgidi, winets idō'on y'ijty ja teety tyōkidi jap mijawyeen tōjkjōtpy midi Kunuu'kxy Et yiktejp, jōts idō'on ja windsō'ok'ajkin ja yikjujky'ajtpi t'atmo'odi pōni juuni ja kō'om tsojkin'ajttōō. ⁷ Jōts idō'on jap myimajtsk tōjkjōtpy midi yiktejp Amaāgyunuu'kxy Et, tuk'ojkyits ja winjumōjt ja mōjteetywindsōn jap tyōki; ja jiyujk ni'jpy idō'on ja

myidøjkp midy y'atswa'xpy mā ja pyøky jawyeen yik-maa'kxt jøtsnim ja jaa'y yja' nayide'en. ⁸ Yide'ents idø'n ja Dios Espiritu Santo xukja'gyukam ku dø'n jap nipøn nugo kyatøki myimajtsk tøjktøpy mā txøw'aty Amaagyunuu'kxy Et. Japyi ja midu'uk tøjktøpy ja'ayi xyumitøkidi. ⁹ Yø' adøm idø'n n'ejxpajtin'ajtimp wine'enin naxwii'ñit jaa'y'ajtyindi, jøts nni-jā'wa'ant ku ja winmaa'ñ kyawa'ach øy ja wine'en ja wyindsø'jkin tjayika'pxtøø. ¹⁰ Ja' idø'n ja wyindsø'jkin'ajttip sudso kya'adyit sudso y'uuktit, jøts sudso ñanky'øiyidit ñankchuyiyidit, sam ja møjaa'y chinnā'yin tyikutuky. Niwine'enin ja anmija'win ja tkayik-wa'ats'aty. Ja'ats ja jade'en tyungunajxtip kunim ja Dios kø'øm tø tyiktigach.

¹¹ Tøts idø'n ja nwindson'ajtim Jesucristo myiñ, ja'ats idø'n ixyam tñimøjteetywindsøn'ajtp ja jemchinā'yin midy yā tø tyañ. Jawaani øy idø'n jøts jawaani tsuj idø'n ja tsaptøjk mā dø'n ja tyuñ, ka'ap ja jaa'y ja tkøjy, paty idø'n ja kyanaxwii'ñit tsaptøjki. ¹² Tø dø'n ja nwindson'ajtim Jesucristo ñaxy jap myimajtsk tøjktøpy midy xyøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ni'jpy; kyø'øm ni'jpy ja myidøjkp tuk'ojkøjxp ja'ayi, midy adøm idø'n xemikøjxp tø xuktanitsøjkyim.

¹³ Yikwachptsik idø'n y'ijty ja pøky ja tsigiduuri ni'jpy, jøts ja tsapaxunā'jk ni'jpy, jøts nayide'en ja tsigivaki jaam midy yiknitødyip jam altajrkøjxp, ku dø'n ja y'ijty ñadyaninuugyidi nikijxy jøts ja pøky jade'en tyik-wa'atswa'andi xjats ja kunuu'kxin ja jade'en tpaattøø.

¹⁴ Pøni jade'ents ja', jawaani kajaats idø'n ja nwindson'ajtim Jesucristo ja ni'jpy yikpøkwa'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwa'ach, midy ja Dios Teety kyupijky, jøts idø'n ja ni'jpy ja tyikwa'atst ja ka'øchinā'yin midy ja kudigø'øyin xukpaajtimp, jøts ja Dios jøts ja yikjujky'ajtpi jade'en nmimado'owin.

¹⁵ Paty idø'n ja Jesucristo møj yik'ajot'aty ku yjemgyutujk tø tyiktso'onda'aky, pø ja'axi ja kyu'o'jkp jøts yikpøkmyaa'kxtit pøn jaty tø pyøkyundi ku ja møjaa'gyutujk y'ijty tyuñim, jøts ja jaa'y tpaattit ja xemikøjxp pit øy'ajtin, midy ja Dios Teety ttamidsøjkiyidip windi'ixip. ¹⁶ Jabi jade'enxi yiktuñ ku ja māay wya'kxy, jaanim ja wya'kxy ku ja jaa'y y'øøkñim. ¹⁷ Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay. ¹⁸ Kuwanixi ja ni'jpy ojts chuñ xye'kxy ku ja møjaa'gyutujk cho'ondaajky. ¹⁹ Ku dø'n ja Moisés wyinaty ja kajp tø ttukmadø ja Dios kyutujk y'ana'amin, winets tñaxajiyiñ tukmutsk øøxy ja ujts aay møøt ja tsajpts wet, jøts ttuktaxø'øky ja tsiginijpy ja chiibi ni'jpy, midy nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en. ²⁰ Winets wyaañ: "Ya'at ni'jpy idø'n tyikmøjtøjkp ja Dios kyutujk midy mee tø myiktamidsøky."

²¹ Tyaniwa'jx idø'n ja Moisés ja ni'jpy nayide'en ja tsaptøjk, jøts tuki'iyi pøni ti jaty yiktundip, ku dø'n ja Dios ja t'atswindsø'øgidi. ²² Jade'en idø'n kyutuky jøts ku ja ni'jpy tuki'iyi tyikwa'atst, kuts ja ni'jpy kya'ett ka'ats ja pøky yikmee'kxy.

Cristo y'ayo'ongøjxp ja pøky wya'ach

²³ Paty idø'n chojki ja ni'jpy jøts wya'atst it ja pik-tā'aky jap tsaptøjkøtpy, midy y'agojnax'ajttip ja tsajpøtpyt tsinnā'yin. Jawaani øy pyaāt'atyiyi ja tsajpøtpit'ajtin ja windsø'øgi, midy ja Cristo kø'øm tø ttuñ. ²⁴ Jøts ka'ap ja Cristo jam tyeety'ajty tsaptøjkøtp midy yā naxwiiñ ja jaa'y tø tkojti, jøts tsajpøtpit tsaptøjk ja' nugo y'awanax. Jamxi dø'n ja tyimchajpøtp tø tyøki, mā adøm ja ixyam x'agø'dujkyim x'axajtuikyim Dios Teety wyingujkp. ²⁵ Tuk'ojkyi dø'n ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsø'ndi midy dø'n y'ijty winjumøjt ja'ayi tmidøjkp ja ni'jpy jam tsaptøjkøtp jøts ni tkakø'mni'jpyi ja'adi. ²⁶ Ka'ats idø'n ja Jesucristo jexyip nayide'en ttumi, tøts idø'n ja jexyip may'ojk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'ojk ja o'jkin ja ja'ayi tø tkupiky jøts ja pøky tuki'iyi xemikøjxp tyikwa'atst. ²⁷ Nayide'en sami jaa'y niduki'iyi tuk'ojk y'oo'kti, jøts yiktiiduy'unditnim, ²⁸ nayide'ents ja Cristo tuk'ojkyi tø y'øøky, jøts may ja jaa'y tyikwaajtsit ja pyøky. Kuts idø'n wyinaty jadigojk ñanky'ejpaaadyiyi, ka'ap ja yikpøkwyatspi wyinaty y'ukmeni, ja' ja wyinaty ñimimpy pøn jaty ja awejx'ajtyip.

10 Ja jemgyutujk idø'n ja' y'aga'ax ja nugo kutujk midy ja Moisés yiktaan, paty idø'n ja kyama-jada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach. ² Ku dø'n ja jexyip ja pøky tyikwa'ach, jøts ja øchinā'yin jexyip tyaky, tuk'ojkyits idø'n ja jexyip jade'en yjaty. Ka'axi ja jexyip y'uknabyøkyja'winiyidi. ³ Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi ja windsø'jkin, ⁴ ja'agøjxpts ja jade'en yjatti ku ja pøky ni ja tsiginijpy ni ja chiibi ni'jpy tkayik-wa'ach nijuuni.

⁵ Paty idø'n ja Jesucristo ja Dios Teety tñimaay ku ya myiñ naxwiiñ:

Ka'ats xtsøky'aty jøts myiktawindsø'øgit ja jiyujk, patyxi øts tø xyikjaa'yjaty jøt øts ja ne'kx jøts øts ja ni'jpy tø xmø'øy.

⁶ Ka' myikjotkujk'aty ku ja jiyujk yjanitøø, ni ja windsø'jkin midy jayiktump jøts ja pøky xmaa'kxt.

⁷ Winets ø nwaañ: "Ixyam ø Dios Teety, jøts ø nbadu'unt pøni ti me nmi'ana'amwampy sã jap jaabyety nøkyijxy y'ity."

⁸ Ku dø'n ja jawyeen tø tñigajpxy ku ja Dios Teety tkadajotkujk'aty ja windsø'jkin ku dø'n ja jaa'y ja jiyujk tjayik'ookti, jøts ku tigati tjayiktømyidi jøts ja pyøky wya'atst it sam idø'n ja yagutujkyi. ⁹ Winets ja nwindson'ajtim Jesucristo wyaañ: "Ixyam ø Dios Teety, jøts ø nbadu'unt pøni ti mdsøjky." Yikudigøøpyts idø'n ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch. ¹⁰ Tøts adøm idø'n ja Dios xkunuu'kxyim, pø tøxi ja nwindson'ajtim Jesucristo xemikøjxp tuk'ojkyi ja ñine'kx tkøyaky midy idø'n ja Dios Teety tø tmø'øy adømgøjxp.

¹¹ Tum jade'ents ja israelit teety tundinim, nay ja jiyu-
jk ja tyawindsø'jkidip ja Dios, øy ja pøky ja nijuuni tja-
gayikwā'ach. ¹² Tuk'ojkyits ja Jesucristo ja'ayi tø y'øøky
jøts adøm ja nbøkwyaaajtsindit, jøts ja jam tø y'ixa'aky
yikutujkpi, Dios Teety y'aga'ngyøjøm. ¹³ Jamts ja
y'awixy kunim ja myidsep yikpikta'akt tyekyji'py jøts ja
ttekpya'an'att, ¹⁴ pø tøxi ja tu'ugyi ja wyindsø'øk'ajtin
ttamajada'aky ku ja kø'øm tø ñadyagidøkiyi ja Dios
Teety, jøts jade'en xemikøjxp tø tyik'awa'atspidsimy
pøn jaty ja kunuu'kxin tø tmø'øy. ¹⁵ Jøts ja Dios Espiritu
Santots ja kajpxy nayide'en tyiktuu'yø'øpy tyiktuu'wejt-
sp ku wyā'añ yide'en:

¹⁶ Midi øts idø'øn yø jaa'y ndamidsojkip, ku dø'øn ja
xøøw ja jumøjt tpaatt, yide'en øts idø'øn ja wyinaty
nduñ.

Ndukja'gyukip øts ja ngutujk jøts øts ja nbiktaajkit
y'anmija'wingøjxp.

¹⁷ Jøts yjaakwā'añ:

Ka'ap øts ja pyøky ja wyinaty n'ukja'myajtsniyi, ni ja
kya'øy'ajtin.

¹⁸ Paty idø'øn nja'gyuka'ant yikxon pøni tø ja pøky
xemikøjxp yikmee'kxy, ka'ats y'uktsojkniiyi jøts ja Dios
Teety njaaktawindsø'jka'ant o ti jøts ja xpojkip-
maa'kxint.

Møk ja Dios janchja'win nbiktaajkit

¹⁹ Paty migu'uktøjk idø'øn ka' tsø'ogijawi nwin-
gunøjkxindit ja Dios Teety jap tsajpjøtpy, pø tøxi ja
nwindson'ajtim Jesucristo xkudsu'una'am xkudajx-
a'am. ²⁰ Ja'ayi tsojkip jøts adøm ja nwindson'ajtim Jesu-
cristo ja yjemdyuu' nguyø'øyint midi ttukpatp ja
xemikøjxpit juky'ajtin, jøts midi ja nwindson'ajtim Je-
sucristo tø awā'ats tyiktañ kyø'øm y'o'jkingøjxp. ²¹ Ja
nwindson'ajtim Jesucristots adøm idø'øn nmøjteety-
windsøn'ajtyimp jam tsajpjotp; ²² paty idø'øn tu'ugyi ja
n'anmija'win nbiktaajkit ku ja Dios Teety n'ajot'ajtin,
jøts tu'ugyi dø'øn ja janchja'win amumjoojt
nmøt'ajtin; pø tøxi ja xyikpøkwyaaajchim jøts adøm
nga'uknabyøkyja'wiña'ant, tøts nayide'en ja nøbajtin
nøø xyikwaaajchindi. ²³ Yikxonimts idø'øn ja n'aweixint
midi ja Dios tø t'agajpxuky ku adøm ja kyutujk ja tø
ngupijkyim. Pyadu'ump ja' ja y'ayuujk. ²⁴ Ja' adøm
idø'øn n'ixa'ayimp sudso xem yam nnabyudøjka'ant
jøts nnachojka'ant. ²⁵ Ka'ap adøm ja jaa'y chinaa'yin
nyikmøjtøjka'ant pøn jaty kamendip ku nnamyu-
jkyandi Dios ajot'ajtpi, nagaajpxot'amøjkamp adøm
idø'øn ne'egi, ixa ja nwindson'ajtim Jesucristo wyin-
goni.

²⁶ Ku adøm kø'ømdsojkingøjxp ja Dios yja' n'ixmajt-
sint, ka'ats ja maa'kxujkin yikpaatt, jabi ka'axi ja abiky
yiknitsokpi y'ukmenit. ²⁷ Ja'ayits adøm njøp'ejxindip
pøni jade'en adøm ndsinaa'yin, jøts ja Dios Teety ja
myøktiødyu'unin nbaajint, jøts xemikøjxp ja tø'øyin
xmø'øyindit midi dø'øn pyaattip pøn ja Dios tmid-
sep'ajttip. ²⁸ Pø nayide'enxi y'ijty yiktundi pøn tkami-
madoodip ja Moisés y'ana'amin, ku namajtsk uk
nidigøøk ja a'ejxnaxpi kyajpxti, kuwanits ja y'ijty
y'øøky, niwine'en ja kyayik'ayo'ejxti. ²⁹ Jawaani kajaats

ja pyaat'atyidi ja ayo'on pøn jaty ja Dios U'nk nugo
t'uktaa'nwidejtnidip, jøts ja y'o'jkin tka'ukmøjpk-
taajkniiyi midi tø yikpojkiwā'achidi, jøts nayide'en ja
Dios Espiritu Santo tø t'ukmigajpxigøøñidi yam ja
yjaba'ayøyi. Pø ja y'o'jkinxi ja Cristo y'ejxa'anin'ajtpy
ku dø'øn ja Dios Teety chojkin tø t'nigajpxy, midi tø
yjayikpøkwyā'achidi pøn ja ka'ukmøjpktaajkniiydip.
³⁰ Pø nnija'wampxi ku ja Dios Teety tø wyā'añ: "Øts
xpaat'ajtp jøts øts ndagubattit ja pyøky; øts yø
nmo'odip kija' ja y'ayo'on pøni wine'en yø
pyaat'atyidi." Jøts nayide'en wyami: "Ndiødyu'ump øts
ja ngajp." ³¹ janch kawinmaañ dø'øn ja y'ayo'on'ixy
pøn ja Dios, pøn ja yikjuyk'ajtpi tyukpatpy
myøk'ajtingøjxp ja y'aki!

³² Kidi mee xja'dyigøy ku ja nwindson'ajtim yja' x'e-
jxidi jøts ja chinaa'yin xpadøjkidyøø, winets o sagasa
xkujajtidøø ja mjanchja'win. ³³ Jam mee niwinaagin
pøn ja mayjaa'y m'ejxidi ku myikta'oiti jøts myikat-
see'kti ja mdsinaa'yin, jøts nayide'en xajotmay'oookti ja
mmigu'ukti pøn o sagasa yiktundip. ³⁴ M'ayo'ejx meets
ja tsumyjaa'y, jøts mimadaajk meets ja jotkujk ku ja
mbikta'aky tuki'iyi myikpøjkigyøxtøø, pø mnija'wipxi
meets ku jam tsajpjotp jawaani y'øbyi xpaattit midi
xemikøjxp etp. ³⁵ Wan ttuñi pøni ti tuujni, awejx'et
meets ja ejtp pøni ti ja nwindson'ajtim tø t'agajpxuky,
myikmo'op meets ja kajaa. ³⁶ Tuda'aky ja Dios Teety
y'ana'amin paduñ tsoøky, jøts ja tyakt pøni ti ja tø t'a-
gajpxuky. ³⁷ Pø yide'enxi ja nøky wyā'añ:

Jawaani jaa'aweix'etti,

tsojk ja mye'ent ja nwindson'ajtim pøn ja øy'ajtin
xmø'øyimp.

³⁸ Midi'its øts idø'øn ngupijky, janchja'wingøjxp
idø'øn t'awixy'aty ja øy'ajtin,

pøni windsi'jkyts ja', ka'ats øts ja ndajotkujk'att.

³⁹ Ka'ats adøm nwindsi'jkyjaa'yandi midi pojn yikmi-
majadaktip, tum ja'abixi adøm pøn ja janchja'win tta-
jujky'ajttip, jøts jade'en ja n'anmija'win xemikøjxp
nyiknitsojkindit.

Ti dø'øn janchja'win'ajtp

11 Ja' dø'øn janchja'win'ajtp ku amumjoojt tu'ugyi
n'aweixint pøni ti dø'øn yikmø'øyimp jøts ku
amumjoojt nmibøjkint midi nga'ijxyindip. ² Ja yjanch-
ja'win idø'øn ja ndeety'amøjtøjk yiktakajxajkti.

³ Ja janchja'win adøm xukmibøjkimp ku ja Dios ja
tsajp ja naajx jøts tuki'iyi tø tyik'øyi y'ayuujkøjxp ja'ayi,
jøts ja' midi ixyam n'ijxyindip ka'ap ja y'ity te.

⁴ Janchja'wingøjxp ja Abel øy ja Dios twindsø'jkøø,
yam ja Caín kajade'en, paty ja Dios ja Abel tkupijky jøts
ja'agøjxp ja wyindsø'jkin tkupøjki. Ots ja Abel tø
yja'oo'kni, tø ja ejxpajtin ja xemikøjxp tyiktañ ku ja
janchja'win ja tmøt'ajty.

⁵ Janchja'wingøjxp ja Enoc yiktaniwawi ja xemikøjxpit
tsinaa'yin øy ja o'jkin ja tjagapaajty, jøts ja tka'ukpat-
nidi ku tja'ixaadyøø pø tøxi ja Dios ja wyinaty
pyawā'aniyi. Yide'ents jap nøkyijxy wyā'añ ku ja Dios
ya naxwiñ tyikjotkujk'ajty. ⁶ Janch tsepts jøts ja Dios
nyikjotkujk'ajtin, pøni ka'ap ja janchja'win yik-

møt'aty, ja kuxi ja Dios yikpaatw'añ, jawyeen idø'on ja njanchjā'want ku dø'on ja jaa, jøts ku ja nayide'en tkunuu'kxy pøn jaty ja ixaajiyip.

⁷Janchjā'wingøjxps idø'on ja Noé ja Dios tmibijky, jøts tmimadøø ku ja tyukmadooji pøni ti jaty idø'on tunwajniþ wyinaty, o dø'on niti kyagaxi'ikñim, jøts ja barki tyik'ø'yiyi'ñ midi yiknitso'ogip wine'enin jam tyøjkjotp yjāa'y'atti. Ja yjanchjā'win ja tyamøj'ajt jøts ja ttuk'ijxy pøn jaty ja pøky ttunk'ajttip, jøts nay ja'agøjxps ja Dios tyaxonda'agyi.

⁸Yjanchjā'win ja Abraham yikmadooji, ku ja Dios ojts myigajpxyi jøts ja kyajp tmajtstuuþy, jøts tñidsø'øñ ja naajx ja et midi ja Dios ttamidsojki, øy ja tjaganijawi pøni ma dø'on ñijky. ⁹Ja'agøjxps idø'on ja Abraham chinaay jam etjotp midi dø'on ja Dios ttaniwaaðsojiyi ku janchjā'win ja tmøøt'aty, jøts jabyøø'kxyin ja jam chinaay. O magama ja tyøjk tkojwidettøø sam ja tu-u'yø'øbyidi. Jøts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamiguy'ejxidøø ja naajx ja et. ¹⁰Ja'agøjxps ja jade'en ttuun ja Abraham, ku tjøp'ijxy'aty ku tyukpaattit ja kajp midi ja Dios kø'øm yik'øyip yikpaadip, ja tsajpjotpit kajp midi tu'ugyi etp.

¹¹Nay ja janchjā'win ojts ja Sara tyukmibikiyi ku ja tu'uk ja y'u'nk tpaatt øy ja wyinaty tø yja'amøji kyidakni. Pyaajt idø'on ja y'u'nk ja ja'agøjxps ku tjanchjāa'wiyi'ñ jade'en sa ja Dios ñimaajyøø. ¹²Ots idø'on ja ñiyaa'y Abraham yjadyimyojāa'yini, ojts idø'on tnigojpkteety'aty janch namay ja naawii'ñit jaa'y, ejxim maad-sa', uk ejxim pu' mejy'agø'øm kyamachooni.

¹³Tum oo'køjxtits yø jaa'y, ixa jade'en tø yikjā'myatsti, jøts nika' ja ya naawii'ñ yikmøøgyijxy pøni ti jaty ja Dios wyinaty tø tni'adsowi; ttuk'ejxidits ja jagamyi ja yjanchjā'win midi ja Dios yakwanguijxpy jøts jade'en ttaxondaøktøø, jøts ja jade'en tñankñija'widøø ku ja ya naawii'ñ nugo ñaxti. ¹⁴Pønts jade'en ttundip, y'ix-aadyipnīm idø'on ja tu'uk ja kajp ma tu'ugyi chinaa'ñidit. ¹⁵Kuk ja ttajotmay'oo'knidi ja kyajp midi yiktandī, wimbejtitsik ja jadigojk nay jam. ¹⁶Kumi øgyajpts ja jawaani ja chojktip midi dø'on jam tsajpjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'dyufñidi, kajpja'wiyidip ja'.

¹⁷Nay ja janchjā'win ja Abraham ja Dios ttukmimadooji ku myøkwinmaa'ñ'ejxiyi jøts ja tyu'umts majnk y'amidoojiyi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'on ja Dios kø'øm wyinaty tø ñi' mxyi: ¹⁸"Yø Isaac mets idø'on myikmayiyip."

¹⁹Ja'agøjxps idø'on ja Abraham jade'en ttuun ku ja twinmay ku ja Dios myøk'ajtin myøji jøts tyikjujkyøkt ja oo'kpi jaa'y. Oo'kpi agujky idø'on ja Abraham ndejint ja y'u'nk wyimbijty jadigojk øy idø'on ja yjaga'øøky.

²⁰Janchjā'wingøjxps ja Isaac t'agajpxuujky ja kunuu'kxin midi ja y'u'nk Jacob jøts ja Esau paadidip.

²¹Jøts ku ja Jacob wyinaty y'ookwani, janchjā'wingøjxps idø'on ja ttami'awa'aniyi'ñ jøts ja José y'u'nk y'unaj'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijyiyi. ²²Janchjā'win ja

José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

²³Janchjā'wingøjxpts ja Moisés ja tyeety tyaaak yu'uch yik'ejttøø tigøøk po'; ja'agøjxps ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit. ²⁴Jøts nay ja janchjā'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni. ²⁵Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naawii'ñ'ajtin midi naþp midi tigøøpy.

²⁶Jade'en ja wyinmaaþy ku ne'egi jawaani øy jøts ja Cristo o sagasa tmijatt, midi dø'on yikniagajpx me'emp, ka'ap ja tmøjpiktaajky pøni wine'enin jam ja meeñ jøts ja pikta'aky Egipto; ja' y'awijxpy midi ja Dios mo'ojip.

²⁷Ja janchjā'win ja Moisés yiktsoo'nøø jam Egipto etjotp, ka'ap ttsø'jkijyi'ñ ja windsøn y'aki, nugo ku ja tpadunguixy ja y'øwyinmaa'ñ ejximdam ja Dios ja jexyiy tyimy'ixy.

²⁸Janchjā'wingøjxps ja Moisés tyiktso'onda'aky ja paški xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyooþi majnk ka'ap ja Dios Teety y'ankilis yik'oogidit sam ja Egipto jaa'y yjajttøø. ²⁹Janchjā'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'øts naþkøjxps; kuts ja egiptit jaa'y nayide'en tjatunwandøø winets ja ñøjøø'kxti niduki'iyi.

³⁰Janchjā'wingøjxpts ojts ja Jericó kajp ja ñawaap kyidagajxy, ku ja israelit jaa'y wixujk xøøw ja kajp tni'awidejttøø. ³¹Jøts nayi janchjā'wingøjxps ja Rahab, ja ka'ødyø'øxyøjk, ojts møøt kya'øøky pøn tkami-madoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajptøjkidi ejxpi koobi.

³²¿Ti jaty ø njaakmadya'akp? Ka'ap ja et ja xøøw ñibaadi ku ø nniimadyaktøkit ja Gedeón, ja Barac, ja Sansón, ja Jefté, ja David, ja Samuel jøts ja jaa'dyi midi y'ijty ja Dios y'aaw y'ayuujk'ajtpy ku ti tñigajpxwa'añ.

³³Janchjā'wingøjxps idø'on yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa jadi'iñi tø t'apanmujkidi ja y'apajk, ³⁴jøts ja møj jøøon nayide'en tø tmimajada'akti, jøts tsujx kumy tø kya'ookti. Jøts tø yjotmøkpøkti pøn kajotmøkti, jøts ja y'awa'ambi midsep tø tmimajada'akti. ³⁵Jam idø'on ja tø'øxyøjk pøn janchjā'wingøjxps ja ñiyaa'y tø t'ejxpaatti jadigojk jujky.

Mayts y'oo'kmidi ayo'on agujky, jade'en idø'on ja ne'egi ttsøktøø jøts ka'ap ja Dios yja' t'ixmajtsidøø ja'agøjxps ku ja t'awejx'atti ja jujky'ajtin xemikøjxps.

³⁶Jøts may nayide'en yikxon tø yiktaxe'ekti jøts tø yikwopti, jøts ja pujkkuwøøñ tø yikpitaajkidi jøts tø yiktsumdi. ³⁷Jøts nayide'en tø tsaaaga'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujxkøjxps tø y'oo'kmidi; jøts ja borreegi'ak jøts ja chiibi'ak yik'ayowim tmiwidejttøø, o sagasa ja ayo'on tpaattøø.

³⁸Ja'abi jaa'y idø'on tø wyidetti abak etjotp, kojpkøjxps, jøts tsaa ankjøtpy, tsaa jutjøtpy. Niwine'en ja naawii'ñit jaa'y ja'abi jaa'y kyapaat'atyiyi. ³⁹Ots idø'on yø øy tsuj

tø yik'ejxti yikpaatti ku janch møj ja yjanchja'win, ka'ap yø ti tø yikmo'odi pøni ti dø'øn ja Dios tø t'uknigajpxy; ⁴⁰ pø tøxi ja ttanibiktaagi kø'øm jawaani øy jøts ja y'øbyidsø'ømdit adøm møøt.

Ja Jesús adøm n'ejxpajt'ajtimp

12 Janch mayts adøm ja jaa'y nnija'wa'andi pøn jaty ja janchja'win tø tmøøt'atti jøts ja tø tñankñigaxi'igyidi. Wants adøm tmajtstuujtna'am tuki'iyi pøni ti jaty xyikjotkøjximp, jøts ja pøky nayide'en nmajtstuujtint midi yjawi xyikpak'amujk-na'amp, jøts yikxon njaakpadungojindit tudā'aky ja øchināa'yin. ² Ja Jesús adøm n'ejxpajt'ajtimp pøn ja janchja'win tyajkp jøts pøn nayide'en tjaakyik'øyip jøts tjaakyiktsujip. Tø ja Jesús jam kruskøjx y'øøky, ots ja yjatsø'øduñ, ja'abi o'jkin ka'ap ja tø tmøøpikta'aky, pø ñija'wipxi ja' ku ja ayo'on ja ttanaxt jøts ja tpaatt ja jotkujk'ajtin ja xondaajkin; jøts ja tø y'ixā'aky yikutujkpi møøt ja Dios Teety jam y'aga'ngyøjø'øm.

³ Paty mee kidi mjotkixy ni mga'amutskidit, ja Jesús meets ja'myats jøts ja xni'ejxu'uttit ku pojkpitumbi kyøjø'øm kawinø'øn tø y'ayo'ombaaty. ⁴ Ka'anim meets ja pøky xmøøtseptuñ jøts xkudaxit. ⁵ ¿Uk tø meets idø'øn ja xja'dyigøøñi sã adøm Dios Teety y'u'ngin xja'ane'emyindi? Pø yide'enxi jap jaabyety nøkyijpxy:

U'nk, kupøk ja ayo'on midi ndaniguejpxy jøts mdsinaa'yin xyiktigatst,

jøts kidi x'ayooji ku me n'ojt.

⁶ Pø tum ja'axi øts ja chinaa'yin tigach ndamidsøjky pøn jaty ø ndsøjky,

jøts ja ayo'on nmø'øy pøn jaty n'u'nk'ajtpy.

⁷ Midani meets idø'øn ja ayo'on, pø ja'agøjpxxi meets ja Dios ja mmø'øyi ku y'u'nk y'unā'jkin mdsøkyidi. ¿Uk jaa dø'øn ja jaa'y pøn nijuuni ja tyeety tø kyakajpxwiji? ⁸ Pøni ka'ats meets ja Dios mgajpxwiji sami dø'øn ja y'unk y'unā'jk ja ttamidsøjky, mga'u'nktejpts meets idø'øn ja', wenk u'nk meets ja mdiyyi. ⁹ Nayide'enxi mutskyi ja ndeety ndaak tø xkajpxwijiindi, jøts adøm ja y'ijty øy tsuj nmigajpxyindi, yayits ja y'ana'amin ja yjatundi naxwiñ. ¿Sudsots adøm idø'øn ja Dios Teety midi jam tsajpjotp ngagupøjkint ja kyajpxwejin? Pø ja jujky'ajtinxi adøm ja xukpaatwā'animp. ¹⁰ Ja'ayi adøm ja ndeety ndaak xakajpxwejiindi pøni sudso dø'øn ja tja'gyukidi ku ja tsinaa'yin tyiyi yā naxwiñ; kuts ja Dios x'ane'emyindi, tiyts ja y'ane'emy, jøts ja' ja xani'ana'amindip sudso ja wā'ats'ajtin nbaajtint nayide'en sam ja'. ¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; pønts ja ayo'on pønts ja kastigi tpattip, ku wyejti kyajti, ja'ats idø'øn ja chinaa'yin tiy tsuj tyikyø'ødyip, ka' ti, ka' sã, ka'ap ja tsep.

Ja ayo'on ku ja Dios kyajpxy kyayikmimadø

¹² Yikmøkpøkti mgø' mdeky pøni tø ja y'anu-u'kxyinidi. ¹³ Ixā'adi ja tiy'ajtindi jøts ja mmigu'uk pøn

ja yjanchja'win kamøktinim mba'ejxyidit jøts ja kyatu-u'tigø'ødyit, jøts ja jade'en ne'egi yjotmøkpøktit.

¹⁴ Øy tsujim ja mdsinaa'yin xyikyø'ødyit, tudā'aky ja jaa'y niduki'iyi møøt mdsøønidit; ku wyinaty jade'en mgajaa'y'atti sudso ja Dios x'ejxtit, pø ka'axi jadi'iñi nugo ñiyik'ixy ñiyikpaaty. ¹⁵ Yikxonim wanidi, ejxim xka'ukpatnidi ja kyunuu'kxin midi ja Dios pya'ay-o'ajtingøjxpx mmo'owajnidip, øy ja jade'en tø yja'uk-wā'añ ku ja mbudøkiyidit; kidim tã'am ujtšin mnabyik-tã'agyidi midi pã'amdump jøts ni xkayiktsokmi ja mmigu'uk. ¹⁶ Kidi nugo mnamyøøt'atyidi pøni ka'adam ja xniyaa'yidi xnidø'øxyidi, tum ja Dios yja' ne'egi mjotmay'attip; kidi Esaújin xundi pøn nugo y'u'nk ttaguyajt ja yjagyøobi, tuktey ja tokx ja'ayi ttagugøø. ¹⁷ Mni-jawidipxi ja nayide'en ku ja Esaú ja tyeety kya'uk-møø'ñiyi ja kunuu'kxin ku ja tja'uk'amidoonaa; øy ja wyinmaa'ñ ja tja'uktayaaxnaa ni sudso ja kya'ukyik-møøñaa ja kunuu'kxin.

¹⁸ Ka'anim meets idø'øn ja Dios myøk'ajtin nayide'en xpaajti sam adøm ndeety'amøj t'ejxti ku ja kojpk Sinai ñitøøwyidity. Ni ja xaachkoots meets xka'ijxñim mā ja anaaw ja widsuk adsø'jkibim wyidity, ¹⁹ jøts nayide'en ka' xmadowdinim ja pujxujx midi yjawi xyiknajtimp ku ja nmado'owint, jøts nika' ja ayuujk tø xmadowdinim janch møk midi dø'øn kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxnidit.

²⁰ Ja'agøjxpx idø'øn ja jade'en ku ja adsø'jkibim ja kutujk yikmøødyi midi wamp: "Pøni pøn yø kojpk tyømpy py-atpy yika'tspa'ookp inet ja', uk yikumba'ookp øyi yja-jiyujki." ²¹ Janch adsø'jkibim idø'øn ja t'ejxti tuki'iyi, ja sã Moisés paat kø'øm wyaañ: "Xjanchyikmi bejpnip øts ya'at et."

²² Ka'ats meets, ja Dios kyunuu'kxy'et jade'en tø xpaatti, jabi jotkujkxi meets ja Dios ja yikjujky'ajtpi y'øy'ajtin tø x'ejxi møøt ja y'ankilis kamachooni ²³ pøn ja Dios twin'øøgunajxtip. Tøts nayide'en xpaatti pøn ja Cristo tø tjanchja'wimyidi pøn ja ñitso'ok'ajtin abaadi awejxnidip. Ja Dios meets idø'øn tø xwingunøjkxidi mi-di dø'øn niduki'iyi ttiidyungøxp, jøts ja øyjaa'y'oo'kpi y'anmija'win midi ja Dios jam møøt chinaañidi, nayide'en meets ja møøt ja winmaa'ñ xyikyø'øñidi.

²⁴ Jøts ja Jesús tø xpatmidi pøn jam Dios Teety wyingu-jkp xkugajpxindip pøn ja ñi'jpy xnitanaa'yindip. Ka' xukpøky'ajtyim ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

²⁵ Paty idø'øn yikxon x'ejxtit jøts ja kyajpxy y'ayuujk xku'oojkidit, pø kuwanixi ja y'ayo'ombaatti pøn jaty ja Dios kyugajpxy tkamimadoodøø. Jawaani kajaats adøm xpaat'ajtint ja ayo'on, pøni ka'ap adøm ja Dios kyajpxy nmadooja'am ku adøm ja tsajpjotp kø'øm xjamigajpxyim. ²⁶ Ojts idø'øn ja møk ujk ñajxy ku ja Dios kyajpxy jam Sinai kojpkøjxpx. Yide'en ixyam ja y'ayuujk wyā'añ jadigojk: "Ku øts wyinaty jadigojk ja ujk nyikmiñ ka'ap ja naajx ja'ayi y'adø'øtst, nayide'enxi ja tsajp y'adøtsmit." ²⁷ Ku dø'øn ja Dios wyā'añ ku tyik'adø'øtst ja'ayi jadigojk tuki'iyi, ja' idø'øn ja tyijpy ku ja tuki'iyi tyikudigø'øty midi jaty jawyeen tø tyik'øyi. Ka'ats ja sã yjattit midi xemikøjxpx ja chinaa'yin tø yik-

tanibiktaagi. ²⁸ Ja'abi øy'ajntins adøm idø'on ja Dios tø xamidsøjkyim, ka'ats idø'on ja nijuuni sã yjatt, xemikøjxp idø'on ja y'ett. Paty adøm ja Dios ngajx-ajkint, jøts øy tsuj nwindso'jka'ant pøni sã dø'on ja pyaät'aty jøts pøni sã dø'on ja ttsøky; ²⁹ pø ja' kuxi adøm ja nDios jade'en yikwindigøy sãmi jøøn.

Sudso tsinaa'yingøjxp ja Dios nwindso'jka'ant

13 Kidim xja'dyigøydi, ejtpim mnachokidit xem yãm Cristo køjxp. ² Kidim xja'dyigøydi, jøts ejtp xtøjkmo'odit pøn jaty mdøjkjotp ja'ttip, pø mayxi jade'en tø yjatti ku ja jabyøø'kxy ja tyikpoo'kxti, ja Diostam idø'on ja y'ankilis ja yikpoo'kxtip øy ja tjagani-jawidi.

³ Nayide'en ja tsumyjaa'y xja'myatstit ejximdam meets jeexyip mdsummy. Ja'myatsti pøn jaty ja chinaa'yin tø tkuwanjatidi jabi mnija'widipxi pøni sã dø'on ja'abi ayo'on.

⁴ Yikxonim x'ejx'ettit m'amajstk'ajtin jøts øy tsuj mnamyøø'tatidit, tyiidumpy ja Dios ja wyinaty pøn jaty namyøø'tatidip jadi'iñi yãm ja tkaniyaa'yi uk tkanidø'øxyi.

⁵ Kidi ja meeñ ni ja pikta'aky nugo mganadyapikmy-o'ojidit; tajotkujk'atti pøni ti jam mmøø'tajttip pø tøxi ja Dios wya'añ: "Nijuuni me ngaja'dyigø'øty, ni nga'ix-matst." ⁶ Paty adøm nwa'anint jotkujk:

"Ja ndeety'ajtim øts idø'on xpudøjkp, ka'ap øts ja ndso'øgit pøni sã xunwa'añ tu'uk ja jaa'y."

⁷ Kidi xja'dyigøydi pøn jaty tø mgajpxwijyidi jøts ja Dios y'ayuujk tø mdukmadøyidi; pawinmaydi sã ja chinaa'yin tø tyikøxti tyikubatti, jøts tundi jade'en sã ja yjanchja'win ja'adi.

⁸ Tu'ugyi dø'on ja Jesucristo y'ity, nay ja' jekyip, nay ja'ats ixyam, nay ja'ats wyinaty xemikøjxp ejtp. ⁹ Paty idø'on xkamibøktit pøni ti jaty abiky jøts tigach mjayik-tukmadoodip. Dios y'øy'ajtingøjpxi ja anmija'win y'øy'aty jøts ka'ap ja ja'agøjxp ku yikpaduñ sudso kya'pxy ja ka'ayin ja uuikin, jabi nijuunixi ya'atpi tsinaa'yin ja øy'ajtin tø tyukpaadyidi pøn jaty ja øy tjanch-jabadundip.

¹⁰ Jawaani øy adøm nwindso'jkin jøts ka' mibaat twindsø'jkin'attit ja møjteetywindsøndi pøn ja møjaa'-gyutujk tyiktundipnim. ¹¹ Ku ja møjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts

ja jam tyiknøtødyi. ¹² Nayide'ents idø'on ja Cristo kø'øm y'ø'jky kajp pa'am jøts ja naxwii'ñit jaa'y ttagunuu'kxy ja kyø'øm ni'jpy. ¹³ Wants t'ixmajtsnandi ja møjaa'gyutujk jøts ja Cristo n'anøjkxandi, øy ja sã njaguwanjajtandi sãm ja yjajty. ¹⁴ Pø ka'axi adøm ya naxwiiñ ja tsinaa'yin xemikøjxp nmøø'tajtyindi, n'ix-a'ayindipnimxi adøm ja' midid dø'on me'emprnim ja'atp-nim. ¹⁵ Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajtin ku ja kyø'øm U'nk ja ndawindsø'jka'ant; jøts nayide'en ja Dios ja n'aa'w ja n'ayuujk ndadaxondaajkint. ¹⁶ Jøts kidi xja'dyigøydi ku ja Dios nayide'en twindsø'jkinjawi ku ja mbikta'aky xem yãm mnadyabudøkiyidi.

¹⁷ Mimadowdi pøn jaty mgajpxwejidip; pø ja'axi dø'on m'anmija'win t'ejx'ejttip jøts ñija'widip ja' ku ja Dios ja wyinaty nay ja' tyamachidi. Pudøkidid jøts jotkujk mmøø'tunidit, kidi ayowim xundi, pø ni meetsxi wyinaty jotkujk mgatsøni.

¹⁸ Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja ndsojkin wya'añ ku ja n'anmija'win wa'ats jade'eñim y'ett. ¹⁹ Tundi may'ajit jøts øts jawaani møk xni'amidoowidit jøts wyinaty nnabyaätkojma'andi tsojk.

Yikyajkp ja kunuu'kxin jøts ja kajpxpoo'kxin

²⁰ Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindso'n'ajtim ja y'o'jkin mdabudøkiyidit jøts øy tsuj mdsøonidit mdanidit jøts ndungøjxindit pøni ti tø xamidsøjkyim. Mutsk borreegi u'ngin adøm idø'on ja nwindso'n'ajtim Jesucristo x'ejx'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'on xkøj'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'ett. Jade'en idø'on ja y'ejxi.

²² Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'on nda'ana'amdip. Winmadowdi waani ya'at ayuujk, øy idø'on yø wine'en kyidyimgya-jaaji. ²³ Nijawidi ku adøm nmigu'uk Timoteo tø pyuxøjktøjkpidsimy; pøni nabyaajtip øø pojin, nmøøtnøjkxp øts ja wyinaty.

²⁴ Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

²⁵ Mbaattip ja Dios kyunuu'kxin niwine'enin jam mdsøonidi. Jade'en idø'on ja yjatt.

SANTIAGO

Ku ja Santiago tnijayi ja israelit jaa'y pøn tø ñawyā'kxniyidi

1 Santiago'ajtp øts. Øts ja Dios Teety, øts ja nwind-søn'ajtim Jesucristo nmidumpy. Ixyam mee nnijayi jøts øts ngajpxpøø'kxy niduki'iyi ja israelit jaa'y pøn jaty tø choondi yā jøts tø ñøjkxti tsinaabyi abiky tsoo.

Ja wijy'ajtin ja nija'win midi ja Dios yajkpy

2 Meets migu'uktøjk, mbaat'ajtip meets ka' ti xku-mayjawidit øy yjadyimyñ o midi ayo'on. **3** Nni-ja'windipts ku ja ayo'on ja myiñ, jade'ents ja Dios x'e-jxint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit. **4** Øy ka'pxy yikxon mwinma'adyit, winets nayide'en yikxon mwimbidsø'ømxiyidit ja m'øwyinmaa'ñ jøts xjagyaptit ja ja'gyukin, kidi mwa'andi jøts ku ti mga'ijtyidi.

5 Jøts pøni jats meets winaagin pøn ka'ejtixidip ja wijy'ajtin, ja ja'gyukin, amidowdits ja Dios jøts ja mmo'o-jidit, pø ja'axi tuki'iyi tyajkjøxp, ka'ap ja ti t'amā'at'aty jøts ka'ap ja ti tyamigajpxy. **6** Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt. **7** Pøni pøn jade'en winmaapy, ka'ap ja Dios ja ti y'ukmø'øñiyit, **8** ja'agøjpx ku ixyam ti t'uktsøky jøts jabom ja wyinmaa'ñ tyiktigatskojmi, ka' tu'ugyi ja wyinmaa'ñ tyik'ity.

9 Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjkk wyaa'dso'oniyidi jøts ja yiknitso'ok'atidit. **10** Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyidit øy myeeñ ja yjagayiktamøj'ejxti. Jabi yiknitso'ogidipts ja Dios ja' ku wyinaty twin-gunøjkxiñidi. **11** Tigøøpy ja kumeeñ jaa'y ja myeeñ ku ayo'on myiñ. Nayide'en ñamyayi yjaty sam ja ujts pijy u'ngin yjaty ku ja xøøw chā'ayiyi jøts ja tyøtskøjxni ja pyijy.

Ku ja ka'øbyi x'amutsk'ejxwā'añindi

12 Janch jotkujk meets ku tuda'aky mjaā'y'atti øy ja ayo'on xjapaatti; ku jade'en mmajada'akti, winets ja mmø'øyidi ja Dios ja jujky'ajtin midi xemikøjpx, midi ja Dios mdamidsojkiyidip, jade'en'ampy ku ja Dios xtsojkti. **13** Ku pøn ñayjawiyi ka'øbyi ttunwā'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt,

jøts nipøn ja jade'en tkawinmaa'nmyø'øy jøts ja jade'en ttu'unt. **14** Ku pøn jade'en ttunwā'añ ja ka'øbyi, kyø'øm winmaa'ñ, kyø'øm tsojkin ja jade'en pyadundip. **15** Yø'øbi ka'øwyinmaa'ñ, pøky yø'; jøts ku ja pøky yikmøøt'aty, ja o'jkin tigø'øyin ja yajkpy.

16 Migu'uktøjk, kidi mnawyin'ññidi; **17** tuki'iyi ja øybi tsujpi midi nmøøt'ajtyindip, Dios yø tyajkp, tøxi ja tpik-tā'aky ja jaj ja tøø'kx jam tsajpwemp. Tu'ugyi ja', ka'ap ja tyigach. **18** Tø ja Dios xmø'øyim ja øy'ajtin midi xemikøjpx ku njanchja'wa'am ja kyajpxy ja y'ayuujk, ja tiiby ja janchpi, ja'agøjpx ja jade'en ttuñ jøts adøm nyiktso'ondak'okwā'anint pøn ja pyabøjkpi'ajttip, sam ja ttamidsøkyin.

Sā yikpaduñ ja Dios yjanchja'win

19 Paty, migu'uktøjk, njaaknigajpxy jøts tuda'aky mjaā'y'attit. Yikxon xmadow'ettit ja mmigu'uk sā wyā'añ, kidi mnay'øøjyidi, jøts kidi mmigu'uk xmi'am-bøkti. **20** Nisudso'ampy idø'on ja Dios xkadajotkujk'ajtyindi ku ja nmigu'uk nmijot'ambijkyindi. **21** Paty mas-tu'utti tuki'iyi midi ka'øy, ja ka'øwyinmaa'ñ jøts ja ka'ødyunk. Møj pikta'akti yikxon ja Dios kyajpxy midi tø myiktukmadøwdi; pø yø'øxi tyanitso'ok'attip ja n'an-mija'windi.

22 Padundi dø'on pøni sā jaty ja Dios kyajpxy wyā'añ, kidi ja'ayi nugo xmadøwdi. Nawyin'øø'nindip nugo ku ka' nbadu'unint. **23** Pøni pøn jade'en adøtsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtpy **24** jøts ku ka' wyā'adsi. Ku ñijky, ka' tjā'myech jøts wyimbujt. **25** Jotkujk idø'on ja ñayjawiyidit pøn ja Dios kyutujk tpaduujnidip midi xyik'awa'atspidsø'ømimp, ka'ap ja ja'ayi nugo tpat-madøy.

26 Pøni mwandip jøts ja Dios yja' xpaduujnidit, jøts nay jaty ja mdoojts nugo xyik'awidetti yam nadyijy ja Dios yja' xpaduujnidit, jade'ents nugo mnawyin'ññidi jøts ka' x'ukpadunidi jade'en. **27** Ja' ja Dios Teety kyupijky ku nbudøjka'ant ja ku'øky'u'nk jøts ja ku'øk-tyø'øxy pøn ayoodip, jøts nayide'en ka' nugo nbøk-tyu'unint yā naxwiñ.

Ka'ap pøn ñay'øy'ejxidit kyanay'øy'ejxidit wan tjaøni

2 Meets migu'uktøjkti, pøn jaty tjanchja'widip ja nwindson'ajtim Jesucristo ku ja wā'adsu ku ja myøji, kidi meets pøn x'øy'ejxti xka'øy'ejxti wan tjaøni. **2** N'ukpiktaajkimp tu'uk ja madyā'aky, pøni tøjkidip ja jaa'y jap mā meets mnamyukyidi, tu'uk kumeeñ jaa'y janch xyøxy janch wyeti janch ñaamyi,

jøts jadu'uk ayoobi jaa'y nipach ixpach, ³ jøts ku ja'ayi øy tsuj xkajpxpoo'kxti, ja' pøn janch kumeeñ pøn janch xyøxy, jøts ja øybi tsinaabyajt xmo'odi, jøts ja ayoobi xkamøjpikta'akti jade'en xnøjmidi jøts wan ttani uk najxkijxy chøønit, ⁴ pø yide'en'ampxyi yik'ixy yiknijawi ku tu'uk x'øyjawi jøts jadu'uk xka'øyjawi. Ka'ap jade'en y'øyi, mbøkyundip jade'en.

⁵ Ukmadøwdi, migu'uktøjk, jøts ja'gyukidi ya'at: Ja ayooobi jaa'y pøn ejttip ya naxwiiñ, ja' idø'on ja Dios Teety tø wy'iixyidi jøts ja tjanchjavidit ja Dios yja' jøts yikmo'odit ja y'øy'ajtin midi ja Dios ja yjaa'y tyanitanaapy, pø tøxi ja ttamidsøky jøts ja tmo'ot pøn tsojkiyip. ⁶ Jøts meets, jade'en meets ja ayoobi jaa'y nugo xtsø'ødyundi ku xkamø'ejxti. Nayide'en meets ja kumeeñ jaa'y mjatu'umiyidi ku myikni'øø'nidi jam kudunk wyindump. ⁷ Yø' nayide'en tka'ødyejtip tka'øñimadyaktip ja nwindson'ajtim Jesus pøn adøm xyiknitso'ok'ajtidip.

⁸ M'øy'adøtsp meets wyinaty pøni mbadundip ja Dios Teety y'ana'amin midi yide'en wamp: "Tsok ja mmigu'uktøjk, windsø'øgi ja mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi jøts sa kø'øm mnawyindsø'øgiyi." ⁹ Pøni jamts meets ja mmigu'uktøjk x'øy'ejxti xka'øy'ejxti wan tjapøni, mbøkyundipts idø'on jade'en, ka'ap ja Dios y'ana'amin jade'en xpaduujnidi. ¹⁰ Øy ja Dios kyutujk ka'pxy njabadunwa'añindi jøts jam tu'uk y'ana'amin kyayikpaduñ, pøkyu'unindipts adøm idø'on ku ka' ka'pxy yikpaduñ. ¹¹ Nay ja' midi tyikutujk, jøts yide'en ñiimy: "Kidi mmigu'uk ñiyaa'y ñidø'øxy xpøjxki", nay ya'at tyikutujkmaa jøts: "Kidi myikjaa'y'øøky." Øy pøn ja myigu'uk ñidø'øxy ja tjagapøjxki jøts ja ne'egi yikjaa'y'øøky, pøkyumppts ja jade'en ku ja Dios yja' ka'pxy tø tkabaduujni. ¹² Øy yixxon ngajpxint ndu'unint sam ja Dios ttsøky, jabi nay ja'abi kutujkxi xiidyu'unimp midi ja nitso'ok'ajtin nayide'en tyajkp. ¹³ Pøni pønts ja myigu'uk tø tka'ayo'ixy, nayide'ents ja Dios ja nøjkk ka'ayo'ijxyim tyiidyuñiyi; pønts ja myigu'uk t'ayo'ejxp, pyaaptpts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, zti ja ñiwyā'ant ku ja'ayi nwa'añim ku ja Dios njanchja'wa'am jøts nika'ap ja øybi n'ukpadu'una'am? Ka'ap jade'en ja nitso'ok'ajtin nbaajtint. ¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet, ¹⁶ jøts nnimaa'yint: "Mbaatp ja mwet ja mnaamy ja mjiñ'kxy", jøts ka' ti nmø'øyint pøni ti yjatsøjkpy. zTi ja ñiwyā'ant jade'en? ¹⁷ Ku ja Dios njanchja'wa'am jøts nika'ap ja nmigu'uk n'ukpudøjkiña'am, ka'ap ja janchja'win jade'en tyuñ.

¹⁸ Jamts pøn jawamp: "Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawi, nbudøjkip øts ja nmigu'uk." Jade'en'ampyts idø'on ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi. ¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjanchjawi ku

jaa ja Dios, kyudsø'jkipts ja'. ²⁰ Kidi nugo mgujuun'aty, zka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant? ²¹ Jade'en'ampy ja n'apteety'amøj Abraham ja Dios kyupøjki ku ja tpadu-uñ sam ja Dios ttsøkyin jøts ja y'u'nk Isaac ttamiyoxt. ²² Ja'gyukidi meets jade'en jøts ku ja Abraham jade'en tnanky'ijxyi ja yjanchja'win ku jade'en tpaduuiñ, jøts jade'en ttuk'abaaty ka'pxy ja yjanchja'win. ²³ Y'abaajt idø'on jade'en ja Dios kyajpxy ku wyā'añ: "Ojts ja Abraham tjanchjawi ja Dios, ja'ats ja Dios y'øyja'wiyiñ jøts ja ojts tkupiky." Paty ja Dios myigu'ukjawi yi ja Abraham.

²⁴ M'ejxtip mnija'widip ixja sa ja Dios tkupiky ja jaa'y ku ja tpaduñ, jøts ni kidi ja'ayip tu'ugyi sam ja yjanchjawi. ²⁵ Nayide'en ja ka'ødyø'øxy Rahab ja Dios kyupøjkøø jade'engøjxp ku ja t'ødyuuñ ja Dios kyugajpxy; ku tjønmoøy ttøjkmøøy jøts abiky tyuu' ttajøpkajxiyiñ ku ja myidsep wyinaty pyayø'øyi. ²⁶ Ka'ap jade'en tyuñ ku ja Dios njanchja'wint ku ngabadu'unint sam ja ttsøkyin. Jade'en ja tpaaty sam ja jaa'y'øøgyin, ka'ap ja ñine'kx tyuñ ku y'anmija'win kya'uk'ejtni.

Sam nugo yø toojts yiktakajpxy

3 Meets migu'uktøjk, ka' pyaāt'aty jøts mee ni-duki'iyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yiktabayø'ødyit ku ja ka'pxy tkabadu'undit. ² Tum jade'en ja tundigø'øyin yikjagyepy; winaaagin ja' pøn katundigø'ødyip kakajpxigø'ødyip, ja' idø'on janch'øy jaa'y ku ja tpaduñ ku ja ñay'ejx'ityiyi. ³ Jade'en'ampyts ja kawaay kyajpxy kyupiky ku ja axots tmøø'taty y'aawjotpy midi yikwa'k'øyip, øy midi'ampy nduknøjxint. ⁴ Ku n'ukwinma'ayint nayide'en sam tu'uk ja barki yø'øy; øy janch jamøj ja' jøts ja poj ja wyetsmiñi wyetsxøpyi, mutskts ja pujxu'nk midi ja jaa'y yikyø'øpy, jøts ja tyikyø'øy pøni mā ja ttsøky. ⁵ Nayide'en yø toojts; win'ii'nxyip ja' midi xyikajpxigø'øyimp. Jade'en yø' kidim ja jøøn tyøøbyikyin jøts ja tyøømyøji, jøts ja et tyøøyi. ⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp. ⁷ Yikyujpy ja jaa'y o midi jiyujk, wan tjooni wan tsaā'ñi jøts ja' midi tsinaadyip mejyotp. ⁸ Ka' pøn mibaat jade'en ja toojts tmi-mada'aky, tundigøøpy yø nugo. ⁹ Nayi toojts xyikajpximp ku ja Dios nja'myejxim n'ajot'ajtyim, nayø'øts ja nmigu'uktøjk xukmigajpxigø'øyimp, Diosts jade'en ñamyayi nmigajpxigø'øyimp ja y'agojnajxy midi kø'øm tø tpikta'aky. ¹⁰ Nayi aawjotpy pyidsimy ja øgyajpxy tsujkajpxy, jøts nay jaayi pyidsimy ja axøøka-jpxy. Migu'uktøjk, ka'ats idø'on jade'en yjapaat'aty. ¹¹ Ku n'uk'ejxint mā ja wa'ats nøø pyidsimy, tu'ugyixi ja wyā'atsnøø'aty, ka'ap jam ja tyā'mtspi, ka'ap jam ja pyā'akpi. ¹² Migu'uktøjk, z'm'uk'a'ejxip meets tyøømit jam iigi kipkyøjxp ja wenk tsa'am? Ka'axi mibaat nayide'en ja nøø pyidsimy jam nøømu'utjotp ja tyā'mtspi ja pyā'akpi.

Ja ja'gyukin midi ja Dios yajkpy

¹³ Pøni jap pøn tñimadø y tñijawī, wan tñanky'ijxyi sã ja y'øy'ajtin ja y'øyjã'y'ajtin, wan jade'en ja ja'gyukin tyiktuñ jøts ka' ñamyikaxit. ¹⁴ Pøni ja meets ti mnadyami'amã'at'atyidi ku nugo kø'øm jade'en xwin-mãã'ñ'atti, ka' ja ja'gyukin jade'en xnanky'ijxyidi, tãay yø jade'en pyidsimy. ¹⁵ Ka'ap ja Dios jade'en xukni-ja'wim jøts jade'en n'adøøtsint, ja' jade'en adøøtstip pøn ka'øyjã'dyi ku ja miku' jade'en tyuktuñidi. ¹⁶ Mã y'ity ja windi'iñ'ajtin jøts ja nadyami'amã'at'ati, nay jam y'ity ja tsep jøts o ti axøøk'ajtin. ¹⁷ Pøn ja ja'gyukin ja Dios møøjyip, ja'ats øyjaã'y'ajttip, wã'ats chinaã'yin ja tyiknaxti; ka'ap cheptundi chepkajpxti, myøøt'ajttip ja tudã'aky'ajtin jøts ja ja'gyukin. Tsaach'ejxtip jøts ja øy'ajtin ttundi; ja myøkwinnmãã'ñ pyadundi, ka' twin-daay'atti ja wyinnmãã'ñ. ¹⁸ Pøn tjã'gyukip tkajpxkukip, ja'ats ja øy'ajtin ttukpatp ja myigu'uk.

Ka' nminamyãay'int ja ka'øy'ajtin midi ja ñaxwiiñ

4 ¿Mã chøøñ ja tsep ja aka midi mdundip? Kø'ømyi xyiktso'ondã'akti ku ti mnadyami'amã'at'atyidi. ² M'animp y m'adsøjkpy pøni ti mmigu'uk myøøt'ajtpy, kuts ja xkapaãtti winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktsowdi midi mdsojktip. ³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwã'andi nugo mã ka' pyãat'aty. ⁴ ¿Meets mga'øwyinmaadyip! ¿Ti kidi meets xnijawī ku øy møøt nnayja'win ja' midi ja Dios kyatsøjkpy, jade'en'ampyts idø'øn adøm ja Dios nmidsepøjkna'am jøts nga'uk-ja'myajtsna'am? ⁵ Yide'en jap nøyijxpy wyã'ãñ: "Øy xtsojk'anaxyim ja Espiritu Santo midi ja Dios xukmi'e-jtimp jøts ka' t'øyjãwi ku wenkpi nbadu'unint." ⁶ Dios ne'egi xmay'ajtimp xpudøjkimp sãm ja kyajpxy ja y'ayuuik yide'en wyã'ãñ: "Myi'ambijxpy ja Dios pøn namyøjpiktaajkiyip; pønts tudã'aky'ajtp øy'ajtp, pudøjkiyipts ja Dios ja'." ⁷ Amumjoojt mnadyamiyoxidit ja Dios. Møk windanidi ja miku' jøts mniwã'adsiyidit. ⁸ Wingunøjkxidi ja Dios jøts ja ne'egi mnimeniyidit. Yik-wã'atsti ja mbøky, meets, ku nugo ja Dios majtsk'ãaw majtskjoojt xtsokti, ku xpadundi nayide'en ja ka'øybi. ⁹ Jotmay'ookti, taya'ãxti ja mbøky. Kidi jotkujk mnay-jãwiyidi ku tø mbøkyundi. Yikmendi ja mwinmãã'ñ jøts xjagyaptit ja jotmay. ¹⁰ Nabyikta'ãgidi yik'ayowim nwindson'ajtim wyingujkp, jade'ents ja ñitso'ok'ajtin ja møj mmo'ojidit.

Ka' nugo nbayø'øyint ja nmøøtjanchja'wibi

¹¹ Meets migu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myigu'uk jade'en tøyky'ejxp, ja Dios ja kyutujk ja jade'en wyind-sojip mã wyã'ãñ jøts ku ja nmigu'uk ndsojkint, tiddyumbits ja ne'egi nugo ñabyikta'ãgyi jøts ni tk-abaduñ kø'øm ja kutujk. ¹² Tu'ugyi ja' pøn ja kutujk tmøøt'ajtp, nay ja'ats xpayø'øyimp, ja'ats nayide'en

xyiknitso'ok'ajtimp, nay ja' xyikwindigø'øyimp. ¿Mbøn mets ku xpøkpyayø'øwyã'ãñ ja mmigu'uk?

Ka' yiknijawī pøni ti memp jabom wixøjkp

¹³ Ukmadowdi meets sã x'ukwinmaydi: "Jabom wixøjkp njãã'mint abikyajp jøts jam tukjumøjt n'ejtint. Najxint ndøjka'ant, jamts ja meeñ jade'en nbaajtint", ¹⁴ nipøn tkanijawī pøni ti memp kidãkp jabom wixøjkp. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tø tyigøøgyojmi. ¹⁵ Yide'en ne'egi mwã'ãndit: "Pøni xpudøjkimp ja Dios, winets jade'en ndu'unint pøni ti jaty ndunwã'ãñimp." ¹⁶ Meets ja mgø'øm winmãã'ñ mee myiktunwampy jøts ja namyikaxi; ka'øyts idø'øn yø jade'en pyidsimy. ¹⁷ Pøn wã'ats tjanija'wip jøts ja ka'pxy tkabaduñ, pøk-tyundipts ja jade'en ne'egi.

Sã ja kumeeñ jãay yikajpxwejtī

5 ¿Madowdi meets kumeeñ jãay! Mdayã'axtip ja mwinmãã'ñ ku ja ayo'on xpaãttit x'ejxtit. ² Tuki'iyi ja mjujky'ajtin jadi'iñi pyutskøjxnit jøts ja m'øybi wet ja m'øybi nãamy ja kipkyaa'tspi jadi'iñi tyikwindigø'øty. ³ Towigyøjxp ja oori ja plãti midi mmøøt'ajttip, jade'ents idø'øn m'ukyik'ejxtit m'ukyiknijawidit ku møøt mwindigø'ødyit ja mbikta'ãky. Tøxi ja mgumeeñ'ajtin øy xpaãtti, wingompxi ku ja tiddyunin mye'ent. ⁴ Ja kãmdumbi pøn tø xkamijjuudyi, ja' myik-tabayø'ødyip. Wã'ats ja nwindson'ajtim ja t'ixy tñijawī ku ja mdumbi jade'en xkamijjuudyi. ⁵ O meets yã ñaxwiiñ jotkujk xyiknaxti, o ti kø'øm tø mnadya-may'atyidi, wingompts ja xøøw ku ja tiddyunin mye'ent. ⁶ Tø ja xmidundigøydi pøn ti tkatump pøn ti tkanija'wip, jade'en idø'øn ku nugo tø xpayø'ødyi jøts xyik'ookti ku ka'ap ja møk'ajtin tjagyapti.

Ja tudã'aky'ajtin jøts ja dios'ajot'ajtin

⁷ Meets migu'uktøjk awejxti tudã'aky, kunim ø nwindson'ajtim mye'ent, nayide'en sãm ja kãmdumbi tudã'aky t'awixy ja tuu jøts ja pyikta'aky tøykmukt. ⁸ Nayide'ents meets x'awejxti tudã'aky, kidi nugo mjotigøydi, wingomp jøts mye'ent ja nwindson'ajtim Jesucristo. ⁹ Meets migu'uktøjkiti, kidi nugo mnagya-jpxyidi mnay'øyjidi jøts ka' myikpayø'ødyit; wingompxi ja Dios pøn ja ñaxwiiñit jãay tiddyunidip. ¹⁰ Migu'uk-tøjkiti, windanidi ja m'ayo'on nayide'en sãm ja Dios Teety kyugajpxy twindanaay ja yja'. ¹¹ Jotkujk ja'adi pøn tø tyiknaxti amumjoojt ja y'ayo'on. Pø tøyi xnijawidi sãm ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, tiy'ajtin mgajpxtip. Kidi nugo xuk'ejxti ja Dios ku nwã'ãnint "Tiy ja'", tiy'ajtints ja'; kuts nwã'ãnint "Ka'ap ja tyiy'ajtin", tyimwyã'ãnimpts jade'en ku ka'ap tyiy'ajtin, ka'ats ja Dios jade'en xpayø'øyint.

¹³ Pøni jam pøn y'ayø ywinmay, wan ja Dios t'a-jot'aty. Pøni pønts agujk jotkujk tyiknajxp, wants ja

t'øwdi ja kunuu'kxy ayuujk. ¹⁴ Pøni pøn pøjkip, wants ja twaadsøy ja møjaa'dyøjk pøn tundip tsaptøjkjotp, jøts ja kyugajpxidit jøts aceite tpiktā'aktit nwindson'ajtim køjxp. ¹⁵ Ku amumdu'uk t'ajot'attit ja nwindson'ajtim, tso'okpts ja pamaa'y. Pøni tø tyundigøy, yikpojkipi-maa'kxpts ja'. ¹⁶ Paty nayide'en mnadyamimayatsidit ja mbojkpi nidu'uk ja nidu'uk, jøts ajot'atti ja Dios pøni pøn pøjkip jøts cho'okt. Pøn øyjaa'y'ajtp jøts amumjoojt ja Dios t'amido'ot tpøktso'ot, jade'ents ja Dios myøk'ajtin myajada'akt. ¹⁷ Ja Dios kyugajpxy pøn

txøøw'ajit Elias nayide'en ja y'ijty sam adømin; ku ja Dios ja t'amidøøy jøts kyatu'ut, winets ja tuu kya'uk-menaa tigøøk jumøjt jagujkp. ¹⁸ Jøts ku jadigojk t'ajot'ajty ja Dios jøts tyu'ut, xjats myiiñ ja tuu jadigojk xjats ja piktā'aky y'øyiyiiñ.

¹⁹ Migu'uktøjkti, pøni jaa pøn tka'ukpaduni sam jawy-
een tø t'ukpaduñ, jats ja' pøn ja nayide'en tuk-
paduniyip, ²⁰ mnijawidipts nayide'en ku tø tyiknit-
so'ok'aty ja mmigu'uk y'anmija'win jøts yikmaa'kxtit ja
pyøky.

1 PEDRO

Ku ja Pedro tñijayi ja janchja'wibitøj k pøn tø ñawya'kxniyidi

1 Øts idø'øn Pedro nxøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjxkti jam Ponto, jam Galacia, jam Capadocia, jam Asia jøts Bitinia. ² Tøyip meets ja Dios Teety mwi'ejxniyi jøts ku meets ja m'u'nk'atyyit sayim ja tñiwimma'ayiyiñ. Yø Espiritu Santo meets ja mdabudøjkiyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømxi nbøky ja xkubajta'am ku ja chuuñ tyajxy. Dios mjanchkunu'kxidip jøts øy tsuj xyiknaxtit.

Ja tsinaa'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'oyindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bijkyindi jøts ja xukjøp'ijxyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp.

⁴ Paty tu'ugyi njøp'ejxin jøts ku ja Dios ja myaay xmø'oyim, pø tøxi ja t'a'ejxi jap tsajpjøtpy pøni ti ja xmøøwya'animp midi tum øy, midi nisä kajajtp. ⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiyi kunim meets ja jujky'ajtin xtyimbyaatt midi xemikøjxp, jøts jaanim ja tñanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaaðidi yø'øbi winmaa'ñ.

⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'øty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajada'kixy ja ayo'on pøni sã ndyimyjagujajta'am ja øwyinmaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagyøxtit ja ay-o'on, ja'ats mee myiktagupøkp, nay ja'ats mee myik-tawindsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgyit.

⁸ Mwampy mdsøjky meets ja nwindson'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin, ⁹ jøts ku xni-jawidi ku ñitso'ok'atti ja m'anmija'windi xemikøjxp;

jats idø'øn m'ajot'ajtin tyundi, jade'en idø'øn ja wyin-gaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tñigajpxti jøts ku meets Dios y'øy'ajtingøjxp mmo'owa'añiyim yø yjade'embi. ¹¹ Ja Espiritu Santo midi ja Cristo tkajxp, ja' ja kugajpxy ttukmadoojidøø sã jaty ja Cristo yiknitsokpi wyinaty yjatwa'añ ku ja y'ayo'ombaaatt, jøts sã nayide'en yik-windsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatyimy'ukme'ent ku ja Espiritu Santo ja jade'en tyukmadøyidi. ¹² Ku ja Espiritu Santo ja jade'en tyukmadøyidi jøts ku ja ka' tpaattit t'ejxtit midi wyinaty ttunwajni, adømniimts inet ja ixyam nbaajtyim n'i-jxyim jøts ja myiktukmadowdi ja nitsoojkin ayuujk nayide'en sã jaty ja Espiritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paaat ja tjantyimy'ejxwa'andi tjantyimñi-jawiwya'andi sudso'ampy adøm nnitso'ok'ajtyindi.

Xwaadso'ojimp ja Dios jøts ja ndsinaa'yin wa'ats tsuj nyiknajxint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaa'yin øy xyikyø'ødyit. Amumjoojt meets ja Dios y'øy'ajtin ja kyunuu'kxin xjøp'ejxidit midi ja yakwampy ku nwindson'ajtim Jesucristo mye'ent jadigojk. ¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uktsinaañidi sã y'ijty mga'øchøonidi ku Dios wyinaty ka'anim xpabøjkidi ja yja'. ¹⁵ Øy tsuj mjaa'y'at-tit jøts jade'en x'aduunaxtit ja Dios Teety wyaa'ats'ajtin y'øy'ajtin, pøn idø'øn tø mwi'ijxyidi; ¹⁶ pø yide'enxi jap nøkyijxpy wyaa'añ: "Øy tsuj mjaa'y'attit sam øtsin, kumi ka' ø nbøkmyøødi."

¹⁷ Pøni mdeetyja'wip meets ja Dios Teety, windsø'øgip meets idø'øn ja ejtp, pø ja'axi ka'pxy tiidyu'ump sã pønjabøn ja chinaa'yin tyikyø'øy, ka' pøn ja tiidyu'unin tkapaatt. ¹⁸ Jabi ja Dios Teety meets tø mduknitso'ok'atyidi ja ka'øchinaa'yin midi adøm ja n'apteety'amøj tø tpamendi tpabatti; mñija'widipts wa'ats jøts kidi oorip plätip ja yiktaguyajkip, windigøy'ejtpxi yø'. ¹⁹ Ja' ja yiktaguyakiyñiñ ku ja nwindson'ajtim jade'en wyidsuun wyidajxy, øy ja ñiti pøky tjagamøødi sam ja borreeg'u'nk y'ijty yik-tamyøxy ja Dios Teety. ²⁰ Windi'ixyip ja tanibiktaagi y'ejtni, namga'anin ja naqxwii'ñit cho'ondaqy, xjats ja yamnim tø myiñ ku kyøjxwa'añ ja naqxwii'ñit jøts ja xa'ødyøkidit ma ja Dios Teety. ²¹ Ja nwind-

søn'ajtimgøjxp meets ja Dios Teety xpabiky midi tø tyikjujkyjy jade'en'ampy ja tø tmø'øy ja myøk'ajtin, ja kyutujk, jøts ja njanchja'win amumjoojt, jøts tu'ugyi njøp'ejx'eitin ja Dios.

²² Jade'ents ja m'anmija'win wā'ats y'etti ku ja Dios tyiy'ajtin xmiimadojidi midi ja Espiritu Santo xukni-ja'windip. Jade'en'ampyts mnabya'ayowidit, tsokti, wā'andi ja mmigu'uk sā Dios ttsøkyin. ²³ Jade'en idø'øn tpaaty, tø meets jadigojk mga'axigach, ka' meets ja ñamyayi x'ukteety'ajtni ja jāa'y midi oo'ktip tigøødyip, ja Dios meets ja kyajpxy tø myikjujky'atigachidi midi nijjuuni sā kajajtp. ²⁴ Kumi nømp ja':

Jade'en idø'øn naxwii'ñit jāa'dyi sām o ti ujtsin, jøts ja tyunk jade'en sām ujtspijy midi ja tyikni-gaxø'kp.

Paty tuki'iyi wyindigøy, ti ti uktaamp ku ujts tyi'ich, pø nayide'enxi ja pyijy wyindigøy;

²⁵ Jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2 Paty x'ixmatstit tuki'iyi ja mga'ødyu'unindi, ja mga'øwyinmā'andyi, wine'en mwin'øø'ndi, wine'en o ti mnadyawindaay'atyidi, wine'en x'a-mā'at'atti, xka'ødyejti, xka'øbyikta'akti pøngapøn. ² Nayide'en sām tu'uk ja māxu'nk ñamgaxi'iky jøts ja chetsk tsojk mābaadyim tpaatwā'añ, jade'ents meets idø'øn xtsoktit ja Dios kyajpxy y'ayuujk, midi øy midi wā'ats, jøts jade'en ja mjanchja'win myiweni'adø'tstit, jøts ja nitso'ok'ajtin xpaattit, ³ pøni tødām idø'øn xjanchnijawidi ku ja nwindson'ajtim yja' y'øyi.

Ja Cristo dø'øn ja xemikøjxpit jujky'ajtin tyajkp

⁴ Mbaattip m'ejxtip ja nwindson'ajtim Jesús, yø' xyikjujky'ajtim xemikøjxp, jade'en ja myøk'ajtin tjagyepy ejxim tu'uk ja jønts tsāajin. Jats may pøn tkat-sojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsāa twi'ixy midi yiktun-wampy. ⁵ Nayide'en meets sām ja pojtspi ja øybi tsāa twi'ixy midi yiktumpy ku tsāptøjk tyik'øyi. Jade'ents meets ja Dios Teety myiktunwā'āñiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbiktā'aky xamiyoxtit, ja' idø'øn ja jade'en mdawindsø'øgidip, jøts ja Dios Teety xkupøjkidit ku jade'en ndu'unidit Jesucristo køjxp. ⁶ Paty ja Dios kyajpxy wyā'añ:

Nbiktakpy øts jam Sion jade'en tu'uk ja ejxpajt ejxim ja tsāa mā pøch cho'onda'aky, tu'ugyits ja yikpa'ext jade'en;

pøn ja tpadump jade'en, ka'ap ja wyinguwopi yjöpku-wopi, pyaatp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknit-so'ok'ajtim; pønts tkamøjpiktakp, pøn tkajanchja'wip jatyi, jatpts idø'øn ja yide'en sām ja Dios kyajpxy wyā'añ:

Ja tsāa midi ja pojtspi kya'a'ejxip tyiktunwā'añ, ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wyā'añ:

Jade'en yø', ejxim tu'uk ja tsāa midi ja jāa'y tyagi-dāapy.

Jade'en yø yjatti wyinguwopidi yjöpkuwopidi ku tk-abadundi ja øy ayuujk midi ñigajpxy ja nwindson'ajtim yja'; jade'en ja Dios tø ttanibiktaagi jøts jade'en yjattit.

Pøn ja Dios ja'ajtiydip

⁹ Tum ja' meets pøn ja Dios tø wyi'ijxyidi, meets mmi-dumpy ja nwindson'ajtim Jesucristo yja', jade'ents meets wā'ats mjāa'y'atti jøts tu'ugyi ja Dios mja'atyidi pøn ñiwindson'ajtpy ja tsajpjotpit jøts naxwii'ñit, ja'agøjxp jade'en tø myikwi'ejxti jøts xkajpxwā'kxtit xkajpxyø'ødyit sā ja Dios janch øy janch møj. Nay ja'ats ojtø øy tsuj myikujajtaajkidi myikudø'kxāajkidi ku y'ijty m'etti agootstujpy. ¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyi, mba'ayojidipts ja Dios ixyam.

Yikxon xpadu'undit ja Dios

¹¹ Meets migu'uktøjk, tøg'ayø'øbyi adøm n'ijtyindi yā, tsajpjøtpy adøm ngugajp'ajtyindi xemikøjxp paty mee møk nminuu'kxā'aky, kidi xyikmajada'akti ja ka'øy-jāa'y'ajtin midi tmimada'akwamp winjaa windsojk ja anmija'win. ¹² Jagyapti ja tudā'aky'ajtin ja øyjaa'y'ajtin mā pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'e-jxti ku tnijawidi ku tsuj mjāa'y'atti winets ja Dios ja twindsø'øgididi twinjawidi jøts jade'en ja nitso'ok'ajtin tpaattit ku wyinaty ja tiidyu'unin xøøw yja'aty.

¹³ Ja nwindson'ajtim Jesús køjxp xkupøktit xmi-mado'odit ja kudunktøjk jøts ja møj windsøn, ¹⁴ jøts ja tyumbi nayide'en midi tpayø'øpy ja tundigøøbyidi ja kajpxigøøbyidi, midi'its øyjaa'y'ajttip tudā'akyjaa'y'ajttip, ja'ats y'øyja'wip. ¹⁵ Jade'ents ttsøky ja Dios jøts øy tsuj mjāa'y'attit jøts jade'en xyik'amo'ondit pøn nugo agubojidip, pøn tkanija'widip.

¹⁶ Tø meets ja øy'ajtin myikmøøñidi, jøts ka' ti nugo ajawī mmimajada'agidit. Ka' mwā'andit jøts øy sagasā m'adøøtsnidit ku ja øy'ajtin tø xpaatti. Ja' tu'ugyi mbadu'undip midi ja Dios ñi'ane'empy. ¹⁷ Windsø'øgididi winjawidi niduki'iyi sām pyaat'atyiin. Tsokti ja mmigu'uktøjkidi pøn nay ja'abi janchja'win pyadundip midi meets, windsø'øgididi winjawidi ja Dios, jøts nayide'en ja windsøndøjk kudunktøjk.

Ja ejxpajt midi ja Cristo tø xmø'øyim ku y'ayo'ombaaty

¹⁸ Tumbitøjkidi, kajpxyupøjkøjxti niti jot'aka ja mwindsøndi, wan tja'awā'anidi tka'awā'anidi, wan ja tja'gyukidi tkaja'gyukidi. ¹⁹ Jabi øyxi ja' ku ja Dios tuki'iyi xamijawidit ja m'ayo'on ku myikjemandit myiktedundi niti pøkyøjxp, paty ja amgujk jotkujk xmi-danidit. ²⁰ Ku meets xku'ayo'ombaatit o ti o mā øy tsuj tø xkayik'øyi, zti øy'ajtin meets idø'øn mdsaa-ch-paatp? Kuts meets øy tø mjatun jøts kuwāñim myik'ayo-ombāadyidi pøn m'ana'amidip, yā'at idø'øn ja Dios y'øyja'wip ku meets tudā'agyi xkupiky'aty ja ayo'on.

²¹ Paty meets ja Dios tō mwaadsøyidi, jabi tōxi Cristo y'ejxpajt tyiktañ ku y'ayo'ombaaty niti akikōjxp jōts meets ja xpadu'undit jade'en. ²² Niti pōky ja tkatuñ, niwindem xōow ja jaa'y ja tkawindaay'ajty; ²³ ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pōn jade'en tuu-jnidip. Dios Teety ja ne'egi tyanipijky ja ka'pxy tiidyunk. ²⁴ Kō'om idō'on ja Cristo adōm ja nbōky tuki'iyi tku'o'jkigyijxy jam kruskōjxp, jōts ka'ap adōm nyikmōj'ajtint ja nbōky jōts jade'en øy tiy ja ndsi-naa'yin nyiknaxint. Pyaajt ja tsaachi'ajtin ja', jōts adōm jade'en nnitsoojkindit. ²⁵ Jabi jade'enxi y'ijty sam ja borreegi tyigōyin, tōts meets jadigojk xniwimbity ja nwindson'ajtim Jesucristo pōn m'ejx'ejtidi jōts pōn ttunk'ajtp ja m'anmija'windi.

Sa dō'on pyaāt'aty chōonidit ja amajtsk jaa'y

3 Jade'en meets tō'oxyōjkti, kajpxkyupōkti ja mgō'omniyaa'dyi jōts xuk'ejxtit xuknijawidit ja tiy'ajtin ku meets ja mjaā'y'ajtin tuda'aky xyiknaxy. Jats idō'on winaagin ja yaa'dyōjkti pōn tkagupōjktipnim ja øgyajpxy ja ømyadya'aky, ja'ayi meets ja jade'en xukupōktit mjaā'y'ajtingōjxp, niti kajpxy niti madya'aky. ³ Jōts ka'ap meets ja mdsuj'ajtin xmijatt xmi'ookt midi ja'ayi nikijxy kaxō'kp ku tum ja oori, tum ja wimbatjaaxy wimbatwōōky, jōts tum ja tsowibi wet xjotmay'attit. ⁴ Jabi wa' tsuj'ajtinxi meets idō'on ne'egi myiktu'ump midi m'am mjoojtp yik'øyjaa'y'ajtp, ja'abi midi kawindigōōpy. Janch øy ñaxy idō'on ja jam Dios wyingujkp. ⁵ Jade'ents idō'on y'ijtyip ñajxmi ja tō'oxyōjkti pōn ja Dios yja' tpadundip ku ja nayide'en tmōōt'ajtti ja tuda'aky chinaa'yin. Yjanchja'widip idō'on ja Dios ja y'ijty jōts ja ñiyaa'y tuki'iyi tka-jpxkyupōjkidi nayide'en. ⁶ Jade'ents idō'on ja Sara yjaa'y'ajty, tuki'iyi tkajpxkyupōjkijxy ja ñiyaa'y Abraham, jade'en ja tpikta'aky sam tu'uk mōj øy windsōn. Pōni øy meets mjaā'y'aty, nayide'ents meets idō'on xu'unt sam ja Sara tō tjōptuni jōts jade'en ja mniyaa'y xkatsō'ogidit.

⁷ Nayide'en meets yaa'dyōjkmī, ja'gyukidi ja mnidō'ōxyti, windsō'ogidi sam ja pyaāt'atyidi. Kidi meets ja xamōj'aty ku ja nayide'en kyamōkidi sa meets, jabi nay ja'abi øchinaa'yinxi dō'on ja Dios tō myō'øyidi midi meets tō xpaaty y'øy'ajtingōjxp. Tundi jade'en, jōts ka'ap ja Dios mgamo'ojidit midi jaty m'amidoodip mbōktsoodip.

Ku ja øy'ajtin yiku'ayo'ombaadi

⁸ Jade'ents idō'on xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jōts xyiknigaxō'ōktit jade'en ja mduda'aky'ajtin. ⁹ Kidi meets ja kya'øybi nayide'en xyikwimbity jōts ja mmigu'uk xuk'ayojiwya'andi ja ka'øgyajpxy ja ka'øy'ayuujk. Ni'amidowip meets idō'on ja ne'egi ja kyunuu'kxin, pō ja'axi adōm tō nyiktaniwaadsōō'yim jōts ja Dios kyunuu'kxin nbaajtindit. ¹⁰ Jabi yide'enxi dō'on ja Salmos wya'añ:

Pōni pōn idō'on øy tsuj ja xōow ja tsinaa'yin yik-naxwampy,

y'ejx'etp idō'on ja tyoojts ja', jōts ja yigaappi y'axōōkpi ja tkakajpxt

jōts ja y'aaw tkadataay'att.

¹¹ Paa't'ajtp idō'on ja t'ixmatst ja yigaappi jōts ja y'øybi chujpi tpadu'unt ne'egi,

y'ixa'ap idō'on ja øy'ajtin jōts tuki'iyi tpanōjkxt.

¹² Jabi Dios Teetxyi idō'on t'ejx'ejtp pōn øy jaa'y'ajttip jōts nay ja' tmado'op ja tsapkajpxy,

ka'ats idō'on ja mōōt ñamyayi pōn ja y'axōōkpi yigaappi yikmajadaaktip.

¹³ ¿Pōnts meets idō'on ndejint mdamidsep-

wa'aniyidip ku ja y'øybi chujpi xunwan'ettit? ¹⁴ Pōni

jats pōn wyinaty mjanchtuku'ayo'ombaadiyidi ku ja

y'øybi xjatu'undit, øyjawidi kunuu'kxyjawidi meets

idō'on ja ne'egi, jabi mōjxi ja Dios y'øy'ajtin tyikwimbe-jtnit. Patxyi meets idō'on niti nipōn xkatsō'ogidit,

¹⁵ nadyamiyoxiyidi ja Cristo pōn adōm nwindson'aj-

tyimp. Awejx'et meets idō'on ja', ku pōn tyiknidōōwit

tiku xpaduñ ja mjanchja'win jade'en, ku x'adsojimbet-

tit, tsuj tuda'aky meets idō'on ja xu'unt. ¹⁶ Yikxon

meets idō'on m'øy'att jōts xmōōt'attit jade'en ja

m'aaw ja mjoojt jotkujk, jōts ku wyinaty pōn mdamiga-

jpxyidi ja Cristo yjanchja'win, kō'om ja kyajpxy ja

myadya'aky ja ttatsō'odyu'undit ku meets ja jade'en

nugo mnitaayibyetyiyidi. ¹⁷ Øyts ja ne'egi ku ja øy'ajtin

ngu'ayo'ombaajta'ant pōni jade'endam ja Dios kō'om

ttsōky jōts idō'on jade'en ne'egi ngatu'unint ja

axōōkpi ja yigaappi.

¹⁸ Jabi nayide'enxi Cristo kō'om tō y'ayo'ombaatmi

adōm nbōkyōjxp, tuk'ojkyi ja tō ttanaxy ja ayo'on. Øy

ja y'ijty yja'øyjaa'yī, ayo'ombaajt ja' adōmgōjxp

wine'en nga'øyjaa'y'ajtyindi, jōts jade'en ja Dios Teety

xukwingunōjkxa'andi. O dō'on ja ñine'kx wyindigōōy,

jujky'ajtpst ja ixyam jadigojk. ¹⁹ Ja Espiritu Santo

myōk'ajtin ja yiknōjkxōō mā dō'on jap namay anmi-

ja'win t'awejxti ja y'ayo'ondi, jōts ttukmadōōy ja nit-

so'ok'ajtin. ²⁰ Ya'atpi jaa'dyi ku yjujky'ajttōō ka' idō'on

ja tmōjpijktajktōō ja Dios sa ja Noē tjanigajpxy yam ja

Dios ja yjanchja'awijxyidi. Ixyam idō'on wyinaty ja Noē

tyik'øyi tyik'abaadi ja mōj barki mā dō'on niwaani ñit-

sokti, niduktujk idō'on ja'adi ka'pxy pōn jap barkijōtp-

tyi yikanaanwidejtidi ja mōj nōō, jōts jade'en sa kyajajt-

tōō. ²¹ Yō'ōbi nōōjts ndamiguy'ejxa'amp ja nōō midi

tump ku nnōbajttint midi tō xukpaajtyim ja nit-

so'ok'ajtin. Ka'ap ja nōbajtin ja' wya'añ jōts ja ne'kx

ja'ayi wya'ats'ejtindit. Ku dō'on nnōbajttint, ja Dios

idō'on n'amido'owimp jōts ja nbōky xyikwaajtsa'ant.

Jade'en'ampyts idō'on ja nōbajtin tyuñ jōts ja nwind-

sōn'ajtim xukniwaajtsim ja ka'øybi pō ja'axi ja kyuju-

jkpyōjkiyī'ñ jadigojk xemikōjxp. ²² Jōts ja ojts chajpety,

ojts tpu'ixaagi ja Dios Teety y'aga'ngyōjō'om, ja'

tniwindsōn'ajtp ja ankilistōjk jōts wine'en y'etti ni-

duki'iyi ja yikutujkpōjkti, tum ja' amuum paajtip.

Jade'en nbadu'undit sam ja Dios ja ndunkjøøjp tømø'øyindi

4 Tøxi ja Cristo y'ayøy, nayide'en meets idø'on xkupiky'att ja ayo'on. Ku jade'en xu'undit tøm wyinaty ja pøky xkayikmøj'atti, ² jøts jade'en mjaakt-søønidit yā naxwiin sam ja Dios køm tøsøky'aty, jøts ka'ap ja mgø'øm ja' xu'undit, ja kya'øybi. ³ Tøm meets xyikjotkidakøjy jekyip ku xpadundi y'ijtyip pøn ja Dios tka'ejidip. Ja' y'agujkpy meets y'ijty mdsøøni mā ja axøøkpī yigaappi, mā ja awānax agojnax nayide'en xwindsø'øgidit xwinjāwidi, midi idø'on kapaat'ajtyip nbadu'unint. ⁴ Ja'abi jāa'dyi, kumaap ja tjawidi ku meets ja xka'ukpadu'unxiniyidi ja y'axøøkpī yigaappi tsinaa'yin, paty meets myikjigajpxy myikpagajpxy. ⁵ Ka'ap meets ja xmøjpkta'akt, kyøya'aktip ja køm ja tiy'ajtin jøts ja yiktidyu'undit, ja' ja nøjx ttiidyuujnidip pøn ttiidyump ja oo'kpī jøts ja jujkpyi. ⁶ Ja' pøn tøm y'oo'kni, tøm yiktuk'ixy yiktuknijawi sudso døm ja y'anmija'win xemikøjxp ndejint y'uktsøønit møm ja Dios. Jaayip idø'on ja ñamyayī tpadso'ondakni ja xemikøjxpit jujky'ajtin ku ja Dios yja' tkupøjkiyidi, øy ja kawine'en yjayiktiidyundi yā naxwiin, tjapaatti tja'ejxti ja kajkin ja o'jkin ja'adi. ⁷ Wingonipxi jits kyudigøøgyøjxint tuki'iyi ja pik-ta'aky, paty meets ja y'øybi winmaa'ñ xyiktu'undit jøts xamija'myatsidit ja Dios. ⁸ Ja tsojkin meets idø'on ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja aki ja tkayikmajada'aky. ⁹ Nagyupøkidi mjønnotp mdøjkjotp, pøni pøn jam memp jā'tp, kidi ti x'ama'at'atti. ¹⁰ Kija' meets idø'on xu'unt ja mdunkjøøjp sam ja Dios tøm mmø'øyidi jøts jade'en mnadyabudøkiyidit nixem niyam pøni sā Dios ja kunuu'kxin køm kidā'ak tøm mmø'øyidi. ¹¹ Pøni jaa pøn tniğajpxwā'añ ja Dios yja', ja Dios idø'on ja y'ayuujk ja wyinmaa'ñ ja yktuujnip. Pøni jaa pøn myigu'uk tpuðøkiwya'añ tuki'iyi døm ja tyiktungøxt ja møk'ajtin midi ja Dios yajkpy. Jøts jade'en ja Dios Teety ndamø-jā'wa'ant ndagunuu'kxyjā'wa'ant ja ndunkjøøjp nwind-søn'ajtim Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'on yjatt.

Ku ja Cristo nbadu'unint, ayo'ombajjimp

¹² Meets migu'uktøjk, kidi kumā'ayin xjāwidi ku møk m'ayo'ombajjiti, kidi mnømdi ku jade'en kyapaat'aty. ¹³ M'øyjāwip meets idø'on ne'egi ku meets idø'on Cristo møm m'ayo'ombajjiti, jøts nayide'en wyinaty xaxondaknidit ku tñanky'ejxit ja myøj'ajtin ja y'øy'ajtin ku wyinaty myeni jadigojk. ¹⁴ Jotkujk meets idø'on mnayjāwiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espiritu Santo mmøøt'ajtp. Axøøk yigaap ja nwind-søn'ajtim ja tni-madya'akti, ka'ap meets nayide'en, ja'axi meets mwindsø'jkip mwinjā'wip. ¹⁵ Møk tsø'ødyu'unin møk payø'øyin ne'egi ñaxy ku nyikjāa'y'o'jkint ku nma'jt-sint, ku tigati ndatøjka'ant ndakajpxa'ant midi'ibi adøm xkapaat'ajjimp. ¹⁶ Ka'ats ja ne'egi chø'ødyu'uni

ku ja Cristo yja' ngu'ayo'ombajjita'ant. Ndamø-jā'wa'amp ndagunuu'kxyjā'wa'amp adøm idø'on Dios ja ne'egi.

¹⁷ Ixyam adøm idø'on ndiidyunk tyuu'na'amp pøn jaty ja Dios ja'ajtidip. Møkts adøm ja ndiidyunk ñajxindit, ¿sats idø'on ja yja' mye'endit kyida'aktit pøn ja Dios tkabadundip? ¹⁸ Jabi ja øyjaa'yts ja ñitsoojkin ñiyjøjxk tkapattip, ¿sats idø'on ndejint tyimyjattit pøn ja Dios tkamimadoodip, pøn ja chinaa'yin tyiknajxtip pøky'agujkpy? ¹⁹ Patyts pøn ja Dios yja' tmi'ayo'ombajjtidip sam ja køm tøm tyamidsøkyidi, ka'ap ja mibaat t'ixmatstip ja y'øybi, tyun'etibyim ja'adi, amuum ja y'anmija'win ttamiyoxtit ja Dios pøn yiko-jidip yiktsoojkidip, nijuuni ja kyamajtstu'udyidi.

Ku ja Cristo yjanchjā'wibi yikajpxwejti

5 Ixyam ngajpxwejwā'añ pøn jam mnigubajk'ajtyidip, ja møjaa'dyøjkti, jabi nay-ja'abi tunkxi nmøøt'ajtpy, ja ku øts idø'on kømøyi ndy-imy'ijxy sā døm ja Cristo y'ayo'ombajjiti. Nbaatp øts nayide'en ja øy'ajtin sam nayide'en ja møjaa'dyøjkti, ku wyinaty ja nwind-søn'ajtim tøm ttukmibaat'aty. ² Paty øts ixyam mee møjaa'dyøjk nnøjmidi jøts yikxon x'e-jx'ettit pøn ja Dios yja' tpaduujnidip midi meets tøm myiktagidøki; kømømdsøky idø'on meets ja xu'unt sam idø'on ja Dios køm tøsøky'aty, ka'ap akikøjxp jøts ni meengyøjxp ja xkatu'undit. ³ Kidi meets ja mgutujk nu-go xamajada'aky, tudā'aky idø'on ja xuu'mo'odit jøts ja m'øchinaa'yin xuk'ejxajtin'attit. ⁴ Kuts jade'en wyinaty myeni ja møj ejx'etpi jøts meets xpøkt ja møj øy'ajtin midi niwindem xøøw ja kyudigø'øyin kaja'tp. ⁵ Ixyam meets unā'jktøjkti ngajpxwejwamidit, mi-madoow meets idø'on tuki'iyi ja kyutujk ja møj-jaa'dyøjkti, sam meets niduknax nixem niyam mnagyupøkidit. Jabi jade'ents ja wijkyajpxy wyā'añ ku ja Dios ka' tøsøky pøn køm namyøjpkta'ajkidip, jøts ja' tpuðøki y'øy'ajtingøjxp pøn tmøøt'ajtp ja tu-da'aky'ajtin. ⁶ Ku xmiduda'aky'attit ja Dios myøk'ajtin, nay ja'ayi døm køm mgunuu'kxyidip ku ja xøøw jumøjt wyinaty tpaaty. ⁷ Tagidøkidi ja Dios tuki'iyi midi mbamaadyip mbadajtip jabi ja'axi ja tyunk'ajtpy jøts adøm ja xtsojkint.

⁸ Nay'ejx'etidim, wijy kejy nabyikta'agidi; jabi oxī mā y'ixy kyøw ja miku', ja mmidsep pøn mduk'ix-matšwajniyidip ja mjanchjā'win. ⁹ Mimøk'atti, tamøk'atti ja mjanchjā'win, jā'myatsti ku nayide'en ja mmigu'uktøjk y'ayo'ombatmidit o madsoo sam meets. ¹⁰ Ku adøm wyinaty tøm n'uk'ayo'ombajjityindi waani, xjats adøm idø'on ja Dios xyik'øø'yandit jøts xmøø-gyøjxindit ja møk'ajtin jøts jade'en nisa nga'ukjajtinidit. Xpa'ayo'ondip idø'on ja Dios ku kawinmaa'ñ xkunu'kxindi, jøts ku køm tøm xwāadsøø'yim jøts adøm n'ejxindit nbaajtidit ja y'øy'ajtin ja myøj'ajtin xemikøjxp møm ja Jesucristo. ¹¹ Tu'ugyi døm ja Dios Teety myøk'ajtin møj midi niwindem xøøw ja kyugøjx'ajtin kamemp. Jade'ents idø'on ja yjatt.

Ja kajpxpoo'kxin midi tyagugøjxiñip

¹² Yjanchpadumpy tudā'aky'ampy ja janchja'win yø Silvano adøm nmigu'uk. İxyamts øts ja ndamigaxi tu'uk ja nøky midi tø nja'ay jøts meets ngajpxwejwā'añ jøts ku Dios kyunuu'kxin tø mmø'øyidi jøts jade'en'ampy tnanky'ijxyi pøni ti jaty tø xpaatti x'ejxti. Mdsojkidip meets ja Dios jøts kidi mibaat x'ixmatsti, tu'ugyi yikxon xpanøjkxtit.

¹³ Mdanigajxidip øts ja kajpxpoo'kxin ja Babilonia janchja'wibidi pøn ja Dios tø t'awaawmujkmi nayide'en sam meets. Nayide'en ja mgajpxpoo'kxmiyidi ja mixy Marcos midi n'u'nkja'wip pøn øts xpudøjkip.

¹⁴ Nagyajpxpoo'kxidi nixem niyam sam tu'ugyi ja jaa'y ñamyayidi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindson'ajtim Jesucristo yja'ajtpy. Jade'ents idø'on yjatt.

2 PEDRO

Ku ja Pedro tnijayi pøn tjanchja'widip ja nwind-søn'ajtim Jesucristo

1 Øts idø'øn Simón Pedro nxøw'ajtpy. Øts ja nwind-søn'ajtim Jesucristo nmidump jøts øts ja nayide'en ngudanaapy. İxyam meets ja nøky ndani-gaxi pøn nayide'en tø xpaatti ja janchja'win sam øøts ja nja', ja'agøjxp ku ja nwind-søn'ajtim Jesucristo tyiyi kya'pxyi. ² Jade'en sam x'ejxtit xnijawidit ja Dios Teety jøts ja nwind-søn'ajtim Jesús, nayide'en idø'øn mda-ja'adiyidit ja y'øy'ajtin kyunuu'kx'ajtin.

Ja' midi yiknigajxø'øgiyip pøn tjanchja'widip ja Cristo

³ Myøk'ajtingøjxp adøm ja Dios Teety xmø'øyim køx kidā'ak midi xka'ejtxa'amp jøts jade'en øy tsuj ja ndsi-naa'yin nyiknajxint, sam ja ajot'ajtin nayide'en yik-mo'ot, jabi tøxi Cristo xuk'ijxyim pøn tø xwi'ijxyim xwigø'ønim y'øy'ajtingøjxp myøk'ajtingøjxp. ⁴ Nay yø'øbi køjxp adøm nayide'en tø xmø'øyim ja y'øybi, ja awejx'ajtin sam idø'øn ku tijy xyiknitso'okwā'añim ya naxwiiñ, mā ja tigø'øyin kadye'eyin y'ity, jøts jade'en ja kyunuu'kxy y'øy'ajtin xukpaajtint. ⁵ Pøni nbaat-wā'añimp idø'øn ya'at, ja janchja'win idø'øn nmøøt'ajtim; ku ja wyinaty nmøøt'ajtyimp, winets ja tichinaa'yin ja øchinaa'yin n'ixā'ayint; ku ja wyinaty tø nbaajtyim xjats idø'øn nbadøjka'ant sudso ja Dios yja'nnija'wa'ant midi tø ttanibiktaagi; ⁶ kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en tø ndu'uñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' køx kidā'ak jade'en nnadyamiyojxa'ant; ⁷ kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyajya'ant; jøts jade'en ja tsojkin nmøøt'ajtint midi kamastu'udyim yikja'wip.

⁸ Kuts ya'at xyikmøjdidit xyikyajkidit midi mmøøt'ajttip, zja ti nugo meets ndejint tø x'ejxni xnija'wiñi ja nwind-søn'ajtim Jesucristo? Jabi ka'axi ja mdsinaa'yin nugo xyiknaxtit ya. ⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tu'uk ja jaay'kubets kugoots y'etwā'añ kø'ømdsojkingøjxp; ka'ap ja t'ukja'myajtsni ku ja nwind-søn'ajtim Jesucristo ja pyojkpi tø tku'oogi jøts ku yam yjapaat'ajtniyi jøts ja chinaa'yin tyiktigajtsnit. ¹⁰ Jade'ents mee migu'uktøjkti, nanky'ejxidi dø'øn ku meets ja Dios tø mwi'ijxyidi tø mwigø'ñidi, jøts jade'en niti nima ja mjanchja'win kyawinguwopidit. ¹¹ Jøts jade'en wyinaty agujk jotkujk mdøjkiñidi mā ja nwind-søn'ajtim Jesucristo ja kyutujuk

ja yja'y ttanitani, mā ja yiknitsokpi xemikøjxp xyik'e-jtint.

¹² Paty meets ya'at ejtp ndukja'myats'ett, øy yø xani-ja'wiñidi øy yø xjadamøk'ajtnidi Dios tyiy'ajtin midi mmøøt'ajttip. ¹³ Øy øts idø'øn ja njawi ku meets njaakajpxwejt, ku njaakujjy'att, ¹⁴ jabi tøxi øts ja nwind-søn'ajtim Jesucristo xuknijawi ku øts tsojk ya'at naxwii'ñit nmajtstutnit. ¹⁵ Tuki'iyi øts yø n'aaw njoajt nbikta'akt, jøts xja'dyangøxtit yø' kajpxwejin, jøts jade'en ku wyinaty tø nja'oo'kni njadigøøñi, ejtp yø xja'myats'ettit.

Pøn t'ejtøø wyemp y'amp sa Cristo tnanky'ejxøø ja myøj'ajtin

¹⁶ Øy meets mwā'ant ku myikwindaay'atti ku meets tø ndukmadøy ja xpøjkin midi ñigajpxy ja nwind-søn'ajtim Jesucristo myøk'ajtin jøts ku ja mye'ent jadi-gojk. Ka'ap øøts yø kø'øm tø nyik'øyi yø' madya'aky, jabi tøxi øøts idø'øn kø'øm ndyimy'ixy ja nwind-søn'ajtim y'øy'ajtin ja myøj'ajtin. ¹⁷ N'ejx øøts ku ja Dios Teety tyikjajty jøts ja Cristo ja windsø'jkin win-ja'win tpaatt, ku ja ñine'kx tyigajch jøts ku amuum chamaambijkyaju'uk agujk. Nmadoow øøts nayide'en ja Dios Teety y'aaw y'ayuujk ku yide'en wyaañ: "Øts ya'at n'U'nk midi kawinmaa'ñi ndsojknajxpy, midi øts ixyam øy yikxon ndajotkujk'ajtpy."

¹⁸ Kø'ømxi øøts idø'øn ndyimyadøøy ja Dios Teety y'ayuujk midi tsajpjøtpy kidā'jk, jabi jamxi øøts wyinaty kojpkøjxp midi kunuu'kxy, møøt øøts ja nwind-søn'ajtim jam wyinaty.

¹⁹ Kidi yø'øyipxi dø'øn ja'ayi nugo ejxpajt'ajtp, pø tøxi ja Dios Teety ja kyajpxy tpaduñ midi ja kyugajpxy windi'ixyiy jaadyandøø. Øy'ajtp idø'øn jade'en ku jade'en xu'unt ku xunk'attit yø'øbi kajpxy, yø'øbi ayuu-jk, midi ja wejin ja kajin xmø'øyimp jøts ja kugoot-s'ajtin jade'en xmajtstuujtint. Jade'ents Cristo ja yja'xagujajamp xagudøø'kxamp kunim ja mye'ent jadi-gojk jøts kø'øm ñanky'ejxyitnim. ²⁰ Ja ku dø'øn jawyeen kuwani xnijawidit jøts ku ja Dios kyajpxy ka' nugo øy pøngapøn nugo ajawi tja'gyuki, ²¹ jabi ka'axi ja Dios kyugajpxy kyø'øm winmaa'ñ ttakajpxtøø. Dios Teety miyøxy ja'adi, jøts tnigajpxidi ja yja' sa jaty ja Espiritu Santo wyinmaa'nmyøøjyidøø.

Pøn ñanky'ixpøjkidip ja taay'ajtin

2 Nayide'en idø'øn Israelit jaay'y y'ejtmidi pøn ñadyi-jiy nañikajpxidip ja Dios kyugajpxy; nayide'en meets idø'øn winaa'in xnitaayibyajtmidi ja Dios yja',

pøn idø'on kø'øm t'ejxma'tnidip ja nwindson'ajtim mi-di tø yiknitsø'ogyidi; kø'øm idø'on ja myøj'ayo'on wyi-naty tsojki t'ixā'adi. ² Namay idø'on jaa'y ja tpabøktit ja y'axøøkpī tsinaa'yin, jøts ja'agøjxpti wenk yikni-madya'akt ja Dios kyajpxy midi yiknitsoojki. ³ Kuts ja meeñ ja t'amidit tjoipidit, jade'en meets idø'on mwi-gaadsidit mwibøkidit, ku o tigati kajpxy mdawin-daa'y'atidit meengyøjpx; ja'atp idø'on ja myøj'ayo'on ja'adi, niti nitsoojkin, jabi jekyixi dø'on tø yiktanibik-tajkiñidi ku jade'en yjattit.

⁴ Ka'ap ja Dios tmaa'kxuujky ja y'ankilistøjkti pøn kamimadooljyidi, jagam idø'on ja tñajtswojpiyñi mā ayodaajk jap, jøts jap kube'ets kugoots tsumy t'aweixti ja tiidyu'unin. ⁵ Nika'ap nayide'en ja Dios tmaakxuujk-mi ja jaa'y pøn jekyip tsinaamyidøø ku ja Noé yjujky'aj-ty. Ja kom tuujxi dø'on tyanigajx, jøts jade'en tuki'iyi ja naixwii'ñit ñijaa'xni ñigomni, jøts jade'en y'o'j'køjxtøø ja ka'øyjaa'dyi. Ja'ayi tyiknitsøøjky ja niwixujkpi jaa'y jøts ja Noé pøn ja tiichinaa'yin tñigajpx. ⁶ Nayide'en tyiku-tujkmaa jøts kyudigø'odyit ja kajp midi txøøw'ajtøø Sodoma jøts Gomorra, jade'en tyikudigøøy, nugo jaam tyiktaañ, jøts jade'en t'ejxpajt'attit ja ka'øy jaa'y pøn wyinaty ja chinaa'yin tyiknaixwandipnim. ⁷ Yiknitsoojk ne'egi ja Lot, pøn y'ijty øyjaa'y'ajtp jøts pøn nayide'en tjanch'ødyunja'widip ja y'axøøk tsinaa'yindi. ⁸ Jabom jabom idø'on ja y'ijty yjotmay'øøky ku t'ixy tñijawi sa ja'abi jaa'y yjanch'adø'øtstøø. ⁹ Jade'ents idø'on, maajyip idø'on ja nwindson'ajtim jøts ja xpudøjka'ant mā ja yigaappi y'axøøkpī xmimajada'akwa'añim wine'en adøm tø nadyamiyojxna'andi ja nwind-son'ajtim yja', jøts nayide'en myaa'miyyi tyik'ayo'om-baatt øy pøn tundigøøbyidi ku wyinaty ja tiidyu'unin myiñ kyida'aky.

¹⁰ Yik'ayo'ombaatp ja Dios ja'adi dø'on pøn kø'øm ja y'axøøk tsojkin tpadundip jøts pøn ttekpya'an'ajttip ja nwindson'ajtim kyutujk. Namyikajxidip ja', ap tyimñay-jawiyidi; ka' ñadyijyi tyimchø'ogidi jøts tka'ømyigajpxti tka'ødyejti ja kutujk'ajtin midi jap tsajpjøtpy, ¹¹ yam ja ankilistøjkti niti nisā kyawa'andi jam nwindson'ajtim wyingujkpi, jawaani møkts ja ne'egidi ja kyutujk.

¹² Nayide'en idø'on ja'adi sam ja jiyujkindi, niti ja'-gyukin tkamøøt'atti, nugo ja yjujky'ajtin yikjujky'atyidi, ja'ayi t'aweix'attit sa ja myigu'uk tmatstt uk yikmatstt kø'øm, sa ja o'jkin tigø'øyin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tyimñayide'en idø'on ja y'oøktit sam ja jiyujkti nugo ñaxti, ¹³ kyu'ayo'ombaadidip sam ja myigu'uk tø tyik'ayo'ombaatit. Jotkujk idø'on ja tjanch'ukjawiidi ja y'øybi yjøkchpi midi pojñ najxp; nu-gu dø'on ja chø'ødyundi ku meets ja mxøduñ møøt, jøts ñadyijyi yjanch'uknankyotkujk'atyidi jøts meets ja jade'en xpabøkt.

¹⁴ Ka' idø'on ja tø'øxyøjk ja nugo t'ejxtit, ja' idø'on ja wyinmaa'ñ'attit jøts tmøøt'attit; ka' idø'on ja pøk-tyu'unin yjotnaxyidi. Ja win'øø'nik ja'ayi tyunk'ajttip jam mā pøn ja yjanchja'win kyamøjkidinim; tuki'iyi tñiwa'anwa'angøjxti ti jaty ja myigu'uk yja'ajttip; ja dø'on møk ayo'on ja Dios ttukpaadidip. ¹⁵ Abiktyuu'

idø'on tø tpabøknidi ku ja tiidyuu' tø t'ixmatsti. Wa' idø'on ja y'ejxpajtin pyaduujnidip ja Beor myajnk midi Balaam xyøøw, pøn ñadyijyi kyajpxnajx ja Dios yja'. Yā'at jaa'y, o dø'on ja tigati ttunwaañ, jøts jade'en ja meeñjinggaap taagyøjpx tpaaty, ¹⁶ kunim idø'on ja Dios tu'uk ja jachu' tyikajpxt jøts ja pyøky yiktawindsø'øty jøts jade'en ja kyujuun'ajtin tka'ukyikmajada'knit.

¹⁷ Jade'en idø'on yā'at jaa'dyi sam tu'uk ja tø'øts nøø-mu'ut ni tukxa'kx ja ñøø. Nayide'en ja'adi, sam ja poop yoots midi katuup, nugo pyojwidity; jap idø'on ja kyastigi agootstujpy tø yiktanibiktaajkiñidi. ¹⁸ Jabi tum wenkxi ja myadya'aky ja'adi, tum ja katumbi kya-jpxy'ajttip, jøts ja jaa'y twindaay'atti ku ja y'axøøk win-maa'ñ ttukpadundi yam ja wyinaty namnim tø tja'uk'ixmajtsmidi ja'abi tsinaa'yin. ¹⁹ Ja tsinaa'yin ja tyaguwa'anidip mā øy sa y'adøtsnidit. Tø ja kø'øm tñimiyiwanjajitnidi jiyujkin ja axøøkpī tsinaa'yin. Ku pøn nugo tyimykimajada'aky øy yjade'embi, janch amøñi idø'on ja tpaduñ øy yjawi sa tñijajitni. ²⁰ Jawaani møk idø'on ja ayo'on tpaattit pøn ja nitso'ok'ajtin tø t'uk-paaty nwindson'ajtim Jesucristo køjpx, jøts jadigojk ja kya'øy'ajtin tpadundøjkigoyjmidit. ²¹ Ne'egi øy jeexyip tpaaty ku jeexyip tñanijawidi ja tiichinaa'yin, jøts jade'en jeexyip tka'uk'ixwejtsni ja Dios kyutujk midi øy midi wa'ats, midi wyinaty tø y'ukyikmo'odi. ²² Jabi tøxi dø'on ja' ayuujk tyiy ku jaa'y y'ukwa'añ ku ja uk ja y'iich jadigojk tñiwimbity, jøts ku ja kuch midi namd-seepnim jits ja jadigojk nay jaayi ja mo'onts tseemu-jkojmi. Jade'en idø'on øy ndejint yø'øbi jaa'dyi.

Ku ja nwindson'ajtim mye'ent jadigojk

3 Meets migu'uktøjkti, yā'at idø'on myimajtsk nøky midi mee ndanija'ayip. Nayide'ents meets ixym ndanijayi sam jawyeen, jøts ku meets x'ejxkapt ja tiwyinmaa'ñ midi ngajpxpatpy. ² Jade'en ø nwa'añ ku meets xja'myatst ja Dios kyugajpxy sa ja y'ayuujk tyik-waañ pøn ja Dios tø ñadyamiyøxyidi, jøts nayide'en xja'myajtsmidit ja nwindson'ajtim kyutujk pøn yiknitsoojki, sam øøts tø nnigajpxy pøn ja kyudanaabyi'ajttip.

³ Jawyeen idø'on tyimbyaat'atyidi meets xñijawit yā'at: ku wyinaty myeni kyidakni ja tiidyu'unin, winets idø'on ja jaa'y kyaxø'øktit midi tyaxe'ektit tuki'iyi ja Dios yja', jøts nugo tñidsøønidit midi axøøk wyinmaa'njyøtpy myøøt'ajttip, ⁴ jøts yide'en wyā'andit: "¿Samts idø'on ja Cristo y'ayuujk tø yjajitni kuts idø'on ja tijy wyimbett jadigojk? ¿Windemnimts idø'on ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtøø." ⁵ Kyaja'myajtstip idø'on yø' ku naixwii'ñit kawinaak ojk tø yjadigach, jabi windi'ixyixi ja tsajp ejt-ni jøts ja naajx pyidsiimñim nøøjøtpy, Dios Teety y'ana'amingøjpx. ⁶ Kyaja'myajtstip idø'on nayide'en ku ja Dios kawinaak xøøw anaduu' tkejxy, jøts ja naixwi-i'ñit jaa'y jade'en kyudigøøgyøxtøø. ⁷ Y'awixy'ajttip idø'on yø', jawaani møj ja ayo'on midi wyinaty memp sam ja kø'øm tø tñanibiktajkiñi ku tñajtskaxit ja jønyow. Ja'abi jøon idø'on yiktøøydip ja ka'øyjaa'dyi ku wyinaty ja tiidyu'unin ñaxy.

⁸ Mniĵa'wip meets nayide'en ku ka'ap ja nwind-søn'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt. ⁹ Kidi meets mwinmay sam winaagin wyā'andi ku ja nugo tyāa'ni ku kyamiñ jadigojk sam ja kyajpxy tø tpikta'aky, møk idø'øn tyudā'aky'ajtin ja tyikmajada'aky jøts ja jadine'en xmaa'kxujkyim. Ja' chøjkpy jøts ka'ap pøn nugo wyindigø'ty jøts ja ndsināa'yin nyiktigajtsint.

¹⁰ Jade'en idø'øn ja nwindson'ajtim jotkumoni ja tyiidyu'unin tmøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'øn tsajp pyømemga'akt ku ja kyudigø'øyin tø myeni. Winets tyøbyøjkøxnidit tuk'ojkyi ja tøø'kxpī tsamambi midi jam tsajpwemp, jøts yø naxwii'ñit tuki'iyi tyigøøñit jønyow agujkpy.

¹¹ Jabi jade'enxi dø'øn ja ayo'on ñaxkida'akt ya naxwiiñ, ijadits adøm idø'øn nganadyamiyojxa'ant ja Dios! ¹² Yikyijiyidi ja mxøøw ja mjumøjt jøts ja yja' xyikmayidit, jøts jade'en chojkī ja xøøw ja jumøjt ku wyi-naty kyudigøøgyixy jønyow agujkp tuki'iyi midi jam tsajpwemp jøts ya naxwiiñ; ¹³ ja'ats idø'øn adøm n'awejxindip ja jembyi tsajp ja jembyi naajx midi ja Dios tø tni'adsowi køøm, mā dø'øn niduki'iyi ja jaa'y ja y'øybi ja tyiibyī ttu'undit.

¹⁴ Paty meets migu'uktøjkti, ku ya'at xjøp'ijxy'attit, tum ja' meets mdu'ump midi ja Dios chøjkpy, tsokti ja tudā'aky'ajtin, nixem niyam mnamyayidi jøts jade'en ja Dios mbaadiyidit niti pøky niti kadyeey. ¹⁵ Jā'gyukidi ku ja nwindson'ajtim tsojk kyamiñ, paty idø'øn ja ttuñ jøts nyikmøja'ant nyikmaya'ant ja nitso'ok'ajtin, ja tyu-dā'aky'ajtin idø'øn ja jade'en yiknigaxi'kpy. Nayide'en meets idø'øn tø mdaniĵa'ayimidi yø'øbi winmāa'yin ja Pablo, adøm nmigu'uk, ku tyiktuñ ja jā'gyukin midi ja Dios tø myø'øyi. ¹⁶ Tum ya'atpi ixpøjkin idø'øn kyajpx'i-jtpy mā ja nøky ja jaa'y ttanijayi, øy idø'øn ja muum tsep ku nja'gyukiwya'anint, jaa dø'øn ja kaja'gyukibidi, jøts pøn ja yjanchja'win kamøktaktipnim tum wenk idø'øn ja ixpøjkin ja tjuutti, ka'ap jade'en ja Pablo yjawā'āñ ñøkyjøtpy. Nayide'en idø'øn ja ttumidi tuki'iyi ja Dios kyajpxy kyø'ømgudigø'øyingøjxpti.

¹⁷ Paty mee migu'uktøjkti, jabi mniĵa'wiñidipxi meets ya'at tuki'iyi. Nay'ejx'etidi jøts ka' xpabøktit sā yø' jaa'y wyā'andi, ku taagyøjxp myikpøjkiwya'andi ja mjanchja'win. ¹⁸ Ne'egi ja' pawinmaydi sā ja nwindson'ajtim Jesucristo ja tyiy'ajtin xniĵa'wiyidi. Yikmøjidi ja tsojkin ja pa'ayo'owin midi ja yiknitsokpi tø xmø'øyim, pøn ja y'ø'y'ajtin myøj'ajtin xemikøjxp ejtp. Jade'ents idø'øn yjatt.

1 JUAN

Ja' midi xyikjuyky'ajtyindip

1 Ya'atpi nõky øø nguejxpy, jøts mee ndukmadøy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' øø tø n'ixy tø nmadøy jøts nayide'en øø tø ndukpaaty ja ngø' ndeky; yø' y'ayuujk yø' wyinmaa'yin adøm ndajuyky'ajtyindip. ² Tø ja ñankñigaxi'igiyi, øøts tø n'ixy øøts tø nnijawi, paty mee ndukmadøy ixyam ku ja ejtp møøt chøøni ja Dios Teety, tøts idø'on ixyam xnimi'iñindi. ³ Tyiiby øøts ndy-imñigajpxy midi øøts idø'on tø ndyimy'ixy ndy-imyadøy; paty mee ndukmadøy jøts meets m'ett amuki møøt øøts, kumi tyimdyiy tyimyjanch ku øø møøt n'ity ja Dios Teety jøts nayide'en møøt ja y'U'nk Jesucristo. ⁴ Yø'øbi ayuujk yø'øbi winmaa'yin meets ixyam ndanija'ayip jøts yikxon ejtni xoni mwinmaa'ñ y'ettit.

Janch wä'ats ja Dios ejxim ja jajin

⁵ Yø' øøts nnigajpxwampy yø øy'ayuujk yø ømyadya'aky midi øøts ja tø xukmadøy: jøts ku ja Dios Teety janch øy janch wä'ats ejxim ja jajin, jøts niwine'enin ja ka'øy'ajtin tkamøødi. ⁶ Kuts nwaä'ñindi ku ja Dios Teety nmøøt n'ijtyindi jøts nika' n'ukpaduu'-na'andi ja n'ayuujk, nugo adøm ja nmidundigøy adijchindi. Yø' idø'on møj taay ku jade'en nugo nwaä'ñindi. ⁷ Kuts ndsinäa'yindit øy wä'ats ejxim ja Dios Teety chøøni, winets nixem niyam tu'ugyi ja win-maa'ñ nmøøt'ajtyindit, jade'en idø'on ja y'U'nk Jesús xyikpøkwyäajchindi midi jaty ndu'uñindip ku ja wyid-suuñ wyidajxy. ⁸ Xjats ku nugo nichøky nwaä'ñindi jøts ku ka' ndundigøø'yindi, nugo kø'øm nnawyin-daay'ajtya'andi jøts tiy ngakajpxyindi. ⁹ Kuts ndami-madyakøxindit ja Dios Teety nbøky, njøp'ejxindip ja' ku ja ttu'unt midi paat'ajtip, jøts nay ja xpojkipi-maa'kxindip jøts nay ja' jatyi xyikwaajtsindip midi jaty adøm ndundigøø'yin'ajtyindip. ¹⁰ Kuts nugo nwaä'nint ku ka'ap nbøky nmøøt'ajtyindi, jade'en idø'on ja nbik-taajkyindi jøts ku ja tyäayi ja Dios Teety, niwine'enints jade'en ngamimadoo'ja'ant ja kyajpxy ja y'ayuujk.

Jesucristo amuum xnikajpxuujtimp

2 Meets u'nkti unaj'jkti, ya'at meets ndukmadøøpy tuki'iyi ku ka'ap mbøkytu'undit, jøts pøni pøn wyinaty sã tyimyajtp paty xnijawidit ku jaa nmøøt'ajtyindi tu'uk ja nikajpxutpi jam Dios Teety wyingujkp, ja Jesucristo dø'on ja' pøn janch, pøn tiy. ² Tø ja Jesucristo

tku'ayo'ombaaði adøm ja nbøky, jøts nigidi adømyipti, niduki'iyi dø'on nayide'en ja naxwii'ñit jaa'y.

³ Pøni nbadu'uñindip ja Dios ja kyutujk sã ja tø xuk'i-jxyindi xuknija'wa'andi, jade'en'ampts adøm ja x'u'nk-ja'wa'ant. ⁴ Jøts pøni pøn wamp ku ja y'u'nk'atyi ja Dios jøts nika'ap ja tpaduujniyi ja kyutujk, ja' nugo kajpxigøøpy, nugo ja tyäayi. ⁵ Jøts pøni pøn amumjoojt nadyamidsøky'ajtip ja Dios, ja'ats tpaduujnip ja Dios kyutujk; jade'ents ja yiknijawi ku nwindson'ajtim ja møøt y'ity. ⁶ Pøni pøn tyimwyamp ku møøt tyimy'ity ja Dios, wants nayide'en tyiknaxy sãmi Jesús tyiknajxy.

Nbadu'unimp ya'at jembyi ana'amin

⁷ Migu'ukti, ka'ap meets ja jemgyutujk ixyam ndani-jayi; nay ja' yø' midi mee tø xmadowdi xnijawidi ku ja mdsinäa'yin xyiktso'ondaktøø jadigojk. ⁸ Yø' meets ixyam njaaktukmadøøpy, yø kutujk, midi janch øy janch tump, øgyajemgyutujk, ja ku ja xem ja yam nna-chojkindit jade'en sã ja Cristo ttuun, jøts mbaat'ajtyip meets nayide'en xu'unt. Yø'øbi winmaa'ñ tyikudigøøpy ja ka'ødyunk, jade'ents ja tsinäa'yin y'øyi pyäadi.

⁹ Jøts pøni pøn nugo wamp ku ja tpaduñ ja jemchi-naa'yin, yam ja myigu'uk ja tmi'ambikñim tmijotma'a-tynim, ja ka'ødyunk ja wyinaty pyadun'adichpñim.

¹⁰ Pøni pøn twamp ttsojpk ja myigu'uktøjkti øpyøni, ja' idø'on tpadump ja øchinäa'yin jøts niwine'enin ja pyøky kyanadyukpaadyi jade'en. ¹¹ Jøts pøni pøn ja myigu'uktøjk tmi'ajkidip, ja' nugo tsinaapy ka'ødyunk agujkpy, ka' tnijawi pøni ti tyumpy kyajpxy, jade'en ja wyimbejtni ejxim ja kugoots jaa'y.

¹² Meets u'nkti meets unaj'jkti, ixyam mee nnijayi jøts ndukmadowdi ja'agøjxp ku ja Dios Teety tø mbo-jkpimee'kxyidi Jesucristo køjxp. ¹³ Teetyi taakti, nayide'en meets ixyam ndukmadøy ya'at ayuujk kumi tø mee xpabiky ja Jesús yja' midi jaayim wyinaty ku cho'ondakijxy tuktsajp'agida'aky. Meets wajtyøjkti meets kiixye'edi, ixyam mee ndukmadøy ya'at ayuujk kumi tø xmimajada'akti ja miku' yja'.

Nayide'en meets u'nkti meets unaj'jkti ndanijayi ya'at ayuujk, kumi tø m'u'nk'atyidi ja Dios Teety. ¹⁴ Meets teetyi taakti, jade'en meets ixyam ndanijayi ya'at ayuu-jk kumi tø xjanchjpabøjkti ja Jesús yja' midi jaayim wyinaty ku cho'ondakijxy tuktsajp'agida'aky. Nayide'en meets wajtyøjkti kiixye'edi ixyam ndanijayi ya'at ayuu-jk ku ejtp mjanchmøkwinmaydi jøts ku ja Dios Teety kyajpxy y'ayuujk tø xpabøjkidi amumjoojt, jøts nayide'en ku tø xmimajada'akti ja miku' yja'.

¹⁵ Kidi nugo xtsojkti ja pøkyunk ni ja pikta'aky mididi ja ejtp naxwiiñ. Jøts pøni pøn t'anømp t'adsojpk ja pøkyunk jøts nika' ja Dios Teety ne'egi ttsøky'aty jade'en. ¹⁶ Yide'en idø'on ja naxwiiñit jaa'y tjanchojkti ja pøkyunk mididi winmaa'ñjotpy mee'nxidip, jøts mididi tyimchuj'ejtip tyimchujawidip. Ja'ats nugo ja pikta'aky nadyamøja'wiyidip, ja' ja nugo pyawinmay'ejttip mididi jaty jaa kayik'ødyump ja naxwiiñ, yamts ja Dios Teety ja jade'en tø tkadanibiktaagi. ¹⁷ Windigøopy y'ity mididi yikpøkyump ja naxwiiñ, mididi nugo yiktsojk anaxp; jøts pøni pøn tpadump sa jaty ja Dios ttsøky, ja'ats y'anmija'win xemikøjxp jujky'atp.

Pøn mibøjkip ja Cristo, jøts pøn ja kamibøjkip

¹⁸ Meets u'nkti unaj'kti, tø jabaat tpaaty ja et ja xøow ku myenwa'añ tu'uk ja jaa'y pøn ja Cristo møk myidsep'atwampy, pøn meets nayide'en tø xnijawi xni-madøy; icyamts nayide'en tø kyaxø'knidi namay pøn tmidsep'ajttip ja Cristo, paty jade'en yiknijawi ku tø jabaat ja et ja xøow tpaaty. ¹⁹ Nay adøm nmigu'uk jade'en winaagin adøtstip pøn adøm tø xmajtstuu-tyindi paty ja tmidsep'atwa'andi ja Cristo; nigidits ja' pøn adøm nwinmaa'ñ møøt tuknaxti, ku jeexyip ja'adi, tø ja jeexyip møøt ndaa'ñindi. Jade'en idø'on jyaty ku winaagin xpuwaajchindi, paty wa'ats yiknijawi ku ka'yikxon tmøøt'atti ja winmaa'ñ sa adøm nja'.

²⁰ Adømts ja Cristo tø xuktatøjka'andi ja Espiritu Santo, ja'agøjxp icyam nnija'wa'andi ja tyiibi ja yjançpi.

²¹ Paty meets icyam nnijayi ku xnijawidi mididi tiy mididi janch, ka'ap ø nwa'añ ku ka' xnijawidi; wa'ats mee xni-jawi ku ja tyiibi ja yjançpi ka' nayide'en sa ja taay.

²² ¿Pønts idø'on taay'ajtp? Ja'ats idø'on pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús. ²³ Pøni pøn tkawandip tkatsoktip ja Dios Teety y'U'nk, ja Dios Teety idø'on wyinaty jade'en kayiktsojpk; jøts pøni pøn twandip ttsoktip ja y'U'nk Jesús, ja Dios Teety idø'on wyinaty jade'en yiktsojpk.

²⁴ Paty øøts idø'on nnigajpxy jøts xwinmaa'ñ'attit ja øgyajpxy ja øy'ayuujk mididi tø xpabøkti jøts mididi yajkpy ja øchinaa'yin; pøni mwinmaa'ñ'ajttip yø', jade'en ja Dios Teety jøts ja y'u'nk Jesús møøt n'ijtyindi. ²⁵ Kumi Jesús kø'øm ñi'adso'owi ku ja xmø'øyint ja øchinaa'yin mididi xemikøjxp yikmøøt'atp.

²⁶ Ja'agøjxp mee nnijayi ku nugo myikwindaa'yidit.

²⁷ Pø tøxi ja Jesucristo mmø'øyindi ja Espiritu Santo, paty ka' pyaat'aty jøts pøn jadu'uk mgajpxwejiyidit, pø ja Espiritu Santoxi mee kø'øm myikwejiyip myikajiyip mididi tiy mididi janch jøts ka' tyaa'y. Meets migu'uktøjkti, jade'en idø'on y'ejxi tyiyi jøts yikxon mdsøønidit mdanidit amuki møøt ja Cristo, jade'en sa kø'øm mduktatyidi ja Espiritu Santo.

²⁸ Jøts jade'en wingujk jotkujk njøp'ejx'ejtindit ku ja mye'ent ja Jesús, jøts jade'en ka' nmitsø'ødyu'unindit.

²⁹ Pø tøxi meets xnijawi ku ja Jesucristo y'øyi tyiyi, jøts kuwani xnijawidit nayide'en jøts ku pøn øy tiy yjaa'y'aty, ja'ats ja Dios u'nk'ajtiyip.

Sa ja Dios x'u'nk'ajtyindi

3 Ejx ja Dios Teety xjançøjkyindi, jøts ja wya'añ ku ja x'u'nk'ajtyindi x'unaj'kj'ajtyindi, pø janch jade'enxi adøm. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tni-jawidi pøni pøn ja Dios Teety. ² Migu'uktøjkti, tø dø'on ja Dios x'u'nkpijkyindi xmaa'byijkyindi; ka'animts xukni-ja'wa'andi pøni sudso njaa'y'ajttindit wiingyubety. Ja'ayi nugo nnija'wa'andi jøts ku ja Jesús ñançñigaxøøk-wa'aniyi jadigojk, jøts jade'en njaa'y'ajttindit nju-jky'ajttindit nayide'en sam ja', pø yik'ejpxi ja' sam idø'on ja chøøni tyani. ³ Pøni pøn tjøp'ejxp jade'en, ja'ats nay'ejx'ejtip jøts ja pøky kyapaadit, jøts ja jade'en chøønit sami Jesús wya'ats'atyin.

⁴ Jøts pøni pøn tundigøy'ejtp, ja' Dios kyutujk kyamøjpiktaajkidip, pø yø'øxi tundigø'øyin'ajtp ku ja Dios kyutujk kyayikmimadøy. ⁵ Pø tøxi mee xnijawi ku ja Jesucristo ja tø myiñ naxwiiñ jøts adøm xyikpøk-wyaajtsindit, jøts nayide'en xnijawidi ku ja janch wa'ats, ni tu'uk ja pøky tkamøødi. ⁶ Jade'en idø'on, pøni pøn møøt y'ity ja Jesús, ka'ap ja jade'en y'ukpøkyun'adøtsnidi sam ja jaa'y pøn tkidyimñija'widip ja Jesús. ⁷ Meets u'nkti unaj'kti, kidi nugo myikwindaa'yidi; pøn y'øyi tyiibi tpadump, yø' idø'on øy jaa'y'ajttip nayide'en sam ja Cristo y'ø'y'ajttin wya'at-s'atyin. ⁸ Pønts ejtp tyimdyundigøopy, ja miku' yja' pyaduujnidip, pø ja'axi jade'en tyiktso'ondaa'jk ja pøkyun'unin ja win'øø'nin. Paty idø'on ja Jesús øjts myiñ jøts ja tyikudigø'øty ja miku' pyøkyun'unin, ja wyin'øø'nin, sa jaty ja y'adi'ich.

⁹ Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøtyidip ja myø'ajttin; paty ka' nugo y'ukpøkyun'adøtsnidi, pø Diosxi u'nk'ajtniyidip.

¹⁰ Yide'en'ampy idø'on yiknijawi pøn ja Dios u'nk'ajttidip jøts pøn ja miku' u'nk'ajttidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigøy'ejttip.

Nachojkindip ja xem ja yam

¹¹ Yø'øbi kajpxy yø'øbi ayuujk mididi mee tø xnijawi ku ja m'øchinaa'yin xyiktso'ondaktøø, yø' idø'on tyijpy ku nnachojka'andit nixem niyam. ¹² Jøts ku ka'ap jade'en njaa'y'ajttindit sam ja Cain ku ja y'uch ja tyik'øøjky, ja' pyadumpy ja miku' yja'. ¿Ti ja tyuku'o'jkøø? Ja'agøjxp ku ja tkabaduñ ja miku'.

¹³ Meets migu'uktøjkti, kidi sa xjawidi ku mmi'am-bøjkidit yø ka'ødyumbidi. ¹⁴ Tø adøm nmajtstuu-tyindi yø ka'ødyunk jøts ja øchinaa'yin tø nbabijkyindi, jade'en idø'on yiknijawi ku nixem niyam nnachøjky'andi. Pøni pøn tkawamp tkatsojpk ja myigu'uk, ja' pyadun'adichp ja ka'ødyunk. ¹⁵ Jøts nayide'en pøn tmi'ambøjkp tmijotmatp ja myigu'uk jade'en ja pyidsømni sa yikjaa'y'ookpi, pø mnija'wipxi meets ku ka'ap ja yikjaa'y'ookpi y'anmija'win y'ity xemikøjxp, windigøopy ja'. ¹⁶ Nnija'windip sa Jesucristo xtsøjkyindi amumjoojt, paty adøm ja xku'o'jkandi; jøts

nayide'en adøm ja xpaat'ajtyindi ndsojkindit ja nmigu'uktøjkti sam adøm tøm nyiktsøjkyindi sam adøm tøm nyiku'o'jkandi. ¹⁷ Pøni pønts jotkujk tyiknæxp, yja'ijxpy ku ja myigu'uk y'ayøwinyimay, niwine'enin tkidyimdy'a'ayo'ixy ja pyiktā'aky midi ja myøøt, ¿sudsots ja nugo wyā'añ jøts ku Dios ja twā'añ ttsøky? ¹⁸ Meets u'nkti unā'jkti, ka'ap y'øyi ku nugo nwa'anindit jøts ku nmigu'uktøjk ndsøjkyindi; yø' ne'egi øy ku ndyimbyadu'unindit tiy janch. Yø'øts jade'en wingaxø'kp ku ja nachoki amumjoojt yikmøøt'aty.

Sudso jotkujk nnayja'wa'ant Dios wyingujk

¹⁹ Jade'en idø'on yiknijawi jøts ku nbadu'uñindi ja tyiibi ja yjanchpi, jøts jade'en idø'on niti ngagumaa'yindit Dios wyingujk; ²⁰ kuts kø'øm nnañi'øø'na'andit, ku nmaa'yindit ndajindit ku ja Dios tøm x'u'nkpijkyindi, pø kø'ømxi ja jade'en tøm xtsøjkyindi jøts møj ja', ja' tuki'iyi tnija'wip sa adøm njawinmaa'yindi. ²¹ Jøts ku ngamaa'yindit ngatjindit winets ngatsø'jka'andit jam Dios wyingujk. ²² Ja' adøm tuki'iyi xmøøtyindip ti jaty adøm n'amidowa'añindip nbøktsowa'añindip ja'agøjxp ku nbadu'uñindi sa ja x'ane'emyindi pøni sa ja ttsøky. ²³ Yide'en idø'on ja y'ana'amin ku njanchja'windi ja y'U'nk Jesucristo, jøts nayide'en nachoiki'indit nixem niyām sam ja Jesús kø'øm xa'ane'emyindi. ²⁴ Pønts jade'en tjanchpadundip ja y'ana'amin, ja'ats ja Dios tmøøt'ejttip jøts ja nayide'en myøøt'ityidi. Jade'en'ampy nnija'windi kudam ja tøm xuktatøjka'andi ja y'Espiritu Santo jøts ja jade'en kø'øm xmøøt'ijtyindi.

Ja Espiritu Santo jøts ja' midi tkaminamyajyip ja Cristo

4 Mee migu'uktøjkti, kidi nugo xmibøjkti ja jaa'y pøn wandip jøts ku ja tnigajpxidi ja Dios y'øgyajpxy ja y'øy'ayuujk, ejxti yikxon pøni janchpi tyiibi dø'on ja kyajpxtip, pø may adøststipxi ja jaa'y yā naxwiñ pøn windaay'ajttip. ² Yide'ents meets ja xnijawidit: ja' idø'on ja wyinatyi pøn tjanchja'widip jøts ku Jesucristo yā y'atsnanky'ejxøø tyimjaa'yin, ja'ats idø'on ja Dios Teety møøt'y'ity. ³ Pønts jade'en tkamibøjpk ja Jesús, ja'ats idø'on ja Dios Teety kamøøt'ejttyip; ja ka'øwinyimaa'ñ ja ne'egi yiktumpy midi tkaminamyajyip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'on ja yjanchmiñ, pø jaanixi ja wyinmaa'ñ ja yā naxwiñ.

⁴ U'nkti unā'jkti, Dios mee mja'ajttip, tøxi xmimajada'akti pøn mwindaay'atwajnidip; pø tyimykxi ja' pøn mee mmøøt'ejttyip jøts nika'ap ja jade'en myøki ja ka'ødyumbi yja'. ⁵ Ja' ja nugo tyunk'ajttip ja ka'ødyunk ja ka'øwinyimaa'ñ paty ja tum jap ttuk'ixpøkti ja jaa'y jøts ja jade'en yikmøjawidit. ⁶ Diosts adøm xja'ajtindip jøts ja xmibijkyindi pøn jaty ja Dios møøt'ejttip. Ja'ats xkamibøjkindip pøn kamøøt'ejttip ja Dios; jade'en'ampyts nnija'wa'an pøn tpadundip ja y'øybi ja tyiibi jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

⁷ Mee migu'ukti, xpaat'ajtindip ejtp nixem niyām nnachojkandit, jabi Dios wyingujkpxi chøøñ ja øchojkin. Pøn ja myigu'uk ttsojpk, pøn ja myigu'uk tpa'ayoop, ja'ats idø'on ja Dios tjanchja'wip jøts ja jade'en y'u'nk'atyiyi. ⁸ Pøn tkatsojpk tkaba'ayoop ja myigu'uk, ja'ats tkidyimjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayø. ⁹ Jøts adøm ja ojts xani'ejxa'andi sa ja xjanchøjkyindi xpa'ayø'øyindi ku ja tyu'umptspi U'nk ja ojts xaniguejxyindi, jøts ja øchinā'yin xmøøtyindi y'oo'kingøjxp. ¹⁰ Yide'en'ampy idø'on ja Dios chojkin ja pya'ayo'owin y'ejxi tyiyi: pø nigidi adømxi ja tøm ndsøjkyindi nba'ayø'øyindi jawyeen, pø ja'axi adøm kø'øm tøm xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

¹¹ Migu'uktøjkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam. ¹² Pøn ja Dios tøm t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyām jade'en ja xmøøt'ijtyindi jøts ja jade'en njaaktyimchojkin. ¹³ Nnija'windip ku ja Dios møøt'n'ijtyindi jøts xnamyøøt'ejtindip ja nayide'en, ja'agøjxp ku ja tøm xuktatøjka'andi ja y'Espiritu Santo. ¹⁴ Tøm øøts n'ixy, tøm øøts nnijawi wemp'am, paty øø nwa'añ jøts ku ja Dios Teety tøm tjanchkexy ja y'U'nk yiknitsokpi yā naxwiñ. ¹⁵ Pønts tjanchja'wip jøts wyā'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejttip ja nayide'en.

¹⁶ Jade'en'ampy adøm ja tøm nnija'wa'andi jøts ku xjanchøjkyindi xpa'ayø'øyindi ja Dios. Pø ja'axi ejtp tsojpk, pø ja'axi ejtp pa'ayoop; pønts ja tsojkin yikwinyigaxi'kpy, ja' ja Dios møøt'ejttip. ¹⁷ Ku jade'en nbadu'unint, jade'en ja nyikmøjtajjint ja øwinyimaa'ñ, jøts ja jade'en ngawingudsø'jkant ku ja mye'ent tiidyumbi; ja'agøjxp ku ja nayide'en xukwinyimaa'yimp ja tsojkin ja pa'ayo'owin sam ja xtsøjkyindi sam ja xpa'ayø'øyindi. ¹⁸ Niwine'enin ja Dios chojkin ja Dios pya'ayo'owin xkayiktsø'jkandit. Yjaaktyimyktyigøgyijxpy ja tsø'øgi ja ne'egi, jøts pø yiku'ayo'owipxi ja tsø'øgi ku pøn chø'øgi, ja'ats idø'on tkayikmøjtøjkipnim ja Dios chojkin ja Dios pya'ayo'owin.

¹⁹ Ja'agøjxp adøm ja Dios ndsøjkyindi kumi jawyeen ja jade'en tøm xtsøjkyindi. ²⁰ Pøn nugo wamp: "Ndsøjkpy øts ja Dios", jøts ni ka'animdmts ja myigu'uk ja twā'añ ttsøky, ja'ats idø'on taayip. Sudso'ampyts ja Dios tjaaktyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjkpy pøn yja'ijxpy wiiñ'ajy. ²¹ Jøts ja Dios yide'en xmøøtyindi ja y'ana'amin: pøni pøn ja Dios ttsojpk, nayide'en ja myigu'uk ja twā'ant ttsokt.

Sudso'ampy ja ka'ødyumbi yja' xkamimajadaajkint

5 Pøn jaty tjanchja'widip ku ja Jesús yikejxy yā naxwiñ yiknitsokpi, ja'ats ja Dios Teety u'nk'ajtyidip; pøni chojktip tam ja Dios Teety jade'en, nayide'ents idø'on ja ttsojktit tpa'ayo'odit pøn jaty ja

Dios Teety y'u'nk'ajtpy. ² Kuts ja Dios ndsojkindit jøts ja jade'en ndyimbyadu'unindit sa ja y'ana'amin ja wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy. ³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amin nbadu'uñindi, jøts ka'ap ja mabaat chepi. ⁴ Jøts pøn jaty ja Dios møøt y'ity, ka'ats ja tmibøjkiidi ja ka'ødyumbi yja'. Pø paty ja Dios janchja'win xuktama-jadaajkyindi jøts ja xkadukmibijkyindi ja ka'ødyumbi yja'. ⁵ Pønts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

⁶ Nnija'windip adøm ku ja Jesús Dios U'ngi, jabi kø'ømxi ja Dios Teety ja tyimñigajpxy ku ja Jesús ñøbejty jøts ku nayide'en wyinaty y'ookwaañimi; jøts ja Espiritu Santo ejtp nayide'en tnigajpxmi, jabi myøøt'ajtpy ja tiy'ajtin ja'. ⁸ Tigøøkts adøm idø'øn ja ejxpajtin nmøøt'ajtyindi midi tnigajpxtip ku ja Jesús Dios'u'nk'aty. Ja myidu'ukpi, ja Espiritu Santo kyajpxy y'ayuujk ja' midi xuknija'wandip ja tyi#byi ja yjanchpi. Ja myimajtskpi, ja Dios Teety y'ayuujk ja' midi yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midi yikmadoow tsajpøtpy kyida'aky ku ja Jesús wyinaty y'ookwani. ⁹ Sa ja jaa'y tyiy'ajtin ngupijkyindi, ¿ti Dios idø'øn ja tyiy'ajtin njaakidyim-gyupøjkin? Pø ja'axi jawaani tyimdyiy tyimyjanch ku ja tnigajpxy sa ja y'U'nk ja yjajty kyubejty. ¹⁰ Pøn tjanchja'wip ja Dios U'nk, kø'ømms ja tjajgyuki ja tiy'ajtin; jøts pøn tkajanchja'wip ja Dios ku ja tnigajpxy sa y'U'nk yjajty kyubejty, ja'ats taadyejp ja Dios. ¹¹ Ya'at tiy'ajtin xuknija'windip jøts ku Dios tø xmø'øyindi sa n'anmija'win xemikøjxp yjuky'ajtindit, ja y'U'nkts ja'abi jujky'ajtin tmøøt'ajtp. ¹² Pønts møøt y'ity ja Dios U'nk,

yikmøøpyts ja'abi jujky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi jujky'ajtin.

Ku ja kajpxwejin jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja jujky'ajtin midi xemikøjxp.

¹⁴ Jade'ents ngawingudsø'jkindi ja Dios ku n'amido'owin nbøktso'owin pøni ti ja kø'øm xamidsojkindip, ja' ja myadøøpy. ¹⁵ Tøts inet nnija'windi ja Dios kudam ja tmadøy ja amido'owin ja pøktso'owin, jøts nay jaty x'adsowimbijtyindi pøni ti dø'øn tø n'amidø'øyindi.

¹⁶ Pøni n'ijxyindip nnija'windip ja nmigu'uk ku ja ttundi ja pøky midi ttukja'dyigøøpy ja Dios, jatyits ngu'amidoo'wandit jøts ja Dios ja myaa'kxukiyit. Jabi jaaxi ja kajabøky midi ja anmija'win tyikwindigøøpy jøts ja Dios tyukja'dyigøy, kidi ja'apts ndijpy. ¹⁷ Tumbøky yø tundigø'øyin kajpxigø'øyin; jamts ja winaaain midi tkayikwindigøøpy anmija'win.

¹⁸ Nnija'windipts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtu-jkiyip jøts ja miku' ja sa kyatuniyit.

¹⁹ Pø nnija'windipxi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniyidi.

²⁰ Jøts nay yiknija'wip ja' ku ja Dios U'nk tø xnimi-i'ñindi, jøts ja tø xuknija'wandit midi tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idø'øn tu'ugyi ndios'ajtyindip, ja'ats tyajkp jøts ja n'anmija'win xemikøjxp yjuky'ajtindit. ²¹ U'nk una'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsø'øgidi. Jade'en idø'øn ja yjatt.

2 JUAN

Ja tiy'ajtin, ja tsojkin jøts ja pa'ayo'owin

1 Mets u'nk Ciria, møjaa'y'ajtp øts, ixyamts meets yā'at nøky ndanijayi møøt m'u'nk m'unā'jkti wine'enin ja Dios tø m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayø, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øybi tyiiby tpadundip. ² Ja' øts jade'en xyik'adøtsp ja ku nmøøt'ajtyindi ja y'øybi tyiiby jøts nijuuni adøm ja xkamajtstuu-jtyindi. ³ Dios Teety jøts ja Dios U'nk, ja'ats mee mgunuu'kxidip mba'ayoojidip jøts mmø'øyidi ja øy'ajtin ja jotkujk'ajtin tiy janch sã ja ttsøjkyin.

⁴ Jade'en øts ja m'u'nk ja m'unā'jk wināagin njanch-taxonda'aky ku øts ja nbaaty ku øts ja n'ixy tpadundi ja y'øybi tyiiby jade'en sam ja Dios Teety ja tø xa'ane'e-myindi. ⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyamnim yø jade'en yikmadø, jaayip yø yikmadoodso'ondakni ku ja ndsināayin nyiktigajchindi. ⁶ Yø' idø'on tsojkin'ajtp, yø' idø'on pa'ayo'owin'ajtp ku ja Dios kyutujk nbadu'unin; jøts yø' idø'on kyutujkin'ajtpy midi tø xmadowdi ku mdsināayin tø xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'on tkawamp tkatsojkp ja Cristo. ⁸ Øyim mnay'ejx'etidit, kidi xkamøjpkta'akti ja ixpøjkin midi mee tø nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'ukta-jotkujk'ajtniyi ja Cristo y'ixpøjkin, ja'ats kamøøt'ejtíp ja Dios; pønts jade'en tjantymbyadump sã ja y'ixpøjkin wya'añ, ja'ats idø'on møøt'ejtíyip ja Dios Teety jøts ja Dios U'nk. ¹⁰ Kuts pøn mninøjkxidit mjøn jotp mdøjkjotp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjotp, jøts kidi meets ja xmo'odi ja kajpxpoo'kxin; ¹¹ pønts ja tkajpxpoo'kxp, ja'ats idø'on tpadump ja ka'øy ixpøjkin.

Sã yā'at ayuujk yjøpkixy

¹² Maynim øts ja winmaa'ñ nmøødi midi mee ndukmadoowampy, jøts ka' meets ja nugo ndanijayiwya'añ; ndyimñinøjkxwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tø y'a'ejxiyi, ja'ats ja y'u'nk ja y'unā'jk yam mdanigajxiyip ja kajpxpoo'kxin. Jade'eñi øts ja ayuujk nguexy, jade'en idø'on yjatt.

3 JUAN

Øy tsuj ja Gayo yiknigajpxy

1 Møjaa'y'ajtp øts, ixyamts øts ya'at nøky ndanijayi mets migu'uk Gayo, ja'agøjxp ku nijuuni nga-ja'dyigø.

² Migu'uk, wamp øts jøts øy yikxon xyiknaxt møk mø-jaaw, nayide'en sam ja Dios øy tsuj myik'ityi.

³ Njanch'øjja'wipts øts, njanchuja'wipts øts, jøts ku øts ja jaa'y winaagin xnimendøø pøn nmigu'uk'ajtyindip, jøts øts ja xamimadya'akti jøts ku mets øy tsuj mjaa'y'aty sam ja Dios kyajpxy wya'añin. ⁴ Midi'ibi øts idø'on njaaktyimy'øjja'wip njaaktyimchuja'wip pø nmadøøpxyi øts jøts ku øts nmigu'uk ja møj ja mutsk tpaduujnidi ja Dios kyajpxy.

⁵ Migu'uk, øy'ajtp ku øy tsuj mjaa'y'aty ku jade'en nmigu'uk xpudøki pøn jaty tminaxtip tmidøkidip ja Dios kyajpxy øy ja xjaga'ijxy'aty. ⁶ Tøts øøts ja winaagin xukmadowdi sã mets ja xtsøky sã mets ja xpa'ayø. Jaaktyimdyun ja may'ajt jøts ja xjaakpudøkit sam ja Dios tkupikyin, ku ja jam jade'en yja'attit choondit. ⁷ Pø ja'axi ja tønidoondi jøts ja jade'en tmiwidejtidi ja Dios kyajpxy, jade'ents ja ka'ap tkupøkti ja pudøjkin midi ja jaa'y ja møøjyidip pøn jaty tkanija'widipnim ja Dios. ⁸ Patyts adøm xpaat'ajtyindi jøts ja ndyim-byudøjkandit ku ja jade'en tmiyø'dyidi tminaxti ja y'øy-bi ja tyiiby.

Ka'ap y'øjja'y'aty ja mixy Diótreres

⁹ Tø meets ja nøky ndanijayi jøts mee ndukmadø y'øbi winmaa'ñ, ja' ku ja mixy Diótreres tkamøjpik-

ta'aky ja n'ayuujk ja n'ana'amin, ja'ats ne'egi kø'øm nabyiktaajkip windsøn jøts niwine'enin øts ja xkami-madø. ¹⁰ Paty ku øts wyinaty nniikxy, møk øts ja ndawingugajpxit ku adøm ja xwingajpxyindi xpa-gajpxyindi ku ja xnidaay'ajtyindi. Nayide'ents ja tkada-jotkujk'aty, yjaaktyimy'ane'empy ja myigu'uk ja', jøts ja ka'ap tkupøktit pøn jaty tmija'ttip tmidso'ondip ja Dios kyajpxy, pønts ja jade'en tjagabadunwamp, jatyits ja tpawøpy jøts ja ka' t'uktuktatøjkiñi ma ja Dios kyajpxy yikpatmadø.

¹¹ Migu'uk Gayo, nijuuni jade'en xkatu'unt sam ja ka'ødyumbi ttuñ, tum ja øybi mdu'ump. Pøn jade'en øy jaa'y'ajtp, ja'ats ja Dios ja'ajtyip, pønts ka'øy'ajtp, ja'ats idø'on tka'ejxp tkanija'wip ja Dios.

Janch øyjaay'ajtp ja Demetrio

¹² Øy tsuj yiknimadya'aky ja Demetrio. Ñanky'ejxip ku ja tpaduñ ja y'øybi ja tyiiby. Nayide'ents øø nwaami, nyiktiidyøjkip øøts ja nayide'en, pø mnija'widipxi ku øø ka' ndaayi.

Ja kajpxpoo'kxin midi ya'at nøky tyagugøjxip

¹³ Maynim øts ja winmaa'ñ nmøødi midi me nduk-madoowampy, jøts ka' mets ja nugo ndanijayiwy'añ; ¹⁴ ndyimñinøjkxwampy me kø'øm jøts ixy windani nnagyajpxindit.

¹⁵ Øy yikxon xyiknaxt. Ixyam mmigu'uk mdaniguexyiyi ja kajpxpoo'kxin pøn jaty yam tsi-naadyip. Tunts ja may'ajt jøts nayide'en xkajpxpoo'kxt pøn jaty jam nmigu'uk'ajtyindip.

JUDAS

Ku ja Judas tñijayi pøn jaty ja Dios tø twi'ixy

1 Judas'ajtp øts. Øts ja Jacob nmiga'ax'ajtpy. Nmi-dumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atyyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti. ² Mbaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaay'atwamp

³ Meets migu'uktøjk, o meets ja nøky kawinaak ojk tø njadanijawiyaa'añ sa dø'øn y'ejxi tyiyi ja nits'o'ok'ajtin midi njagyejpyindip, ixyamts mee nnijayi jøts tu'ugyi xyik'ettit ja mjanchja'win midi ja Dios tu'ugyi tø xmø'øyim, ku ja xja'ajtyindi. ⁴ Jabi tøxi ja jaa'y jam tmidøki ja win'øø'nin jøts meets ja mdukpadun-wa'añidi midi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaatt sam pyaat'atyiyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' tto-sjkidi pøn xja'ajtindip møøt ja nwindson'ajtim Jesu-cristo.

⁵ O meets ja xjanijawi, nduknijawiywampy meets ja jadigojk jøts ku ja Dios Teety ojts tyik'awa'atspidsimy ja Israelit jaa'y jam Egipto, xjats tyikwindigø y ja' pøn ja kamibøjkiyi kabaduujniyi. ⁶ Jøts nayide'en ja ankilistøjk winaaqin ja yja' ka' t'ukpadunidi sam pyaat'atyiyi, Diosts ja tø myachi jøts ja tø pyikta'agyiyi agootstujpy, jam ja y'awejxti ku ja tiidyyunin mye'ent. ⁷ Nayide'ents ja yjajtmidi ja Sodoma kajp jøts Gomorra kajp, jøts midi jaty jam kajp wingon ejttø. Øy sa y'adøtstøø, yaa'dyøjk namyøøt'ajtidip tukyaa'dyøjk, tø'oxyøjk namyøøt'ajtidip tuktø'oxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaadyidi mā xemikøjxp tyø. Jade'ents yø xuk'ijxyimp xukni-ja'wimp jøts ka'ap jade'en n'adøøtsint.

⁸ Øyi tjanijawidi pøn meets ixyam nugo mwini'øø'nip, kyø'øm winmaa'ñjotpy ja jade'en ttundi ku ja kya'øy-jaa'y'atti jøts ka' tmøjpikta'akti ja Dios kyutujk. Nugo twindsø y ja ankilistøjk midi ja Dios myøøtsinaapy. ⁹ Janch wenk idø'øn ja Dios yø'øbi jaa'y twindsowdi, nika'ap ja møj ankilis Miguel twindsøø y ja miku' jade'en ne'egi, ku ja Moises ñine'kx tyiktsepjajtidit sud-so dø'øn ja yiktu'unt. Ne'egi yide'eñi ja'ayi tñimaay, "Dios paat'ajtiyip pøni sa ja mdunwa'añi." ¹⁰ Yø jaa'y midi mwini'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø

jade'en y'adø'øtstit ejxim jiyujkin, kø'ømts yø nugo jade'en ñankwyindigø yidi.

¹¹ Ayo'ombaattip ja'adi ku nay ja' tpadundi sam ja Cain yjaa'y'ajty ku ja myigu'uk ja tyik'ø'jky. Tundiip nayide'en sam ja Balaam jøts ja meeñ patp tjawidi. Jade'en nøjx wyindigø ydi sam ja Coré ku y'ookøxti ku ja Dios tmidsepøjktøø. ¹² Nugo mdsø'dyuniidi meets mā mee mgaadyi m'uukti tukpabøjkpitøjk, ku meets yø ka'ap mnimiñidi amumjoojt, jøts ku yø nugo ku'uxy kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'ejx'ityidi, ka'ap ja t'ixy pøni ti ja tø yiktaguwanidi. Jade'en ja'adi ejxim ja yoots n'ejxint midi ka' tyu'uy, jøts nayide'en ejxim tu'uk ja tsaa'mguipy midi katøømip, øy ja tyøøm'ajtin ja tjapaaty, windigø y y'ejtnidipts ja jadi'iñi.

¹³ Tum ja ka'øybi tyundiip jøts ne'egi o sa ty-imy'adø'øtswa'andi tsø'ødyumbim. Jade'ents tø tyu-u'tigøødyi jøts xemikøjxp jap y'ettit agootstujpy.

¹⁴ Ja møjjaa'y Enoc pøn myiwixujk najtskaxi, ku ja Adan jawyeen, ja' ja Dios kyugajpxy'ajit jøts yide'en tni-gajpxy ja ka'øy jaa'y, jøts wyaañ: "Jøts ø n'ijxy ja nwindson'ajtim ku ja mil'ampy tmøøtmiñ ja pyabøjkpitøjk, ¹⁵ jøts pøky pyayø'øwya'añ pøn ka'øyjaa'y'ajttip, pøn tø tyundigø ydi kyajpxigø ydi jøts ku tø twindsowdi ja nwindson'ajtim." ¹⁶ Yø'øbi jaa'y nugo ña'amdi nugo pyagajpxti, ja y'øy'ajtin yø nugo yjayiktunwandip jøts ja jaa'y øy tsuj nadyijyi tmigajpxti ja'agøjxp ku nugo tkajpxwyetswa'andi.

Ku ja pabøjkpitøjk yiktukmadø y sa yjaa'y'attit

¹⁷ Meets migu'uktøjk, ja'myatsti sa ja nwindson'ajtim Jesucristo kyudanaabyi mdukmadoojidøø ¹⁸ ku wyandøø yide'en: "Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtip tka'ø-gyajpxtip ja Dios yja'. Ka'øyjaa'y'ajttip ja' jade'en sa ja kø'øm ñadyamidsøkyidi." ¹⁹ Yø' nugo tyikwinmaa'n-mya'atwamp ja jaa'y; ja'ayi chojktip ja kya'øybi jøts ka'ap Espiritu Santo ja tmøøt'atti.

²⁰ Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espiritu Santo mbudøkiyidip. ²¹ Xtsojkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njøp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

²² Yikjotkujk'atti ja' pøn pyamaapy pyadajpy pøni midi'ibi pyabøkp. ²³ Tuu'mo'odi kajpxwejt ku tyundigø ydi jøts ka'ap ja ayo'on tpaattit; jøts xpa'ay-

o'ot nayide'en pøn ka'øyjāā'dyi, øyim mnay'ejx'etidit
kø'øm, jøts ka'ap jade'en xu'undit sām ja'adi.

Ku ja Judas tkajxā'aky ja Dios jøts tyikjøpkijxy ja ñøky

²⁴ Tu'uk ja Dios møj, pøn tnijā'wip, pøn xyiknit-
so'ok'ajtimp, ja'ats ja myøk'ajtin xa'ejx'ejtimp jøts ka'

ndundigø'øyint, jade'en'ampyts agujk jotkujk xukwin-
guwā'jka'ant ja' wyindump, ku niti pøky
ngamøøt'ajtin. Ja'ats tmøøt'ajtp ja øy'ajtin ja
møk'ajtin nwindøn'ajtim Jesucristo køjxp, jaayip ku ja
tyiktso'ondākijxy tuki'iyi, jøts kunim ja nayide'en
tyikjøpkøxt. Jade'en idø'øn ja y'ejxi tyiyi.

APOCALIPSIS

Ku ja Jesucristo ttuk'ijxy ja Juan sã ja nãxwii'ñit yjatt

1 Yã'at idø'on tiy'ajtin midi ja Dios Teety tyuk-madoow ja Jesucristo, jøts ja pyadumbi pyabøjkpi ttuk'ext ttuknijawit sã nøjkx yjatt kyubatt tsojk ya nãxwiiñ. Nay øts ja tiy'ajtin tuki'iyi tø xuk'ixy tø xuknijawit sã tu'uk y'ankilis tø xukmigajpxy. ² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadø.

³ Tya'øy'ajtidip ja Dios kyunuu'kxin pøn yã'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'on jøts jade'en yjatt sam yø nøky wyã'añ.

Ku ja Juan tnijã'ayiyii'ñ pøn jaty ja Dios tjanchjã'widip ja niwixujkpi kajp

⁴ Øts Juan, øts meets yã'at nøky ndanija'ayip pøn ja Dios tjanchjã'widip, ja niwixujkpi kajp midi jam Asia y'etjotp. Paat meets ja kunuu'kxin øy'ajtin midi ja Dios yajkpy, ja' midi xemikøjxp jujky'ajtp, nayide'ents mgunuu'kxidit ja niwixujkpi ja'win midi møøt y'ity ja Dios Teety. ⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yujkpyøjkøjmi jap oo'kpi jutjøtpy. Ja'ats nayide'en tnigutujk'ajtp niduki'iyi ja møj windsondøjkti yã nãxwiiñ. Nayide'en ja Cristo xpa'ayø'yimp sã tø xyikpøkwyãajchim ku tø wyidsuñ wyidaxy adøm nbøkyøjxp. ⁶ Tøts ja xpiktaajkyim jade'en øyjaã'y møjãã'y, jøts nbadu'unindit ja Dios Teety yja' midi tyeety'ajt nwindson'ajtim. ¡Wan tjã'myechim xemikøjxp ja Dios y'øy'ajtin myøk'ajtin! Jade'en idø'on ja yjatt.

⁷ ¡Meets, uk'ejxti ukmadowdi, jade'en idø'on ja Cristo mye'ent yootsjøtpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombãajti kruskøjxp; janch yã'axtip janch jã'idyip ja nãxwii'ñit jãã'y ku jade'en t'ejxtit. Jade'en idø'on ja yjatt.

⁸ Yide'en ja Dios Teety wyã'añ pøn ja myøk'ajtin møj, jøts pøn xemikøjxp jujky'ajtp: "Øts idø'on ja tso'on-daajkin jøts øts nayide'en ja jøpkøjxin'ajtin nyajkpy."

Ku ja Juan t'ijxy ja Cristo

⁹ Øts Juan, meets nmigu'uk'ajtpy ku ixyam nayide'en ngu'ayo'ombãajtindi ja nwindson'ajtimgøjxpit, paty adøm xmø'øyim ja øy'ajtin ja tudã'aky'ajtin jøts ja xyik'ejtint mã ja kyutujk xanatanãã'yimp. Jam øts wyi-naty ndsumchøøni mã txøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwã'kxi

jøts ja Jesucristo yja' nnigajpxi. ¹⁰ Domingi xøøw wyi-naty ku øts ja Espiritu Santo adsu'jky xatøki, jøts kumaa'yjøtpy møk øts xjiguyãaxi ejxim tu'uk ja puxujx, ¹¹ yide'en ja wyã'añ:

—Øts idø'on nyiktso'ondaajk tuki'iyi jøts nay øts nyikjøpkøxp. Midi jaty m'ejxp mnijawip, tanijayi pøn ja Dios ja'ajtip mã niwixujkpi kajp jam Asia y'etjotp. Ja' xyøøw ja kajp: Efeso, Esmirna, Pérgamo, Tiatira, Sardis, Filadelfia jøts Laodicea.

¹² Xjats n'ejximbijty pøn øts xmigajpxp, jøts n'ejxpãaty wixujk ja kandleeri midi tum oori. ¹³ Jam wixujkpi kandleeri kujk'am n'ijxy tu'uk ja jãã'y jade'en sam adømin, jade'en ja wyet tyek'ok'am paat kyidã'aky. Tum oori ja chum kyaxi'iky midi jã'tp kyachwiiñ. ¹⁴ Ja kyubajk, janch amuum poop ja wyãay kyaxi'iky ejxim ja poop pixyin, ejxim tsãp'øøpkyin, jøts ja wyeen jade'en kyaxi'iky ejxim jønyowin. ¹⁵ Ja tyeky, jade'en kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kya-jpxy, møk idø'on nmadoo'wint, jade'en ejxim ja møj nøø y'iichin. ¹⁶ Jam y'agã'ngyøjøm tmach'ity wixujk ja mããdsã', jøts y'ããwjøtpy pyidsimy tu'uk ja yøñchujx midi janch jøpxuu'ñ jøts adsow jøøjp. Jade'en kyaxi'iky ja wyeen ja y'ããw ejxim ja xøøw møk y'añin.

¹⁷ Ku øts n'ijxy jade'en, winets øts øjts øøky nayjawiyyi nnãxkidã'aky ja' tyekyøjøm, jøts øts øjts y'agã'ngyø' xanixajy jøts ø xniããy:

—Kidi mdsø'øgi; øts idø'on, tø nyiktso'onda'aky tuki'iyi nayide'en sã nyikjøpkøxt. ¹⁸ Jujky'ajtp øts idø'on øy tø nja'øøky, xemikøjxp njujky'aty jøts øts ja møk'ajtin njagyeypy, jøts øts nyikjujkyøkt pøni pøn tø y'ookti tyigøydi. ¹⁹ Jaadyangøx tuki'iyi midi ixyam m'ijxpy, midi ixyam mnijã'wip, jøts midi jatwamp. ²⁰ Jade'en idø'on ja twandijy midi tø x'ixy, ja wixujkpi mããdsã' n'agã'ngyøjøm jøts ja wixujkpi kandleeri nayide'en: ja wixujkpi mããdsã', yø' twandejp pøn ø ngugajpxy'ajtpy mã øts ja njanchjã'wibitøjk jamdi mã wixujkpi kajp jam, jøts ja kandleeri ja janchjã'wibitøjk ja'adi, pøn jam'ajttip.

Yã'at ayuujk ja nwindson'ajtim tyaniguejpxy ja yjãã'y mã ja wixujkpi kajp: Yide'en jawyeen yiktanijã'ayiyii'ñ ja Efesit jãã'y

2 'Nijayi øts ngugajpxy midi jam Efeso sã øts ixyam nnigajpxy: "Yide'en ja wyã'añ pøn jam y'agã'ngyøjøm tmach'ejtp ja wixujkpi mããdsã' jøts pøn jam tanaapy wixujkpi kandleeri kujk'am: ² Wã'ats ø nnijãwiti tuki'iyi pøni ti mdumpy; nnijã'wip ø tuki'iyi sã

møk mduñ øts køjxp, jøts sã mduda'aky'aty, nayide'en ø nniãawi ku xkagupiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyiy'ajtin wyingaxi'iky, nugo ja wyindaayidi.

³ Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaadi øts køjxp, jøts ka'ap ja jotkøjxin tø xmøøt'aty. ⁴ Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojknì sam xyiktso'ondaajky. ⁵ Paty ø nwa'añ, ja'myats pøni mã tø mduu'digø, jøts xyiktigatst ja mwinnmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandeleeeri midì mmøøt'ajtpy. ⁶ Ots idø'on yjade'eni, mjagejpy nayide'en ja øy'ajtin ku nayide'en xkatsøky ja nicolaítas y'ixpøjkin sam ø ngatsøkyin. ⁷ Madowdi yikxon sam ja Espíritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadãkp ja miku' yja', ja'ats nmo'op ja øy'ajtin xemikøjxp mã Dios y'ity."

Yide'en ja Esmirnit jaa'y yiktanija'ayiyi'ñ ja ayuujk

⁸ Nijayi nayide'en øts ngugajpxy pøn jam ejtp mã øts njanchja'wibitøjk jam Esmirna kajpjtøp: "Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn o'jk jøts yjukpyøjkojmi oo'kpi y'agujkpy: ⁹ Nniãa'wip ø tuki'iyi pøni ti mdumpy; pøni sã m'ayøw mwinnmay, øy yø meeñ kyidyimy'ity, tø ja Dios mdsuj'ixxy mdsujawiyi ja' wyingujk. Nniãa'wip øts ku mjemigajpxy mдемigajpxy winaagin pøn nugo nadyejip israelit jaa'y, yø' yide'en nugo tjayikmajadã'akwajnidip ja miku' yja', pø ka'axi Dios ja tja'aji. ¹⁰ Kidi mdsø'ogidi pøni sã mjattit mgubattit; yø miku' mnankchumwajniyidip jøts nidu'uk nidu'uk myikjot'e-jxtit, jøts xmajtstu'uttit ja Dios yja'; øy yø mjayik'etidit majk xøøw puxøjkjøtpy, tu'ugyi ja mwinnmaa'ñ xyik'ettit o mjadyimy'ookti, øts mee nmo'op ja jujky'ajtin midì xemikøjxp. ¹¹ Madowdi yikxon sã yø Espíritu Santo tni-gajpxy pøn ja Dios ja'ajtip, yide'en ja wya'añ: Pøni pøn tmimajadãkp ja miku' yja', ka'ap ja tpaatt t'ext ja ayodãajk. Ka'ap ja y'anmija'win sã yjatt."

Yide'en ja Pérgamit jaa'y yiktanija'ayiyi'ñ ja ayuujk

¹² Nijayi nayide'en øts ngugajpxy pøn jam ejtp mã øts njanchja'wibitøjk jam Pérgamo kajpjtøp: "Yide'en ja wya'añ pøn tmøøt'ajtp ja yøñchujx yjøpxu'ñ adsow jøøjp: ¹³ Nniãa'wip ø tuki'iyi pøni ti mdumpy jøts ku jam ja miku' møk y'ane'emy mã mdsøøni, ka' xja'dyigø ja mjanchja'win øy øts njanchja'wibitøjk yjadyimy'ø'jky pøn txøøw'ajt Antipas, pøn øy tsuj xpaduujni øts n'ayuujk. ¹⁴ Ya'at øts n'øy'ixxy nga'øy'ixxy pøni ti mdumpy: jam meets winaagin jam Pérgamo, pøn tka-majtstu'utwãmp sam ja Balaam ja y'ixpøjkin jekyip tyik'ity, ja'ats ojts t'agajpxi ja Balac jøts ttukmado'ot ja israelit jaa'y sã tyundigø'ødyit. Ojts ttukmadøw jøts tjøø'kxtit midì tø wyinaty yiktamiyøxy ja mãxandsaa, jøts nayide'en o sã pøn ñamyøøt'atiyidit. ¹⁵ Nayide'en meets jam winaagin pøn tkamajtstu'utwãmp ja nicolaítas y'ixpøjkin midì øts ngatsøjky. ¹⁶ Paty ø nwa'añ,

jøts tyiktigatstit ja wyinnmaa'ñ; pøni ka'ats, tsojks ø nnøjkxt jøts ndatseptu'unt ja nyøñchujx midì pidsømp n'aa'wjøtpy. ¹⁷ Madowdi yikxon sã yø Espíritu Santo tni-gajpxy pøn ja Dios ja'ajtip: Pøni pøn tmimajadãkp ja miku' yja', ja'ats nmo'op ja jii'kxy midì yiktejp maná midì yu'uch ejtp; nayide'ents ø nmo'ot ja mutsk tsaa'u'nk midì poop, japts tu'uk ja xøøw kyøxja'ayi midì jemy jøts midì ka' yik'ixy yikniãawi, ja'ayi tu'uk tni-ja'wip pøn ja yikmøøpy."

Yide'en ja Tiatirit jaa'y yiktanija'ayiyi'ñ ja ayuujk

¹⁸ Nijayi nayide'en øts ngugajpxy midì jam ejtp mã øts njanchja'wibitøjk jam Tiatira kajpjtøp: "Yide'en ja Dios U'nk wya'añ pøn ja wyeeen jade'en kaxø'kp ejxim ja jøn'ayowin, jøts ja tyeky ejxim tu'uk ja pujx midì janch tøø'kxp tsamãmp: ¹⁹ Nniãa'wip øts tuki'iyi pøni ti mdumpy, sã mmigu'uk xpa'ayø, sã ja Dios kyajpxy xpaduujni, sã xpudøki pøn ti ka'ejttip jade'en sã mdu-da'akyjaa'y'aty. Tø øts nja' xyikmiweni xyikaja'aji jawaani øy yam, ka'ap jade'en sam jawyeen tø xyiktso'onda'aky. ²⁰ Ya'at ø n'ijxpy nga'øyja'wip mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'ñiñ øts ja njanchja'wibitøjk kuk idø'on øy o sã pøn ñamyøøt'atiyit jøts ku tjøø'kxtit midì tø yiktamiyøxy ja mãxandsaa. ²¹ Tøts øts nayide'en njanøjmi jøts tyiktigatst ja wyinnmaa'ñ sam pyaat'aty, ka'ats ja tpadunwa'añ: ka' tmajtstu'utwa'añ ja kya'øy'ajtin. ²² Øts ja nwanu'ump sã ja yuu ja pa'am pyaadiyit, nayide'en niduki'iyi pyaatkøxyit ja ayo'on pøn jaty møøt tø tyundigø. ²³ Nwanu'umpts øts nayide'en ja y'u'nk ja y'unaj'k pøn ka'ødyø'øxy'ajttip. Jade'en idø'on t'ejxtit tniãawidit niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinnmaa'ñ tjagejpy y'am yjotp. Nidu'uk nidu'uk meets ndiidyu'undit pøni sã jaty pøn tø y'adø'øtsti. ²⁴ Ka'ap øts sã nwa'andijy ku ja ka'ødyø'øxy yja' tø xkabaduujni ku ja miku' kyootswinnmaa'ñ tø xkayikmajadãajkidi. ²⁵ Padun'etti xemikøjxp ja winmaa'ñ midì myiktundip kunim ø nme'ent. ²⁶ Pøni pøn tmimajadãkp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajtin jøts tniwindsøn'att niduki'iyi ja naxwii'ñit jaa'y. ²⁷ Yø'øbi møk'ajtin midì øts ja Dios Teety tø xmø'øy, nay yø'øts mdaba'ejtjip md-abayø'ødyip ja naxwii'ñit jaa'y. ²⁸ Nayide'ents meets nmo'ot ja øy'ajtin jøts meets møøt n'ett xemikøjxp. ²⁹ Madowdi yikxon pøni sã jaty ja Espíritu Santo tnojmi ja janchja'wibitøjk pøn ejtp jam mã niwixujkpi kajp."

Yide'en ja Sardisit jaa'y yiktanija'ayiyi'ñ ja ayuujk

3 Nijayi nayide'en øts ngugajpxy pøn jam ejtp mã øts njanchja'wibitøjk jam Sardis kajpjtøp: "Yide'en ja wya'añ ja' pøn tkajxp ja niwixujkpi kugajpxy jøts midì tpøkjø'kp ja wixujkpi mãgdsã': Wa'ats ø nniãawi pøni ti mdumpy. Ots myiktijy myikwa'añ ku øy tsuj mduñ, nniãa'wip øts ku ka' mduñ. ² Jawidi, nay'ejx'etidi, jøts ka' jadi'iñi mwindigø'ødyit; n'ijxpy nniãa'wip øts midì

mdumpy ku ka'ap tyiy'aty Dios wyindump. ³Ja'myatsti ja øy'ayuujk ja øgyajpxy midi tø xmadowdi tø xukpøkti; nay yø' mbadu'undip jøts ja mwinmaa'ñ xyiktigatstít. Ku xkату'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xnijawit pøni juuni nme'ent ejxpi payø'øbyi. ⁴O meets yø'øbi winmaa'ñ tø xjababiky, jamts winaaqin pøn øy wa'ats jaa'y'ajttip, ja'ats ø møøt n'ity xemikøjxp sam pyaat'aty. ⁵Pøni pøn tmimajadap ja miku' yja', ja'ats ja wa'ats'ajtin tsuj'ajtin tpaatp, ka'ats øts ja xyøøw nyiktigøjyi midi tø yikja'ay jap nøkyjøtpy ma jap y'ity ja jaa'y xyøøw pøn jujky'ajttip xemikøjxp. Ngajpxkaxø'jkijxy øts ja jam Dios Teety wyindump jøts jam y'ankilis wyindump. ⁶Madowdi yikxon pøni sa jaty ja Espiritu Santo tnøjmi ja janchja'wibitøjk pøn ejtíp jam ma niwixujkpi kajp."

Yide'en ja Filadelfiit jaa'y yiktanija'ayiyiñ ja ayuujk

⁷Nijayi nayide'en øts ngugajpxy pøn ejtp jam ma øts njanchja'wibitøjk jam Filadelfia kajpjtóp: "Yide'en ja wya'añ ja' pøn øy'ajtp wa'ats'ajtp, ja janchpi ja tiiby, nayide'en ja møk'ajtin tjagyepy jade'en ejxim ja rey David y'ijty yikutuky: Ku ja tuu' nyik'awa'ach ka' pøn mibaat tyik'awa'atst. ⁸Nnija'wip øts tuki'iyi pøni ti mdumpy. Tøts ja mduu' nyik'awa'ach midi ka' mibaat pøn tyik'adukt; øy ja møk'ajtin waani tø xjagyepy tøts ja n'ayuujk xmøjpktaajki, ka'ap ø tø xkagupiky. ⁹Jamts winaaqin pøn nugo nadyejip israelit jaa'y jøts øts nja' ñadyijyi xyiktuujni. Ka' tyiy'ajtin, taa'y ja pyiktakpy ku ja miku' yja' tyiktuujni, nay øts ndukupøkp jøts mwind-sø'øgyit, m'ejkapiyit ku mee ndsøky. ¹⁰Tø øts n'ayuujk xpaduujni ku øy tuda'aky mjaa'y'atti sa dø'øn nda'ane'emy, nayide'ents nbøkji'kpy n'ejxi'kpyts meets m'øy'ajtin. Jats yik'ext ku ja møk ayo'on ku ja tiidyu'unin ñaxkida'akt jøts ja payø'øyin tyunit pøn jaty tø y'øy'atti ya ñaxwiñ. ¹¹Me'emp øts tsojk. Yik'etim yø mwinmaa'ñ jade'en sa tø xpaduñ, ka' pøn mibaat ja Dios yja' mbøjkxiyit. ¹²Pøni pøn tmimajadap ja miku' yja', ja'ats møjtkøkp ma ja Dios, nijuuni ja tkamajt-stu'uttit; nayide'ents meets ja Dios xyøøw ndawinja'att jøts ja kyajp midi yiktejp jemy Jerusalen, yø' tsoomp jam Dios wyingukp; ndawinja'apts meets njemxyøøw nayide'en. ¹³Madowdi yikxon sa yø Espiritu Santo tnøjmi pøn ja Dios ja'ajtip ma niwixujkpi kajp."

Yide'en ja Laodiceit jaa'y yiktanija'ayiyiñ ja ayuujk

¹⁴Nijayi nayide'en øts ngugajpxy pøn ejtp jam ma øts njanchja'wibitøjk jam Laodicea kajpjtóp: "Yide'en ja wya'añ ja' pøn tyakp ja tiy'ajtin, pøn tyiktso'ondakøjk tuki'iyi: ¹⁵Nnija'wip øts tuki'iyi pøni ti mdumpy, ku nugo ejxingøjxp øts nja' xpaduujni, ka'ap amumjoojt. jø'y'ajtp ku tu'ugyi xpadu'undit, pøni ka'ats, majt-stu'utkts øts! ¹⁶Kumi ka' xnijawidi pøni midi ndun-wandip, nugo mee møk xyikjotkixy, ndyimyajtstu'ut-wampy mee ne'egi. ¹⁷Nømp mee mwa'añ jøts ku meets jotkujk xyiknaxy, ku niti mgadigø'øxyi; ka'ats mnayjawiyi ku niti mga'ijtxyi, ku nugo wimbeets ku-goots xyiknaxy. ¹⁸Yide'ents idø'øn ja kajpxwejin

nmøø'y, jøts ø x'amido'ot xpøktso'ot midi øts nmøøt'a-jtpy, jade'ents xpaatp ja øy'ajtin, ja wa'ats'ajtin jøts ja ja'gyujkin. ¹⁹Jade'engøjxp meets icyam møk n'ane'e-my ku mee nba'ayøy. Møk xwindanidit jade'en sam øts xmijøtimbettit. ²⁰Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmadøjip jøts øts nja' xkupøjkit, ejtpts øts ja møøt n'ett. ²¹Pøni pøn tmi-majadap ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tø xmø'øy ku øts ja miku' yja' nmimajadaajki, møøts øts ja Dios Teety n'ity. ²²Madowdi yikxon sa ja Espiritu Santo tnøjmi ja janchja'wibitøjk ma jam ja niwixujkpi kajp."

Sa ja Dios Teety yikajxa'aky jap tsajpjøtpy

4 Ku tø jade'en y'ukjaty jøts n'ejxpaaty ja tsajp y'awa'adsi ejxim ja tøjkaawin; jøts ja ayuujk nmadøøy møk sam ja trompeta'an midi øts jawyeen xmigajpx, jøts øts xnimaay:

—Pat yam, jøts nnanky'ejxit tuki'iyi sa yjatwa'añ kyubatwa'añ.

²Tø øts wyinaty ja Espiritu Santo xatøki, kumaa'yjot-py n'ixy jade'en tu'uk ja tsinaabyajt jap tsajpjøtpy ejxim ja møj windsøn yja'ajin, jamts chøøni tu'uk ja jaa'y ³midi jade'en kaxø'kp ejxim ja tsaa midi janch tøø'kxp tsamamp, sa ja jaspe tsaa, uk ja cornalina tsaa; jamts i'jch tø ñawyidityi, jade'en tyi'kxy sam ja es-meralda tsaa. ⁴Ma ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts ja møj-jaa'dyøjk ni'ee'pxmaktaxk chøønidit, amuum poop ja wyetti jøts tkujup'atti ja koroni janch amuum oori. ⁵Møk ja anaaw ja widsujk pyidi'iky ma møj tsinaabyajt jam; nay jam wyingujk wixujk ja jøøn tyøøbyiky, ja niwixujkpi ja'win idø'øn ja' midi ja Dios Teety møøt y'i-ty. ⁶Nay jam møj tsinaabyajt wyindump kyaxi'iky tu'uk ja mejy, janch wa'ats janch tøø'kxp ejxim keega'an.

Jøts jam nayide'en ja møj tsinaabyajt ñawidityi namaktaxk ja jiyujk midi may ja wyeen tmøøt'ajttip, kaxø'kp yjøkki'py kaxø'kp wyinduyj. ⁷Ja myidu'ukpi jiyujk, jade'en ja kyaxi'iky ejxim tu'uk ja kaajin: ja myi-majtskpi jiyujk, jade'en ja kyaxi'iky ejxim ja tsakaajin; ja myidigøøkpi jiyujk, jade'en ja wyeen ja y'aaw kyaxi'iky ejxim ja jaa'yin; jøts ja myimaktaxkpi jiyujk kyaxi'iky ejxim ja weejs kyakwidityin. ⁸Tu'uk jaty ja jiyujk tudujk ja kyank tmøøt'aty, may ja wyeen nayide'en kyaxi'iky yjøkki'py jøts wyinduyj; xinaxy tsunaxy ja Dios tja'my-atsti jøts ñøm'etti:

Janch øy janch wa'ats me Dios Teety,

Mets tu'ugyi ja møk'ajtin mjagyeypy,

jøts xemikøjxp mjujky'aty.

⁹Xjats ku ja jade'en ja nimaktaxkpi jiyujk ttundi, ku ja jade'en tja'myatsti ja' midi xemikøjxp ejtp, midi tsi-naapy møj tsinaabyajt køjxp, ¹⁰xjats ja ni'ee'pxmak-taxkpi møjaa'dyøjk jaty ñagyuxendya'agyidi, jøts ja ky-oroni tkidyakti jam møj tsinaabyajt wyingujk jøts wya'andi:

¹¹Mets Dios Teety, mets amuum møj sam pyaat'aty miykwindsø'øgit miykwijnawit.

Pø tæxi xyiktso'ondakijxy tuki'iyi mdsojkingøjxp jøts jade'en y'ett.

Ja nøky jøts ja Borreek U'nk

5 Xjats n'ijxy ja' pøn jam tsinaapy møj tsi-naadyajkøjxp ku jam tmach'ity y'aga'ngyøjøm tu'uk ja nøky abidity midi ja'ay jøtpy jøts ñikøjxp, wixujk weents ja cha'ayi, jøts ja jade'en y'aduky. ² Winets ø n'ijxy tu'uk ja møj ankilis jøts ja møk t'amidøy:

—¿Pøn paat'ajtip tyik'awa'atst yø nøky, jøts t'agø'øt-stu'utt yø seeyi?

³ Nipøn ja tkanadyaja'ejxyi tyik'awa'atst, ni tsajpjøtpy ni naxwiiñ ni naxpatkipy, nipøn ja tkawin'ejxwa'añ.

⁴ Xjats øts nyaaxni njiñi, nipøn kyayikpaaty pøn tyik'awa'atst ja nøky jøts yik'ext yiknijawit, nipøn ja tka'ukwin'ejxwani. ⁵ Xjats øts xnimaay ja møjaa'y tu'uk:

—Kidi mjanchya'axy, jaa tu'uk pøn tnigubajk'ajtp ja Judajit jaa'y, jøts pøn ja rey David y'apip, yø'øts tø myajada'aky jøts t'agø'øtstu'utt ja wixujkpi seeyi jøts tyik'awa'atst ja nøky.

⁶ Xjats ø n'ijxy tu'uk ja Borreek U'nk tyani ma møj tsi-naabyajt jam, ja' kyujk'am ma ja møjaa'dyøjkti, jøts ma ja nimaktaxkpi jiyujk jam. Jamts ja yik'ijxy kyaxi'iky sam ti yjaty kyubety y'ayo'ombaaty. Wixujk ja wyaj tmøøt'aty jøts wixujk ja wyeen; jade'en yø tijy yø wixujkpi ween sam ja niwixujkpi ja'win midi ja Dios tø tkexy ya naxwiiñ. ⁷ Xjats ja Borreek U'nk tninijxy pøn wyinaty tsinaapy møj tsinaabyajkøjxp jøts tpojki ja nøky midi wyinaty myøøt'ajtpy y'aga'ngyøjøm. ⁸ Ku ja tpijky ja nøky, winets ja nimaktaxkpi jiyujk jøts ja ni'ee'pxmaktaxkpi møjaa'dyøjk ñagyuxendyajkidi jam Borreek U'nk wyingujk. Nidu'uk nidu'uk ja møjaa'dyøjk tmøøt'atti ja kow midi yiktejp arpi, jøts nayide'en tkondi ja poom tøy'iñ, tum oori ja', jade'en yø poom tijy sam ja Dios'ajot'ajtin midi kyajpxtip pøn jaty ja Dios Teety ja'ajtip. ⁹ Jamts yide'en ja jemy iyy tyikwandøø:

Mets idø'øn mbaat'ajtip yø nøky jøts yø seeyi xkøøtst; ja pø tøts xniwanguixy niduki'iyi ja jaa'y, o midi kajp o midi ayuujk,

jade'engøjxp ku tø m'ayo'ombaaty ma tø mdsuñ tø mdaxy.

¹⁰ Tø øøts xyikmøjtøki jøts øø nbadu'unt sam ja Dios tsøkyin, jøts øø nwindson'att ja naxwiiñit.

¹¹ Winets ø n'ixy ja ankilis namay tni'awidetti ma ja møj tsinaadyaajk jam, nay jamts wyinaty ja nimaktaxkpi jiyujk jøts ja møjaa'dyøjkti, ¹² møk y'øøwdi tum jade'en jøts wy'a'andi:

Janch øy ja Borreek U'nk midi tø y'ayo'ombaaty, paat'ajtip jøts tpaatt ja møk'ajtin ja øy'ajtin, ja wejin ja kajin.

Paat'ajtip yikwinjawit yikwindsø'øgit.

¹³ Xjats nmadøy nayide'en ku y'øøwdi niduki'iyi ja naxwiiñit jaa'y jade'en tsajpjøtpy naxkijxy, jøts jade'en øy ja ma jøts wy'a'andi:

Janch øy janch møj ja Borreek U'nk,

paat'ajtip yikwinjawit yikwindsø'øgit xemikøjxp.

¹⁴ Xjats nayide'en ja nimaktaxkpi jiyujk wyandøø:

—¡Ots jade'en!

Xjats ja ñi'ee'pxmaktaxkpi møjaa'dyøjk niduki'iyi ñagyuxendyajkøxidi jøts twindsø'øgidi ja Dios.

Ja wixujkpi seeyi

6 Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi, jøts nmadøøy tu'uk ja ñimaktaxkpi jiyujk ku møk yjanchwi-na'añ jade'en sam ja anaawin, jøts yide'en wy'a'añ:

—¡Men x'uk'ixy!

² Jøts ø n'ijxy tu'uk ja poop kawaa'y, pønts ja tyatsi-naajyip, arki ja tu'uk pyagajpy. Tu'uk ja koroni yikmøøy ku tø myajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'agø'øt-stu'uty, jøts ja myimajtskpi jiyujk wyaañ:

—¡Men x'uk'ixy!

⁴ Jøts jadu'uk ja kawaa'y kyaxi'iky, tsajpts ja' ñine'kx. Pøn ja ttatsinaapy ja'ats yikmøøy tu'uk ja amøjtsujxyøñ jøts yiktanipijky jøts ja cheptu'unt, jøts niduki'iyi ja naxwiiñit jaa'y ña'ñbidøkøxyit, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'agø'øt-stu'uty, jøts ja myidigøøkpi jiyujk wy'a'añ:

—¡Men x'uk'ixy!

Winets ø n'ixy tu'uk ja yøk kawaa'y, pøn ja ttatsinaapy, tati'yin ja wyejts'ijtpy kyøjøm. ⁶ Jats ja ayuujk nmadøøy jam ñimaktaxkpi jiyujk kyujk'am, ku wy'a'añ yide'en:

—Wimbatp nøjx ja trigo jøts nayide'en ja cebada midi amuum tump; aceite jøts ja vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja myimaktaxkpi jiyujk wy'a'añ:

—¡Men x'uk'ixy!

⁸ Winets ø n'ixy tu'uk ja pu'ts kawaa'y, pøn ja ttatsinaapy ja'ats yiktanipøjk jøts ja yikjaa'y'oock. Ix'oojk ja pyamiñi pøn tkudanaapy ja ayodaajk. Xjats ja yiktaguwa'anøø jøts tyik'ayo'ombaatt jawaani kagujk-wa'kxy ja naxwiiñit jaa'y, jade'en'ampyts ja tyik'oock ku tkaxt ja tsep, ja yuu, ja pa'am jøts ja awa'an jiyujk.

⁹ Jats ja Borreek U'nk ja myimagoxkpi seeyi t'agø'øt-stuujty, jøts n'ijxy altajr patki'py may ja anmija'windi pøn tø tku'oogidi ja Dios yja'. ¹⁰ Ja'ats kajpxtip møk, jøts ja Dios yiknimaay:

—Janch øy janch wa'ats me Dios Teety, jøts xuñ ja tiy'ajtin. Juuninim xpayø'ty xiidyu'unt ja jaa'y pøn øøts tø xyik'øøky ya naxwiiñ.

¹¹ Jøts yikmøøy ja poop wet jøts yiknimaadyi jøts pyoo'kxtit y'awejtitnim øy winø'ønin. Wan tu'uk-namyukyidi ja migu'uktøjk pøn tku'ookwajnipnim ja Cristo yja'.

¹² Xjats ku ja Borreek U'nk t'agø'øtstuujty ja myidudujkpi seeyi, xjats ja tsaachmøk uyx ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts kyaxi'jky ejxim ja wa'ats tsajpts ni'jpyin, ¹³ jøts ja maadsa' kya'y naxkijxy, jade'en ejxim ja tsaachmøk poj tyikajtskø'øy ja ujts tøm. ¹⁴ Jøts ja tsajp jadi'iñi ñawya'kxkøjxniyi, jade'en ja yajtni ejxim ja

nøky jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi tyigatskøjxni ma ja y'uk'ijty. ¹⁵Xjats ja jaa'y kyakwidejtnidi, t'ixaabyi naxwa'knidi ja nayu'utstaajk, tyøjkiñøø tsaaj jutjøtpy tsaaj ankjøtpy øy ma. Jajttip ja windsøndøjk ja kumeendyøjk, ja møj ja mutsk. Jajttip ja soldadi wyindsøndøjkti, nayide'ents ja jaa'y pøn mijuy kamijuy tundip. ¹⁶Jøts wyaniidi ku ay-o'on jade'en t'ejxti:

—iWan ja kojpk wan ja tsaaj ne'egi xyik'o'jknindi jøts jade'en xka'ukwin'ejna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷Tøxi ja xøøw jade'en kya'pxy ku ja møj ayo'on jade'en yik'ijxy, nipøn ja jade'en tkamimajada'aky.

Ku ja Israelit jaa'y yikmøø'y ja ejxa'an pøn jaty ja Dios tyami'ejxip tyamidsojkip

7 Ku ja jade'en yjajty jøts ø n'ijxy nimaktaxk ja ankilis ku ja wyinaty tyani naxwii'ñit eskiini køjxp, jamts ja poj ja t'axajtuky jøts ja møk poj niwine'en kyanaxkida'akt naxwiingyijxy mejkyijxy, jøts ja aay jøts ja kipy kyapojwidett. ²Jamts ø n'ijxy jadu'uk ja ankilis xøbidsimbyi myiñ, jap ja Dios syeeyi tmøøt'ajtti pøn xemikøjxp jujky'ajtp. Nay ja'ats møk tnimaay ja nimaktaxkpi ankilis midi wyinaty tø yiktanipiky jøts tuki'iyi tyikwindigøøgyøxt tuktsajp'agida'aky, jøts wya'añ:

³—Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkøjxp nidu'uk nidu'uk, pøn jaty ja Dios yja' tpaduujnidip. Jaanims xyikwindigøøty ja naajx, ja mejy jøts ja aay ja kipy.

⁴Jade'en ø nnimadøy ku tukmagø'pxy ja wixijky myaktaxk mil tø yik'ejaxandi ja israelit jaa'y pøn ja ñimajtskpi y'apteety'ajttø. ⁵Nimakmajtsk mil idø'on yik'ejaxandi pøn tyatsk'apip ja møjaa'y Judá. Nimakmajtsk mil yik'ejaxandi pøn tyatsk'apip ja møjaa'y Rubén jøts nimakmajtsk mil nayide'en pøn tyatsk'apip ja møjaa'y Gad, ⁶nimakmajtsk mil yik'ejaxandi pøn tyatsk'apip ja møjaa'y Aser, nimakmajtsk mil yik'ejaxandi pøn tyatsk'apip ja møjaa'y Neftalí, nimakmajtsk mil yik'ejaxandi pøn tyatsk'apip ja møjaa'y Manasés, ⁷nimakmajtsk mil yik'ejaxandi pøn tyatsk'apip ja møjaa'y Simeón, nimakmajtsk mil yik'ejaxandi pøn tyatsk'apip ja møjaa'y Leví, nimakmajtsk mil yik'ejaxandi pøn tyatsk'apip ja møjaa'y Isacar, ⁸nimakmajtsk mil yik'ejaxandi pøn tyatsk'apip ja møjaa'y Zabulón, nimakmajtsk mil yik'ejaxandi pøn tyatsk'apip ja møjaa'y José, jøts nimakmajtsk mil yik'ejaxandi nayide'en pøn tyatsk'apip ja møjaa'y Benjamín.

Ja mayjaa'y pøn ja poop wet wyet'ajttip

⁹Ku jade'en nnimadøy jøts ø n'ijxy janch may jaa'y nikyamachooni. Choondi o magajp, o ti ayuujk tkajpxti pøni sa jadu'uk ja nidu'uk ja kajp ja y'ayuujk tjagyepy; jam twindanidi ma møj tsinaabyajt jøts nay jam ma Borreek U'nk, poop wet wyet'ajttip jøts tiixy'aay tkøñidi. ¹⁰Niduki'iyi dø'on tjajmyatsti ja Dios jøts møk wya'andi:

Yø Dios Teety xyiknitso'ok'ajtim, pøn jam tsinaapy møj tsinaabyajtkøjxp, nayide'ents ja Borreek U'nk.

¹¹Jamts ja ankilistøjk nawidity tnadanidi ma møj tsi-naabyajt jam, ma ja møjaa'dyøjk jøts ma ja nimaktaxkpi jiyujk, jøts ñagyuxendyaa'jkidi ja' wyingujkp ma ja møj tsinaabyajt jam; møj tjanchja'myajtsti ja Dios, ¹²jøts wyandøø:

Nmøja'wip øøts, njanchja'wip øøts Dios Teety. Mets ja møk'ajtin, ja ja'gyukin jøts ja øy'ajtin mmøøt'ajtpy xemikøjxp. Jade'en idø'on xemikøjxp y'e-xji.

¹³Jøts nidu'uk ja møjaa'dyøjk wya'añ jøts x'amidøøy: —zPøn idø'on yø'ødi ixja poop wetxøødi, ma dø'on yø choondi?

¹⁴Jøts ø nnimaay:

—Mets møjaa'y, nniija'wip mets yø'.

Jøts ø xnimaay:

—Yø' dø'on jap tø ñaxti ma ja møj ayo'on jam, ja Borreek U'nk ñi'jpy tø yikpøkwyaa'achidi. ¹⁵Paty idø'on jam y'etti møj tsinaabyajt wyingujkp ma ja Dios chøøni, jamts ja tpaduujnidi ja Dios yja' xinaxy tsunaxy; jøts ja pyøkjø'øgidit xemikøjxp ja' wyingujkp. ¹⁶Ka'ap ja ay-o'on t'uk'ejxnidit, kya'ukyu'ooknidit kya'uktøøjtsiñidit, ni an niti kya'ukpaajtniyidit, ¹⁷jade'engøjxp ku ja Borreek U'nk t'ejx'ity jøts ttukpaatwa'añ ttuk'ejxwa'añ ja wa'ats nøø midi xyikujky'ajtim xemikøjxp; nayide'ents ja Dios tyiktigøøty ja yjotmay'o'jkindi.

Ja myiwixujkpi seeyi jøts ja poomdøø'y'ii'ñ midi tum oori

8 Ku ja Borreek U'nk ja myiwixujkpi seeyi t'agøøt-stuujty, jøts kujkp hora'an y'amongøjxti niduki'iyi jam tsajpjotp. ²Nay jaty n'ijxy ja niwixujkpi ankilis midi jam tanaadyip Dios wyingujkp ku ja yikmøødyi nidu'uk nidu'uk ja puxujx. ³Jøts jadu'ukpi ankilis myiñ jøts jam tyanaay'øyiyii'ñ altajr wyingujkp midi tum oori, poomdøø'y'ii'ñ ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtip. ⁴Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip. ⁵Xjats ja ankilis tnixajiyii'ñ ja poomdøø'y'ii'ñ jøts tpiktaajky ujts ja jøndsabajk midi wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujk.

Ja niwixujkpi puxujx

⁶Xjats ja niwixujkpi ankilistøjk tjøp'ejxti ttax-uxwa'andi ja puxujx.

⁷Ku ja myidu'ukpi ankilis xyuujxy, jøts ja møk tuu myiñ jøts ja tøst jøts ja jøøn møøt ja ni'jpy ñaxki-daa'ky. Jade'en tyøøy ja naxwii'ñit jawaani kyagujk-wa'kxy, møøt ja kipy møøt ja ujts kyudigøøy.

⁸Ku ja myimajtskpi ankilis xyuujxy, winets yjawi tigati ñaxkidaajky jam mejjotp ejxim ja møj kojpkkin, ja'ats

jam tøbyøjk; jøts ja mejy wyimbijty jawaani kagujk-wa'kxy wa'ats ni'jpyin. ⁹ Jawaani kagujkwa'kxy ja jiyujk kya'ookøxti midi jam wyinaty tsinaadyip, jøts ja barki nayide'en wyindigøøp.

¹⁰ Ku myidigøøkpī ankilis xyuujxy, winets tu'uk ja maadsa' tsajpwemp kyatska'ay, tyøøp jade'en ejxim ja møj jøonin. Naxkidajky ma may ja møj nøø yø'ødyi jøts ma ja kom nøø pyidsimy. ¹¹ Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejt-naa ja nøø.

¹² Ku ja myimaktaxkpi ankilis xyuujxy, xjats ojts waani wyindigøøp ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøp.

¹³ Winets n'ejxpaaty tu'uk ja ankilis ñaxy tsajp kuj'am, jøts ja møk wya'añ:

—Meets naxwii'ñit jaaj'y, mjanch'ayo'odip meets ku xmodo'odit ja puxujx ku ttaxu'uxtit ja nidigøøkpī ankilis!

9 Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøøp ja ñi'awaajts ma ja møj jut jam midi nøjxk ayodaajk. ² Xjats ja møj jut tyik'awaajch xjats ja jok yikxon jap pyidsimy sam møj orn jøtpyin; jøts ja xøøw tyikwingoodsiña, ni poj niti tka'ukyikyø'øñi. ³ Japts jokjotpy may pyidsømdi ja møj mu' jøts tuki'iyi ja naxwii'ñit twinguyø'øyigyøjxnaa; jade'en ja yikejxy sam ja kajpyin jøts ja naxwii'ñit jaaj'y tyik'ayo'ombaatt. ⁴ Ka'ap ja jade'en tø yikexy jøts ja aay ja ujts ja tyikwindigø'øty ya naxwii'ñ. Ja' ja pyayø'øpy pøn jaty ja Dios y'ejxa'anin tø kyabikta'agyi midi yikpiktatip wyimbojkwemp. ⁵ Ka'ap ja jaaj'y tjady-imyik'øøky, ayo'on ja myøøpy jøts ja jajyi ja tøøyi tuk-miba'am tsøøni magoxk po'jin; jade'en ja pya'am ja tjawidi ejxim ja kajpy xøjpt. ⁶ Møk ja tjawidi, jady-imwyandip ja' jøts tyimy'ooktit; o kø'øm ñanky'oogidit, ka'anims ja y'o'jkin kya'pxti.

⁷ Jade'en ja møj mu' kyaxø'økti ejxim ja møj kawaayin midi nay'a'ejxyip tseptumbi nøjxktp; tum jade'en ja kyubajk kyaxø'økti koroni kujupy midi amuum oori, jøts ja wyeen ja y'aaw jade'en kyaxi'iky ejxim ja jaaj'yin. ⁸ Jade'en ja wyaay tmøøt'atti ejxim ja tø'øxyøjkin, jøts ja tyøøjts jade'en t'ixy ejxim ja kaajin. ⁹ Tum pujx ja amuum y'ak'ajttip, jøts ku kyajkwidetti jade'en møk yikmadøp ejxim ja maakyareti midi kawaay myinøjxktp tseptumbi. ¹⁰ Jade'en ja tyu'tst tmøøtt'atti ejxim ja kajpyin. Ja'ats ja tyukta'ayo'ombatpy ja jaaj'y jøts tuk-miba'am tsøøni magoxk po'. ¹¹ Jamts tu'uk ja ankilis midi tso'omp jap ayodaajkjotpy, ja'ats tniwindsøn'ajtp ja møj mu'; ja'ats txøøw'ajtp Abadón ja hebreit ayuujk, jøts ja griegit ayuujk Apolión midi tyijpy pøn yikwindigøøpy.

¹² Jade'en idø'on ja myidu'ukpi ayo'on ñajxy; naxkida'akpts ja mimajtskpi ayo'on.

¹³ Xjats ja myidudujkpi ankilis ttaxuuujxy ja puxujx, winets pyidsimy ja ayuujk jam nimaktaxkpi tsakaa waj agujk jam altajrkøjx jam Dios wyingujk. ¹⁴ Xjats ja

myidudujkpi ankilis yikniimaay midi ja puxujx tmøøt'ajtp:

—Migaji ja ñimaktaxkpi ankilis midi jamdi ma ja møj nøø midi yiktejp Eufrates.

¹⁵ Xjats ja jade'en yikmigajidøø jøts tyik'ookti jawaani kagujkwa'kxy ja naxwii'ñit jaaj'y. Jabi a'ejxixi y'ejtni jøts ja jade'en yjattit ja'abi xøøw ja'abi jumøjt. ¹⁶ Namajtsk magø'pxy millones idø'on ja ankilis cheptumbi midi idø'on jade'en yikjaaj'y'ooktip, midi kawaagyøjxpti.

¹⁷ Yide'en ø n'ijxy kumaa'yjotpy ja kawaay, jøts ja' pøn ttatsinaadyip, pujx ja myøøt'ajttip kyachwiif, tsajpts, tsujk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjotpy pyidsimy ja møj jønyow møøt ja jok jøts jøky. ¹⁸ Jøts jade'en'ampyts ja mayjaaj'y y'ookøxti, jawaani kagujkwa'kxy idø'on kyawindigøøgyøxtøø.

¹⁹ Ja'ats idø'on ja kawaay tya'awa'an'ajtp ja y'aaw jøts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaaj'y ja tyik'ayo'ombaatt.

²⁰ Pønts jaaktandi ka'abyim ja tmajtstu'utti ja ka'ødyunk ja ka'øwyinmaa'ñ. Wyindsø'jkiy'ejttip ja miku'tøjkti jøts øy ti awanax agojnax. Nayide'en twindsø'øgidi ja nugo dios agojnax midi oori øyip, midi plati øyip, midi bronze øyip jøts nayide'en midi kipy øyip, ka'ap ja y'ixy, ka'ap ja yø'øp, jøts ka'ap ja myadøp. ²¹ Ni jade'en ja tkamøjpiktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uk-tøjkti, jøts myaats'adø'øtsti.

Ja ankilis midi tkon'ejtp tu'uk ja mutsk libri'u'nk

10 Kuts jade'en yjajty jøts ø n'ejxpaaty tu'uk ja møj ankilis. Yoots'agujk kyida'aky jam tsajpwemp jøts ja i'jch jam kyaxi'iky y'agubajk. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin. ² Jam tu'uk ja libri'u'nk tmøøt'aty jøts ja t'agii'byajky kyøjøm, jøts ja y'aga'ndyky ttawinwa'aky ja mejy jøts ja y'anajtyky naxwingijxy. ³ Jøts ja chap'aay møk ejxim ja møj kaaj myu'uyin jøts nay jaty wixujk ojk ja anaaw pyijy. ⁴ Ixyam øts wyinaty njaadyanwa'añ sa ja anaaw wya'añ jøts ø nmadøøp ja ayuujk midi kidakp tsajpwemp jøts ø xnimaay:

—Amaa'tsk'at yø' sam tø wya'añ yø anaaw, kidi xaadyañ.

⁵ Jøts ja ankilis midi tuktamajndyky tawa'kpajt ja mejy jøts jaduktamajndyky ja naxwii'ñit, ja'ats y'aga'ngyø jam tkonjø'jk, ⁶ jøts ja tkajpxwa'kxy ja Dios tyiy'ajtin pøn tø tyiktso'ondakijxy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt; ⁷ kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknija'wiyii'ñ ja kyugajpxtyøjkti. Ka'ap ja o pøn nugo ajawi ttuknijaw.

⁸ Xjats ja ayuujk nayide'en nmadoogojmi midi tsajpjotpy tsoo'mp, jøts ja jadigojk xmigajpxkøjmi jøts wya'añ:

—Nøjkx atspøjkít ja libri'u'nk midí jam agii'byaky kyii'yítpy ja ankílis, ja' midí tanaapy mejkyøjxp jøts naxkíjxy.

⁹Jøts ja ankílis nniníjxy xjats ja libri'u'nk n'amidøøy jøts ø xmo'ot, jøts ø xnimaay:

—Íxya ja libri, mats jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøxnāa ja libri, jøts ja jotmay'øøgyi xpatnāa. ¹¹Jøts ø xnimaagyojmi:

—Kuwaní jadigojk xkajpxwa'kxt ja Dios yja' sa chøønídít sa tyanídít niduki'iyi ja naxwii'ñit jaa'y, wan tmøji wan tmutski.

Namajtsk ja jaa'y pøn testigi'ajttip

11 Jøts tu'uk ja kapy nyikmøøy midí yiktajpxp, jøts ø xnimaay:

—Tani jøts xkejpxit ja Dios chaptøjk møøt ja altajr, jøts nayide'en xmacho'ot pøn jaty jap twindsø'jkíp ja Dios. ²Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja'agøjxp ku wenk jaa'y myenwa'andi jøts jap wyidettit, jade'ents ja tyikma'attit mā jaty ja wyidettit jap Dios kyajpjøtpy, wixíjxy myajtsk po' y'ettit jade'en. ³Ngaxp øts namajtsk ja ngugajpxy midí tum yøk wet twet'ajttip, ja'ats xkajpxip ja nja' tígøøk jumøjt jagujkp.

⁴Ja namajtskpi kugajpxy, jade'eñi n'ukpiktaajkin ejxim ja olivi kipyin, jøts nayide'en ejxim ja majtskpi kandleeri midí jam ejtp nwindson'ajtim wyingujkp. ⁵Pøni pøn midundigøøwajni, yikpidsømdip ja jøøn ja y'aawjøtpy, jade'eñits ja myidseptøjk tyik'ookøxtit tyikwindigøøgyøxtit. ⁶Yø namajtskpi kugajpxy yjagya-jpti ja møk'ajtin jøts ka'ukyiktunít winø'nin ja Dios yja' tkajpxwa'kxidit. Nayide'en ja nøø tyikajtnidit wa'ats ni'jpyin, jøts tkaxtit kawināak jøøjp ja pa'am sa ja kø'øm t'a'ejxidit. ⁷Kuts ja jade'en tkajpxwa'kxkøxtit ja Dios yja', winets tu'uk ja møk awa'an jiyujk pyidsø'ømt jam ayodaajjotp jøts ja namajtskpi kugajpxy yik'oogyit. ⁸Jamts ja oo'kpi jadi'iñi tyā'ant, jam ja wyibejpnit jam tuu' kujk'am, nay ja kajp mā ja nwindson'ajtim Jesucristo kyiruspejty. Nugo dø'n jade'en yø kajp yiktijy Sodoma jøts Egipto. ⁹Tígøøk xøøw jagujkp yik'ejxtit yiknijawidit ja oo'kpi. Øy pøn jaa'y o magajp mye'endit jøts ka' tñankyikpidi'igyí ja oo'kpi. ¹⁰Xjats ja naxwii'ñit jaa'y jade'en aguik jotkujk ñayjawiyidi, janch nixem niyam o ti ñadyamay'atyidi ja'agøjxp ku tø y'ookti ja'adi pøn møk tø yik'ayo'ombaaadyidi pøn ja Dios yja' tkajpxwa'kxidip. ¹¹Xjats ku myidigøøk xøøw jagujkp'ajty, winets ja Dios tyikujkpyiky jadigojk ja oo'kpi. Janch tsø'jkidøø ja'adi pøn jaty jam wyinatyi. ¹²Winets ja namajtskpi kugajpxy møk yikmigajpxti, tsajpjøtpy ja kyajpxy, jøts yiknimaydi:

—Pat yam.

Jøts chapajtnidi tsajpjøtpy yoots'agujkpy jøts ja myidseptøjk y'ejxidøø ñija'wiyidøø. ¹³Jøts nay jatyí ja møk uix ñajxy, jøts wixujk mil ja jaa'y y'ookti ku ja kajp kyujawiyii'ñ kyujejtii'ñ. Janch tsø'jkidip ja' pøn jaty jaak-

tandøø, jøts ja Dios ja tjanchja'myajtsti midí jap tsajpjøtpy.

¹⁴Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

¹⁵Xjats ku ja myiwixujkpi ankílis ttaxuuixy ja pyuxujx, jøts møk yikmadøøy may ja ayuujk jap tsajpjøtpy jøts wya'añi:

Íxyam ja kutujk ñaxkida'aky midí ja Dios Teety jøts nwindson'ajtim Jesucristo yja'ajttip;

jøts xemikøjxp ja tyiktu'undit mā y'ijty ja naxwii'ñit jaa'y yja' tyiktundi.

¹⁶Xjats kyuxanidi jøts ñaxkowdi ja ni'ee'pxmaktaxkpi møjaa'dyøjk pøn jam tsinaadyip Dios wyingujkp, jøts ja Dios tmøjawidi twindsø'øgidí, ¹⁷jøts yide'en wya'andí:

Janch møj me Dios Teety, tu'ugyi me m'ity xemikøjxp.

Møj øøts nmøjawi ngunuu'kxyjawi ku tø xyikma-jada'aky ja mmøk'ajtin

jøts ja mgutujk mā ja naxwii'ñit jaa'y.

¹⁸Jøts ja naxwii'ñit jaa'y mmijot'ambikyiyi, tø kya'pxy jøts ja ayo'on xmo'ot jøts nayide'en xidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tø mbadu'unxyi pøn jaty tø tkajpxwa'kxy wan tmøji wan tmutski.

Tø kya'pxy jøts nayide'en xyikwindigø'øty pøn jaty tø tmidundigøø ja naxwii'ñit jaa'y.

¹⁹Xjats ja Dios chaptøjk y'awaajch jap tsajpjøtpy jøts yik'ixy ja kaaxi mā jap y'ity ja Dios kyutujk. Xjats ja møk uix ñajxy jøts ja anaaw, jøts ja widsuk jøts ja møk tøst ñaxkidaajky.

Ja tø'øxyøjk jøts ja awa'andsaa'ñ

12 Xjats winet kyaxi'iky tu'uk ja møj ejxpajt jam tsajpwemp: jamts tu'uk ja tø'øxyøjk tyani po' kyubajkp. Jade'en yø møk chamamy sam ja xøøwin, jøts tkujup'aty tu'uk ja koroni midí makmajtsk maadsa' tjagyajp. ²Jøtpyts ja tø'øxyøjk wyinaty, ka'axwampts jøts møk ja y'u'nk ja yik'ayøyi jøts kyaxø'økt. ³Winets jam tsajpwemp n'ijxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøøt'aty, jøts ja koroni nayide'en tu'uk jaty tku-jup'aty. ⁴Jøts ja tyu'tst ttabajaa'xkijxy may ja maadsa' jam tsajpwemp, jøts naxkíjxy ja tñajtswøjii'ñ. Jam tyanaay'øiyii'ñ mā ja tø'øxyøjk jam kya'axwa'añ jøts ja y'u'nk jatyí tsu'jtsit ku ja kya'axt. ⁵Ka'ax ja', mixyu'nk ja', ja'ats nøjkx niwindsøn'aty møk'ampy ja naxwii'ñit jaa'y. Xjats ja y'u'nk ja Dios tpøjknaa jøts ja tyiknijxy mā ja møj tsinaabyajt jam; ⁶jøts ja tø'øxyøjk kyeejky, jøts jam ja ñøjkxni mā abak et, mā ja Dios jam wyinaty ja y'et tø t'a'ejxi, jamts ja kya'aty aguik jotkujk, jade'ents jam chøønit tígøøk jumøjt jagujkp.

⁷Xjats ku jade'en yajty winets ja tsep tyuujni jap tsajpjøtpy. Ja møj ankílis Miguel møøt ja y'ankilistøjk

minamyajtsi ja awa'andsaa'n m00t ja y'ankilist0jk ja' m00tmi. ⁸ Ka'ap ja myajadakt00 ja awa'andsaa'n; ka'ap ja ma' y'uk'etnibajtniyi tsajpj0tpty. ⁹ J0ts ja jade'en yikpawojpnaa, yikaxni naxwingijxy. Y0' d0'on ja m0j miku' winds0n midi yiktejp Satan0s midi twin'00'n ja naxwii'nit jaa'y.

¹⁰ Winets nmad00y m0k ja kajpxy jap tsajpj0tpty midi yide'en wamp:

—T0 ja Dios ja naxwii'nit jaa'y tyiknitso'ok'aty. T0ts ja my0k'ajtin tnanky'ijxyiyi j0ts ja kutujk tm0'0y ja Cristo sa' ttanitanit ja yjaa'y; t0ts ja nayide'en tpaw0py ja' mi-di xinaxy tsunaxy tni'00'nip jam Dios wyindump ja' mi-di t0 y'ookti Dios k0jxp. ¹¹ T0 tmimajada'akti ja miku' yja', ja'ag0jxp ku ja Borreek U'nk t0 tkudsuni tkudaxi ja naxwii'nit jaa'y, j0ts ku t0 tnigajpxk0xti sa' tjanchjawidi ja Dios yja', wan tjaty p0ni sa' yjaty. ¹² Ejtni xoni meets p0n jap tsajpj0tpty, j0ts janch yik'ayow meets p0n ya naxwii'nit tyiknajxtip. T0 meets ja miku' mnimee'niyidi j0ts awa'an'ampy mga'0dyunidit, nija'wipxi ja' ku tsojk kya'pxt.

¹³ Xjats ku ja awa'andsaa'n tjawiyii'n ku ja ya' naxwii'n t0 yikajxni, xjats ja t0'0xy0jk ja tpay0'0y p0n ja y'u'nk wyinaty t0 tyikaxi'iky. ¹⁴ Winets ja t0'0xy0jk yikm00y majtsk ja weejts my0jkajnk, j0ts ja kyajknijxy ma' ja y'et ja jam abak etjotp. Jade'en ja tnikejky ja awa'andsaa'n. Jamts ja kya'aty yj00'kxt amgujk jotkujk tig00k jum0jt jagujkp. ¹⁵ J0ts ja awa'andsaa'n ja m0j kom n00 tyikpidsiimy y'aawj0tpty, jade'ents ja t0'0xy0jk ja tyikj0'twa'a'n; ¹⁶ j0ts ja t0'0xy0jk ja naxwii'nit pyud0jkiyi. M0j et aaw awaajts, japs ja n00 jadi'i'ni ty0tsk0jxnaa. ¹⁷ Jade'ents ja awa'andsaa'n m0k tmi'ambijky ja t0'0xy0jk, j0ts ja tmidsepjky ja y'ap ja y'ok. Jade'en id0'on ja'adi p0n ja Dios yja' tpaduujnidip sam ja nwindson'ajtim Jesucristo tnigajpxy.

Namajtsk ja m0j ka'0y jiyujk

13 Jam 0 mejy'ag0'0m nwa'k'0yiyii'n j0ts 0 n'ijxy jam pyidsimy tu'uk m0j ka'0y jiyujk. Wixujk ja kyubajk tm00t'aty j0ts majk ja wyaj. Tu'uk tu'uk ja wyaj tm00t'aty ja koroni, j0ts jam kyubajk0jxp yikja'ay ja letri midi ja Dios kya'0yja'wip. ² Jade'en ja kyaxi'iky ejxim ja m0j kuxibyiyin, j0ts ja tyeky kyaxi'iky ejxim ja osa'an, j0ts ja y'aaw ejxim ja kaajin. Ja'ats ja awa'andsaa'n m00jyi tuki'iyi ja my0k'ajtin ja kyutujk midi ja wyinaty my00t'ajtpy. ³ Jade'en ja kyubajk tu'uk kyaxi'iky ku janch m0j t0 chaachi, tyimiyik'ookwajnip. Ka'ats ja yik'o'jki, tsoojk ja'. Kuts ja t'ejxti ja naxwii'nit jaa'y, nigyumaap ja tjawidy00 xjats ja tpadundi ja yja'. ⁴ Nayide'ents ja tm0jawidi twinds0'0gidi ja awa'andsaa'n, ja'ag0jxp ku wyinaty t0 tm0'0y ja my0k'ajtin ja kyutujk ja m0j ka'0y jiyujk, j0ts ja nayide'en yikwind-s0'0gi. Yide'en ja wya'andi ja naxwii'nit jaa'y:

—iP0n jade'en t'uktu'ump sam y0 m0j ka'0y jiyujk, p0nts jade'en ukmajada'akp!

⁵ Xjats ja m0j ka'0y jiyujk yikm00y ja tuu' j0ts ja m0k'ajtin j0ts tjemn0jmit tten0jmit ja Dios yja', wix-ijxy myajtsk po' y'ett. ⁶ Jade'en id0'on ja ttuun; tuki'iyi tmigajpxig00y midi ja Dios yja'ajtpy j0ts ja xy00w j0ts

ja chinaadyaajk, j0ts midi ejtp tsajpj0tpty, tuki'iyi ja yik-migajpxig00gyijxy. ⁷ Nayide'en yikm00y ja tuu' j0ts tm00tseptu'unt p0n jaty ja Dios yja' tpaduujnip kunim ja tmimajada'akt; jade'en ja kyutujk yikm00y j0ts tniwinds0n'att niduki'iyi ja naxwii'nit jaa'y. ⁸ J0ts ja naxwii'nit jaa'y jade'en twinds0'0gi ja m0j ka'0y jiyujk, ja' tpadundi jade'en p0n jaty kajaabyety jap n0kyj0t-pty kuuyip ja naxwii'nit cho'ondaajky. Y0' n0ky ja Borreek U'nk my00t'ajtpy midi t0 y'00ky ad0mg0jxp.

⁹ 0y yikxon madowdi. ¹⁰ P0ni p0n ja myigu'uk tsump, nayide'ents ja yiktsu'umt; j0ts p0ni p0n ja myigu'uk tyik'ookp, nayide'ents ja yjatt. Paty ch0kyi mduda'aky-jaa'y'attit j0ts x'ajot'attit ja Dios sam pyaat'aty p0n ja Dios yja' tpaduujnip.

¹¹ J0ts jadu'uk 0 n'ijxy m0j ka'0y jiyujk pyidsimy naxj0tpty. Majtsk ja wyaj tm00t'aty jade'en sam ja borreegi wajin, j0ts jade'en kyajpxy sam ja m0j awa'andsaa'n. ¹² Nayide'en ja kyutujk tjagyepy sam ja myiga'0y jiyujk midi ja kyubajk tsaachiyi'n, j0ts y0 tn0jmit ja naxwii'nit jaa'y j0ts yikwinjawit yikwinds0'0git.

¹³ Nayide'ents ja myilagri'ajtin tnanky'ijxyi, m0j j00n tyikts00n tsajpwemp j0ts naxkijxy tyiknaxkida'aky, j0ts ja jaa'y ttuk'ixy wyemp amp. ¹⁴ Jade'en'ampy ja jaa'y twin'iin ku myilagri'ajtin tnanky'ijxyi, xjats ja naxwii'nit jaa'y tnimaay j0ts tyik'0yit ja tsamaxan ja awanax midi t'ejxp jade'en sam ja m0j ka'0y jiyujk midi tsaachiyi'n.

¹⁵ Xjats ja yikm00y ja m0k'ajtin j0ts tyikjuykpy0kt tyikajpxt ja tsamaxan, p0nts ja kawinds0'jkiyip, yik'ookp ja'. ¹⁶ Xjats nayide'en ja m0j ka'0y jiyujk ja y'e-jxa'anin tpiktaajky ky0j0'0m uk wyimbojkwemp tuki'iyi ja naxwii'nit jaa'y, wan tm0ji wan tmutski, wan tkumee'n jaa'yi, wan t'ayoobi jaa'yi, 0y ja yjawind-s0nd0jkidi, 0y ja yjatumbit0jkidi. ¹⁷ Ka'ap p0n mibaat ti tjuy, ti tkajpxy, ti tt00ky, ku ja y'ejxa'anin tkam00t'attit midi ja m0j ka'0y jiyujk t0 tpikta'aky. Ja' y'ejxa'anin'ajtpy ja xy00w j0ts ja n0meri. ¹⁸ Y0'0bi numeri ka'ap y0 o p0n tnijawi; ja' y0 tnija'wip p0n yikxon t'a'ejxip. Y0 jade'emb0 numeri, jade'en y0 kyajpxy ejxim ja jaa'yx00win, tudujk mag0'pxy ja tugi'pxyudujk jade'en ja'.

Ku ja tukmag0'pxy wixijky myaktaxk milbi jaa'y y'00wdi

14 Kuts jade'en yjajty j0ts 0 n'ejxpaaty ja Borreek U'nk jam tyani kojpk0jxp ma' yiktijy Si0n. Tukmag0'pxy ja wixijky myaktaxk mil ja jaa'y tm00di p0n wyinaty wyimbojkwemp t0 yikpikta'aky ja Dios Teety xy00w j0ts ja Borreek U'nk yja'ami. Ja'ats id0'on ja y'e-jxa'anin'ajttip. ² J0ts nmad00y m0k wyina'a'n tsajpj0tpty ejxim ja m0j n00 y'iichin j0ts ja m0k anaawin; jade'en yikmad0y wyinaa'n ejxim ja maagyow midi yiktejp arpi. ³ Jamts ja jemy'i'y t'00wdi ma' ja m0j tsinaabyajt jam, ma' ja nimaktaxkpi jiyujk jam j0ts ja m0jaa'dy0jkti. Nip0n ja'abi i'y tkajaty, ja'ayi tjajttip p0n nits0'ok'ajtti ya' naxwii'n, tukmag0'pxy ja wixijky myaktaxk mil jade'en ja'adi. ⁴ Wa'ats 0y tsuj yjaa'y'attit j0ts ka'ap ja o p0n t0'0xy0jk tm00t'attit, tu'ugyi tpadundi ja Borreek U'nk p0ni ma' ja nijxy. Y0' d0'on ojts jawyeen

jk ja y'ejxa'anin tmøøt'ajttip jøts pøn twindsø'jkidip ja y'awanax.

³ Xjats ja myimajtskpi ankilis mejjyotp ja kyopi tyiktawaajch, jøts ja yjajtnaa wə'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi midijaty jam tsinaapy mejjyotp. ⁴ Jøts ja myidigøøkpki ankilis ja kyopi tyiktawaajch møj nøjøtp jøts mə jaty ja nøømu'ut. Nayide'ents ja wyimbejtnimaa wə'ats ni'jpy. ⁵ Winets nmadøøy ja ankilis midi tniwindsøn'ajtp ja nøø ku wyə'añ:

—Me Dios Teety, tiy'ajtin ku jade'en xuñ. Janch øy janch wə'ats mets, jøts xemikøjxp me m'ity, ⁶ ja'agøjxp jade'en yjatti ku mets ja mjanchja'wibitøjk yikjemandu yiktedundi, tø tyik'oockti, kawinø'on tø tyiktsuñ tyiktaxy. Paty mets ja nøø xyikwimbejtni wə'ats ni'jpy jøts yø t'uukti; jade'ents yø pyaät'atyidi.

⁷ Nmadøøy nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møk'ajtin xjagyepy, ku naxwii'ñit jaa'y jade'en tø xpayø'øy, tiy'ajtingøjxp idø'on ja tø xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniyi ja xøø'an. ⁹ Øy ja kawinø'on ja xøø'an yjatsə'yidi ni jade'embaats ja wyinmaa'ñ ja tkayiktigatsti. Ni jade'embaat ja Dios tka-jə'myatsti ku ayo'on tja'ejxti, ne'egi ja Dios tmi-gajpxigø'y'adø'øtsti.

¹⁰ Jøts ja myimagoxkpi ankilis tyiktawaajch ja kyopi mə ja møj ka'øy jiyujk ja myøjtsinaabyajt jam, jøts tuki'iyi kyoodsigyijxy winø'ømbaat t'ane'emy ja yjəə'y. Øy ja ayo'on ja møk tja'ejxti, jadi'iñits ja tjantyimyimajadə'akti. Nugo ja tyoojts ja tjanch'atsutsu'utsmukti; ¹¹ ni jade'embaats ja tkamajtsu'uty ja kya'øy'ajtin midi ja tyundip, ne'egi ja tmigajpxigø'y'adø'øtsti ja Dios pøn jap tsajpjøtpy, ja'agøjxp ku ayo'on ja jade'en ttuk'ijxy.

¹² Xjats ja myidudujkpi ankilis tyiktawaajch ja kyopi møj nøjøtp midi yiktejp Eufrates. Ku jade'en ttuun jøts ja tyijch, jøts ja tuu' jam y'awaajch, jøts ja møj windsøndøjk jam ñajxti midi tsoo'ndip xøøbidsimdso'ampy.

¹³ Winets ø n'ijxy ku ja miku' pyidsimy jap awa'andsaa'ñ y'aawjøtpy. Nayide'en pyidsømi jap møj ka'øy jiyujk y'aawjøtpy, jøts nayide'enmi jap kugajpxtyøjk y'aawjøtpy midi nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin. ¹⁴ Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwə'añi pøn yə naxwiiñ. Jade'ents ja tsep t'a'ejxidit ku ja xøøw tpaatt jøts ja Dios tmime'ent ja myøk'ajtin midi ka' pøn tmi'abaaty.

¹⁵ Yide'en ja Dios wyə'añi: "Ukmadowdinim, adsu'uky ø nme'ent ejxim ja maa'tspa'an, nipøn tkanijawi. Tya'øy'ajttip ja Dios kyunuu'kxin pøn nay'ejx'ejtidip nabyøkjø'kidip. Ka'ap øts xmidsø'ødyu'unt ku nme'ent." ¹⁶ Jøts ja møj windsøndøjk ñamyukøjxidøø mə jam hebreo ayuujk tejti Armagedón.

¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midi tsoo'mp jap tsajpjøtpy mə ja Dios chinaadyaajk, jøts wyə'añ:

—Tø y'øyigyixy jøts tyunit jøts yjattit.

¹⁸ Jøts møk ñaxkidaajky ja widsuk, jøts wyinanguejky ja anaaw, jøts ja tsaachmøk uix myiñ midi ka'anin windii yik'ijxy yiknijawi yə naxwiiñ. ¹⁹ Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'øyjəə'y'atti jøts jade'en əmbøjkin'ampy tyukji'kxyidi ja ayo'on. Tuki'iyi ja kajp wyindigøøgyijxy jøts yjəə'ø'kijxy yə naxwiiñ.

²⁰ Wyindigøøgyijxy ja naajx midi jam mejkyujk'am jøts ja kojpk nayide'en yjajty. ²¹ Nayide'en ja jaa'y pyajtigøøjyøø ja tøstt midi je'mch'ajtp wixijxy kilil tu'uk tu'uk. Ni jade'en ja jaa'y tkaja'myatsti ja Dios øy yø sə wyə'n'adø'øtsti, øy ja ayo'on møk tø yjayikmo'odi.

Ku ja ka'ødyø'øxy tø pyajtniyi ja myiwini'øø'mbi

17 Kuts jade'en yjajty, jøts myiñ nidu'uk ja niwixujkpi ankilis midi tmøøt'ajttip ja wixujkpi kopi, jøts ø xnimaay:

—Men, jøts ø n'uktuk'ext sə y'ayo'ombaatt ja ka'ødyø'øxy pøn jam tsinaapy mejwyingøjxp. ² Yø møj windsøndøjkti pøn yə naxwiiñ, tø yø tmøøtpøkyundi yø ka'ødyø'øxy. Jade'ents ja naxwii'ñit jaa'dyi tø ttuktuñ ttuknijawi ja kya'øyjəə'y'ajtin, jøts jade'en tu'ugyi tø yikwin'øø'nidi.

³ Nayi kuməə'yjøtpy ja Espiritu Santo xuk'ijxy ku øts ja ankilis xyiknijxy jam møj abak etjotp, jamts ø n'ijxy tu'uk ja tø'øxyøjk ttatsøni tu'uk ja møj ka'øy jiyujk, tsajpts ja' jøts wixujk ja kyubajk, majk ja wyaj tmøøt'aty, amuum nija'ay ja y'ak midi kya'ødyamigajpxy ja Dios. ⁴ Jøts ja tø'øxyøjk ja wyet twet'aty tsuu'nk jøts tsajpts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midi amuum oori, ujts ja kopi nayide'en tmøøt'aty midi kyada'øyjəə'y'ajtpy; ⁵ jøts wyimbojkwemp ja letri tmøøt'aty midi ka' nugo ajawi yiknijawi. Yide'en ja tijy: "Ja møj Babilonia midi tniğubajk'ajtp ja ka'ødyø'øxyøjkti, ja ka'ødyunk jøts ja ka'øwyinmaa'ñ." ⁶ Jøts nay jaty n'ijxy ku ja ka'ødyø'øxy myu'ugyi, ja ni'jpy tam ja muujkip pøn ja Dios ja'ajtip ku ja Jesús yja' tø tku'oogidi. Ni-gyumaap njawi ku jade'en n'ijxy. ⁷ Xjats ja ankilis xni-maay:

—¿Tiku nigyumaap xjawi? İxyam n'uktuknijawit sudso'ampy idø'on yø jade'en tijy yø tø'øxyøjk jøts yø ka'øy jiyujk midi ja tø'øxyøjk tyatsinaapy, midi wixujk ja kyubajk jøts majk ja wyaj. ⁸ Yø ka'øy jiyujk midi İxyam m'ijxpy, jekyip yø jaayi y'ijty. Ka'ap yø İxyam mə y'ukyik'ejxni; øy jade'en tø yjaty, pidsømgøjmi jap ayodaajkjøtpy jøts ñøjkxt mə wyindigø'øty xemikøjxp. Jøts ja jaa'y pøn ja xyøøw kayikja'ay jap nøkyjøtpy mə jap y'ity ja jaa'xyøøw midi jujky'ajttip xemikøjxp, yø'øts nigyumaap tjawidip ku ja t'ejxkojmidit ja ka'øy jiyujk ku ja nay jaa yjujky'aty.

⁹ Ukmadow yikxon midi ndukmadowampy: Yide'en yø wixujkpi kubajk twandijy yø wixujkpi kojpk mə yø tø'øxyøjk chøøni. ¹⁰ Nayide'en yø wixujkpi kubajk

twandijy niwixujk ja windsøndøjk. Tø wyindigø y ni-magoxk, jøts nidu'uk ixyam wyindsøn'aty, jøts jadu'uk ka'aním ja myiñ. Kuts ja mye'ent, ka'ap ja jeky y'ett.

¹¹ Jøts ja ka'øy jiyujk midi yā ejt naxwiiñ jøts ka' ixyam mā y'uk'ejtni, ja' idø'on etp myiduktujkpi windsøn. Ja' idø'on ndejint yjapatpy ja ñiwixujkpi windsøn pøn øy sã tø yikajpxpaaty, jøts jade'eñi ja kyudigø'øyin ñaxt.

¹² Ja majkpi waj midi tø x'ixy, ja' wyandijpy nimajk ja windsøndi, ka'aním ixyam ja kutujk yiktanipøkti; pyøktipts ja kyutujk jøts tu'uk hori ja'ayi møøt wyindsøn'at-tit ja ka'øy jiyujk. ¹³ Tu'ugyi ja wyinmaa'ñ tyik'etti yø ni-majkpi windsøndi jøts tmo'odit ja myøk'ajtin ja ka'øy jiyujk. ¹⁴ Xjats møøt cheptu'undit ja Borreek U'nk, mi-majada'akidipts ja' ja'agøjxp ku møk ja myøk'ajtin tjagyepy; nipøn yā naxwiiñ kyajade'eni, pøn ja møøtti kø'øm ja Dios Teety ja tø wyi'ijxyidi jøts ja tø yajxyidi, myiduda'aky'ajttip ja'.

¹⁵ Jøts ja ankilis nayide'en xnimaay:

—Yø mejy midi tø x'ixy mā yø tø øxyøjk chøøni, yø' wyandijpy niduki'iyi naxwii'ñit kajp. ¹⁶ Jøts ja nimajkpi windsøndøjkidi midi wyandijpy ja ka'øy jiyujk wyaj, ja'ats kyadami'ejxiwampy ja ka'ødyø'øxy jøts tyiktuu'-duktit; jøts jade'eñi tyikwindigø'ødyit jønjøtpy. ¹⁷ Tundi jade'en sam ja Dios kø'øm tø mwinmaa'nmyø'øyiidi sam ja kø'øm ttsøky, paty tkajpxmuktit ja windsøndøjk jøts ja kyutujk tmo'ot ja ka'øy jiyujk kunim yø ttu'undit jade'en sam ja Dios tø ttanibiktaagi. ¹⁸ Yø ka'ødyø'øxy pøn tø x'ixy, jade'en yø' sam yø møj kajp Babilonia mi-di niduki'iyi ja naxwii'ñit ja windsøndøjk y'ane'empy.

Ku ja møj kajp Babilonia wyindigø y

18 Xjats ku jade'en yjajty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiiñ jøts ja naxwii'ñit tyikjajtaajky ku ja møk tyi'kxy chamamy. ² Xjats ja ankilis møk kyajpxy jøts wyā'añ:

—Tø ja møj kajp Babilonia wyindigø y. Miku' tsi-naadyaajk tø wyimbejtñi jøts tum ja ka'øy jiyujk jam tsinaadyip. ³ Ja'agøjxp jade'en yjajty ku ja naxwii'ñit jaa'y tø ttukpaduñ ja kya'øy'ajtin. Tø ja windsøndøjk møøt y'øyjaa'y'aty kya'øyjaa'y'aty. Pønts atstooktip at-syaktip tø ja ttamøktøjkiñidi ku ja ttookti midi yik-tundip ja pøkyumbi.

⁴ Xjats ø nmadøø y jadu'uk ja ayuujk midi tso'omp tsajpjøtpy, xjats wyā'añ:

—Pidsømdi meets jam kajpjøtp pøn jaty ø nja'ajtpy. Kidi nugo ja pøky xpaatti jøts kidi nayide'en ja ayo'on nugo xpaatti. ⁵ Tø yø jade'embí kajp ja pyøky ñipajtni, xjats ja Dios ka' tjā'dyigø y ku jade'en kya'øyjaa'y'atti. ⁶ Wan yø tjaty nayide'en sam yø tø tka'ødyuñ ja naxwi-i'ñit jaa'y. Wan jawaani møj tkubety ja kya'øy'ajtin. ⁷ Pø øxyi ñamyikejxyi, møj ñayjawiyyi, wants t'ixy tñijawi nayide'en ja ayo'on. Wampts ja' y'am yjotp: "Windsøn'ajtpyim øts ixyam; ka'ap ø nmay ndajy sam ja ku'økyø'øxyin, ka'ap ø sã njatt." ⁸ Ja'agøjxp tuktoñi nøjxk ñaxkida'aky mayjøøjp ja ayo'on: ja o'jkin, ja yuu, ja pa'am, jøts nayide'en nøjxk tuki'iyi tyøøyjø'køxti; ja Dios janch møj ku ja ayo'on jade'en myo'ojidit.

⁹ Jøts ja naxwii'ñit windsøndøjkidi tpayā'axtit tpa-jø'ødit ja kajp mā ja tø pyøkyundi, ku t'ejxtit ku ja tø yjønmajtñiyyi, jøts ja jok nugo pyidø'kni. ¹⁰ Jagam ja tsø'øgi y'a'ejxuktit, ja ku ja nayide'en yjattit, jøts yide'en wyā'andit:

—iMjanch'ayøø y meets Babilonia! Janch møk ja møk'ajtin y'ity xmøøt'atti. Pø tøxi tuktoñi mwindigø y.

¹¹ Nayide'en ja too'kpi ajuubyitøjk, pyayā'axtip ja', ja'agøjxp ku ka' pøn jade'en y'ukjuuñit sam y'ijtyin, ja tyøøky myimaadyip myidajtip ti jaty ja myøøt'ajttip:

¹² jap oori, jap plati, jap n'ijxyim nga'ijxyim, jap ja øybi wet, tsuu'nk jøts tsajpts; jap nayide'en mayjøøjp ja kipy midi pa'akxukp, jap tsaaðsech tsaaøueegidi, jap bronze jøts ja nugo pujx, ¹³ japts nayide'en ja kanela, to'kx tsøø y, poom, mirra, jøts ja pa'akxukpi, jap ja vino, aceite, y'øybi ariin way jøts ja ariinbajk; jap nayide'en ja jiyujk midi tsimchømp, jap ja borreegi, jap ja kawaa y jøts ja karreti. Nay jap ja tumbi jaa'y tyøøgyi pøn tundip sam ja jiyujkin. ¹⁴ Xjats ja too'kpitøjk wyā'andit: —Tø wyindigøøgyixy tuki'iyi midi y'ijty mdsojktip; tø tyigøøgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵ Jøts ja too'kpitøjk, tsø'jkidip ja', jøts jagam y'a'e-jxuktit ku nayide'en y'ayo'ombaaattit, pyayā'axtip pya-jø'ødip ja', ¹⁶ jøts wyā'andit:

—iMjanch ayøø y meets Babilonia kajp! Janch tsuj meets mgajp y'ijty sam tu'uk ja tø øxyøjk tsuj ñaxyøxyin, ku øybi wet tpikta'aky wan tsuu'ngi wan tsajpts, kuts o midi'ibi xox tpikta'aky wan ja oori jøts ja tsaaðø'kxpi. ¹⁷ iPø tøxi tuktoñi kyugøxi ja mgumeeñ'ajtin ja mjujky'ajtin!

Jøts nayide'en pøn jaty jam tundip barki jøtp, jagamyi ja tyandøø. ¹⁸ Jøts t'ejxpaattøø ja jok ku tø tyøøbyøjkní ja kajp, jøts møk wyandøø:

—iNimā jade'en ja kajp ejxim ya'at tø y'ityin!

¹⁹ O sã yja'adø'tsnidi o sã ñadyu'uniyidi, ja' møk yja'widip ku ja kajp jade'en yjaty, chap'aawdi, jøts wyā'andi:

—iMjanch'ayøø y mee Babilonia kajp! ja mgumeeñ'ajtin ja mjujky'ajtin øø tø ndamajada'aky pøn jaty ja barki tmøøt'ajttip yam mejyøøjty, jøts jot-møñ tø mdyimgyudigøødyi!

²⁰ Taxonda'akti meets pøn jap tsajpjøtpy, meets ku-gajpxtyøjk, meets janchja'wibitøjk, pø tøxi ja wyindigø y ja ka'øgyajp jøts jade'en ja Dios tø tpayø'øy ku tø myika'ødyundi.

²¹ Xjats tu'uk ja møj ankilis tkiyji'iky tu'uk ja amuum møj paandsaa jøts ja mejyjotp tkuwibejpiyñ, jøts ja wyā'añ:

—Jade'en yø Babilonia kajp wyindigø y ejxim yø tsaa yikuwibejpi mejyjotp, jøts nijuuni xøøw kya'ukyik'e-jxnit. ²² Nimā jadigojk ti kya'ukyikmadooni kajpjøøjty ja xuxpi ja kowbi; nimā pøn ti tka'uktunidi, nimā pøn kya'ukjøtsnidi. ²³ Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'ityin xyødundi. Tø yø kajp wyindigø y, øy ja too'kpi yajkpidi tø tjamøøt'atti møj, øy tuki'iyi ja naxwii'ñit kajp tø tjawin'øø'nguixy møøtpi ja kya'øy'ajtin.

²⁴Ja'agøjpx yø kajp jade'en tø yjaty ku jam tø tyik'ookti ja Dios kyugajpxy jøts ja Dios yjanch-ja'wibitøjk. May ja jaa'y tø tyik'ookti o magajp.

19 Kuts jade'en yjaty jøts nmadøøy ku mayjaa'y kyajpxti jap tsajpjøtpy jøts møk wya'andi: iTu'ugyi adøm nDios Teety janch møj janch øy! Ja'ats tu'ugyi xyiknitso'ok'ajtindip.

²Tiy'ajtingøjpx ja Dios ttiidyuñ; t'ayo'onmøøy ja ka'ødyøxy, ja'agøjpx ku ja naxwii'ñit jaa'y tø tyikma'aty ja' kya'øy'ajtingøjpx; paty ja Dios ja tpayøøy ku jade'en tø tyik'ookti ja yjanchja'wibitøjk.

³Xjats jadigojk wyangojmidi: —janch møj ja Dios! Nijuuni yø kajp kyatøøy'amøø-ty, jok'ejtp yø'.

⁴Xjats ja ñi'ee'pxmaktaxkpi møjaa'dyøjk jøts ja ni-maktaxkpi jiyujk ñagyuxendyaajkidi jam Dios myøjtssi-naadyaajk wingujk, Dios tja'myatsti jøts wya'andi: —jade'en, ku Dios janch møj!

⁵Jøts yikmadøøy ja kajpxy ja ayuujk ma ja møj tsi-naabyajt jam, midi wamp yide'en: Winjawidi kunuu'kxyjawidi meets ja Dios, pøn tpadundip pøn twindsø'jkidip wan tmøjidi wan tmutskidi.

Ku ja Borreek U'nk yikxødu'unt

⁶Xjats nmadøøy nayide'en ejxim ja mayjaa'y kya-jpxyin, sam ja møj nøø øø'tspin wyina'añ jøts ja tsaach møk anaaw, jøts wya'añ yide'en:

janch møj ja Dios! Tø ñaxkida'aky ja kyutujk jøts jade'en xniwindsøn'ajtindit.

⁷Wan t'øy'ajtyim wan txondaajkyim, wan twin-ja'wa'am wan twindsø'jka'am.

Tøxi tpaaty ja yja' midi yiktejp Borreek U'nk jøts tmøøtsinaawya'añ tmøøt'etwa'añ ja yjanchja'wibitøjk pøn øy'ajttip wə'ats jaa'y'ajttip.

Jade'en idø'on yø tijy sam ja jaa'y ja xøøw ttundi ku y'amajtskidi.

⁹Xjats ja ankilis xnimaay: —ja' jade'en: "Tya'øy'ajttip pøn tø yikway ma ja Borreek U'nk xyøduñ."

Jøts ja yjaakwa'añ: —Yø' ayuujk midi tø xjaadyañ, tiy janch yø', Dios tyiy'ajtin yø'.

¹⁰Xjats ø nagyuxendyaajki ankilis wyingukp jøts nwindsø'øgiwya'añ, jøts ø xnimaay:

—Ka'ap jade'en m'adøøtst; pø tu'ugyixi ja Dios Teety yikwindsø'øgi. Nayide'enxi øts ja nwindsøn'ajtim Jesús yja' nbaduujni sam metsin, sats ja mmijanch-ja'wibitøjkindi. Ja Jesús kyajpxy y'ayuujk nbagajpx-a'amp pøn jaty ja Dios ja'ajtiyip.

Ja jaa'y pøn ttatsinaapy ja poop kawaaay

¹¹Xjats ø n'ejxpaaty ja tsajp y'awaajch; jamts kyaxi'jky tu'uk ja poop kawaaay, ja'ats ja ttatsinaapy pøn øy pøn tiy'ajtin møøt, jøts tpayøøwya'añ ttiidyun-

wə'añ ja naxwii'ñit jaa'y. ¹²Janch tøø'kxp ja wyeen ejxim ja jønyowin, jøts kyubajkøjpx may ja koroni tmøøt'aty. Jamts ja xyøøw yja'ayi wyimbojkwemp, øy ja pøn tja'ijxy ka'ap ja pøn t'ejxkapy, ja' køøm tniija'wip.

¹³Amuum ni'jpy ja wyet midi wyet'ajtpy, jøts ja xyøøw, Dios kyajpxy ja' Dios y'ayuujk ja'. ¹⁴May ja myøøtsep-tumbi pyayøøyi pøn tso'ondip jap tsajpjøtpy. Amuum poop, øybi wet, wə'ats wet wyet'ajttip jøts tum poop kawaagøxpti. ¹⁵Japts y'aawjøtpy pyidsimy tu'uk yøñchujx, janch jøøjp ja', ja'ats tyayiktsaachip ja naxwi-i'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payøøyin tyiknaxwa'añ ku ja Dios Teety tø yjanchjot'ambiky. ¹⁶Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøøt'aty, nipøn ya naxwiiñ kyajade'eni.

¹⁷Winets ø n'ijxy tu'uk ja ankilis jam xøøw wyin-dump, jøts tmigajpxy ja jiyujk midi kajkwidejttip tsajp-wemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja', ¹⁸jøts xtsu'utstit xjøø'kxtit ja windsøndøjk ja sol-daditøjk. Nayide'en xtsu'utstit ja kawaaay jøts pøn ja tatsinaajyip. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹Xjats ø n'ijxy ja møj ka'øy jiyujk jøts ja windsøndøjk pøn ya naxwiiñ møøt ja syoldaditøjk, ja'agøjpx tø ñamyukyidi ku cheptunwa'andi møøt ja' pøn ttatsi-naapy ja poop kawaaay. ²⁰Jøts ja ka'øy jiyujk yiktsuumy møøt ja' pøn nugo win'øø'ndip ñadyijyi ku Dios ja tkajpxnaxpi'aty. Jade'en ñadyijyi tñanky'ejxi ja myila-gri'ajtin jøts jade'en ja jaa'y twin'ii'ñ jøts yikmo'odit ja møj ka'øy jiyujk y'ejxa'anin jøts jade'en twindsø'øgidit ja y'awanax. Xjats ja møj ka'øy jiyujk møøt ja' midi nu-go win'øø'mp yikuwibejpidyi mejyotp, ma yjanchtøøy yjancha'ay ja nøø. ²¹Ja'ats ja tya'ookøxti ja myigu'uk midi ja yøñchujx tmøøt'ajtp y'aawjøtpy, jøts ja jiyujk ja yjø'kxkøxyidi midi kajkwidejttip.

Sa ja kutujk midi tukmil jumøjt etp

20 Xjats ø n'ijxy tu'uk ja ankilis midi tso'omp tsajpjøtpy, jøts ja tkøñ'ity ja ñi'awaajts ja ayo-daaik jøts nayide'en tu'uk ja møj pujkadeen. ²Myajts ja ankilis ja møj ka'øchaa'ñ midi yiktejp møj miku' ja Satanás, jøts yikøxøjch, yikpakxøjch jøts tukmil jumøjt y'ett ³y'ayo'ot ma yikuwibejpiyi'ñ ayodaajkøtpy. Jap ñi'adujkpejty jøts ja seeyi yikpiktaajky ja agaj, jade'engøjpx jøts ka'ap ja naxwii'ñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajt-stu'utt øy winø'onin.

⁴Winets ø n'ijxy ja møj windsøndøjk chøønidit jam møj tsinaabyajtkøjpx. Tø yikmo'odi ja kutujk ja møk'ajtin jøts ttiidyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindsøn'ajtim Jesús yja'. Jade'ents ja Dios yja' tø tpaduujnidi. Ka'ap ja twindsø'øgidi twin-jawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkwøjpx jøts kyøjøøm. Yik'ijxy ku ja yjujkyøøkøxti jøts tukmil jumøjt møøt wyindsøn'attit ja Cristo. ⁵Yøøts jawyeen jukpyøktøø, pønts jaaktandøø

jaanimts ja yjujkyøktit kunim ja tukmil jumøjt ñaxt. ⁶ Tya'ø'y'ajtíp tyaxondaajkip ja Dios yja' pøn jawyeen jade'en jujkyøktøø. Ja'ats ja Dios ja'ajtidíp jøts ka'ap ja y'ayo'odit ku ja myimajtskpi o'jkin ñaxt. Pyadundíp ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajt-stu'utt ja Satanás. ⁸ Ku pyidsø'ømt, wyin'øø'mp ja' ja ñaxwii'ñit jaa'y. Nøjkx twin'iññ nayide'en ja kajp ma yik-tijy Gog jøts Magog, jøts ñamyukidit ja tseptumbi ni-duk'i'iyi ja syoldadi. Janch namay ja'adi, ka'ap ja mya-chooni. ⁹ Namyujkidøø jam møj jøgyøjxp jøts tnawide-jtkøxti ma jam y'etti pøn jaty ja Dios ja'ajtidíp, pøn ja chøjkpy. Xjats ja Dios ja jøøn tñajtskajxiy'iñ jap tsajpjøtpy jøts ni duki'iyi tyøøgyijxy. ¹⁰ Xjats ja miku' nayide'en yikmaajch ja'agøjxp ku ja jaa'y nugo twin'iññ. Nay jam yikpiktaajky mejyotp ma yjanchtøøy yjan-cha'ay ja nøø. Møøt ja' ja møj ka'ø'y jiyujk, jøts ja' midi nadyejip kugajpxy pøn nugo twin'øø'mp ja ñaxwii'ñit jaa'y. Jamts y'ayo'odit xemikøjxp xinaxy tsunaxy.

Ku ja Dios ttiidyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'iyi wyindigøøgyijxy Dios wyingujkp, nimā niti kya'uk'ejtñi. ¹² Jøts ø n'ijxy ja jaa'y, Dios wyingujkp tyanidi pøn tø y'ookti, ja møj ja mutsk ja'adi. Jamts ja nøky yik'ijxy sã tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en ni duki'iyi yikpayø'odyi. ¹³ Jam ja'adi pøn tø y'ookti mejyøtpy jøts nayide'en pøn tø y'ookti ñaxkijxy. Jamts ja yikpayø'odyi tu'uk tu'uk pøni sã tø yjaa'y'atti. ¹⁴ Winets ja Dios tyikjøkixy ja o'jkin tigø'øyin jøts ka' pøn y'uk'ooknit jadigojk. Ja' tøødyip pøn tø tyundigøydi jap mejyøtpy ma yjanchtøøy yjanča'ay ja nøø. ¹⁵ Ja' jade'en yikpiktaktip jam, pøn ja xyøøw jap ka'ejttip nøkyøtpy, pøn tk-abadundip ja Dios yja'.

Ku ja tsajp ja naajx jadigojk y'øyiñ'iñ jemy

21 Nay winets ø n'ijxy ja jemchajp ja jemñaajx jadigojk; pø tøxi ja tsajp ja naajx wyindigøy midi jawyeen ejt. Nayide'ents ja mejy kya'uk'ejtña. ² Xjats ø n'ijxy tu'uk ja jemgyajp kyida'aky tsajpjøtpy, kunuu'kxy Jerusalén xyøøw'ajtpy, Dios wyingujkp ja chøøñ. Janch tsuj janch xøxy ja kajp, jade'en ja kyaxi'iky ejxim ja jaa'y pyøkwa'añin. ³ Winets nmadøøy møk kyajpxy jap tsajpjøtpy, xjats wya'añ:

—Ejx sã ja Dios tmøøtsinaawya'añ ja ñaxwii'ñit jaa'y. Ja' amuum ja'ajtidip jøts ja ja' xemikøjxp tmøøt'ett. ⁴ Yiktigø'øpy ja yjotmaydi ja yjotmay'o'jkindi. Ka'ap ja o'jkin y'uk'ejtñit y'ukpaajtñiyit, ka'ap ja jajyi tøøyi t'uk'ejxñit; sã tø y'uk'ityin, tø ja ñaxy.

⁵ Xjats ja wya'añ pøn jam tsinaapy møj tsinaabya-jtkøjxp:

—Uk'ejxim sã øts tuki'iyi jemy nyik'øygøxt.

Xjats jade'en wyangojmi:

—Jaabyat ya'at ayuujk ja'agøjxp ku tyiyi yjanchi, ka' ma ndagudsø'jka'ant.

⁶ Winets øts xnimaagyojmi jøts yide'en wya'añ:

—Tø y'øygøxy. Øts idø'øn nyiktso'ondaajk tuki'iyi jøts nayide'en nyikjøkøxt. Pøni pøn tøøjtsip, øts ja nøø ja nmo'op midi yikjujky'ajtp xemikøjxp, jøts may'ajt ja'. ⁷ Pøni pøn tmimajadaajkip ja miku' yja', ja'ats nmo'op ja øy'ajtin; jade'ents øts ja n'u'nk'att jøts nmøøt'ett xemikøjxp. ⁸ Pøn tkawamp øts nja', pøn tkamibøjkp, pøn xkatsojkp øts nja', pøn yikjaa'y'o'kp, pøn ka'øyjaa'y'ajtp, pøn ja miku' yja' tyiktuujnip, pøn twindsø'jkp ja maaxandsaa, pøn taay'ajttip, ja' nøjkxkøxtip xemikøjxp jam mejyotp ma yjanchtøøy yjanča'ay ja nøø.

Tsuj kyaxi'iky ja jemgyajp Jerusalén

⁹ Winets tu'uk myiñ ja ñiwixujkpi ankilis midi ojts tyikmiñ ja wixujkpi ayo'on ya ñaxwiiñ, jøts ø xnimaay: —Men, jøts ø nduk'ext ja janchja'wibitøjk pøn møøt y'ettit ja Borreek U'nk.

¹⁰ Nayi kumaa'yjøtpy ja Espiritu Santo xuk'ijxy, ku øts ja ankilis jam møj kojpkøjxp xyiknijxy, jøts ø xuk'ijxy ja kunuu'kxy jemgyajp, ja Jerusalén midi kidakp tsajpjøtpy jam Dios wyingujkp. ¹¹ Janch tsuj janch tøø'kxp ja kajp sã ja Dios chinaadyaajkin, jade'en chamamy ejxim ja wa'ats tsaadøø'kxpa'an, tajajnaxp jade'en sã ja wa'ats keega'an. ¹² Køjxp nabojts'awidity ja kajp jøts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkøjxp kyøxa'ayidi ja xyøøw pøn ja Israelit jaa'y y'aadsip kyugojip, namakmajtsk idø'øn ja'adi jøts tu'uk tu'uk ja agaj ja xyøøw tmøøt'ajtti. ¹³ Tigøøk ja agaj tyañ aga'ñ tso'ampy, jøts ja jadigøøkpi agaj tyañ anajy tso'ampy. Xjats ja jadigøøk agaj tyanmi windujy tso'ampy, nayide'en jadigøøk agaj tyañ jixkø'øm tso'ampy. ¹⁴ Makmajtsk ja tsaa yiktapojtsøø'ñ ja pøch, jøts tu'uk jaty ja tmøøt'aty ja xyøøw pøn jaty ja Jesús kyudanaabyi'ajtpy.

¹⁵ Ja ankilis midi ø xmimadyakp jam ja takejpx ja tmøødi, tum oori, xjats ttakijpxy winø'ønin ñabojts'awidityi ja kajp, jøts nayide'en winø'ønin myøji ja agaj. ¹⁶ Kwadradi ja kajp, ni sudso'ampy kyayøñi kyakoni. Majtsk mil ja majtsk magø'pxy kilometri tuk-tamajñ jaty, jøts nayide'en kyøxpi. ¹⁷ Winets nayide'en tkijpxy ja pøch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sã adøm nguijpxyin.

¹⁸ Amuum jaspe tsaa tø ttaapøch, jøts ja kajp amuum oori ja', jøts wa'ats keegi kyaxi'iky. ¹⁹ Ma ja makmajtskpi tsaa tø yiktapojtsøøñ, mayjøøjp ja øybi tsaa'u'nk tø yiktaxøxy. Ja myidu'ukpi tsaa tmøøt'aty ja jaspe, jøts ja myimajtskpi tsaa tmøøt'aty ja zafiro. Ja myidigøøkpi tmøøt'aty ja ágata, jøts ja myimaktaxkpi tmøøt'aty ja esmeralda. ²⁰ Ja myimagoxkpi tsaa txox'aty ja ónice, jøts ja myidudujkpi tsaa txox'aty ja cornalina. Ja myiwixujkpi tsaa txox'aty ja crisólito jøts ja myiduktu-jkpi txox'aty ja berilo. Ja myidaxujkpi tsaa txox'aty ja topacio jøts ja myimajkpi tsaa txox'aty ja crisoprasa. Ja

myimaktu'ukpi tsaa txox'aty ja jacinto jøts ja myimak-majtskpi txox'aty ja amatista. ²¹ Tum perla ja makmajtskpi agaj, jøts amuum oori ja møj tuu' midi najxp kajpjotp, jajp tsamamp ja'.

²² Ka'ap ja tsaptøjk jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk. ²³ Ka'ap ja chøkyi jøts ja xøøw ja po' jam y'a'nt kajpjotp. Kø'øm ja Dios Teety jøts ja Borreek U'nk ja y'aju'uk ja y'ajaj tyikjajt tyiktøø'kxt. ²⁴ Nay ja' tkudøø'kxidip tkujajidip ja naxwii'ñit jaa'y pøn tø ñitso'ok'atti, jøts nayide'en ja windsøndøjkti pøn ja y'øy'ajtin jam tø tminøjkxti. ²⁵ Awā'ats jam y'ity mā ja pøch agaj jam. Nijuuni jam kyakoodsi, xiiñ jam y'ity. ²⁶ Xjats jam tminøjkxti ja naxwii'ñit jaa'y ja y'øy'ajtin ja wya'ats'ajtin; ²⁷ ka'ap jam tyøkit pøn ka'øy'ajtip, pøn ja myigu'uk nugo twin'øø'mp twindaay'ajtp jøts o ti tkadami'ejxiwya'añ. Ja'ayi jam tøkidiip pøn ja xyøøw jap jaabyety jap nøkyjøtpy, mā jap y'ity ja jaa'y ja xyøøw pøn jujky'ajtipp xemikøjxp. Ja'abi nøky tmøøt'ajtp ja Borreek U'nk.

22 Xjats ø xuk'ijxy ja ankilis tu'uk ja møj nøø. Midi yik'ukp janch wā'ats ja', ja'ats xyikjujky'ajtim xemikøjxp. Janch ti'kxy ja', jøts ja jam pyidsimy mā ja Dios Teety chøøni møøt ja Borreek U'nk. ² Jamts ja møj tuu' kujk'am yø'øy ja nøø. Adsow aduuk ja kipy jam yøñ nøøba'am. Ja' tyøøm yiktajujky'ajtp xemikøjxp. Wimbo' wimbo' ja tyøøm'aty jøts ja y'aay tsøøy'aty ja naxwii'ñit jaa'y. ³ Pøn jap tsinaadyip ka' pøn y'ukjemñi-maa'yniyi y'uktenimaa'yniyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkidiip ja yjanchja'wibitøjk. ⁴ Ejxiyidip nijawiyidip wemp'am ja Dios Teety, jøts nay ja xyøøw myøøt'ajtidip wyimbojk-wemp. ⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadyañ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jøts ttukmado'ot ja pyadumbi pyabøjkpi sã tsojk yjatwā'añ kyubatwā'añ.

⁷ Nøøm ja nwindson'ajtim:

—iMe'emp øts tsojk! iTya'øy'ajtip tyajotkujk'ajtip pøn ja Dios kyajpxy tmøjpiktaajkip sã yap nøkyjøtpy yjaabyetyi!

⁸ Xjats øts nmadøøy n'ijxy kø'øm sã øts ya'at nøkyjøtpy tø njaadyañ. Winets øts ja ankilis wyingujky nagyux- endyaajki sã øts ja xuk'ijxy jøts øts ja nwindso'øgit.

⁹ Jøts øts ja xnimaay:

—Ka'ap jade'en m'adø'øtst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sã metsin, sãts ja mijanch- ja'wibitøjkindi, jøts niduki'iyi pøn jaty tmøjpiktaakp midi yap nøkyjøtpy jaadyañ.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjøtpy jaadyañ. Wingompxi jøts yjatt kyubatt jade'en. ¹¹ Wan jade'en tjaa'y'atti pøn ka'øy'ajtip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nmime'ent ja øy'ajtin. Ja'ats ndamay'atp nidu'uk nidu'uk sã tø yjaa'y'atti. ¹³ Øts idø'øn nyiktso'ondaajk tuki'iyi jøts nayide'en nyikjøp-køxt.

¹⁴ Tya'øy'ajtip tyajotkujk'ajtip pøn tø ñitso'ok'aty. Awā'ats ja tyuu'di jøts ja tyøkidit jam kunuu'kxy kajpjotp. Jamts tpaattit ja kipy midi jam yiktajujky'ajtp xemikøjxp. ¹⁵ Ka'ap jam tyøkidit pøn ka'øy'jaa'y'ajtip pøn ja miku' yja' tpaduujnidip, pøn maa'tstip, yik- jaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yikni- gajpxkøxt ya'at Dios kyajpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sã ja møj jaxyøøw midi jøpyidsømp.

¹⁷ Xjats ja Espiritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twā'andi:

—iMen!

Jøts pøn ttsojpk ja øy'ajtin ja xondaajkin wan tmiñ jøts tpaatt ja may'ajt.

¹⁸ Ixyam ø nnigajpxy pøn jaty yam tmadoop ja Dios kyajpxy sã yap nøkyjøtpy yjaabyetyi: Pøni pøn nugo tyiktigajtsip ya'at ayuujk jøts ne'egi tiy tijy midi ka' tyiy'ajtin, Diosts ja ayo'on mo'ojip sã yap nøkyjøtpy yja'ayi. ¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sã yap nøkyjøtpy yja'ayi, Diosts ja pøjkiñip ja y'øy'ajtin jøts ka' tyøkidit mā ja kunuu'kxkyajp jam midi yø nøky ñigajpxy.

²⁰ Xjats ja nwindson'ajtim wya'añ pøn ya'at tnigajpxp:

—Tsojk nme'ent.

Jøts ø n'adsojimbijty:

—Øy jade'en. iMen, nwindson'ajtim Jesús!

²¹ Ja nwindson'ajtim Jesucristo mgunuu'kxidip meets niduki'iyi. Jade'en idø'øn ja y'ejxi tyiyi.